

Ekwo Jieremaya Onye Mpfuchiru Chileke

¹ O waa bụ opfu Jieremaya nwa Hilikaya. O tso lẹ ndu-uke Chileke, shi lẹ mkpukpu Anatotu, nọ l'alị ndu Benjiaminu. ² O nọmaru opfu Chipfu l'apha k'iri l'eto, Jiosáya nwa Amọnu bụ eze ndu Jiuda; ³ bya anụmakwa iya phọ teke Jiehoyakimu nwa Jiosáya bụ eze ndu Jiuda; gbiriri jasụ l'ọnwá k'ise l'apha k'iri lẹ nanụ l'abubu, Zedekaya nwa Jiosáya bụ eze ndu Jiuda, bụ teke a kpuru ndu Jierúsalemu lẹ ndzụ laa ẹka ọzo.

Chileke eku Jieremaya

⁴ Opfu Chipfu rwuru mu nchị sụ: ⁵ “Mu byaru akpụ ngu ye l'ẹpho ne ngu; mu vuhawaru ụzo maru ngu. Mbụ l'a byaru anwụ ngu; mu vuhawaru ụzo họtá ngu dobe iche; bya emee ngu onye epfuchiru Chileke l'ọhamoha.”

⁶ Tọbudu iya bụ; mu sụ: “Aa! Gube Nnajiuphu, bụ Chipfu; mu ta amakwa g'eepfuje opfu; kele mu bụnukaru nwata!”

⁷ Chipfu sụ mu: “Ta asujeshi l'ị bụnukaru nwata. Iphe, bụkpoo onyemonye mu sụru g'i jepfu bẹ ii-jepfukọta je epfuaru iya iphe, mu karu ngu sụ g'i pfua. ⁸ Ta tsujekwa phẹ ebvu; kele mu nọkwa swiru ngu eswiru; teme mu je l'anafutaje ngu l'ẹka phẹ. Nokwa iphe, mube Chipfu epfu bụ ono.”

⁹ Tòbodu iya bụ; Chipfu bya amachia ẹka iya bya edenyi mu l'ọnu bya asụ mu: “Nta bẹ mu yewaru opfu mu l'ọnu nkengu. ¹⁰ Lekwa lẹ-a; ntañ-a bẹ mu họtaru ngu dongoo ohamoha l'ophu; bya edobe ngu dongoo iphe, bukpo alì-eze l'ophu; g'i pheshia epheshi; lakashia alakashi; g'i mebyishia emebyishi; kwatsua iphe, dụ k'akwatsu; l'i kpua iphe, dụ k'akpukpu; bya adzaa iphe, dụ k'adzadza.”

Iphe-ohumalenya labo

¹¹ Noo ya bụ; opfu Chipfu bya erwua mu nchi sụ: “?Bụ gụnu bẹ ì hūmaru; Jieremaya?”

Mu sụ: “O kwa iphe, mu hūmaru bụ ẹkali-oshi alumondu.”

¹² Chipfu sụ mu: “O bụ-a iphe, ì hūmaru bẹ o bụ; kele mu nwu ẹnya kwaberu opfu mu; mu je l'e-me iya ge mu pfuru iya.”

¹³ Opfu Chipfu rwukwaa mu lẹ nchi ozo. O sụ mu: “?Bụ gụnu bẹ ì hūmaru?”

Mu sụ iya: “Mu hūmaru ite, phuhuru uphu; o gberu egberu kpolia ike l'uzo isheli.”

¹⁴ Chipfu sụ mu: “Oo l'uzo isheli ono bẹ mkpurupyata e-shi dapfu iphe, bukpo ndu bu l'alì-a l'ophu. ¹⁵ Mu abyakwa ekukobe ndu alì-eze ndu isheli l'ophu. Nokwa iphe, mube Chipfu epfu bụ ono. Ndu eze phe a-bya bya eworu abaeze phe sùbe l'ọnu-abata mkpukpu Jierusalemu. Ephe a-dapfu igbulọ iya gbaa mgburugburu; bya adapfu iphe, bukpo mkpukpu, nọ l'alì ndu Jiuda. ¹⁶ Mu e-kpe phe ikpe; opfu l'ephe meru ejo-iphe; l'ephe jikaru mu je awata akporu agwa ozo unwù-isensu oku. Teme ephe wata abaru

iphe, ephe gude eka phe mee eja. ¹⁷ Oo ya bu le-a; gubedua l'onwongu; rikobe onwongu. Gbalihu je epfuaru phe iphemiphe, bu iphe, mu suru g'i pfuaru phe. G'ephe be yekwa ngu ebvu; odumeka be mu e-yekwa ngu ebvu l'iphu phe. ¹⁸ Ntanu-a be mu mewaru ngu; i buru mkpukpu, a kpushiru ike; bya aburu itso, a wuru l'igwe; bya aburu igbulo, a kpuru l'onwirubvu. Mu mewaru ngu g'i pfuru pfushia ike l'iphu ndu ali-a l'oplu; mbu l'iphu ndu eze ndu Jiuda l'oplu; me ndu-ishi phe; me ndu-uke phe; me ndu ali-a l'oplu. ¹⁹ Ephe e-tso ngu ogo; ole ephe taa lwukpedu ngu; kele mu no swiru ngu eswiru; teme mu je l'a-nodu adzo ngu l'eka phe. Nokwa iphe, mube Chipfu epfu bu ono."

2

Ndu Izurelu atunwa Chileke

¹ Mu byakwa anuma olu Chipfu, suru mu:
² "Je je araa ya arara ge ndu Jierusalemu numadzuru; su phe-a:

"Mu nyatakwaru g'o shi
 evubeje ngu evuvu
 eme iphe,
 du mu ree teke i bukwadu
 okorobya.

I shi yee mu obu ge nwanyi,
 a luru k'ophuu.

I shi etsojeru mu je aghakota
 echiegu;
 mbu je aghaa ali ono,
 adudu iphe,

aakoje iya ono.

³ Ndu Ízurèlu shi duru Chipfu
nsọ.

Ọ buru phẹ̀ bụ akpuru mbụ,
mu vuru ọzo kpata l'iphe,
mu kọru l'opfu mu.

Iphe, bukpoọ ndu mekparu
phẹ̀ ẹhu bẹ ọ nmaru
ikpe.

Teme ẹjo mmekpa-ẹhu
dapfukwa phẹ̀ phọ.

Noo iphe, Chipfu epfu bụ ono.”

⁴ Unu nưmakwa opfu Chipfu;
unubẹ ọnu-ulo Jíékọpu;
unubẹ ipfu l'ipfu ọnu-ulo
Ízurèlu!

⁵ Wakwa iphe, Chipfu epfu
baa:

“?Bụ gunu bẹ ndiche unu phẹ̀
sukporu lẹ mu mejeru
phẹ̀, meru g'o gude
ẹphe haa mu jemihu?

Ẹphe je awata etso ntẹkpe,
adudu urwu, ọ baru
phẹ̀ shi nno buru ndu
adudu iphe,
ẹphe baru urwu iya
l'onwophe;

⁶ ọphu ẹphe ajiduru sụ:

‘?Bụ awe bẹ ọ nọ;
mbụ Chipfu,
bụ iya dufutaru anyi
l'alì Ijiputu;

bya edua anyi dughaa
 echięgu, adudu iphe,
 dabyiru iya nu;
 mbu dughaa ali ono,
 bu evevee du iya;
 yee iduma iduma;
 ali, du chakiri chakiri
 bya agbahukota tsukiribaa;
 ali, adudu onye eshije iya
 eshishi;
 ophu o dudu onye bu iya
 ebubu?’

⁷ Su-a; mu duru unu dubata
 l'ali emehu iphe,
 e meberu iya g'unu rije
 akpuru-iphe, ami iya nu;
 yee eku, kuru iya nu.

Obenu l'unu bataru iya bya
 aturwua ali mu;
 bya emee okiphe mu ono;
 o kpo idzu.

⁸ Ophu ndu-uke mu ajiduru su:
 ‘?Bu awe be o no; mbu Chipfu?’

Ndu eme k'ekemu ta amadu
 onye mu bu;
 ndu-ishi kwefuru mu ike;
 ndu mpfuchiru buru Balu
 be ephe epfuje iphe,
 o pfuru; buru iphe,
 ephe etso bu nteke,
 adudu urwu, o baru.”

⁹ Wakwa iphe, Chipfu epfu
 baa:

“Ọo ya bụ ịe mu e-pfunupho
 iphe, unu meru mu
 ọzo.

Mu a-nọdu efunupho ọzo
 iphe, unwu nwanwa
 unu meru mu.

¹⁰ Mbụ-a; unu ghabunaa
 eze-onyimu bahu l'ali
 ndu Sayipurosus je
 elekpodapho ọnya!

Unu yenu nemadzụ g'e
 jerwua ali ndu Keda
 je egbua ya igo
 rengurengu!

Maeshikwaru ?O nweru
 ọka egube iphe ono
 mejeru?

¹¹ Mbụ-a; ?O duru ọha,
 gbajeru agwa p̄he inwe;
 l'ebe abụ l'iphe ọbu,
 ọp̄he agwa ọbu bụ Chi?

Obenu ịe ndibe mu gbanweru
 mube onye d̄u
 akpabiri je anata iphe,
 adudu urwu, ọ baru.

¹² Gube igwe; g'iphe-a nyikwaa
 ngu ishi edzu!

G'ị kpọ-yiaru iya ukuvu!
 Nokwa iphe, Chipfu eepfu.

¹³ Ndibe mu mewaru uzi iphe-eji
 labo.

Ep̄he gbadowaru mu;
 mbu mube ọgbà mini,

doru r̄isaa;
 aso gborogboro;
 bya ebvuaru onwophe
 iduma-nnakobe-mini;
 teme o buru
 iduma-nnakobe-mini,
 gbawashihuru agbawashihu;
 ophu mini adojeduru iya.”

14 “Ízurelu ?o bu ohu to?
 ?O bu onye a byaru anwu;
 o buwaru ohu to?
 ?Denukwanu g'o gude a
 kwaahaa ya okwata?

15 Oduma, du igwerigwe
 suakwaru ekiri;
 bya abawaru iya
 hanyihanyi.

Ephe tukowaru iphe,
 du l'ali iya mebyishichaa.

Mkpukpu, dugbaa ya nu be
 a tuakwaru oku;
 oku tsufukota iya;
 ophu o duedu onye bu iya
 nu.

16 Ozo bu le ndu mkpukpu
 Memufisu;
 yee ndu mkpukpu
 Tahupanahesu kpwaru
 ngu ishi.

17 ?Tobudu ngu meru iya
 onwongu;
 eshinu i jikaru Chipfu,
 bu Chileke ngu teke o

du ngu eje lẹ gbororo?

18 Nta-a; ?bụ ụnu kparụ iphe,
iije alị Ijiputu eje angụ mini,
shi l'enyimu Shihọ?

Ọzokwanu; ?bụ ụnu bụ k'eje
alị Asiriya je angụ mini,
shi l'enyimu Yufurétisu?

19 Ejo-iphe, iime bukwa
iya e-mechaa hụa ngu
ahùhù.

Ọ bụru azụ ono, ìila ono
a-gbọru ngu ụja.

Rịnaa ya ariri maru g'ọ
dụ-beru ngu eji waa
g'ootsu-beru ngu l'ẹhu
g'ị jikaru Chipfu,
bụ Chileke ngu;
ọphu ìitsudu iya ebvu
ililekpọo.

Nokwa iphe, Nnajiuphu epfu
bụ ono;
mbụ Nnajiuphu,
bụ Okalibe-Kakọta-Ike."

20 Ọ bụro teke dūhawaa ẹnya
bẹ ì nyakafuru ishi iphe,
shi segbabẹ mu lẹ ngu;
mbụ l'ì nyakafuru ẹgbirigba,
e shi gude tūgbabe mu lẹ ngu;
bya epfua sụ l'i tii jeeduru
mu ozi!

G'e lekeberu ẹnya epfu;
ì wata aze-phe l'eli iphe,
bụ úbvú, ha l'eli;

mẹ l'iphe, bukpo mkpula
eze-oshi, jaru àjàjà;
gẹ nwanyi-ukpara.

21 Mu kowaru ngu g'onye koru
opfu okpobe vayinu,
karu upfu bya adubebe ree.

?Denukwanu g'o gude i
ghakobeepfo bya aworeru
mu pho ohu vayinu?

22 O to dukwa m'obeta i gude
ncha-okanwa saa
onwongu;
bya ekwokpo ncha
kwogharu iya aka;
ikpe ono, nmaru ngu
ono rakuru ngu pho l'ehu
g'o rakuru l'iphu mu.

Nokwa iphe, Nnajiuphu,
bu Chipfu epfu.

23 ?Denu g'ii-shi su l'a ta
turwukwaru ngu;
ofhu i gwokwaru obvu
ono, bu Balu?

Lewaro enya l'egube umere,
i meru le nsuda ono!

Gbunaa igo l'egube umere,
i meru l'eka ono.

Iphe, i bu be bukwa nyee
inya-kamelu, ebu
nggada karagidimu
karagidimu.

O -buru nggada ono shia
owa-a;

l'o buru iya shia ọphuu.
²⁴ Nyeekapfu-igara-ọswa,
 echięgu kwọwaru ẹhu,
 akpọ phẹrephere furumu;
 ẹka ọ duru iphe,
 agụ iya ememe.
 Mbụ l'ọ -nọdu ana okee;
 ta adudu onye alophuje
 iya azu.
 Okee ya -nọdu achi iya;
 ike taa bvudu okee
 ya ọbu.
 Ọ -bya eshi nyee ya ono
 okee;
 be ọ humaanaru-a ẹka
 ọ nọ.
²⁵ Sụ-a; ta agbashi ọso gbiriri
 jasụ g'ọkpa swachafu
 ngu;
 ẹkpiri akpọ ngu jegirijegiri.
 Obenu l'i pfururo sụ:
 ?Kẹ gụnhunu?
 Agwa ndu ọhozo be mu
 yeru obu.
 Ọ buru phe be mu a-nọdu
 agba etso.

Ndu Ízurelu gbaru g'aa-nu phe aphu

²⁶ “Ọ kwa g'eekepuje onye-oshi iphu le ntụ
 me e -gude iya-a; bu g'e kpuru onu-ulo Ízurelu
 iphu le ntụ. Ẹphebedua; ẹphe le ndu eze phe;
 yee ndu-ishi phe; me ndu-uke phe; me ndu
 mpfuchiru Chileke phe; ²⁷ tukoru sụ ntekpe, a

pyĩru lẹ mkpũrukpu oshi l'ọ kwa iya bụ nna phẹ. Bya asụ iphe, a pyĩru lẹ mkpuma l'ọ kwa iya bụ ne, nwũru phẹ nũ. Nta-a bẹ ẹphe ghawarũ mu azũ; ẹphe ta aghaduru mu iphu. Ọle ọobujekwanuru; ẹphe -daba l'iphe-ẹhuka; ẹphe asũkwa-a gẹ mu bya adzọo phẹ!

²⁸ “?Denuhunu agwa ọbu, unu gwoshiru onwunu ọbu? G'ẹphe byanũ mẹ ọ -bũru l'ẹphe a-dzọta unu mẹ unu -nọdu eje iphe-ẹhuka; kele ọo g'unubẹ ndu Jiuda nweberu mkpũkpu igwerigwe bụ g'agwa unu dũ-be igwerigwe. ²⁹ ? Denu g'o gude unu nọdu epfu l'ọ nweru iphe, mu meru unu? Ee! Unu tũkoakwaru g'unu ha kwefukotaru mu ike! Nokwa iphe, Chipfu eepfu. ³⁰ Iphe, mu chiru ndibe unu bũkwa iphemmanũ; g'ọ tọ bũdu l'ẹphe eye ọnu k'emezi iphe, ẹphe mesweru-a. Ogu-echi ngu sũwaru ndu mpfuchiru unu pyaapya g'oduma, alajashĩ iphe o guderu alajashĩ. ³¹ Unubẹ ọgbo nta; unu lenaa ẹnya ree l'opfu Chipfu, sũru: ?Mu bũjeru ndu Ízurelu echięgu; tọo alĩ, gbahũru tsũkiribaa? ? Denu g'o gude ndibe mu nọdu epfujẹ sũ: 'Anyi nwekwarũ onwanyi aghaphe g'ọ dũ anyi. Ọphu anyi abyapfutabaędu ngu ọzo?' ³² Nwamgbọko ?ọozohaje iyagba iya? Tọo nwanyĩ, ala ji; ? ọozohaje iphe, e gude kwaa ya akwa ala ji? Obenu lẹ ndibe mu zọhawaru mu ujiku olemole, ete nweędu agũta. ³³ Lewarọ g'i gude achọ nyemobu achọ iya k'erengete! Mbũ l'unwanyi, kachakpọo adũ njọ bẹ i zichawaru iphe, iime. ³⁴ Ọo l'uwe ngu bẹ ndiphe hũmaru mee-ndzũ ndu ũkpa, adũdu iphe, ẹphe meru; l'ẹbe abũ l'i

guderu phẹ l'ẹka ẹphe etsuka ọlo ngu.

“I mechakpọo iphemiphe ono; ³⁵ ị nọdu ep-fukwarọ sụ l'ọ tọ dukwa iphe, i mejeru. L'ẹhu tee ghukwa mu eghu l'opfu ẹhu ngu. Ọle mu e-kpekwanụ ngu ikpe; eshinu ị sụru l'ọ tọ dudu iphe, i mejeru. ³⁶ ?Denu g'o gude i tsoru aghaphe achọ g'ị gbanwee ọzo ngu. Ọ kwa g'ọ tọ dudu iphe, ndu Asiriya duru ike meeru ngu bụ gẹ ndu Ijiputu adudu iphe, ẹphe a-du ike emeru ngu. ³⁷ Ii-mechakwa shikwaphọ l'ẹka ono vuru ẹka l'ishi lwajẹ; kele mu tukuraru ndu ono, ị kpọru obu yeru ono jịka; ọphu ẹphe e-yekwaru ngu ẹka.”

3

Ndu Ízurẹlu, e te gudedu ire phẹ ẹka

¹ “Ọ -buru lẹ nwoke chifuru nyee ya; nwanyị ono -paru iya haa je aluru nwoke ọzo; nwoke ono; ?ọo-chokwarupho nwanyị ono eje tọ? Ono ?tọ bụdu aturwu alị l'ophu l'ophu? Obenu lẹ gubedua gbawaru ukpara l'ẹka ndu du ig-werigwe, unu l'ẹphe eshi ọnyà. ?Ii-du ike lwaphuta azu lwapfuta mu tọ? Nokwa iphe, Chipfu eepfu bu ono.” ² Palia ẹnya huma nggeregede ẹka aagwajẹ iphe. ?O nwekpọoru ẹka ono g'ọ ha a nọada phaa ngu kutukutu? L'aguga gbororo bẹ ịinodujechaa ele ẹnya ọnyà; mbu nọduchaa g'ẹka ndu Arabu nọ l'echiegu. I merwuakwaru alị l'ukpara ono, ịigba ono; yee ejo-iphe ono, iime ono. ³ Nokwa g'o gude e sephu mini azu g'o to dzeshi. Ọphu mini ishi-apha

edzejeedu ililekpoo. Oḷe iimele-a umere nwanyi-
 ukpara. Ophu i kwedu haa g'iphere gude ngu.

⁴ “O kwa l'i wataru mu eku oku su: ‘Nnana
 mu-e! O kwa ngu bu onye shi le teke mu bu
 nwata ehe mu! ⁵ ?Ehu a-nodu eghuwa ngu ro
 eghu tekenteke to? Oke-ehu-eghu ngu; ?oo-no
 jasu l'ojejoje to?’ Oo egube ono be inoduje
 epfu opfu; oḷe iphe, bukpo ejo-ememe, i-du ike
 mee; be i mekotawaru.”

*Ndu Izurelu me ndu Jiuda gbaru g'izimanu lwa
 phe azu*

⁶ No iya; o buru teke Jiosaya shi buru eze be
 Chipfu suru mu-a: “?I humawaru iphe, Izurelu
 ono, e te gudedu ire iya aka ono meru? O
 tukokpooru ubvu, ha l'eli; mekpoo oshi, jaru
 ajaja jekota je anodu ria ogori. ⁷ Mu dobesu
 l'o -mechaa iphemiphe ono be oo-lwaphuta azu
 lwaphuta mu; obenu l'o to meduru iya nno. Teme
 nwune iya nwanyi, e te egudekwapho ire iya
 aka bu Jiuda toko iphemiphe ono, oome ono
 humakota. ⁸ Mu bya ederu ekwo achifu nu
 onye ono, e gudedu ire iya aka ono, bu Izurelu
 chifu iya; opfu l'o rinukaru ogori. Mu byakwaro
 ahuma le nwune iya nwanyi, e gudedu ire
 iya aka kwapho, bu Jiuda be ndzu aguduru.
 Yebdua tugbukwapho lufu je eriahaa ogori.
⁹ O buru l'oo l'urwuali, Izurelu shi arwu ta
 adudu iphe, Jiuda guberu iya meru go gude
 o merwushia ali; mbu yeḷe iphe, e meru le
 mkpuma; ye ophu e meru l'oshi nodu eri
 ogori. ¹⁰ Iphemiphe-a mekotakpo Izurelu; ophu

o meduru nwune iya nwanyi, e gudedu ire iya ẹka bu Jiuda g'o gude obu iya g'ọ ha lwapfuta mu; ọ buleru-a ẹregede be o gude lwa. Nokwa iphe, Chipfu eepfu.”

¹¹ Chipfu bya asukwa mu pho: “Ízurelu ono, ekwedu nkemu ilile ono kakwa apfubekoto eme le Jiuda, e gudedu ire iya ẹka. ¹² Woru ozi-a je ezia ndu isheli; su phe-a: ‘Lwadupho; gube Ízurelu ono, ekwedu nkemu ono! O kwa Chipfu epfu opfu ono. Mu taa gbanwubeeckwaru ngu iphu ozo; kele mu phunukakwaru obu-imemini. Nokwa iphe, Chipfu eepfu. Ehu taa noduekwaro egbu mu egbu l'opfu ehu ngu. ¹³ Oo epho g'i kweta l'ikpe nmaru ngu. L'i kwefuru Chipfu, bu Chileke ngu ike; bya eworu eme iphe-oma ngu je atukaaru agwa ndu ohozo nanunanu l'iphe, bukpuo mkpula oshi, jaru ajaja; ophu iimejeedu iphe, mu suru g'i meje. Nokwa olu Chipfu.

¹⁴ “ ‘Unu lwadupho; unube ndu ono, ekweedu nkemu ono! Nokwa iphe, Chipfu eepfu; kele o kwa mbedua bu ji, alu unu. Mu a-hokwa unu nanunanu le mkpukpu le mkpukpu; hoo unu ebo ebo l'ipfu l'ipfu gude lwa Zayonu. ¹⁵ Noo teke mu a-nu unu ndu a-noduje eche unu g'onye eche aturu ophu e-shi mu l'obu, bu ndu e-gude mmamiphe yee nkwamenya dua unu. ¹⁶ O - rwua mboku ono, bu teke unu a-kawa igwe buru l'ali-a; be epe tee pfubaekwa k'okpoko ogbandzu ke Chipfu. Mbụ l'ọ ọo bahubaedu phe l'egomunggo; ophu epe abyadu anyatabaa ya. Ophu oghoroko iya adubaedu phe; teme ophu epe emebaedu okpoko ogbandzu ozo.

Nokwa iphe, Chipfu eepfu bu ono. ¹⁷ Teke ono be ee-ku Jierusalemu “aba-eze Chipfu.” O buru le Jierusalemu be ohamoha e-dzukoje bya akwabe epha Chipfu ubvu. Epe tee mebaedu iphe, shi phe l'ejo okpoma mgbashi phe ono. ¹⁸ O -rwua mboku ono be ndu onu-ulo Jiuda a-tugbabe l'onu-ulo Izurelu; epe eshi l'ali, du l'uzo isheli tuko bya bya eburu l'ali ono, mu nuru ndiche unu phe g'o buru okiphe phe ono.' ”

Ndu ke Chileke abaru agwa ozo eja

¹⁹ Mube Chipfu l'onwomu su:

“Lenu le mu gege
 egudekpoe pho ehu-utso
 emekpoe ngu pho ge
 nwa; woru eguru ali,
 du ree nu ngu;
 mbu eka kachaa
 ree l'okiphe,
 ndu oha l'ophu enweje
 enwenwe.
 Mu shi dobesu l'ii-ku
 mu nna;
 ophu ji-hadu mu etsotso.

²⁰ Obenu l'oo ge nwanyi,
 ji iya egudedu ire iya
 eka adujeru ji iya
 ghelegheleghele
 bu g'unu duru mbedua;
 unube onu-ulo Izurelu.
 Nokwa iphe, Chipfu eepfu
 bu ono.”

²¹ A numaru olu, ada le
 nggeregede eka aagwaje

iphe.

Ọ buru ẹkwa, ẹphe ara;
 tẹme ẹphe nọdu arwo
 arworwo;
 mbu unwu Ízurelu;
 kele ẹphe shiswewaru
 ọzo phe bya azohawa
 Chipfu, bu Chileke phe.

22 “Unu lwadupho;
 unube ndu ono,
 ekweedu ke Chileke ono!

Mu e-me g'unu ta abuheru
 ndu laphuru azu.”

“Ao; anyi abyapfuta ngu-a; kele ọo ngu bu Chipfu bya aburu Chileke anyi. ²³ Tororo bu l'onye ele enya ge nggeregede eka aagwaje iphe dzoo ya; ele enya iphe iphoro; ophu uzú, aatú l'eli úbvú adudu onye ọo-dzo. Hoo haa bu l'ọo Chipfu, bu Chileke anyi be bu onye ndzota ke ndu Ízurelu. ²⁴ E -shikpo teke anyi bu okorobyia be agwa agwa ono, bugbaa iphe-iphere ono tukoakwaru nwakanya, nna anyi oche phe setaru ripyaa; mbu aturu yee eghe phe; yee eswi phe; yee unwu phe nwoke; me unwu phe nwanyi. ²⁵ G'anyi zenu aze l'eli iphere anyi obu; anyi anodunu g'e kpua anyi iphu le ntu. L'anyi le nna anyi oche phe meakwaru Chipfu, bu Chileke anyi iphe-eji. Noo kele anyi te emejeduru iphe, Chipfu bu Chileke anyi suru g'anyi mee; e -shi teke anyi bu okorobyia byasu nta-a.”

4

Oku izimanu alwa azu

¹ Wakwa iphe, Chipfu epfu baa: “Ọ -buru l’i-lwa; gube Ízurelu; g’i lwapfutanu mu! Ọ -buru l’i-tso agwa ono, bu mu ebyi ono ogu ge mu ta ahumajehe iya; ophu i kpa-phuhueduru akpaphuhu; ² teme ọ -buru l’i-noduje egude irelanu; waa ikpe, pfuru oto; waa apfubekoto ribua angu su: ‘Eshinu Chipfu no ndzu g’o no iya-a’ be Chileke e-gude iswi ehu iya kebe ohamoha l’oma; teme ohamoha ono egude iswi ehu iya riaha ubvu.”

³ Su-a; wakwa iphe, Chipfu epfu anu ndu Jiuda waa ndu Jierusalemu: “Unu kopyashinaa eka a koduru akoko! Unu ta akushinu iphe l’egbudu!

⁴ Unu bunaa onwunu ubvu; buaru iya Chipfu! Unu bunaa onwunu ubvu ime-obu; unube ndu Jiuda ye ndu Jierusalemu. Odumeka be oke ehu-eghu yebe Chileke a-gbanwuhukwa tsuaha g’oku. Ọ buru iphe, a-kpa iya nu bu ejo-ememe, unu mewaru. Ọ -wata etsutsu; ta adukwa onye a-gbanyi iya nu.”

Ola-l’iswi, e-shi l’isheli

⁵ “Unu raa ya arara l’ali ndu Jiuda!

Unu echia ya le mkpu le Jierusalemu su:

‘Unu gbua opu-ogu tsoru ali ndu Ízurelu l’ophu!’

Unu rashia ora ike su:

‘Unu dzukobe l’eka lanu!
G’anyi gbala laa mkpukpu,

a kpụ-pheru igbulọ
mgburugburu!’

6 Unu palia ẹkwa-ọhubama
g'e jeshia úbvú Zayọnu!
Unu gbalaa je anọdu ndzụ!
Be ejekpọkwa anmarwube;
kele mu shikwa l'uzo
isheli gude ọla-l'iswi abya;
mbụ mgbu-ọnwu, a-dụ ejo
ẹji.”

7 Oduma shiakwa
l'ẹpfukala iya wafuta.
Ọla-iphe-l'iswi k'ọha l'ophu be
gbalihuakwaru nụ.
O shiakwa l'ẹka ọ nọ tųgbua
eje g'o mee alị unu ono
g'ọ bụru ochobu.
Mkpụkpụ unu a-tụko
buchaaru ikpọzu;
ọphu ọ dudu onye bya
l'ebubaru l'ime iya.

8 Ọo ya bụ ẹ-a;
unu yee uwe-aphụ;
raa ẹkwa;
chia mkpu-ẹkwa;
kele o-re-phuruphuru,
bụ ẹhu-eghu Chipfu
teke alaphukwa azu
l'ẹhu anyi.

9 Chipfu sụru-a: “O -rwua mbọku ono be
meji a-tọfukwa ndu eze ẹphe ẹ ndu-ishi. Ndzụ-
agugu egude ndu-uke Chileke; ndu mpfuchiru
Chileke agbachihuchaa nchi.”

¹⁰ O buru iya bu; mu su: “Haa; gube Nnajiuphu, bu Chipfu; ndu-a ephe le ndu Jierusalemu be i dusweakwaru uzo rengurengu kpo; kele i suru phe le nchi a-dukpokwaa phe doo. Ole ogu-echi be a dabekwanuru anyi l'ekpiri!”

¹¹ O -rwua teke ono be aa-karu ndu-a ephe le ndu Jierusalemu su phe-a: “Ejo pherephere, erebushi anu l'ehu, e-shi le nggeregede, no l'echiegu ono; l'e-zi zipfuta ndibe mu; ophu o bukwa g'o phuchaa phe aphucha ozoo g'o mechaa phe emecha. ¹² Pherephere ophu a-ka ono njo, be l'e-shikwapho mube Chipfu l'eka. Nta-a bu ge mu bya anmaa phe ikpe.”

¹³ Lenu! Ohogu obu l'asokwa pulapula g'urwukpu abya. Ugbo-inya phe nodu ezi phaaphaaphaa g'oke-pherephere abya. Inya phe kakwa ugo eme egwa. Nshio anyi! Anyi laakwaru l'iswi! ¹⁴ Gube Jierusalemu; sashinaa ejo-ememe, no ngu l'obu huma l'aa-dzota ngu! ?Bu jasu teke ole be ii-ha g'ejo oriri kwaa ngu l'obu?

¹⁵ O duru onye-ozu, shi le mkpukpu Danu ara iya arara epfu l'ejo-iphe byapfutaru ali ubvu ubvu Ifuremu. ¹⁶ “Woru iphe-a pfiaru ohamoha! Raaru iya ndu Jierusalemu arara; su phe le ndu ohogu phe shikwa l'ali eka du enya abya. Ephe nodu echi mkpu-ogu ekpu mkpukpu le mkpukpu, nogbaa l'ali Jiuda. ¹⁷ Ephe no-phee ya mgburugburu ge ndu eche nche l'egu; opfu l'o kwefuru mu ike. Nokwa iphe, Chipfu eepfu.

¹⁸ “O kwa umere ngu; yee iphe, i gude eka ngu meta be lotaru iphe-a kobe ngu. Owaa bukwa

iphe, bẹ eechi ngu. Oomeshikwa ẹhuka ike; ẹme
 ọ nọdu alọ ẹka lẹ meji!”

Jieremaya agu aphu ndibe iya

¹⁹ Ẹpho mu-o! Ẹpho mu-o!

Ọolokwa mu ẹka lẹ meji.

Meji edekwa mu kukuku

l'ime mu.

Mu ta adukwa ike edobe

onu doo;

kele mu numawaru

opu-ogu.

Mu numawaru mkpu,

eechi l'iphu ọgu.

²⁰ Ọla-l'iswi tsopyabe ọla-l'iswi.

Alì ono l'ophu buakwaa

ikpozụ.

Ibe mu g'ọ ha bẹ a

tukoerupho mebyia

lẹ buregedegengu;

tuko ọlo mu

mebyishia lẹ

ntabu-ẹnya lanu.

²¹ ?Bụ jasu teke ole bẹ mu

a-nọdu ele ọgu ẹnya

l'ophuko;

mu anukwapho ẹka

eegbu opu-ogu?

²² “Ndibe mu bukwa ndu eswe;

kele ẹphe ta amadu onye

mu bu.

Ẹphe bu unwegirima,

enwedu egomunggo.

ẘme ọphu iphe edojedu phe

ɛnya.

Iphe, ɛphe maru ɛnya iya bu
eme ɛjo-ememe;
ɔphu ɛphe amadu eme iphe,
du ree.”

23 Mu bya elee ɛnya l'eliphe
mgburugburu;
ɔphu o nwedu ugbugba;
teme ɔphu ɔ dudu iphe,
du iya nu.

Mu bya elee l'imigwe;
ɔphu ɔ duedu iphoro,
du iya nu.

24 Mu bya elee ɛnya l'eli ubvu
ubvu;
ɛphe tuko anmagbaa
jijijii;
obvu obvu nodu angagbaa
anganga.

25 Mu bya elee ɛnya;
ɔphu ɔ duedu nemadzu,
mu humaru.

Iphe, bukpuo ɛnu,
ɛphe l'eli tukowaa
péhuchaa.

26 Mu bya ejeshia ele ɛnya;
ali, e shi emehuje iphe
a koru iya;
buharu mgbegu-evevee.

Iphe, bu mkpukpu,
nokota iya nu g'ɔ ha
bukotawaru ikpozu
l'iphu Chipfu; mbu l'iphu

o-re-phuruphuru,
bù ẹhu-eghu iya onoya.

27 Wakwa iphe, Chipfu epfu baa:

“Alì ono l'ophu a-bùkwaru
ikpọzu;
ọle mu tee mebyishibebedu
iya rọ l'ophu.

28 Oo ya bù l'eliphe a-gù aphù.

Imigwe, nọ l'ephekerephe
agbahù ọchii;
kẹle mu pfuakwaru iphe,
mu pfuru;
ọphu mu alakwa azù azù.

Mu pfuakwaru g'ọo-dù;
ọphu mu a-ghakwa ẹnya
l'azù.”

29 Ndu mkpùkpu ono l'ophu

-nùmaepho igiji ndu chì
ìnya abya ọgu;
yẹe ndu chì apfù abya ọgu;
ẹphe agbalaa je edomigbaa
onwophe l'ẹgbudu;
ndu awùba l'ọgba,
dù l'úbvù je edomishia
onwophe.

Ẹphe atùko mkpùkpu phe g'ọ
ha gbadogbua gbalaa.

Ọ tọ duedu ọphu nemadzù
eburu.

30 ?Bùkwanu gùnu bẹ iime
gùbe ochobu onoya?

?Dẹnu g'o gude i yee uwe,
eke meeme;

tẹme i yee iyagba,
 e meru
 lẹ mkpọla-ododo?
 ?Denu g'o gude i gude iphe
 techishia ẹnya?
 Akwa, ị kwaru onwongu
 bukwa ke mmanu.
 Ndu gu l'ephe eshi onya
 be ị dukwaa ashị.
 Ephe gbekwanu achowa
 ndzu ngu.

³¹ Mu numakwaru olu-ekwa
 onye du ge nwanyi,
 ime eme; mbu l'ude,
 ootsu du ge k'onye
 ime-oduu l'eme.
 Olu ono bukwa ke Nwada
 Zayonu,
 l'eme g'oome tua unme;
 machiru eka iya epfu su:
 "Oowaa! Ike abvukwaa mu.
 Ndu mu be e woakwaru nu
 ndu mgbugbumadzu."

5

O to dudu onye pfuru oto

¹ "Unu tsokpoerupho oma
 gbororo Jierusalemu jee
 iphu l'azu;
 lephee ẹnya maeshiduru;
 chochaa l'edupfu
 l'edupfu phe maru me
 unu a-huma nwonye

lanu,
 bu onye eme ire-lanu;
 teme o nodu achoje iphe,
 bu okpobe opfu.

Oo ya bu le mu aguaru
 mkpukpu ono nvu.

² A makwaru-a l'ephe
 egudeje epha Chipfu ria
 angu; ole angu ono,
 ephe eri ono bukwa
 uka be ephe adzu."

³ Gube Chipfu; ?to budu iphe,
 bu ire-lanu be inoduje
 ele enya iya?

I chiru phe iphe;
 ophu o meduru phe
 ehuka.

I bya egwee phe arakabya;
 ophu ephe ekwekwapho
 emezita iphe,
 ephe mesweru.

Ephe mechaa iphu phe;
 o shihugbaa
 dungudungu ge mkpuma;
 bya ajika l'izimanu taa
 lwadu phe azu.

⁴ Mu bya aria su:
 "Ndu-a bukwa ndu ukpa;
 teme ephe buru ndu
 eme eswe.

Noo kele ephe ta amadu uzo
 ke Chipfu.

Mbu l'ephe ta amadu iphe,

Chileke phe suru
g'ephe meje.

⁵ Oo ya bu l'oo ge mu bya
ejepfu ndu ophu bu
ndu-ishi je epfuru
yeru phe.

Ephedua a-kabekwa maru
uzo ke Chipfu;
mbu iphe,
Chileke phe suru g'ephe meje.”
Ole o bule-a ge ndu ophu du
bu g'ephe du.

Ephedua kwapho
mebyiwaru iphe,
shi segbabe mu l'ephe;
bya agbabua udo,
e shi gude kekota anyi
l'ephe.

⁶ Oo ya bu l'oduma e-shi l'oswa
bya afuaru phe.

Mbu l'ejo-nkuta-oswa
e-shi l'echiegu bya
atapyashia phe.

Agu e-domi l'oma mkpukpu
phe kwaberu phe;
g'o lajashia phe iphiriba
iphiriba;
mbu me o -dukpooru onye
ophu jeru afuta;
kele ekwefu-ike ophu ephe
kwefuru pawaru eka;
teme alaphu azu,
ephe laphuru pawaa

igwerigwe.

7 “?Denu g’o gude mu je
l’aguru unu nvu?

Unwu unu gbadoakwaru mu;
bya egude agwa,
abudu Chileke riahaa
angu.

Ole o kwa mbedua
emekotaru phe iphe,
bu mkpa phe g’o ha.

Ephe nodu erikwapho ogori
bya awu gbiigbiigbi eje
l’ulo unwanyi-ukpara.

8 Ephe bu inya, a nu-jiru epho ree,
eshi okee agushi ike;
kele g’ephe ha aragba
mimimi agbapfu nyee
nwoke ibe phe.

9 ?Bu ephe -mechaa nno;
mu ahaa phe ge mu
ta nu phe aphu iya too?

?Bu oha, du egube ono be
mu ta agwatadu ugwo
iphe, ephe eme?

Nokwa olu Chipfu.

10 Unu je atuko upho opfu-vayinu
iya ono phokashichaa;
ole o to bukwa ke g’unu
mebyishibebekota iya g’o ha.

Unu kwashichaa ya ekali;
kele ndu-a ta aduedu
ophu bu ke Chipfu.

11 Ndu onu-ulo Izurelu yee ndu

ọnu-ulo Jiuda
 be mewaru ọphu mu
 egudedu ire phe ẹka
 ililekpoo.

Nokwa iphe, Chipfu eepfu.”

Chipfu ajika ndu Ízurelu

¹² Ẹphe dzuwaru ọka kpua Chipfu; kele ẹphe sọru: “Ọ tọ dukwa iphe, oo-me! Ọphu ọ dukwa iphe, byaru eme anyi. Ọgu taa dapfukwa anyi; ọphu ọkpa-nri abyapfutakwa anyi. ¹³ Ndu mpfuchiru Chileke ta aduekwa iphe ọzo, ẹphe bu gbahaa pherephere. Ọphu opfu Chileke anọedu phe l’ime. Ọo ya bu g’e mee phe iphe, ẹphe sọru l’oo-me ndu ọzo.” ¹⁴ Ọo ya bu le-a; wakwa iphe, Chipfu, bu Chileke; bya aburu Ọkalibe-Kakota-Ike eepfu baa: “Eshinu ndu-a pfuru egube opfu-a be mu e-me g’opfu mu, du gube Jieremaya l’onu buru oku; ndu-a aburu nkọ, ọo-nodu eke.” ¹⁵ Wakwa iphe, Chipfu epfu baa: “Gube ọnu-ulo Ízurelu; mu gudekwa ndu shi ẹka du ẹnya abapfuta ngu. Ọha ọbu bu ọha, shi l’ichee; bya aburu ọha, ike du; ndu i ti madu opfu-ali phe; ọphu iinudu iphe, ẹphe epfu. ¹⁶ Ẹkpa-apfu phe dugbaa g’ilu, gheru onu. Teme g’ẹphe ha tukoru buru ndu du ike l’ogu. ¹⁷ Ẹphe a-tuko iphe, i gege akpata l’opfu ripyaa bya eripyaa nri, i nweru enweru. Ẹphe atapyaa unwu ngu unwoke me unwanyi; ẹphe atapyaa ikpoto eghe me aturu ngu; mekpoo eswi ngu; ẹphe eripyaa opfu-vayinu ngu; mekpoo oshi figu ngu; ẹphe egude ogu-echi mebyishia mkpukpu le

mkpukpu ngu, bu ndu ophu a kpu-pheru igbulo mgburugburu, bu mkpukpu i kporu obu yeru.

¹⁸ “Obenu le-a; o -rwua mboku ono; be mu tee mebyishibebekwa unu rengurengu. Noo iphe, Chipfu epfu bu ono. ¹⁹ Teke ndu Izurelu jiru su: “?Bu gunu kparu iphe, Chipfu, bu Chileke anyi meru anyi egube owa-a?” Unu asu phe le-a: ‘Eshinu unu gbadoru Chipfu bya eje agwota obvu ndu ohozo gwalaha l’ali unu; be nta-a be unu e-jeahaaru ndu ohozo ozi l’ali, abudu k’unu.’”

Okwa, Chipfu nmaru ndu nkiya

²⁰ “Unu raa iphe-a arara g’onu-ulo Jiekopu numa! Unu ejekwapho echia ya le mkpu l’ali Jiuda su phe le-a: ²¹ Unu numakwa iphe-a; unube ndu eme eswe; teme ophu unu enwedu egomunggo; unube ndu nweru enya; ophu unu aphudu iya uzo. Unu nweru nchi; ophu unu anudu iya iphe. ²² Wakwa iphe, Chipfu epfu baa: ?To gbaduru g’unu gege anodu atsui mu ebvu? ?To gbaduru g’unu a-nodu mu l’iphu phua kpaakpaakpaa. O kwa mbedua gude eja-evevee kpaa oke ali yee eze-enyimu. Teme mu tu-bua le jasui l’ojejeje be o to byadu l’asoghata iya. Akpara-mini a-tukpokwaa soo gborogboro; ole o to dakadu iya. Oo-tukpoo wowoowoo; ole o to soghatadu iya. ²³ Obenu le ndu-a buchaa ndu ejo-okpoma. Teme ekwefu ike du phe l’obu. Epe ghakobewaru; o buru phe atugbu. ²⁴ Epe ta asujedu onwophe: ‘G’anyi tsueshikwa Chipfu, bu Chileke anyi ebvu; onye edzeje mini ishi-apha yee mini udzumini l’orwuberu iya; bya aburu iya

doberu teke emetaje iphe e meberu l'ali.' ²⁵ Oo emeswe, unu emesweje be meru g'egube iphe ono ta adu. O buru iphe-eji unu meru; ophu iphe, du ree erwudu unu eka.

²⁶ "A -bya l'eka ndibe mu doru be ndu eme ejo-iphe nokwa iya; ndu egepajeru ge ndu agba onya-enu; mekpoo ge ndu agba onya, epe e-gude nmata nemadzu. ²⁷ Oo g'unwu-enu ejije epfune iya-a bu g'eregede eregede jiru ulo phe pyimu. Epe byawaru bya enweru iphe bya aburu ndu ike du. ²⁸ Epe bya adachaa okporokpo du ke repfurepfu. Ophu iphe-eji, epe eme enweedu okè. Epe ta ahajeduru ndu enwedu nna enge; ophu epe agbajeeduru ndu akpa nri odzori.

²⁹ "Wakwa iphe, Chipfu epfu baa: ?To gbaduru ke ge mu nua phe aphu iphe-a, epe eme-a to? ?To gbaduru ge mu melata egube oha, du egube owa-a iphe, epe eme mu to? ³⁰ Iphe, aaso oyi; me iphe, anyi ishi edzu meakwaru l'ali-a: ³¹ Le ndu mpfuchiru epfukwa iphe, abudu eviya. Ndu uke buru ike-okpu be epe gude buru ishi. O buru egube ono bu g'o du ndibe mu ree. Obenu le-a; ?bu gunu be unu e-me me o -rwua l'ikpazu iya?"

6

Ndu ohogu ano-phe Jierusalemu mgburug-buru

¹ "Unube oshilokpa Benjaminu; unu gbadaapho oso ndzu unu! Unu shidupho le

Jierúsalemu gbafu! Unu jedupho egbua opu-
 ogu le mkpukpu Tekowa! Unu nwube oku
 agba ama le mkpukpu Betu-Hakeremu; kele
 ejo-iphe shikwa l'uzo isheli achafuta; mbu
 ejo-iphe, a-tuko iphe mebyishikota! ² Mu e-
 mebyishikwa nwada Zayonu, bu onye ono, ama
 ntumatu ono bya aduchaa nwa tekuteku ono.
³ Ndu eche aturu a-chiru aturu phe bya afuaru
 iya. Epe abya eworu ulo-ogu phe kpu-pee
 ya mgburugburu. Onyemonye ekebuta uswe
 iya nkiya." ⁴ "Unu kwakobekwa g'unu l'ephe
 lwua ogu! Unu gbalihu g'anyi jee ogu l'echi
 eswe! Obenu le-a; lewaroo ya; iphoro, du l'eswe
 anyihuakwa. Teme onyonyo uzenyashi hawa
 ogologo. ⁵ Oo ya bu le-a; unu gbalihu g'anyi
 lwua ogu l'enyashi je emebyishia ibe phe aka
 nguru anguru!"

⁶ Wakwa iphe, Chipfu, bu Okalibe-Kakota-Ike
 eepfu baa: "Unu gbutsushia oshi gude je akpoo
 okpo-kuu kpo-pee Jierúsalemu mgburugburu!
 Mkpukpu-a be e chifutajekwa iphe; kele iphe,
 jiru iya nu bu eme nemadzu ewere. ⁷ O kwa
 egube ono, mini anoduje asoshi l'anya-mini ono
 bu g'ejo-iphe shi iya aso asoshihu. Mkpawere
 yee emebyishi iphe bu ebubu l'ime iya. Iphe-
 ememe, eme iya nu; yee iphe, e mekaru iya
 dukota l'iphu mu mkpurumkpuru. ⁸ Numakwa
 alo aka le nchi-a; gube Jierúsalemu; odumeka
 be mu a-ghakwaru ngu azu; bya emee ngu gi
 buru ochobu; k'ophu bu l'o to dudu onye byaru
 eburu l'ime iya."

⁹ Wakwa iphe, Chipfu, bu Okalibe-Kakota-

Ike eepfu baa: “Ēphe a-tutu nwa ndu Ízurelu, phoduru nu ēgube ono, aatoje nwehu tutua akpuru vayinu nwa ndu ophu phoduru nu ono. Ēphe abya atughaa ēka ghota phe g'onye agho vayinu.”

¹⁰ ?Bu onye be mu e-pfubaaru opfu nu lo ya ēka le nchi? ?Bu onye a-ngaberu mu nchi l'olu? A swo-chishiakwaru phe nchi; k'ophu bu l'ephe ta anuedu iphe le nchi. Opfu Chipfu anodujewa egu phe egu. O to dujeedu phe ree anuma.

¹¹ Obenu le mbedua be oke-ehu egu, Chipfu eme g'o tukoshi phe jiru mu obu; k'ophu bu le mu taa dudu ike atagbu iya le nshi.

“Woru iya kpua unwegirima, no l'oma gbororo! Kpukwaa ya pho unwokorobya, kuru l'eka lanu. Nwoke yee nyee ya be oo-tukocha nmata; mbu ephenebo; mechakpoo ndu bu ogerenya; mbu ndu akahu tutsuwaru. ¹² Ulo phe ulo phe be ee-wocharu nu ndu ozo; mekpoo ali phe; me unyomu phe; me mu -machiepho eka byia ndu bu l'ali ono. Nokwa iphe, Chipfu eepfu.

¹³ E -shikpo l'onye ophu kachaa nwanshi; jasu l'onye ophu kachaa shii; g'ephe ha emekotaepho ughoro urwu; mekpoo ndu mpfuchiru Chileke phe; me ndu-uke Chileke phe nno pho; g'ephe ha agbakotaepho eregede. ¹⁴ Onwo, aba ndibe mu be ephe anoduje eme enyiru enyiru g'o bu l'o to dudu iphe, o bu. 'Nchi dukwa doo! Nchi dukwa doo!' Noo iphe, ephe anoduje eepfu bu ono; l'ebe abu le nchi du doo. ¹⁵ ?Bu iphere ahuma, ephe meshiru du phe to? Waawakwa. Iphere ta adukpodaa phe ililekpoo! Epe ta makpodanu g'aasoje enya. Noo g'o gude ephe je l'etsoru ndu

daru iko daa. Ɛphe e-rwu alì teke mu a-wata phẹ ahù ahùhù. Nokwa iphe, Chipfu eepfu.”

16 Wakwa iphe, Chipfu epfu baa: Unu pfukpodarupho lẹ mgbakata-uzo lee ẹnya! Unu jìeshikwa ajì ọzo, shi l'ichee! Unu jìà ajì ẹka ọzo, dù ree dù! Unu awata eshi ọzo ono! Noo teke meji a-nmapfuru unu.

“Obenu l'ẹphe sùleru-a l'ẹphe te eshidu iya. 17 Mu họtaru ndu nche dobe g'ẹphe chee unu nche bya epfua sù g'unu ngabeje nchì l'oda opu-ọgu phẹ; unu jìka sù l'unu taa ngabedu!

18 “Oo ya bụ lẹ-a; unu nùmakwa ọwa-a; unubẹ ọhamoha! Unu lerwetakwa ẹnya ree; unubẹ ndu ekebe; g'unu ahuma iphe, e-me phẹ nù.

19 Gube mgboko; nùmakwa: Mu gudeakwa ọla-l'iswi abapfuta ndu-a; mbụ mebyi iphe, ẹjo-ọriri phẹ mītaru. Noo kẹle ẹphe ta ngabeduru nchì l'opfu mu. Teme ẹphe jìka ekemu, mu tūru dobe.

20 Ụnwù-isensu, shi l'alì Sheba, aakporu mu ọku; ?mu gude iya eme gūnu; je akpachakpọo l'omanko, shi l'alì, dù ẹnya? Ngweja-akpọ-ọku unu bẹ mu ta anatajẹkwa; ọphu anụ, unu anọduje egburu mu adụekwa mu ree.” 21 Oo ya bụ lẹ-a; wakwa iphe, Chipfu epfu baa: “Mu e-dobe iphe, a-dù ndu-a ọpfu l'okpa. Nna mẹ ụnwu a-tuko vukota iya daa iko. Ndu obutobu mẹ ndu eshi ọnyà atuko gude iya laa l'iswi.”

22 Wakwa iphe, Chipfu epfu baa: “Unu lenu; o nwekwaru ndu ojogu, a kpatsuru ẹphe shi l'alì ọzo isheli, awu abya. Ọha ọbu bụ ọha, parụ ẹka. Ẹka ẹphe shi bụ l'ẹka igwe beru alì beru. 23 Iphe, ẹphe chì abya bụ apfu yẹ arwa.

Èp̄he d̄u èj̄o èh̄uka; t̄eme òph̄u èp̄he aph̄udu obu-imemini. Èp̄hu ph̄e ad̄uje g'èka eze-ènyimu asò gborogboro l'èka èp̄he agba l'inya ph̄e eje abya. Èp̄he doru onwoph̄e ḡe ndu nò l'ògu eje abyapfuta ngu; abya ngu etso ògu; ḡube Nwada Zayonu!”

²⁴ A kòakwaru anyi akò ph̄e. Èka nwùkotachaep̄ho anyi lwaalwaa. Meji t̄ofuwaru anyi. Mbù ip̄he-èh̄uka, byaru anyi d̄uepho ḡe k̄e nwanyì, ime eme. ²⁵ Unu ta alufukwa l'ègu! Òph̄u ò d̄ukwa onye a-nòdu aghap̄he l̄e gbororo; k̄ele ndu òhogu ono ch̄ikwa ogu-echi. T̄eme ip̄he, eye ebvu t̄ukoru ụzo èkameka.

²⁶ “Unub̄e ndibe mu; unu yee uwe-aph̄u; gwò onwunu l̄e nt̄u! Unu raa èkwa; èj̄o-èkwa, d̄u ḡe k'onye nwa iya lanu nwùhuru; k̄ele ò kwa: a -bya l'amaru; òla-l'iswi ono abya af̄uaru anyi.

²⁷ Mu meakwaru ngu onye a-h̄u ndibe mu ama. Ìi-nòduje elerweta ph̄e ènya; h̄ua ụzo ph̄e ama.

²⁸ G'èp̄he ha b̄ukota ndu kwefuru ike, obu k̄p̄oru gbengu, b̄uepho ip̄he, èp̄he tsoru aghap̄he eme b̄u eye mgbamu. G'èp̄he ha t̄ukoep̄ho arwu alì. Èp̄he b̄u onyirubvu yee ígwè. ²⁹ Èkò, aanma b̄e òku iya ata pfupfupfu; k'òph̄u ee-gude òku kepyash̄ia òtanjele. Obenu l'onye-úzù eme k̄e mmanu; k̄ele ndu èj̄o-ip̄he ta ab̄udu l'e mewaru; èp̄he bv̄uchaa. ³⁰ Ip̄he, e kuru ph̄e b̄u; mkp̄òla-òchaa, a j̄ikaru aj̄ika; noo k̄ele Chipfu j̄ikawaru ph̄e.”

7

Abu k̄e Chileke l'èregede

1 Wakwa ozi, Chipfu ziru Jieremaya: 2 “Je apfuru l’onu-abata eze-ulo Chipfu raa ozi-a arara l’eka ono: Unu nɔmakwa opfu ke Chipfu; unube ndu Jiuda l’ophu, bu ndu eshije l’onu-abata-a eje abaru Chipfu eja. 3 Wakwa iphe, Chipfu epfu; mbu Okalibe-Kakota-Ike, bu Chileke ndu Izurelu: Unu mezia uzo unu; yee umere unu; ge mu e-kwe g’unu buru l’eka-a. 4 Unu ta akpokwaru obu ye l’opfu ndephu ono su: ‘Wakwa eze-ulo Chipfu; eze-ulo Chipfu; eze-ulo Chipfu!’

5 “O -buru l’unu gbanweru uzo unu okpobe agbanwe; bya agbanwee umere unu; bya ekpeaharu nwibe unu ikpe, pfuru oto; 6 o -buru l’unu te emeedu ndu lwaru alwalwa ewere; me ndu enwedu nna; me unwanyi, ji phe anodedu; ophu unu egbuedu ndu adudu iphe, ephe meru l’eka-a; teme o -buru l’unu ta agbadu etso agwa l’agwa ozo, buhukwaa onwunu be unu emeka iphe; 7 noo teke mu a-ha unu g’unu buru l’eka-a; mbu ali ono, mu nuru ndiche unu phe g’o buru nkephe jasụ l’ojejoje.

8 “Obenu le-a; unu lenu; iphe, unu kporu obu yeru bukwa opfu ndephu, adudu iphe, o bu. 9 ?Unu a-nodu ezi iphuru; egbu ochi; eri ogori; eri angu eregede; akporu Balu unwuisensu oku; agba etso agwa l’agwa, unu amadu; 10 e mechakwa; unu abya apfuru l’iphu mu l’ulo-a, bu ulo ophu eeku epa mu alaru-a; pfuru su: ‘A nafutawaru anyi k’ophu anyi a-nodu eme ahuma ahuma-a?’ 11 ?O du g’ulo-a, eeku epa mu alaru-a be unu mewaru; o buru

ẹka ndu ana nfu edomije onwophe? Ole mu
 elekpoenupho unu ẹnya! Nokwa iphe, Chipfu
 eepfu. ¹² Unu tugbunaa nta-a je l'ẹka mu vuru
 ọzo họta g'ọ buru ẹka mu e-buru eburu le
 mkpukpu Shilo; je ahumawaro iphe, mu meru
 iya; ọ buru iphe, kparu iya nu bu ejo-iphe ndibe
 mu, bu ndu Izurelu emegbabe. ¹³ Teke ono,
 unu emekotakpoo iphemiphe ono; mu pfukwaru
 yeru unu. Mu -pfuchaa; mu epfubaa; ophu unu
 angaduru mu nchi. Mu kua unu oku; ophu
 unu azaduru mu ẹnu. Noo iphe, Chipfu epfu.
¹⁴ Oo ya bu l'oo iphe ono, mu meru Shilo ono be
 mu e-mekwapho ulo-a, eeku epha mu alaru-a;
 mbu eze-ulo Chileke ono, bu ulo ono, unu kporu
 obu yeru ono; mbu ẹka ono, mu nuru unu; bya
 anukwa iya pho nna unu oche phe ono. ¹⁵ Mu a-
 chifu unu l'atatiphu mu egube ono, mu chifuru
 unwune unu g'ephe ha, bu ndu Ifuremu.

¹⁶ "Oo ya bu le-a; ge gube Jieremaya te ep-
 fukwa nu mu l'iswi ehu ndu-a. Te echikwaru phe
 mkpu; ophu iirwokwaru phe arworwo; kele mu
 taa ngakwaru ngu nchi. ¹⁷ ?O du gi ti humaduru
 iphe, epeheme l'oma mkpukpu le mkpukpu,
 nogbaa l'ali ndu Jiuda; mekpoo l'onu gbororo
 Jierusalemu? ¹⁸ Unwegirima akpa nku; ndu nna
 nodu aphu-nwu oku; unwanyi nodu agwophube
 ukpokutu witi, koru ekoko g'ephe gude meeru
 eze-nwanyi igwe akara. Epeheno agbaru agwa
 ozo mee gude agwa iya k'ophu epeheno a-kpatsu mu
 ehu-eghu. ¹⁹ Obenu le-a; ?bu mbedua be epeheno
 akpatsu ehu-eghu? ?To buchidu-a onwophe
 be epeheno emekata; shi nno eme onwophe iphe-

iphere? Nokwa iphe, Chipfu eepfu. ²⁰ Oo ya bu lẹ-a; wakwa iphe, Nnajiuphu, bu Chipfu epfu baa: Oke-ẹhu-eghu mu be aa-wukwa l'eka-a; me l'ehu nemadzụ; mekpoo l'ehu anụ; me l'eli oshi, nọ l'egu; mekpoo lẹ mebyi iphe, eemeta l'alị; l'o tsua ntsulanụ; ọ tọ dudu onye a-du ike agbanyi iya.

²¹ “Wakwa iphe, Chipfu, bu Okalibe-Kakota-Ike eepfu; mbu Chileke ndu Ízurelu: Unu gururo ngweja-akpo-oku unu yekobe lẹ ngweja mmanu ọzo; unu atarọ anụ iphe obu l'onwunu; ²² kele teke mu dufutaru ndiche unu phe l'alị Ijiputu pfuru opfu nu phe; be ọ tọ bulekwapho ekemu k'egwe ngweja-akpo-oku; yee ke ngweja mmanu ọzo be mu turu nu phe. ²³ Obenu lẹ mu tukwarupho ekemu-a nu phe su phe: Unu meje iphe, mu suru g'unu meje; g'unu ahuma lẹ mu a-buru Chileke unu; unu aburu ndibe mu. Unu tsojekpopho ọzo iphe, mu karu unu su g'unu tsoje g'ọ hakpo; k'ophu ọo-duru unu lẹ ree. ²⁴ Obenu l'ephe ta angabeduru nchi; ophu ephe eyeduru onu; ochia iphe, ephe meru bu l'ephe tsoru iphe, ephe ritaru l'ejo okpoma phe. Obeta ophu ephe a-nodu eje l'iphu l'iphu; ephe nodu ala azu azu. ²⁵ E -shi teke ono, ndiche unu phe futaru l'alị Ijiputu ono byasu nta-a; mboku-mboku kpo; be mu anodujeepho ezi ndu-ozu mu, bu ndu mpfuchiru mu g'ephe byapfuta unu; mu -zichaa; mu ezibaa. ²⁶ Obenu l'ephe ta ngaduru mu nchi; ophu ephe eyeduru mu onu. Ephe wolera olu dobe gborojii; mee ejo-iphe, ka ke nna phe oche shii.

27 “Gube Jieremaya; i -pfuchakpooru phe nu iphemiphe-a be epe taa ngakwaru ngu nchi. I-kua phe oku be epe taa zakwa ngu enu. 28 Oo ya bu le-a; waa iphe, ii-pfuru phe baa: Wakwa oha, te emeduru iphe, Chipfu, bu Chileke iya pfuru; ophu epe emezijedu iphe, epe mesweru. Ire-lanu laakwaru l'iswi; o gbawaru oso gbafu; ophu o nohedu phe l'ogbogboromonu.

Nsuda Teterii

29 Kpushia egbushi ngu woru je etuphakpoepho etupha.

L'i jekpooro le nggeregede eka aagwaje iphe je anodu gua aphu;

kele Chipfu jikakwaru ogo ono, o tu-koshiru oke-ehu-eghu iya ono;
mbu l'o gwobewaru phe agwobe ophu.”

30 Wakwa iphe, Chipfu epfu baa: “Ndu Jiu-da meakwaru ejo-ememe l'anya mu. Epe dobeakwaru ahuma phe ono l'ulo ono, eeku epha mu alaru ono; woru iya turwua. 31 Epe kpuchawaru anya eka aagwaje iphe le nsuda Hinomu guá ya Tofetu; g'o buru eka epe akpoje unwu phe unwoke me unwanyi oku. Iphe ono buru iphe, mu asuduru g'epe meje; ophu o batajekpodaru mu nu l'uche abata ophu. 32 Oo ya bu le-a; wakwa iphe, Chipfu epfu baa: Lekwa; mboku abyakwa teke ee-mechaa; e tee kuedu iya Tofetu; ozoo nsuda Hinomu. Ochia iphe, eeku je iya bu nsuda Teterii; kele epe e-mechaa lia odzu le Tofetu jasu a taa humabaedu eka eelije odzu l'eka ono. 33 Noo teke odzu ndu-a l'aburu nri enu, epe l'eli; yee anu, bu l'elipe. O

tọ dudu onye a-chị pẹ chia k'achifu pẹ. ³⁴ Mu emee g'ẹhu-utso; yẹ ete ẹswa mee bugemu. Olu onye alu nwanyi; yẹ nwanyi, aachọ alulu taa duedu lẹ mkpukpu, nọgbaa l'alị ndu Jiuda l'ophu; yẹle oma gbororo Jierúsalemu; kele alị-a a-buru ochobu.”

8

¹ “Wakwa iphe, Chipfu epfu baa. O -rwua teke ono bẹ ọkpu ndu shi buru eze l'alị ndu Jiuda; yẹ ọkpu kẹ ndu-ishi pẹ; waa ọkpu ndu-uke yẹ ndu mpfuchiru Chileke; yẹ ọkpu ndu Jierúsalemu l'ophu bẹ aa-chishichaa l'ilu pẹ. ² L'a chiru pẹ bya awushi jakpata; anwu echi iya; onwa echi iya; iphe, bukpo kpkpode, nọ l'igwe echikota iya; mbu iphe ono, ephe shi yee obu; shi ejeru iya ozi; mbu iphe ono, ephe shi etso ono; ejeru iya l'aji; abaru iya eja ono. A taa tutukobedu pẹ; ophu eelidu pẹ elili; ochia iphe, e-me nu bu l'ephe a-du g'ekiriko nshj, wushiru l'alị. ³ Teke ono, mu a-chikashi pẹ ono bẹ nwa ndu ophu a-nodu ndzu l'iphe, bukpo alị ẹka mu a-chiru pẹ laa a-hata anwuhu eme l'anodu ndzu. Nokwa iphe, Chipfu, bu Okalibe-Kakota-Ike eepfu.”

Iphe-ẹji yẹ eje iphe-ẹhuka

⁴ “Wafukwaa iphe, ii-pfuru pẹ baa: Wakwa iphe, Chipfu epfu baa: Amadu -daa iko; ?tọ gbeshijeedu tọ? Onye laphuru azu; ?tọ lwajeedu azu tọ? ⁵ ?Denukwanu g'o gude ndu-a nodu alaepho azu azu? Mbu-a; ?denu g'o gude ndu Jierúsalemu nodu alaepho azu

azu? O buru ẹregede be ẹphe jeru je agbakua ẹka; jika l'ẹphe taa lwadu. ⁶ Mu ngabekpooru nchi rengurengu; obenu l'ẹphe te epfujedu iphe, pfuru nhamunha. Ophu o dudu g'ẹphe ha ophu izimanu ejo-iphe phe alwaje azu; ke g'o su: '? Bunaa gunu be mu meru egube-a?' Onyemonye emeepho iphe, guru iya nu; g'eka inya eme ena l'iphu ogu. ⁷ Mbukponu oku-eswi-uda, me kerekete; mekpoo agbeta; yee ororokiro; g'ẹphe ha makotaerupho teke ẹphe afutaje. Obenu l'unube ndibe mu ta amadu ekemu mu.

⁸ "'? Denu g'unu e-shi su l'unu maru iphe; l'unu nweru ekemu ke Chipfu l'eka ndu ede ekwo gude ẹregede gbanwee ya; o buru iphe-ẹregede?' ⁹ Ndu maru iphe be ee-mekwa iphe-iphere. Ee-ye phe ebvu; nmata phe l'onya. Eshinu ẹphe jikawaru opfu ke Chipfu; ?bu egube mmamiphe gunu be ẹphe nweru? ¹⁰ Oo ya bu le mu e-duru unyomu phe nu unwoke ozo. Mu eworu ali phe nu ndu ophu l'e-nweru iya nu. L'e shikpoo l'onye kachaa nwanshi jasu l'onye ophu kachaa shii; g'ẹphe ha emekotaepho ughoro enweru iphe. Ndu mpfuchiru me ndu-uke Chileke tukoerupho buru iphe lanu. G'ẹphe ha agbakotaepho ẹregede. ¹¹ Onwo, aba ndibe mu be ẹphe anoduje eme obvu enyiru enyiru g'o bu l'o to dudu iphe, o bu. 'Nchi dukwa doo; nchi dukwa doo!' Noo iphe, ẹphe anoduje epfu bu ono; l'ebe abu le nchi du doo. ¹² ?Bu iphere ahuma ahuma, ẹphe meshiru du phe to? Waawakwa. Iphere ta adukpodaa phe ililekpoo. ẹphe ta makpodanu g'aasoje enya. Noo g'o gude ẹphe je l'etsoru ndu daru iko daa. Mbụ l'ẹphe e-

rwu alì teke mu a-wata phẹ echi iphe. Nokwa iphe, Chipfu eepfu.

¹³ “Wakwa iphe, Chipfu epfu baa: Mu e-mekwa g'ò tọ dọ iphe, ẹphe a-nọdu akpata l'opfu phẹ. Vayinu phẹ taa miẹkwa amimi. Ophu oshi figu phẹ amiẹkwa mebyi. Oo-lakọta ẹkwo. Iphe, mu shi nọ phẹ bẹ mu a-natakọta phẹ.”

¹⁴ “?Bunaa gunu kparu iphe, anyi nọ l'ẹka-a nggujungguji owa-a? Unu dzukọbenu g'anyi tuko gbalaa gbaru lagbaa lẹ mkpukpu ono, a kpupheru igbulọ mgburugburu ono je anọdu l'ẹka ono laa l'iswi; kele Chipfu, bu Chileke anyi tubuwaru l'anyi a-la l'iswi; bya eworu mini, e yeru iphe, egbu egbugbu woru chee anyi. O buru iphe, kparu iya nọ bu l'anyi meru iya iphe-ẹji.

¹⁵ Anyi leri ẹnya nchi-adu-doo; ophu o dudu iphe-oma, byaru anyi. Anyi lee ẹnya teke e-me g'ehu dọ ike; o buerupho ebvu bẹ eeye anyi.

¹⁶ Unme, inya ndu ohogu anyi, nọ lẹ mkpukpu Danu ezi bẹ a -gbẹ l'ẹka-a anu. Teke oke-inya phẹ raaharu miimiimii; ndu alì-a l'opfu awata anma pyaapyaapya; kele ẹphe byaru g'ẹphe lwekọta alì-a l'opfu; yẹ iphemiphe, nọ iya nọ; mebyia mkpukpu lẹ mkpukpu; yẹ ndu bu iya nọ.”

¹⁷ “Lekwa lẹ-a; mu a-chiru ejo agwo ejo agwo yeru unu; mbu ogiji ogiji, adudu iphe, a-suru iya ederitaru. O buru agwo ono a-bya atagbushia unu. Nokwa iphe, Chipfu eepfu.”

¹⁸ Aphu-a, byaru mu nọ-a ta
adukwa onye suru
mu aduta.

Meji tofuakwaru mu l'ime
onwomu.

- 19 Ngabekpodapho nchi numa
 mkpu, ndibe mu echi;
 mkpu, ephe gbẹ l'ali,
 du ɛnya ɛnya echi su:
 “?O du ge Chipfu ta anọedu
 le Zayonu to?
 ?Onye Eze phe ono ta anọedu
 iya to?”
- “?Bu gunu meru g'o gude
 ephe gude ntekpe phe
 kpatsu mu iwe;
 mbu nshi ono,
 ephe
 gwotaru l'ohozo ono,
 adudu iphe, o bu ono?”
- 20 “Teke akpataje iphe e meberu
 l'ali bvukwaru;
 Onanwu bvuwa;
 ophu a dzoduru anyi.”
- 21 Eshinu e gwewaru ndibe mu
 arakabya bukwa mu be
 e gwepyaşiru.
 Mu agukwa aphu;
 teme ndzu-agugu nodu
 agushi mu ike.
- 22 ?To dukpodaa obvu-etete,
 du l'ali Giladu?
 ?O du g'o to dukpodaa onye
 eme obvu l'eka ono?
 ?Bukwanu gunu meru g'o gude
 ophu onwo ono,
 aba ndibe mu ono akadu
 phe mma?

9

¹ Ọ dọ g'a sọ l'ishi mu bu
nggele, mini shi asọshihu.

Enya mu buru ẹka ẹnya-mini
futaru!

Mu gege anọduepho ara
ẹkwa eswe l'enyashi
k'egbushi,
eegbushi ndibe anyi.

² Ọ dọ g'a sọ lẹ mu nweru
ẹka ndu ije akwaje
l'echiegu;
mẹ mu ahaepho ndibe
anyi;
mbu tųgbukpoepho lųfuru
phẹ;
kele ephe erikọta ogori
g'ephe ha;
ndu kuru l'ẹka ono
bukota ndu egudedu
ire phẹ ẹka.

³ Ephe ekweje ire phẹ g'onye
kweru apfu gude agba
uka agbagba.

Ọ tọ budu ire-lanu bẹ ephe
gude atọ okoo l'ali-a.

“Ephe eshije l'eme iphe-ẹji
ọwa-a daba l'eme ọzo;
ọphu ephe amadu onye
mu bu.”

Nokwa iphe, Chipfu eepfu
bu ono.

⁴ Sọ-a; onyenonu kpakwaru

ndu ẹphe l'iya eshi
 ọnyà l'aphara!

Ọphu unu akpọkwaru obu
 yeru unwune unu
 unwoke; kele nwoke,
 yele nwibe iya bu
 nwune agbakwaru
 iya ẹregede.

Teme iphe, bukpo onye
 unu l'iya eshi ọnyà
 buru onye mgbamu.

⁵ Ọnyà nọdu agbaru
 onye yele iya eshi
 ẹregede.

Ọphu ọ duedu onye
 epfuje ire-lanu.
 Ẹphe tukowaru zia ire
 phe adzu uka.
 Ẹphe mewaru iphe-ẹji
 jasụ ẹphe tuhu
 onwophe ayi.

⁶ Ọ buẹpho l'unu bu
 l'echilabo ẹregede.

“Ẹphe gude agba
 ẹregede ono jika
 amaru onye mu bu.”

Nokwa iphe, Chipfu eepfu.

⁷ Ọo ya bu le-a; wakwa iphe,
 Chipfu, bu
 Okalibe-Kakota-Ike
 eepfu baa:

“Lekwa; mu a-hukwa phe
 ama; nuchaa phe anucha;

kele-a; ?bubaa gunu ozo
 be mu e-meba le k'iphe-aji,
 ndibe mu eme?

8 Ire phe bu apfu, egbu
 egbugbu.

Ephe anoduje epfu opfu
 l'eregede.

Onyemonye nodu
 egudeje ire
 mecha-mecha epfu
 eyeru nwibe iya;
 o bekwanu l'o gude
 obu iya agbaru iya
 onya.

9 ?Mu ta ahushi phe ahuhu
 iphe ono,
 ephe eme ono to?

?Mu te emelatashi phe iphe,
 ephe meru mu;
 mbu ndu ali-a to?"

Nokwa iphe, Chipfu eepfu
 bu ono.

10 "Mu a-kwashi enya-mini;
 kpo mkpu-ekwa
 l'opfu-ehu ubvu ubvu.

Mu abya agua aphu irwu
 eswa, du l'echegu;
 kele o kposihuwaru nku;
 ophu o dudu ndu
 eshiswetajekwadu iya nu;
 ophu o duedu onye
 anumaje ora eswi l'eka
 ono.

Ụnwenu, ephe l'eli
phekashihuwaru;
ụnwanu gbakashihu.”

11 Wakwa iphe, Chipfu epfu
baa:

“Jierúsalemu bẹ mu e-me
g'ọ bụru ikpọzu;
ẹka nkụta-ọswa e-buru.

Mu jekwa e-mekwaphọ ọ
mkpukpu ọ mkpukpu,
nọgbaa l'alị ndu Jiuda
bụru ochobu;
k'ọphu bụ l'ọ tọ dudu onye
ebu iya ebubu.”

12 ?Denu onye bụ nwoke, maru iphe ọ ọ iphe-
a doo ya ọnya? ?Bụ onye bẹ Chipfu ziru iphe
k'ọphu bụ l'ọo-dụ ike ọọ ya g'ọ doo ọnya? ?
Bụ ọnu meru g'ọ gude e mebyishia alị-a woru
iya ọgbo ophorokpo g'echiegu, a ta adudu onye
aghajẹ iya aghagha?

13 Wakwa iphe, Chipfu epfu baa: “Ọ kwa iphe,
kparụ iya nụ bụ l'ẹphe gbadoru eme iphe, mu
turu l'ekemu, bụ ọphu mu turu doberu pẹ.
Epe te emeduru iphe, mu sụru g'ẹphe meje;
ọphu ẹphe angaduru nchị l'ekemu mu. 14 Ọ bụ-
chiaru iphe, ẹphe jeru etsoru bụ ejo ọkpoma
pẹ. Epe jeru awata agwo nshi, bụ Balu,
bụ iphe, ndiche pẹ ziru pẹ. 15 Ọo ya bụ
lẹ-a; wakwa iphe, Chipfu, bụ Ọkalibe-Kakota-
Ike eepfu baa; mbụ Chileke ọ ndu Ízurelu:
Lekwa; mu e-me ndu-a g'ẹphe ria nri, atso ilu.
Mu emee pẹ; ẹphe angua mini, e yeru iphe,
egbu egbu. 16 Mu a-chikashi pẹ g'ẹphe

dzuru ohamoha, bu eka ephe ta majeduru; ophu ndiche phe amajeduru iya. Ozo bu l'oo ogu-echi be mu e-gude chia phe jasụ mu emebyishibebe phe.”

¹⁷ Wakwa iphe, Chipfu,
bu Okalibe-Kakota-Ike
eepfu baa:

“Unu rinaa ya ariri nta!
Unu kunaa unwanyi,
akaje akaka ekwa
g'ephe bya!

Unu zikwaa g'e kua ndu
ophu kachaa ara
ekwa engete
g'ephe byakwapho!”

¹⁸ “G'ephe bya egwegwa bya
akarụ anyi akaka ekwa
jasu enya-mini awata anyi
aso gborogboro l'enya;
mbu g'enya-mini ndu
awu anyi gbukugbuku
l'ishishi enya.”

¹⁹ Aanukwa akaka-ekwa,
aaka le Zayonu eka
ephe ara su:

“Waa g'e mebyishiru anyi!
Waa g'iphere anyi habe shii!
Anyi hafutajekwa ali anyi-a
kele ulo anyi be e
mebyishichawaru.”

²⁰ Nta-a bu le-a; unube
unwanyi;
unu numakwa

Opfu Chipfu!

Unu saa nchị numa opfu,
shi iya l'onu!

Unu zikwa unwada unu
g'aakaję àkàkà ẹkwa!

G'onyenonu zia nwibe iya
g'eechije mkpu ẹkwa!

21 Onwu shiwaa lę windo-ulo
anyi pyobata
bya abahụ l'ẹka anyi meru;
ọ nguru anguru.

Ọ bapfu unwegirima l'etsuzo;
bya emee ophu
unworoobyia
edzukoedu
l'edupfu-oha.

22 Pfu sụ: “Wakwa iphe,
Chipfu epfu:

Odzu unwu-eliphe l'a-daka
gę nshị l'oma-egu;
g'ẹka e gburu ereshi;
eswa iya wushiru;
ophu ọ dudu onye
achikobe iya nụ.”

23 Wakwa iphe, Chipfu epfu
baa:

“G'onye maru iphe te
egudekwa mmamiphe
iya kua onwiya!

Ọphu onye okpehu du
egudekwa okpehu iya
kua onwiya!

Ọphu onye nweru iphe

egudekwa iphe,
o nweru kua onwiya!”

24 Ochia l'onye achọ aba abaa;
bụ iphe, oo-gude aba
abaa bụ;
lẹ mu doru iya ẹnya;
tẹme ọ maru mu ree;
mbụ maru lẹ mu bụ Chipfu;
lẹ mu emeje iphe-oma;
bya ekpe ikpe,
pfuru ọto;
bya egoshi lẹ mu
pfuberekoto.

Ọ buru l'eliphe bẹ mu
emekọta iphe ono;
kele ọ bukota iphe,
ememe iya aduje
mu ree.

Nokwa iphe, Chipfu eepfu.

25 Wakwa iphe, Chipfu epfu baa: “Lekwa;
mbọku abyakwa, bụ mbọku, mu a-nụ phẹ aphụ;
mbụ ndu e buru úbvú l'ẹhu kpoloko; 26 mbụ
ndu Ijiputu; yẹe ndu Jiuda; waa ndu Edomu;
waa ndu Amonu; waa ndu Mówabu; mękpoo
iphe, bukpo ndu bukọta l'echięgu; mbụ ndu
akpuje ishi dabunuka iya adabu. Kele ohamoha
ono g'ephe ha te ebuduru úbvù ililekpoo; tẹme
je akpaa lẹ ndu Ízurelu l'ophu te ebukwarupho
úbvù l'ime obu phẹ.”

10

Chileke yẹe nshi

¹ Unu n̄makwa iphe, Chipfu epfu an̄ unube
 ọnu-ulo Ízurelu! ² Wakwa iphe, Chipfu epfu baa:

“Unu ta anw̄kwa iphe,
 ndu ọhamoha eme;
 ọphu iphe-ọhubama,
 emeshi l'akpaminigwe
 eyekwa unu ebvu.

A makwaru-a l'udu iphe ono
 eyekwa ndu ọhamoha
 ono ebvu;

³ kele omelali ndu ono bu
 iphe, adudu iphe, ọ bu.

Ẹphe egbutaje oshi l'oswa;
 ndu eme ọna abya egude
 ayọọ phe pyia ya.

⁴ Ẹphe abya egude
 mkpola-ọchaa me
 mkpola-ododo gude
 mee ya ọna.

Ẹphe abya egude ọngu;
 yee nggu kpobe iya
 g'ọ to m̄nga am̄nga.

⁵ Nshi phe ono du ge
 nwanggiri-utobo,
 e keberu l'eka a k̄oru
 iphe;
 mbu l'o too pfudu opfu.

Ọ buru apata be aapataje iya;
 kele o to jedu ije.

Unu ta atsujekwa iya ebvu;
 kele o to mekajekwa iphe;
 ọphu ọ dukwa iphe, du ree,
 oomeje.”

6 Ọ tọ ụkwa onye ụgụ ụgụbe
Chipfu.

Ị parụ ẹka; tẹme ẹpha ngu bẹ
ike ụgụ.

7 ?Bụ onye ụgụ onye tege
anọdudu atsu ngu
ebvu;
ụgụbe eze ọhamoha?

Ono ụkwa iphe,
rwuberu ngu nụ.

L'iphe, ụkpoo ndu
mmamiphe,
nọkota l'ọhamoha;
mẹkpoo l'iphe,
ụkpoo alì-eze phẹ
l'ophu bẹ ọ tọ
ụkwa onye ụgụ ngu.

8 Ẹphe ụkota ndu enwedu
egomunggo bya aburu
ndu eswe.

Iphe, ezi phẹ iphe ụgụ ntẹkpe,
a pyiru l'oshi,
adudu urwu, ọ baru.

9 Ọo mkpọla-ọchaa, e tsuru
ọngu bẹ e jeru eshi lẹ
mkpukpu Tashishi
wota bya;
yẹe mkpọla-ododo,
e jeru ewota lẹ mkpukpu
Ufazu, ụcha iphe,
ndu eme ọna;
yẹe ndu akpuzu kpuru.

Nshi ono bẹ a chitaru uwe,

dụ urwukpu-urwukpu;
yẹ ọp̄hu dụ uswe-uswe
woru yee.

Ip̄he ono bukotaru ip̄he,
ndu maru eme ọna
meru dobe.

¹⁰ Ọbenu lẹ Chipfu bu iya bu
ọkpobe Chileke.

Ọ bu iya bu Chileke,
dzụ ndzụ.

Teme ọ buru iya bu Eze,
a-nọ jasụ l'ojejeje.

Ẹhu -nọdu eḡhu iya eḡhu;
elip̄he l'ophu anmahụ
pyaapyaapya;

ọp̄hu ndu ọhamoha adụdu ike ata nshi anata
oke-ẹhu-eḡhu iya.

¹¹ “Wakwa ip̄he, ii-pfuru phẹ baa: Agwa-a,
abudu l'ọo phẹ meru igwe; ọp̄hu ọ budu phẹ
meru elip̄he-a bẹ e-mechakwaa laa l'iswi l'elip̄he-
a; laa l'iswi l'imigwe.”

¹² Ọo Chileke bẹ gude ike ẹka
iya mee elip̄he.

Ọ buru yẹbedua gude
mmamip̄he iya t̄a
ọkpa mgboko-a.

Ọ buru yẹbedua gude
nkwamenya iya
ph̄ushi akpaminigwe.

¹³ Ọobujeru; o -dee edede
l'igwe; igwe ara ọrà.

Ọ nọdu emeje g'urwukpu
shi l'ẹka igwe beru alị

beru wata afuta.
 Ọotuje egbigwe me igwe
 ọdu edze mini.
 Teme o buru l'oba iya be
 ooshije ezi pherephere.
 14 Onyemonye te nwe
 egomunggo;
 ophu o dudu onye kwaru
 enya.
 Iphe, bu ndu akpu uzu
 mkpola-ododo g'ephe ha
 be iphere nshi phe
 gudeakwaru.
 Ntekpe, ephe meru tukoru
 buru ughoshi;
 g'o to budu l'ootu unme
 l'onwiya.
 15 Oo iphe, adudu urwu, o baru;
 bya aburu iphe,
 e gude agba mgbonu.
 O -rwua teke Chileke e-kpe
 ikpe be nshi ono
 a-bukotaru ola-l'iswi.
 16 Obenu l'onye ono,
 bu okiphe oshilokpa
 Jiekopu ono be ta
 abudu nno bu g'o du;
 kele oo ya bu onye
 meru iphemiphe dobe;
 mecha mee ndu Izurulu;
 mbu okpa-ipfu ono,
 bu okiphe iya ono.
 Onye ono be epha iya bu

Chipfu;
 bya aburu
 Okalibe-Kakota-Ike.

Mgbu-ọnwu, e-mechaa bya nu

¹⁷ Unu kwakọbekwa iphe unu g'unu alufu l'alì-a; unubẹ ndu ono, ndu ọhogu unu nọ-pheru mgburugburu ono; ¹⁸ kele-a; wakwa iphe, Chipfu epfu baa: "Nta-a bẹ mu a-gba ndu bu l'alì-a kẹ swaramu gbafulu mgba lanu. Mu emee phe ewere k'ophu aa-kpu phe le ndzu."

¹⁹ "Nshio mu; kele e mekaru mu iphe!

Onwo, aba mu nu buru emeta emeta!
 O le iphe, mu epfujeluru-a onwomu bu l'ọ buwaa iphe-ememe, nọ swiru mu nu; mu je l'ataru iya nshi.

²⁰ Ulo-ekwa mu bẹ e mebyishiakwaru.

Eri iya bẹ a tukoakwaru gbabushichaa.

Unwu mu shiakwa mu l'eka gbakashihu; ophu mu l'ephe anọedu.

O to duedu onye ophu phoduru nu kẹ g'oo-kpoberu mu ulo-ekwa obu ọzo; ọzokpoonu g'ọ tularu mu nwamkpu."

²¹ Ndu eche anyi gẹ ndu eche

aturu te nwedu
egomunggo;
ophu ephe akpajedu
Chipfu ishi.

Ọ buru iya meru g'o gude
ophu upete agbaeduru
phe;
a chia aturu phe nanunanu.

22 Unu lekwa! Nzi obu
abyakwaa.

Mbu oke utsu, e-shi l'uzo
isheli etsu abya.

Oo-me ali ndu Jiuda l'o
buru ochobu;
eka nkuta-oswa e-buru.

Epfufu, Jieremaya pfuru nu Chileke

23 Gube Chipfu; mu makwaru-a
le ndzu amadu ta
abudu nkiya;
l'o to budu amadu a-nodu
atu-ziru onwiya eka
oo-zo okpa.

24 Jiko Chipfu; baaru mu mba!

Ọ kwa g'i gude ikpe,
pfuru oto mee ya.
G'o to bukwa teke ehu eghu
ngu eghu; a nonyakwa;
i mee mu;
ophu o duedu iphe,
mu bu.

25 Tu-koshi ohamoha ono
oke-ehu-eghu ngu;
mbu ndu ono,

ekwedu nkengu ono.
 Tụ-koshi iya ndu ono,
 te ekujedu epha ngu ono;
 kele ephe riwaru oshilokpa
 Jiékpọpu ripyaa.
 Ephe kewaru iya gburugburu
 gbeshi;
 bya emebyishia alị iya,
 bụ ibe iya l'ophu.

11

Ogbandzu ono bẹ e mebyiru

¹ Wakwa opfu, Chipfu pfuru nụ Jieremaya. O sụru iya: ² “Nụmakwa iphe, e pfuru gude gbaa ndzụ ono; l'i wokwaru iya phọ je epfuaru ndu Jiuda; yẹe ndu bu lẹ Jierúsalemụ. ³ Pfuaru phẹ sụ phẹ l'ọwa-a iphe, Chipfu, bụ Chileke ndu Ízurelụ epfu baa: Onye a tũru ọnu bẹ ọ bụ; mbụ onye te emedu iphe, ọgbandzu-a pfuru; ⁴ mbụ opfu ọgbandzu, mu tũruro l'ekemu nụ ndiche unu phẹ teke mu dufutaru phẹ l'alị Ijiputu; mbụ teke mu dufutaru phẹ lẹ phoophoophoo ọku, agbazeje ígwè. Iphe, mu pfuru bụ: Unu meje iphemiphe, mu sụru g'unu meje; ọo ya bụ g'unu abụru ndibe mu; mbèdua abụru Chileke unu. ⁵ Noo teke mu e-mekọta iphe, mu riburu ndiche unu phẹ nte lẹ mu e-me; sụ lẹ mu a-nụ phẹ alị, ẹra-eswi; yẹe manụ-ẹnwu jiru pyimu pyimu, bụ iya bụ alị-a, unu bu nta-a.”

Mu sụ iya: “Ọo g'ọ dụ; gụbe Chipfu.”

⁶ Chipfu bya asụ mu: “Raa ya arara l'alị ndu Jiuda; yẹle ọma gbororo Jierúsalemụ: Unu

ngabẹ nchị l'opfu, dụ l'ogbandzu-a tsoo ya g'ọ dụ. ⁷ Eshi teke ono, mu dufutaru ndiche unu phẹ l'alị Ijiputu ono jasụ ntau-a bẹ mu shiekwapho lota phẹ ẹka lẹ nchị; mu -lochaa; mu alọbaa sụ phẹ: 'Unu meje iphe, mu pfuru!' ⁸ Obenu l'ephe ta angabeduru nchị; ophu ephe eyeduru onu; o chia iphe, ephe meru bu l'ephe tsoru okpoma-mgbashi, shi phẹ l'ẹjo okpoma phẹ ono. O buru iya bu lẹ mu atuko otu-onu, dukota l'ogbandzu ono, mu suru g'ephe tsoru; ephe jika l'ephe tee tsodu ono tukota phẹ."

⁹ Tọbudu iya bu lẹ Chipfu asụ mu: "Ndu Jiuda yee ndu bu lẹ Jierusalemu nokobeakwa achiru mu ẹjo idzu. ¹⁰ Ephe laphuakwaru azu je emeahaa iphe-ẹji, ndiche phẹ meru, bu ndu jikaru l'ephe taa ngadu nchị l'opfu, mu pfuru. Ephe tugbuakwaru je agwota obvu ozo, dugbanu jeahaaru iya ozi. Ndu onu-ulo Izurelu ephe lẹ ndu onu-ulo Jiuda tukoaakwaru mebyia ogbandzu ono, mu lẹ ndiche phẹ gbaru ono. ¹¹ Oo ya bu lẹ-a; wakwa iphe, Chipfu epfu baa: Mu e-mekwa g'oke iphe-ehuka dapfuta phẹ; ophu ephe anahukwa iya. O betakpoo ephe raku mu; mu taa ngakwaru phẹ nchị. ¹² Ndu bu lẹ mkpukpu, nogbaa l'alị ndu Jiuda; yee ndu Jierusalemu l'e-je je araku agwa ono, ephe shi anoduje akporu unwu-isensu oku ono; ole ephe tee yeduru phẹ ẹka ililekpoo; me oke iphe-ehuka ono dapfue phẹ pho. ¹³ Oo g'unu nweberu mkpukpu igwerigwe bukwapho g'unu nweru agwa igwerigwe; unube ndu Jiuda. Unu nwekwarupho ikpoto enya ẹka unu

doberu, unu a-nòdu akpò ùnwù-isensu òku; mbù akpò iya anù agwa iphere ono, bù Balù; ẹnya ẹka ono òkwapho igwerigwe g'etsuzo, nò lẹ Jierúsalemù. ¹⁴ Gẹ gùbe Jieremaya te epfukwa nù mu l'iswi ẹhu ndu-a; ophu i chikwaru pẹ mkpu; ophu i rwòkwaru pẹ arwòrwo; kele mu taa angakwaru pẹ nchi; m'ẹphe -kujee mu pò oku; m'ẹphe -nòdu eje iphe-ẹhuka.”

¹⁵ “?Bù gùnù bẹ ndu mu yeru obu eme l'eze-ùlo mu; l'ẹka ẹphe l'ìkpoto ndu ọzo achi ẹjo idzu eme g'ẹphe chìru iya? ?Bù anù, dù nsọ a-kpòshi g'a ta nù unu aphù tọ? Ọ kwa teke unu eme ẹjo-iphe bẹ ẹhu anọduje atso unu ọtso. ¹⁶ Chipfu kuru ngu oshi olivu, abya pulapula; teme ọ nòdu ami mebyi, ama ntumatu l'ugbugba. Ọle ọo ọrà, igwe a-ra l'ẹka oke pherephere ezi bẹ oo-gude kpoo ya oku; teme ẹkali iya agbakwashihu.

¹⁷ “Ọ kwa Chipfu, bù Ọkalibe-Kakọta-Ike, bù onye dzaru ngu nù bẹ tẹ-buru l'ii-mechaa buru ọla-l'iswi; noo kele onu-ùlo ndu Ízurelu; yẹle onu-ùlo ndu Jiuda mewaru ẹjo-ememe; shi ẹgube ono kpatsu mu iwe; kele ẹphe jeru anọdu akpò ùnwù-isensu òku anù Balù.”

Aachiru Jieremaya ẹjo idzu

¹⁸ Eshinu Chipfu kpuharu ẹjo idzu, ẹphe achiru mu goshi mu bẹ mu maerupho iphe, ẹphe achi; kele teke ono bẹ o goshieru mu pò iphe, ẹphe eme. ¹⁹ Mu dọepho gẹ nwaturu, eme gelee, a kpọ eje egbugbu. Ophu mu amakpodaro l'a chìwaru mu ẹjo idzu sù: “Unu g'anyi mebyishia oshi ono yẹ mebyi iya. Unu g'anyi mee g'ọ chìhu

l'alì ndu dzụ ndzụ; k'ophu a ta abyadụ anyatabaa ẹpha iya.”

²⁰ Obenu ẹ-a; gube Chipfu, bụ Ọkalibe-Kakọta-Ike; gube onye ono, ekpeje ikpe, pfuru ọto ono; ẹme ị nọdu ahuje ọkpoma yee ọriri ama; ge mu humanu ẹka ịigwata ugwo iphe, ẹphe meru mu l'ishi phe; kele ọo gubedua be mu e-doru g'ọ duru mu.

²¹ “Oo ya bụ ẹ-a; wakwa iphe, Chipfu epfu l'ẹhu ndu mkpukpu Anatotu, bụ ndu ono, achor ndzụ ngu ono, bụ ndu asuje g'i ti gudehekwa ẹpha Chipfu epfu mpfuchiru; ọdumeka be ị-nwuhukwa phe l'eka. ²² Oo ya bụ l'owakwa iphe, Chipfu, bụ Ọkalibe-Kakọta-Ike eepfu baa: Mu a-nukwa phe aphụ. Unwokorobya phe bụ ogu-echi be ee-gude gbushia phe. O buru ẹgu e-gbushi unwu phe nwoke yee unwu phe nwanyi. ²³ Ophu ọ dudu g'ọ ka mma l'o nweru nwa ndu aa-ha g'ẹphe phoduru phe. Noo kele mu e-me ge ndu Anatotu l'ophu lakota l'iswi; me o -rwuepho apha ono, aa-nu phe aphụ ono.”

12

Jieremaya agu aphụ

¹ Gube Chipfu; ọ to dudu teke ị buedupho onye pfuberekoto; jasukpoo ẹ ge mu echi ngu opfu-a.

Ole ọ bụ; mu e-pfukwaru ngu pho k'ikpe, pfuru ọto, iikpeje.

Sua; ?bụ ụnu kpara iphe,
 ụpete agbaru ndu
 ejo-iphe l'uzo phe?

Mbu-a; ?bụ ụnu kpara iphe,
 ẹhu aduje ndu e gudedu
 ire phe ẹka guu?

² Oo ngu dzaru phe;
 ẹphe gbaa ogharabvu;
 bya evua mịahaa amimi.

Ẹphe akpujeru ngu l'onu
 tekenteke.

Obenu l'o to rwujedu phe l'obu.

³ Obenu le mbedua be gube
 Chipfu maru.

Iihumaje mu; teme i nodu
 enyochaje oriri,
 mu ariru ngu enyocha.

Kputanu phe kpufu g'aturu,
 a kpu eje egbugbu!

Wonuru phe dobe iche
 kwaberu mboku,
 aa-phu phe!

⁴ ?Bu jasụ teke ole be ali a-gu
 aphu gu-beru; mbu eswa,
 noghbaa l'ali
 akposhikota nkụ?

O buru iphe, kpara iya nu bu
 le ndu bu iya nu bu
 ndu eme ejo-iphe;
 o mee unwu anu me unwu
 enu; ẹphe lakota l'iswi.

Ophu kachaakponu bu le
 ndu ono bu iphe,

ẹphe epfu bu:
 “Ọ tọo hụmakwa iphe,
 e-mechaa mee anyi.”

Ọnu, Chileke yeru

⁵ “Ọ -bụru ẹ ụ ẹ ndu gude
 ọkpa gbaru ọso;
 ẹphe ọo ngu phelephele;
 bụ-chia ndu ọphu gude
 inya ẹ ụ ẹ l'ẹphe sụru
 atutu?”

Ọzo bụ ẹ-a; ọ -bụru l'ụpfu
 adu ngu l'ali,
 adudu iphe du iya nu;
 ?denu g'ii-shi mekota
 iya l'oswa ono,
 no ẹ mgboru ẹnyimu
 Jiordanu ono?

⁶ Mbụ-a; unwune ngu nwoke;
 mbụ ndu unu ẹphe shi
 l'unuphu lanu;
 ẹphebedua deru ngu
 ye g'e gbua.

Ẹphe woliru olu ara g'e mee
 ngu iphe,
 a-tsuru ngu nu.

Ba adakobekwa phe;
 m'obeta ẹphe ọdu
 epfuru ngu opfu
 oma!”

⁷ “Mu gbadowaru ndu ọnu-ulo mu.
 Mu gwọbewaru ndu ono,
 bụ okiphe mu ono.
 Ndu ono, du mu l'obu ono

bẹ mu yeakwaru l'ẹka
ndu ọhogu phe.

8 Okiphe mube Chileke ono
byaakwaru bya adu
mu g'oduma, bu l'oswa.

Ọonoduje agboru mu ọja.

Ọ buru iphe ono meru
g'o gude ọ du mu ashi.

9 Ndu ono, bu okiphe mu ono;
duwaa mu g'enu,
voru kidikidi,
bu enu, erije anu enu ọzo;
unwu-enu ọzo
erijekwapho anu ibiya
no-pee ya mgburugburu
abya iya etso ọgu.

Ephe je atuko iphe,
bukpoo anu,
bu l'egbudu rwukoo
g'ephe bya avua anu
iya kpatakpata!

10 Ikpoto ndu eche aturu
mebyishiwaru
opfu-vayinu mu.

Teme ephe gude okpa zoo
opfu mu pyakapyaka.

Eguru opfu mu ono be
ephe meru;
ọ buru echiegu,
dabyiru ke mmanu.

11 E meru iya; ọ buru
okorobo-egu.

Eshinu ọ bu okorobo-egu;

ọ ọ́gàhàà àphù
 rakuahaa mu.
 Mbù l'ali ono l'ophu bẹ
 e meru;
 ọ búru okorobo-ẹgu;
 ọ́phu ọ́ dudu onye
 akpa iya ishi.

12 Ndu mgbupya zeru
 gbiigbiigbi bya
 asopyabe nggerede,
 noḡbaa l'echiẹgu.

Ogu-echi Chipfu e-shi l'ishi
 ali-a ishi lanu sù
 nemadzù pyaapya
 jasù l'ishi iya ọ́phuu;
 ọ́phu ọ́ dudu m'onye lanu,
 ẹhu adu guu.

13 Ẹphe kuru witi; ọ́le iphe,
 ẹphe mechaaru kpata
 bu obvu obvu.

Ẹphe sekashiru onwophe
 l'akanya;
 ọ́le ọ́ tọ́ dudu iphe,
 ẹphe setaru.

Iphere iphe, ẹphe kpataru
 l'opfu phe nodu
 aduje phe.

Ọ́ búru ẹka ẹhu egu Chipfu
 egu.”

14 Wakwa iphe, Chipfu epfu baa: “Ọ́ -búru kẹ
 ndu iwe ono, bú obutobu mu ono g'ẹphe ha;
 mbù ndu ono, denyiru ẹka l'okiphe, mu hẹru
 ndibe mu, bú ndu Ízurelu g'ọ́ búru okiphe phe

ono; lekwa lẹ ndu ono bẹ mu e-phefu ephefu l'ali phe. Mu abyakwapho ephefu ndu Jiuda g'ephe ba nohe l'echilabo phe. ¹⁵ Teke mu phefuchaeru phe pho; mu abya aphuaru phe obu-imemini; duphutachaa phe azu nanunanu g'ephe haa; g'ephe lwaphuta azu l'okiphe phe ono; ¹⁶ gude ephe mu riaha angu su: 'Eshinu Chipfu no ndzu g'o no iya-a'; egube ono, ephe shiwaa zia ndibe mu ephe shi egudeje agwa, bu Balu eri angu ono; bẹ ephe a-ngukwaru anguru l'echilabo ndibe mu. ¹⁷ Obenu teke o bu l'o nweru oha, ete ekwedu ngabe nchi bẹ mu e-phefukpoe phe pho rengurengu woru phe mebyishia. Nokwa iphe, Chipfu eepfu."

13

Akpo ocha, eke l'upfu

¹ Wakwa iphe, Chipfu epfu anu mu baa: "Tugbua je azua akpo-upfu, e meru l'ekwa ochaa kebe l'upfu; ole gi ba tsekwa iya le mini."

² Mu byanu eje azua akpo-upfu ge Chipfu pfuru; bya ekebe iya l'upfu.

³ Noo ya; Chipfu byakwa bya epfuru opfu yeru mu k'ugbo ebo su mu: ⁴ "Wota akpo-upfu ono, i zuru ono, i we l'upfu ono; gude iya je l'enyimu Yufuretisu je edomia ya l'ogba, du l'eze mkpuma." ⁵ Mu tugbukwa je elibe iya le mgboru enyimu Yufuretisu ge Chipfu ziru mu.

⁶ A noekwapho ujiku olemole; Chipfu su mu: "Tugbua je l'enyimu Yufuretisu je avota akpo-upfu-a, mu suru gi je edomia-a." ⁷ Noo ya; mu tugbunaa bya ejee l'enyimu Yufuretisu je avota

akpo-upfu obu; mbu je ewofuta iya l'eka mu shi domia ya; obenu l'o mebyishihuwaru; ophu o duedu iphe, o du ree ememe m'ilile.

⁸ Noo ya; Chipfu byakwa bya epfuru opfu yeru mu su mu: ⁹ “Wakwa iphe, Chipfu epfu baa: Nokwa ge mu e-mebyishi eku-onwonye ke ndu Jiuda; ye oke eku-onwonye ke ndu Jierusalemu. ¹⁰ Ndu-a, bu ndu ejo-iphe-a, bya aburu ndu jikaru l'ephe taa ngadu nchi l'opfu mu; ndu bu iphe, ephe anoduje eme bu iphe, shi phe l'ejo okpoma phe ono. O buru agwa ozo be ephe anoduje etso; ejeru phe ozi; abaru phe eja. Ndu ono bu g'akpo-upfu-a du-a bu g'ephe a-du; mbu l'o to dudu iphe, ephe a-du ree ememe m'ilile; ¹¹ kele oo g'akpo eke l'upfu ekejeru l'upfu nemadzu-a bu ge mu meru ndu Izurelu; yele ndu Jiuda l'ophu ephe keru mu jimujimu l'ehu. Oo ya bu g'ephe a-buru ndibe mu; teme mu egude phe nweru epha; l'aaja mu ajaja akwabé mu ubvu. Obenu l'ephe ta angaduru nchi. Nokwa iphe, Chipfu eepfu.”

Akpo-mee

¹² “Pfuaru phe su phe le-a: Wakwa iphe, Chipfu epfu; mbu Chileke ke ndu Izurelu: ‘Iphe, bukpo akpo-mee l'ophu be ee-yejikota mee.’ Teke ephe suru ngu: ‘?Anyi ta amahaada l'ee-yeji mee l'akpo-mee?’ ¹³ Li su phe-a: Wakwa iphe, Chipfu epfu baa: Mu e-me ge mee wata atsú iphe, bukpo ndu bu l'ali-a l'ophu; je akpachaa le ndu bu eze, bu ndu no l'aba-eze Dévidi; me ndu bu uke; me ndu mpfuchiru Chileke; mekpoo iphe, bu ndu bukota le Jierusalemu l'ophu.

14 Mu e-nwuta phẹ je atụpyabe nwibe phẹ; mbụ ndu bụ nna; mę ndu bụ nwa nwoke. Nokwa iphe, Chipfu eepfu. Mu taa yoduru phẹ ọshi; ọphu mu aphuduru phẹ obu-imemini; ọphu mu emeduru phẹ eze-iphe-oma kẹ gẹ mu haa gẹ mu te emebyishi phẹ.”

Eye ebvu akpu lẹ ndzu

- 15 Unu nụmakwa;
 unu ngabekwa nchị!
 Unu te ejekwa eku onwunu
 ekuku;
 kẹle Chipfu pfuakwaru iya
 g'oo-du.
- 16 Unu kwabẹ Chipfu,
 bụ Chileke unu úbvú!
 Ọdumeka bẹ oo-mekwa
 g'ochii gbaa.
 Teme upfu akpo ngu l'okpa
 l'eli úbvú ono,
 agbakota ochii ono.
 Iphe, unu ele ẹnya iya
 bụ ìphóró;
 ọle oo-me iya l'ọoburu
 onyonyo onwu.
- Teme l'ogbanwee ya;
 mee ya l'ọ gbahụ tsukiribaa.
- 17 Obenu lẹ teke ọ bụ l'unu ta
 angadu nchị
 bẹ mu a-ra ekwa lẹ mpya;
 kẹle unu kunukaru
 onwunu.
 Mu e-gude ẹnya mu raa ekwa
 raghee ya araghe.

Enya-mini aso mu
 gborogboro l'enya;
 kele unwu-aturu Chipfu be
 aa-kpu le ndzu.

¹⁸ “Karū eze; yele nyee iya, bu eze-nwanyị sụ phe-a: Unu shikwa l'aba-eze unu nyizeta; kele okpu-eze unu ono, egbu nwīnwii ono e-mechakwaa dafuchaa unu l'ishi! ¹⁹ Iphe, bu mkpukpu, nokota l'echiegu ndohali be aa-gu-chishicha agu-chishi; ophu o dudu onye suru iya aguha. Ndu Jiuda l'ophu be aa-kpukota laa ali aka ozo; mbu kpukota phe g'ephe hakota.”

²⁰ Palikpodapho enya apali huma ndu shi l'uzo isheli abya. ?Denu ikpoto aturu ono, e yeru ngu l'eka ono; mbu aturu ono, i shi gude eku onwunu ono? ²¹ ?Bu gunu be ii-pfu me o -chitaepho ndu ono, i shi dobesu l'ephe bu okpobe onya ngu ono bya achiru dobe; ephe buru ndu-ishi ngu phe? To watadu ngu eme ehuka g'ime emeje nwanyi, du ime-a? ²² Ozo bu; teke i jiru onwongu aji su: “?Bunaa gunu meru g'o gude iphe-a mee ngu?” Iphe, kparu iya nu bu l'iphe-iji ngu paru aka. Noo g'o gude a jia ngu uwele; woru ngu agada pakaa. ²³ Onye Kushi; ?oo-du ike gbanwee akpo-ehu iya? To agu; ?oo-gbanwe mkpo ono, o chiru l'ehu ono? Nokwapho ge gube onye ejo-ememe kwowaru ehū ta agbanwekotadu iya eme iphe, du ree. ²⁴ Wakwa iphe, Chipfu epfu baa: “Mu e-mechaa phukashia ngu g'onye aphukashi eswa ereshi, pherephere, shi l'echiegu ezikashi ezikashi. ²⁵ Noo oke iya nkengu bu ono; mbu okiphe, mu tu-buhawaru

doberu ngu. O buru iphe, kparu iya nu bu l'unu zoharu mu je akporu obu yeru agwa, ata abudu ire-lanu. ²⁶ Oo ya bu le-a; mu a-ji ngu uwele; phuta uwe ngu kpube ngu l'iphu; k'ophu aahumakwanu iphe ono, emeje g'iphere du ngu ono. ²⁷ Mu humaru ogori, iiri; yee mimiimii, inoduje ara agba ala l'eme ejo-ememe; mbu ukpara ono, igba; ophu iphere adudu ngu ono! Mu humakotaakwaru ahuma ahuma, inoduje eme l'eli ubvu; me ophu inoduje eme l'egu. Nshio gube Jierusalemu! ?Bu jasu teke ole be ii-du-beru inyinyi?"

14

Anwu a-kpobe; unwu abya; ogu-echi etso iya

¹ Wakwa opfu, Chipfu pfuru Jieremaya k'anwu-akpobe ono:

² "Ndu Jiuda agukwa aphu.

Mkpukpu, nokota iya nu
gbajoshihukota
agbajoshihu.

Ephe nodu ara ekwa l'opfu
ehu ali-a.

Temé a nodu echikwapho
mkpu le Jierusalemu.

³ Ndu a maru epha phe ziru
ndu-ozu phe g'ephe je
ekuta mini.

Ephe je l'obvu-mini;
ophu o dudu mini,
du iya nu.

Ephe paru ite phe
l'ophorokpo lwa.

Iphere dụ phẹ;

tẹme meji tofuwa

phẹ.

Ẹphe woru iphe kpuchia ishi

l'ẹka iphere dụ phẹ.

⁴ Alì gbaakwaru ọru;

kele igwe te edzeduru mini

wuṣhi iya.

Iphere gude ndu ako opfu.

Ẹphe woru ẹka kpubegbaa

l'iphu.

⁵ Mbụ je akpachaa lẹ ne ele,

bu l'ẹgu

gbaghachaaru unwu,

ọ nwuru k'òphúú;

ẹka ọ tọ humaduru ẹswa,

ọo-ta.

⁶ Nkapfụ-igara-ọswa pfuchaaru

lẹ nggeregede

atụ phẹpfuphepfu gẹ

nkuta-ọswa.

Ẹnya gbahukota phẹ ọchii

kele ọ tọ dudu ẹka ẹphe

a-nodu taa nri."

⁷ "A makwaru-a l'iphe-ẹji,

anyi meru agba anyi ekebe;

ọle gube Chipfu;

menaa iphe;

g'ẹpha ngu apfuru;

kele anyi lawaru azu lamihu;

tẹme anyi mewaa ngu

iphe-ẹji.

⁸ Gube onye bu ngu bu ẹka

ẹnya ndu Ízurelu dụ;
 onye adzọtaje phẹ
 nụ m'ẹphe -nọdu
 eje iphe-ẹhuka.

?Denu g'o gude ị bya adu
 g'ị byaru abyabya l'ali-a?

Mbu ị bya adu g'onye ije,
 l'a-nọ ẹnyasi lanu
 kpoloko.

⁹?Denu g'o gude ị dụ gẹ
 nwoke, a turu l'upfu;
 g'onye ike ọgu dụ;
 obenu l'ike ta aduedu
 iya kẹ g'ọ dzọo ndzu?

Gube Chipfu;
 anyi lẹ ngu tukonuru
 nọdu.

Teme anyi nọdu aza
 ẹpha alaru ngu.

Ta agbadoshinu anyi!”

¹⁰ Wakwa iphe, Chipfu epfu l'opfu ẹhu ndu-
 a: “Iphe, aduje phẹ ree shii bu aghaphe. Ẹphe
 te esedejedu ọkpa phẹ. Ọo ya bu lẹ mu taa
 natadu phẹ. Ọo nta-a bẹ ọobyanya anyata ẹjo-iphe
 ono, ẹphe megbaberu ono; bya ahua phẹ ahuhù
 k'iphe-ẹji, ẹphe meru.”

¹¹ No iya; Chipfu bya asu mu: “Te pfukwa
 g'ọ duru ndu-a lẹ ree. ¹² A makwaru-a l'ẹphe
 aswijeru Chileke ẹgu; obekwanu lẹ mu ta an-
 gadu nchi l'ekwa, ẹphe ara. A makwaru-a l'ẹphe
 egweru mu ngweja-akpo-ọku; bya egwekwaru
 mu phọ ngweja-nri. Obenu lẹ mu taa natadu
 iya. Ọ bu chia iphe, mu e-me bu lẹ mu e-gude

ogu-echi mebyishia ndu-a. Mu egude ọkpa-nri; yee ejo iphe-ememe mebyikwaa phe pho.”

¹³ O buru iya bu le mu asu: “Gube Nnajiuphu, bu Chipfu; ndu mpfuchiru Chileke anodujeekwapho epfuru phe su phe l'ephe taa ahumakwa ogu-echi ahuma ophu; ophu egu emekwa phe. Mbụ le gube Chileke e-me ge nchi du phe doo noo odu l'ali-a.”

¹⁴ Tobudu iya bu; Chipfu byakwa bya asu mu: “Ndu mpfuchiru ono gudekwa epha mu adzu uka. O to bukwa mbedua ziru phe g'ephe bya; ophu o bukwa mbedua turu phe eka; ophu o dukwa iphe, mu pfuru nu phe. Mpfuchiru, ephe epfu anu ngu bu ophulanya eregede. Ephe nodu agba eja, adudu iphe, o bu; yee iphe, ephe ritaru l'okpoma phe. ¹⁵ Oo ya bu le-a; wakwa iphe, Chipfu epfu l'opfu ehu ndu mpfuchiru ono, gude epha mu epfu ono; mbu ndu abudu mbedua ziru phe g'ephe je; ephe je anodu epfu su l'o to dudu ogu-echi; ozoo egu, byaru edenyi ndu ali-a eka. Ndu mpfuchiru ono l'onwophe be bu-a ogu-echi ono; yee okpa-nri ono e-mechaa mee g'ephe laa l'iswi. ¹⁶ Temu ndu ono, ephe epfu anu ono be ee-mechaa tuphaa etuphaa l'oma gbororo Jierusalemu; o buru iphe, a-kpa iya nu bu okpa-nri ono; yee ogu-echi ono. Ophu o dudu onye a-dukwadunu ke g'o lia phe elili; ozoo lia nyee phe; ozoo nwa phe nwoke me ke nwanyi. Aphu, rwuberu phe nu be mu a-wu phe l'ehu.”

¹⁷ Oo ya bu le-a; pfuru iphe-a yeru phe:
“G'enya-mini sokwa mu

gborogboro l'anya
 eswe l'enyashi
 mkpurumkpuru.

Ndu mu a-ndu araru ekwa
 ono buru nwada mu
 ono,
 adudu nwoke jepfujeru
 iya nu ono;
 mbu ndibe mu ono;
 kele onwo,
 aba phe nu du ejo eji.
 O buru pyaapya bẹ e chiru
 iya.

¹⁸ Teke mu bamiru l'ime
 oha ono;
 mu ahuma odzu ndu e
 gude ogu-echi gbua.

Teke mu bahuru le mkpukpu
 phe; mu ahuma iphe,
 okpa-nri mebyishiru.

Ndu uke me ndu mpfuchiru
 Chileke tukoakwaru
 lashia ali eka ephe amadu.”

¹⁹ ?O du g'i jikawaru Jiuda
 jikaghaa to?

?To duedu iphe, i guberu
 Zayonu to?

?Denu g'o gude i meka anyi
 iphe, ta akpohudu
 akpohu?

Anyi leri enya nchi-adu-doo;
 ophu o dudu iphe,
 du ree byaru anyi.

Anyi lee ẹnya teke ee-me
g'ẹhu dụ anyi ike.

Ọ buerupho ebvu bẹ a gbenu
eye anyi.

²⁰ Gube Chipfu; ẹjo-iphe,
anyi emegbabẹ rwuakwaru
anyi l'ẹhu; yẹe ikpe,
nmaru nna anyi oche
phe.

Anyi meakwaru ngu iphe-ẹji
eviya kpọ.

²¹ Jiko ta agbadokwa anyi;
g'ẹpha ngu apfuru!

Te ewokwaru aba-eze ngu ono,
dụ biribiri ono hua
l'ali!

Nyatakwa ọgbandzu anyi
lẹ ngu!

Te emebyikwa iya!

²² ?O nweru nshi nshi ono,
nọgbaa l'ọhamoha ono,
adudu iphe, ọ bugbaa ono;
?o nweru ọphu aduje ike
dzee mini?

Mbụ-a ?bukponu igwe
alwajẹ g'ọ ka mma l'ọo
yẹgeyege mini?

Waawakwa. Ọo gubedua;
mbụ gube Chipfu,
bụ Chileke anyi.

Ọo ngu bụ ẹka ẹnya dụ anyi;
kele ọo ngu emekota
iphemiphe ono.

15

¹ Tòbudu iya bụ; Chipfu bya asụ mu: Ọ tọ dukwa m'obeta Mosisu yẹ Sámelụ bya apfuru mu l'iphu; uche mu taa lakubeekwa ndu-a. Chifukpoe phẹ phọ achifu l'iphu mu! Haa phẹ g'ẹphe je! ² Teke ẹphe jiru ngu sụ: ?Bụ awe bẹ anyi a-la? Sụ phẹ-a: Wakwa iphe, Chipfu epfu baa:

Ndu a tubuwaru l'ọo anwuhu
e-gbu phẹ;

bụ anwuhu e-gbu phẹ.

Ndu a tubuwaru l'ee-gbu

l'ogu-echi;

l'e gbua phẹ l'ogu-echi.

Ndu a tubuwaru l'ọo ẹgu

e-gbu phẹ; ẹgu egbua

phẹ.

Ndu bụ lẹ ndzụ bẹ aa-kpu

phẹ;

l'a kpua phẹ lẹ ndzụ.

³ Wakwa iphe, Chipfu epfu baa: Mu e-zi uzi omeliwe ẹno g'o je emee phẹ l'iwe. Ogu-echi a-nọdu egbu egbu; nkuta alọ phẹ wuruwuru; unwu-enu, ephe l'eli; yẹ unwu anụ kẹ mgboko avukaa anụ phẹ; mee phẹ omeliwe. ⁴ Mu e-me phẹ g'ẹphe bụru ndu alị-eze unwu-eliphe l'ophu a-nọdu asọ oyi. Ọ bụru iphe, kparụ iya nụ bụ iphe, Manáse meru lẹ Jierúsalemụ. Manáse bụ nwa Hezekáya; ẹme ọ bụru eze ndu Jiuda.

⁵ Gbẹ Jierúsalemụ; ?bụ onye

a-yọkpoo ru ngu ọshi?

?Bụ onye a-gụchiru ngu aphụ?

?Bụ onye a-dukpoo ike

pfucha jia sụ:

?Denu g'oonwuru ngu?

⁶ Wakwa iphe, Chipfu epfu baa:

“Ị gbadowaru mu; laahaa azụ
azụ.

Oo ya bụ lẹ mu a-zụ ngu ẹka
gburumu woru ngu
mebyishia.

Ophu o duedu iphe, e-me
gẹ mu phuaru ngu
obu-imemini.

⁷ Mu e-gude ajakpa phuchaa
phẹ aphucha
l'onu-abata onu-abata
mkpukpu lẹ mkpukpu
ono.

Mu abya egbua phẹ
mgbu-onwu;
mbụ l'e-me ndibe mu ẹphe
aburu mkpurupyata;
noo kele ẹphe ta
agbanweduru ụzo phẹ.

⁸ Ụnwanyi phẹ, ji phẹ anọedu
bẹ mu meru ẹphe ka ẹja,
nọ l'aguga eze-enyimu
igwerigwe.

Eswe kee ẹbo mu wobata
omeliwe gude dapfu ne,
nwuru unwokorobya
phẹ.

Mu bya emee iphe anọ yọkoo;
yẹe iphe ndzụ-agugu;
tụ phẹ l'uzorehu.”

⁹ Wakwa iphe, Chipfu epfu baa:

“Ne nwanyi, nwutaru
 unwegirima esaa
 meerupho yereteke
 tu-buhuepho unme
 atu-buhu.

Enyanwu nkiya riba le teke
 bukwalu echi eswe.

E meru iya iphe-iphere;
 kpua ya iphu le ntu.

Nwa ndu phoduru nu be mu
 nwuru ye;
 e gude ogu-echi gbushia
 phe l'iphu ndu ohogu
 phe.

Nokwa iphe, Chipfu eepfu.”

¹⁰ Nshio mu; ne mu-e; ?bunaa gunu meru g'o
 gude i nwua mu? Ge mu byaru bya aburu nwoke
 ophu yele ndu ali-a l'ophu byaru eseahaa opfu
 dzoahaa enya. Ophu mu ejitadu ugwo; ophu
 mu ejiedu ejiejie; ole onyemonye ephue mu pho
 iphu. ¹¹ Chipfu sukwaru-a: “Ge mu gbukwaru
 ngu iya tororo. Mu a-nafutakwa ngu; g'o-duru
 ngu le ree. Mu e-me ndu ohogu ngu g'ephe
 wata ngu arwo arworwo; me o -rwua teke ee-je
 iphe-ehuka; yee teke ee-me ndiphe mkpawere.
¹² Nemadzu; ?o-du ike gbajia igwe? Mbua igwe
 ono; ozoo onyirubvu ono, a zuru l'ali uzo isheli
 ono?

¹³ “Eku, i kpataru; yele iphe, i nweru enweru
 be me e-nwuru ye g'a kwaa l'okwata. A taa
 pfudu ugwo iya. O buru iphe, kparu iya nu bu
 iphe-eji, iimegbabe l'ali ngu mgburugburu. ¹⁴ Mu
 e-me ngu g'i buru ohu l'eka ndu ohogu ngu l'ali,

ị mahaada; kele ẹhu-eghu mu gbanwuhuwaru ọku, e-tsu ngu phuruphuru.”

15 “Gube Chipfu; ọ kwa ngu bu onye maru nu. Nyatanu mu! Letanu mu enya! Gbanaaru mu odzori l'eka ndu akpa mu ẹhu. G'ẹhu te eghujedu ngu eghu egwegwa-a; be wofushinu mu. Nyatanu ge mu gude jebe iphe-iphere l'opfu ẹhu ngu. 16 Mu numaru opfu ngu; mu nata iya ria ge nri eriri. O mee mu; ẹhu nodu atso mu utso. Teme o dukwa mu pho ree l'okpoma. O buru kele eeku mu ala l'epha ngu; gube Chipfu, bu Chileke; bya aburu Okalibe-Kakota-Ike. 17 Mu teke anodu-swekwaa l'eka ndu mgbonu doru; ophu mu l'ephe eke anodu-swekwa eme emereme. Mu anoduje anopho nkinyi mu; kele mu maru l'eka ngu tu-koru mu l'ẹhu; teme i mewaa; ẹhu nodu eghushi mu eghu ike. 18 ?Bu gunu meru g'o gude ophu iphe-a, l'eme mu ehuka-a emebuhudu emebuhu. Teme onwo, aba mu nu du ejo eji; teme ophu okpohudu akpohu. ?Iime g'i bya aduru mu ge nggele, edeje nemadzu edede; mbu ge nggele, e jeru; ophu mini adudu iya.”

19 Mbụ lẹ-a; wakwa iphe, Chipfu epfu baa: “Izimanu -lwa ngu azu; mu edophu ngu azu l'onodu ngu; k'ophu ii-wata mu ejeru ozi. I -wata epfu opfu, nweru ishi, ophu o buedu mkpokoro opfu; li buru onye a-wata epfu iphe, mu suru gi pfua. Ge ndu a lwapfutanu ngu; o to bukwa ge gubedua lwapfuta phe. 20 Mu e-me ngu gi buru igbulọ noduru ndu-a. Igbulọ, a kpushiru ike, e gude onyirubvu kpua. Ephe e-tso ngu ogu; ole ephe tee mekpedu ngu; noo kele mu

nọ swiru ngu eswiru; k'ọphu mu a-nafutaje ngu; dzoo ngu.” Nokwa iphe, Chipfu eepfu bu ono. ²¹ Mu a-dzo ngu l'eka ndu ejo-iphe; bya agbafuta ngu l'eka ndu njo ono, turu ngu swiswia ono.

16

Mboku eze iphe-ehuka

¹ Tọbudu iya bu; Chipfu byakwa bya epfuru yeru mu su mu: ² “Ba alukwa nwanyi l'ali eka-a; ophu i nwutakwa iya nwoke; ophu i nwutakwa iya nwanyi; ³ kele-a; wakwa iphe, Chipfu epfu baa l'ehu unwu nwoke yee ke nwanyi, a nwushiru l'ali-a; waa l'ehu unwanyi, bu ne phe; yele ehu unwoke, bu nna phe: ⁴ Iphe, e-gbushi phe nu bu ejo iphe-ememe; ophu aaradu eka phe; ophu ee-lidu phe elili. O bu chia iphe, e-me nu bu l'ephe a-du ge nshi, a nyiru togbo l'ali. O buru iphe, e-gbu phe nu bu oguechi; yee okpa-nri. Teme odzu phe aburu nri, unwu enu, ephe l'eli; yee unwu anu, bu l'egbudu e-rije.

⁵ “Le-a; wakwa iphe, Chipfu epfu baa: Te ejekwa l'ulo-ekwa. Be ejekwa akporu iphu l'eka ono; ophu i jekwa ara eka. Noo kele mu tee meedu g'ehu du ndu-a guu ozobaa. Ophu mu eyeheduru phe obu; ophu mu aphuheduru phe obu-imemini.” Nokwa iphe, Chipfu eepfu bu ono. ⁶ “Ndu ha shii me ndu ha nwanshi a-tuko nwushihu l'ali-a. E tee lidu phe elili; ophu aaradu eka phe; ophu o dudu onye a-ka onwiya iphe l'opfu ehu phe; ophu a-kpushiduru phe ishi. ⁷ O to dudu onye a-turu phe nri ulo-ekwa. A taa

tuduru iya nna; ophu a-tuduru iya ne m'ephe -nwuhu; ophu o dudu onye evuru mee abya akporu phe iphu.

⁸ “Ophu ii-bahukwa l'ulo eka aabo Obo- iphe je anodu eri angu. ⁹ Kele-a; wakwa iphe, Chipfu, bu Okalibe-Kakota-Ike eepfu; mbu Chileke ndu Izurelu: Unu e-gude enya unu huma le nta, unu no ndzu-a; teke mu e-me g'a ba numajehe kperekpere k'ehu-utso; me k'ete eswa; ophu aa-nuhedu olu unwumgboko, alu ji; ozoo k'unwoke, alu nwanyi l'eka-a.

¹⁰ “I -pfuaru ndu-a iphemiphe-a; ephe -jia ngu su ngu: ‘?Bukwanu gunu meru g'o gude Chipfu tu-bua eme anyi egube ejo-iphe, ha egube ono? ?Bu gunu bu iphe-aji, anyi meru Chipfu, bu Chileke anyi? ?Bu awe be anyi mesweru?’ ¹¹ Noo teke ii-su phe le Chipfu sukwaru-a: Iphe, kparu iya nu bu le nna unu phe gbadoru mu. Epe gbadoru mu je agwaahaa agwa ozo; je ejeaaharu phe ozi; bya awata phe abaru aja. Epe gbado mbedua; ophu ephe emeedu ekemu, mu turu phe. ¹² O be l'unubedua; unu bya emekporo ejo-iphe, kabaa ke nna unu phe eji. Unu humanu g'unu tukoru g'unu hakporo l'ehu l'ehu toko etso ejo-okpoma unu; haa eme iphe, mu suru g'unu meje. ¹³ Oo ya bu le mu a-chifu unu l'ali-a; chiru unu ye l'ali, unu amadu; ophu nna unu phe amajeduru iya. Unu -rwuwaro eka ono; unu awata ejeru agwa ozi eswe l'enyashi; kele mu tee meekwanuru unu eze-iphe-oma.

¹⁴ “Ole g'o duhabe; wakwa iphe, Chipfu epfu baa. Teke nemadzu e-mechaa; ephe taa subaedu

‘Eshinu Chipfu nọ ndzụ g'ọ nọ iya-a; mbụ onye dufutaru ndu Ízurelu l'alì Ijiputu.’ ¹⁵ Ọ bụwaru iphe, ee-pfufe bụ: ‘Eshinu Chipfu nọ ndzụ g'ọ nọ iya-a; mbụ onye dufutaru ndu Ízurelu l'alì ndu isheli; mę l'iphe, bụ alì ono l'ophu, bụ alì ẹka o shi chiru phẹ ye ono.’ Kẹle e -mechakpọ bę mu a-chilatakwa phẹ l'alì ono, mu nuru nna phẹ oche ono.”

Aphụ, Chileke a-nụ ndibe iya

¹⁶ Wakwa iphe, Chipfu epfu baa: “Lekwa lę nta bę mu e-je ekua ndu eseje ikokoro; ẹphe adu igwerigwe. Ẹphe eje esefuta phẹ. E -mechaa; mu eyekwaphọ ndu achije nta; ẹphe adukwapho igwerigwe je achia nta phẹ l'iphe, bukpoó úbvú úbvú; mękpoo òbvú òbvú; mękpoo l'ogba, du l'eze mkpuma. ¹⁷ Kẹle mu gude ẹnya mu ahumakota iphemiphe, ẹphe eme; ọ tọ dudu ophu eedomiru mu edomi; ophu ẹphe eemedu ẹjo-ememe gę mu ta ahuma iya. ¹⁸ Mu a-pfu phẹ ugwo ẹjo-ememe, ẹphe eme; mę ugwo iphe-ẹji, ẹphe eme; pfua phẹ iya mpfukwase. Noo kẹle ẹphe pharwushiwaru alì mu. Ẹphe gudewaa agwa phẹ ono, adzudu ndzụ tẹme ọ nọdu asọ oyi ono gude merwushia okiphe mu onoya.”

Jieremaya epfu anụ Chileke

¹⁹ Gube Chipfu, bụ ike mu; bya aburu onye mu gude nguru anguru; bya aburu onye mu agbabaję l'ime je anọdu eze ndzụ mę mu -nọdu eje iphe-ẹhuka. Ndu abudu ndu Jiuda l'a-byapfuta ngu; shikporo l'ẹka igwe beru alì beru bya byasụ: “Tororo opfu bụ lę nna anyi phẹ bụ iphe, ẹphe shi kwẹe ẹka bụ iphe, abudu

iphe; mbụ iphe, bụ iphe-mmanụ; bya aburu iphe, urwu adudu. ²⁰ Nemadzu; ?oo-gude ẹka iya metaru onwiya chi l'ẹbe abụ l'iphe obu bụ chi?

²¹ “Oo ya bụ lẹ-a; lekwa-a; mu e-gudefua nwamgbo lanu-a mee g'ephe maru; mbụ lẹ mu e-me g'ephe maru g'ike mu waa okpehu mu habe. Noo teke ephe a-maru l'epha mu bụ Chipfu.”

17

¹ “Iphe-ẹji, ndu Jiuda meru bukwa iphe, e meru l'igwè bẹ e gude kàá ya àkàkà; bya e gude iphe tųpyiru zinguzingu dee iphe l'okwekpu ono, bụ obu phẹ; bya ede iphe lẹ mpu iphe, nọgbaa l'anya ẹka ephe agwajẹ iphe. ² Mbụ l'unwu phẹ nyatachaaru ẹnya ẹka ephe agwajẹ iphe; yee itso Ashera phẹ ono, e shi edobeje l'aguga iphe, bukpooshi, jaru àjàjà; mekpoo l'eli úbvú úbvú, dọgbaa l'eli; ³ mẹ l'eze úbvú, nọgbaa l'egbudu. Eku eku, unu kpataru; mekpoo iphemiphe, unu nweru; bẹ mu e-mekota g'a kwaa l'okwata. Ono buru aswa iphe-ẹji ono, dzuru ekameka l'alị unu ono. ⁴ O buru unu bẹ oo-shi l'ẹka; okiphe, mu nukpooru unu anunu etuphahu. Mu e-woru unu mee ohu ndu ohogu unu l'alị ẹka unu amadu; kele unu kpatsuwaru mu iwe; ehu je l'e-ghu mu eghu jasụ l'ojejoje.”

⁵ Wakwa iphe, Chipfu epfu baa:
 Onu bẹ a turu onye dakoberu
 nemadzu;
 onye bụ ẹka ike dụ iya
 bụ l'ehu nemadzu
 mmanụ;

ọphu ọkpoma iya aduèdu
l'ẹka Chipfu nọ.

6 Onye ono a-du g'ishishi-irwu,
bvuru l'echiegu;
ọphu ọo-humadu teke iphe,
du ree abya.

Ọ buru ẹka du kpokoro
kpokoro kpokoro
l'echiegu obu be oo-buru;
mbu ali unu,
adudu onye bu iya nu.

7 Obenu l'onye dakoberu Chipfu
bu onye a goru onu-oma nu;
onye bu iya be o kpuru
obu yeru.

8 Onye ono a-du g'oshi,
e yeru l'aguga mini,
chiru ogbarabvu iya ye le
nggele.

Ọphu ndzu agujedu iya me
anwu nodu echi;
ekwo iya anodujeepo eji
hirihiri tekenteke.

Ọphu ọoyojedu ọshi me
okpa-nri du;
ọphu ọ dudu teke ọ to
nodujedu ami mebyi.

9 “Obu nemadzu ta adudu iphe,
o kadu ẹregede.

Teme ejo-iphe paa ya ẹka.
?Bu onye suru iya amaru?

10 Ọo mube Chipfu enyoje obu;
teme mu nodu eleje

egomunggo ule;
 k'ophu mu a-pfu
 onyemonye ugwo
 g'umere iya gbaru;
 mbu g'iphe, o meru gbaru.”

11 Onye akpa eku l'eregede du
 g'okwa, kpuru l'ekwa,
 o tuduru;
 kele eku onye ono a-gwobe
 iya me o kajahaepho
 nka ebo.
 O buru l'ikpazu iya ono be
 oo-buru onye-eswe.

12 Ulo, anyi doberu nsọ bu
 aba-eze, du akpabiri,
 o shiepho le mbu;
 butaru eka eekutse
 ekutse.

13 Gube Chipfu, bu onye ndu
 Izurelu ele enya l'eka;
 iphe, bu onyemonye,
 gbadoru ngu nu
 be ee-mechakwaa mee
 iphe-iphere.

Ndu gharu ngu azu be ee-de
 epha phe l'urwuku;
 noo kele o Chipfu be
 ephe gbadoru;
 mbu ishi mini, doru risaa;
 emeje g'a ndu ndu.

Jieremaya epfu anu Chileke g'o gbaa mkpu

14 Meta mu iphe, eme mu nu; gube Chipfu;
 k'ophu mu a-buru onye iphe te emedu! Dzo mu

ro; ge mu a-buru onye a dzotaru; noo kele o
 ngu bu onye mu ajaje ajaja.

¹⁵ Iphe, ephe anodujeepho epfuru mu bu:
 “Denuhunu iphe obu, Chipfu pfuru opfu iya
 obu? G'o menaa g'o pfuru iya!”

¹⁶ Mu ta agbakwaru oso su le mu tee
 cheheduru ngu aturu; ophu o dudu teke ejo
 mboku gujeru mu. Gubedua maru l'iphe, shi
 mu l'onu futa dabyiru eba l'iphu ngu. ¹⁷ Be
 yekwa mu ebvu! O kwa ngu bu eka mu
 agbabaje je anodu ezeru ndzu me iphe-ehuka -
 bya. ¹⁸ Kpunaa ndu akpa mu ehuh iphu le nu!
 Ophu i kwekwa g'e kpua mbedua iphu le nu!
 Menaa g'ephe buru ndu ee-ye ebvu! Ophu i
 kwekwa g'e yee mbedua ebvu! Mee g'iphe-ehuka
 dapfuta phe! Gude oke ola-l'iswi laa phe l'iswi!

Edobe eswe atuta unme nsu

¹⁹ Wakwa iphe, Chipfu pfuru nu mu baa:
 “Je apfuru l'onu-abata mkpukpu, bu uzo eka
 ndu eze ndu Jiuda eshije abata shikwa iya pho
 alufu. Tukokpoepho iphe, bu onu-abata, eeshije
 abata le Jierusalemu je apfuru; ²⁰ su phe-a:
 ‘Unu numakwa Opfu Chipfu; unube ndu eze
 ndu Jiuda; mekpoo ndu Jiuda l'ophu; mekpoo
 onyemonye bu le Jierusalemu, bu ndu eshije
 onu-abata-a abahu. ²¹ Wakwa iphe, Chipfu
 epfu baa: Unu tonupho nwehu g'unu te vuje
 ivu l'eswe-atuta-unme; ophu unu evujekwaru
 iya shia onu-abata Jierusalemu-a. ²² Unu te
 shijekwa l'ibe unu vuru iphe futa etezi; ophu
 unu ejejekwa ozi ejeje ophu l'eswe-atuta-unme.
 O buchikwaa g'unu dobeje eswe-atuta-unme

nsọ, bụ iya bụ iphe, mu sụru ndiche unu phẹ g'ẹphe meje. ²³ Obenu l'ẹphe te eyeduru ọnu; ọphu ẹphe angaduru nchị. Ẹphe woru ishi ngakobe; jika l'ẹphe taa ngadụ nchị; ọphu ẹphe eyedu ọnu lẹ mba, mu barụ phẹ.'

²⁴ "Obenu lẹ-a; wakwa iphe, Chipfu epfu baa: 'Ọ -buru l'unubedua tọru nwẹhu angaru mu nchị l'opfu; ọphu unu evujeduru ivu abata l'ọnu-abata-a l'eswe-atụta-unme; unu -dobe eswe-atụta-unme nsọ; k'ọphu bụ l'ọ tọ dudu ozi, unu ejeje mbọku ono; ²⁵ noo teke eze ndu nọ l'ọkwa eze Dévidi; ẹphe lẹ ndu ejeru phẹ ozi; a-wata eshi ọnu-abata mkpụkpu-a abahụ. Ẹphebedua ẹphe lẹ ndu ejeru phẹ ozi a-nọdu agba l'ugbo-inya; mę l'eli inya abata lẹ mkpụkpu-a. Ndu Jiuda awụ etso phẹ; mękpoo iphe, bụ ndu bu lẹ Jierúsalemụ. Noo teke ee-buru eburu lẹ mkpụkpu-a jasụ l'ojeje. ²⁶ Ndiphe e-shi lẹ mkpụkpu, nọgbaa l'alị ndu Jiuda abya; mękpoo lẹ nwa mkpụkpu, nọgbaa Jierúsalemụ mgburugburu; mękpoo l'oke alị ndu Benjiaminu; mękpoo ndu bu l'alị ọkpa úbvú, nọ l'uzo ẹnyanwu-ariba; mękpoo ndu bu l'alị úbvú úbvú; mękpoo ndu bu l'echiegu ndohali. Ẹphe egudegbaa anụ, ẹphe e-gude gwee ngweja-akpọ-ọku; waa ngweja mmanụ ọzo; mękpoo ngweja-nri; mękpoo ụnwù-isensu; mękpoo ngweja-ekele; gude abya agwa Chipfu l'eze-ulo iya. ²⁷ Obenu lẹ teke ọ bụ l'unu te emedu iphe, mu sụru g'unu meje; k'ọphu bụ l'unu te edobejedu eswe-atụta-unme nsọ; unu -nọdu evujeru iphe abata lẹ Jierúsalemụ l'eswe atụta unme bę mu a-phụ-nwu ọku, e tee menyidu emenyi l'ọnu-abata

Jierúsalemú. Ọ búru ọku ono a-tùko iphe, bú alì-eze, dù lẹ Jierúsalemú ono kekọta.' ”

18

Ọkpú-ite; yẹe ọrwa iya

¹ Wakwa opfu, Jieremaya nùmaru l'ọnu Chipfu, sùru iya: ² “Tùgbua jepfu onye akpú ite l'ibe iya. Noo ẹka mu e-me g'ì nùma opfu mu.” ³ No iya; mu tųgbunaa jeshia ibe ọkpú-ite. Mu jeshia; o gudewaa iphe-wilu labọ, ọokpuje ite akpú ite. ⁴ Ọ kpúa ite ọrwa ono, o gude l'ẹka akpú ono kpú-byia ya akpú-byi. Ọ bya egude ọrwa ono kpúa ọzo lẹ g'ọ dù iya ree.

⁵ Noo teke mu nùmaru Opfu Chipfu, sùru mu: ⁶ Wakwa iphe, Chipfu epfu baa: “Gùbe ọnu-ọlọ Ízurelu; ?mu te emedu unu g'ọkpú-ite-a l'eme-a? Lekwa; ọ kwa g'ọrwa dù l'ẹka onye akpú ite bú g'unubẹ ọnu-ọlọ Ízurelu dù l'ẹka mu. ⁷ Mu -pfua sù l'ọwa-a g'ee-me ọha baa; ọzoo l'ọwa-a g'ee-me alì-eze baa; l'ee-pheshi iya epheshi; ọzoo l'ee-nwukpọshi iya; ọzoo l'ee-mebyishi iya; ⁸ ọ -búru l'ọha ono, mu pfuru l'ọwa-a g'ee-me iya ono dakọberu haa eme ẹjo-iphe phẹ; mu ahaa phẹ eme ẹjo-iphe ono, mu shi rịa lẹ mu e-me phẹ ono. ⁹ Teke o nwekwanuru teke mu pfuru sù l'ọwa-a g'ee-me ọha baa; ọzoo l'ọwa-a g'ee-me alì-eze baa; l'a kwọ-lita iya; mee ya g'ọ nguru anguru; ¹⁰ ọ -wata eme ẹjo-iphe l'iphu mu; k'ọphu bú l'o too mejedu iphe, mu sùru g'e mee; mu ahakwaphọ iphe, dù ree ono, mu shi rịa lẹ mu e-me g'ọ rwu iya ẹka ono. ¹¹ Ọo ya bú lẹ-a; nta-a bú g'ì je epfuru yeru ndu Jiuda;

mẹ ndu ono, bu ẹ Jierúsalemu ono; sù phẹ-a: Wakwa iphe, Chipfu epfu baa: Unu lekwa; mu kwakọbekwaru unu ọla-l'iswi; ẹme mu nọdu ariru unu ẹjo ọriri. Unu dakọbekwa lwaphuta azu; g'onyenonu hakwaa ẹjo-iphe, oome; unu mee uzo unu yẹ iphe, unu eme g'ọ dụ ree. ¹² Ẹphe asukwaro: 'E tee mekọtaekwa iya. Anyi a-nọdukwa eme iphe, anyi ritaru l'ọriri g'anyi eme iya; g'anyi ha l'onye l'onye a-nọdu eme iphe, anyi ritaru l'ọriri l'ẹjo ọkpoma anyi.' "

Ndu Ízurelu ajika Chipfu

¹³ "Oo ya bu ẹ-a; wakwa iphe,
Chipfu epfu baa:

Unu kpaeshikwa ishi

l'ọhamoha;

?bu onye nọmajeru ẹgube

ọwa?

Nwada mu yẹ nwoke

akwajẹduru ono,

bu Ízurelu bẹ meakwaru

iphe, anyi ishi ẹdzu.

¹⁴ Aka-mini-sunoo k'úbvú úbvú

Lébanonu;

?ọ duru teke ọo-nọnya l'ọ

haa adu ẹ kpọkoro

kpọkoro kpọkoro ẹka

ono,

dụ ẹ mkpoze úbvú ono?

Tọo mini-oyi ono, shi l'ẹka dụ

ẹnya asọ abya ono;

?ọo-nọnya l'ọ sọ-buhu tọo?

¹⁵ Eshinu ndibe mu zọhawaru
mu;

wata akpọ ùnwù-isensu ọku
 anụ iphe, abụdu iphe;
 ẹphe mewaa pẹ;
 ẹphe kpọo garigari kpọfu
 l'uzo pẹ ono, bụ ụzo,
 shi pẹ ẹ ndiche ono;
 wata eshi ụzo dụ wẹrere;
 mbụ ụzo, a tūduru mkpoli;
¹⁶ ẹphe mee alị pẹ;
 ọ bụru ochobu;
 bụru ẹka aa-nọdu anmaru
 ọtsa jasụ l'ojeje.

Iphe, bụkpoo onyemonye,
 ghataru iya nụ bẹ ọo-duje
 biribiri;
 l'o phuphee ishi.

¹⁷ Mu a-tuka pẹ nanunanu
 g'iphe, pherephere,
 shi l'uzo ẹnyanwu-awawa
 zikashiru;
 ẹphe adakaa nanunanu
 l'ẹka ndu ọhogu pẹ.

Mu e-goshi pẹ azu mu;
 mu tee goshidu pẹ
 iphu mu
 m'ẹphe -nọdu eje iphe-ẹhuka.”

Aachiru Jieremaya ẹjo idzu

¹⁸ Tọbudu iya bụ; ẹphe sụ: “Unu bya g'anyi
 chīaru Jieremaya ẹjo idzu; kẹle anyi nweru-a
 ndu-uke, a-nọdu ezi anyi iphe; anyi nweru ndu
 maru iphe, bụ ndu a-nọdu atụ-ziru anyi ẹka;
 bya enweru ndu mpfuchiru, a-nọdu ezi anyi

opfu Chileke. Unu bya g'anyi gude ire mee ya omeliwe; g'anyi ba ngakwa nchị l'iphe, oopfu me nanu.”

¹⁹ Ngabɛnuru mu nchị; jiko Chipfu; numa olu ndu achọ mu opfu. ²⁰ ?Ee-gude ejo-iphe pɛua ugwo iphe-oma? Kele-a; epe tɔakwaru nsu doberu mu. Nyatakwa le mu pɛuru l'iphu ngu pɛuaru phe opfu oma gude mee g'ehu ghubuhu ngu egu l'opfu ehu phe. ²¹ Oo ya bu le-a; chinuru unwu phe ye l'okpa-nri; l'e gude oguechi gbua phe pyaapya; unyomu phe aburu ndu ume nwa a-nodu eme; teme epe aburu ndu ji phe nwushihuru. G'e gbushia unwoke phe egbushi; g'unwokorobya phe buru ndu ee-gude oguechi gbushia l'iphu ogu. ²² G'iphe, a-nodu atu l'ulo phe buru uzu-ekwa teke ono, ichiru ndu ojogu sobata l'ibe phe bya atu phe l'upfu ono; kele epe tɔwaru nsu doberu mu ge mu dalahu; bya eworu onya gbaberu mu ge mu ye okpa. ²³ Obenu le gube Chipfu machaarụ ejo idzu, epe achiru mu ke g'ephe gbua mu. Ta agukwaru phe nvu l'ejo-iphe ono, epe eme ono. Ophu i hufukwa iphe-iji, epe eme l'iphu phe. Ochia g'ephe nodu ngu l'iphu buru ndu e mekperu emekpe. Noo iphe, ii-me phe bu ono teke ehu a-nodu egu ngu egu.

19

¹ Wakwa iphe, Chipfu epfu: “Je azuta ite-urwa l'eka okpu-ite. G'unu le ndu bu ogerenya mkpukpu yee ndu bu ogerenya uke Chileke hakwaru swiru. ² Je le nsuda Hinomu l'aguga eka eeshije abahu Jierusalemu, bu Onu-abata

Agbagba-mbeji. I -rwuepho ẹka ono l'ì raa iphe-a, mu ezi ngu-a arara; ³ sù phẹ-a: Unu nùmakwa Opfu Chipfu; unubẹ ndu eze ndu Jiuda; mękpoo ndu Jierúsalemu. Wakwa iphe, oopfufu; mbụ Chipfu, bụ Ọkalibe-Kakọta-Ike; bya aburu Chileke ndu Ízurelu. Unu ngabẹkpodapho nchị! Mu abyakwa egude ẹjo-iphe byapfuta ndu alị-a, bụ iphe, a-gba onyemonye, nùmaru iya nù anwirinwa lẹ nchị. ⁴ Kẹle ẹphe gbadowaru mu; bya eworu alì ẹka-a mee ẹka aanọduje agwa agwa ndu ọhozo. Ẹphe nọwaa ya kpọo ngweja ọku nù agwa, ẹphe amadu; ọphu nna phẹ amadu iya; ọphu ndu eze ndu Jiuda amajeduru iya. Ẹphe nọduwa iya gbushia ndu adudu iphe, ẹphe meru; mee phẹ nọdu asọ gborogboro.

⁵ “Ẹphe kpuwaru ẹka aagwajẹ iphe agwagwa, dugbaa iche iche doberu Balu; k'ọphu ẹphe a-nọdu akpọ unwu phẹ ọku l'ẹka ono gude agwa Balu ono. Iphe ono buru iphe, mu asuduru g'e meje; ọphu mu ephotajekpodaru iya nù ephota ọphu; mbụ l'o tokọ bahuswekpo mu nù l'egomunggo. ⁶ Ọo ya bụ lẹ-a; wakwa iphe, Chipfu epfu baa: G'ẹnya dokwa unu. O nwekwaru mbọku, e-mechaa du nù; mbụ teke ee-mechaa; ndiphe tee kuẹdu ẹka-a Tofetu; ọphu eekuẹdu iya nsuda Hınomu. Iphe, ee-mechaa kuahaa ya bụ nsuda Teterii. ⁷ Ọ kwa l'ẹka-a bẹ mu e-chikposhi idzu, ẹphe achi; mbụ ndu Jiuda yẹe ndu Jierúsalemu. Mu e-me gẹ ndu ọhogu phẹ gude ogu-echi gbushia phẹ; mbụ l'ẹka ndu achọ ndzụ phẹ. Mu eworu odzu phẹ tũkaa g'ọ buru nri duru ẹnu, ẹphe l'eli; yẹe

anụ, bu l'egbudu. ⁸ Mu e-me mkpukpu ono g'ọ buru ochobu; g'ọ buru ẹka aa-kpoyijeru ukuvu. Onyemonye, ghataru iya nū bẹ ẹhu a-nwuje kpalaa; l'ọ kpoyiaru iya ukuvu ghata. Ọ buru iphe, a-kpa iya nū bụ g'e gude mebyishiberu iya. ⁹ Mu e-me phẹ g'ẹphe taa anụ unwegirima ibe phẹ; ẹme ẹphe ataa anụ nwibe phẹ teke ono, iphe a-nọdu atsụ phẹ l'ẹhu ono, bụ teke ndu ọhogu phẹ, l'achọ ndzụ phẹ e-kephe phẹ mgburugburu ono.

¹⁰ “No iya; tukpoo ite ono teke ndu ono, unu l'ẹphe swi ono ele ngu ẹnya; ¹¹ l'i sụ phẹ-a: Wakwa iphe, Chipfu, bụ Ọkalibe-Kakọta-Ike eepfu: Mu a-tukposhi ọha-a yẹ mkpukpu-a ẹgube-a, a tukposhiru ite ọ-kpu-ite-a; ọphu a byadu l'agbakọbe iya ọzobaa. Ẹphe e-li odzu lẹ Tofẹtu; noo kele a taa hụmaedu ẹka ọzo, aa-nọdu elidzuru phẹ. ¹² Wakwa iphe, Chipfu epfu baa: Nokwa iphe, mu e-me ẹka-a yẹ ndu bu iya nū. Mbụ lẹ mu e-me mkpukpu-a l'ọ dū gẹ Tofẹtu. ¹³ Iphe, bukpuo ọlo, nọ lẹ Jierusalemu; yele ọlo ndu eze ndu Jiuda bẹ aa-turwuchaa g'a turwuru ẹka-a, bụ Tofẹtu-a, bụ ẹka ẹphe nọgbaa l'eli ọlo akpọ unwù-isensu ọku nū iphe, bụ kpokpode; ẹme ẹphe nọdu agbaru agwa mẹe gude agwa phẹ.”

¹⁴ Tọbudu iya bụ; Jieremaya byanụ bya eshi lẹ Tofẹtu lwa, bụ ẹka Chipfu shi zia ya g'o je epfuchiru iya opfu-a; bya apfuru l'oma-unuphu eze-ọlo Chileke bya asụ iphe, bukpuo ndu ono l'ọphu sụ phẹ: ¹⁵ “Wakwa iphe, Chipfu, bụ Ọkalibe-Kakọta-Ike eepfu; mbụ Chileke kẹ ndu

Ízurelu: Unu lekpodapho. Iphe, bukpo ejo-
iphe ono g'ò ha, bu ophu mu pfuwaru l'oo-me
phe ono be mu abakwa emekota mkpukpu-a
yee mkpukpu, no-pheru iya mgburugburu. O
buru iphe, kparu iya nu bu l'ephe ngakoberu ishi
jika l'ephe taa angabedu mu nchi l'olu."

20

Jieremaya yee Pasho

¹ O be teke Pasho nwa Ima numaru mpfuchiru
Jieremaya; Pasho bu onye uke Chileke bya aburu
onye-ishi ndu-ishi eze-ulo Chipfu; o numaepho
iphemiphe ono, Jieremaya epfu ono; ² o mee; e
chia Jieremaya, bu onye mpfuchiru ono echachi;
bya eworu iya tu-chia l'ulo-mkporo, no l'aguga
onu-abata eze-ulo Chipfu ophu aza Ephekerephe
Onu-abata Benjaminu. ³ O be le nchitabohu
iya; Pasho bya atufuta iya l'ulo mkporo ono.
Jieremaya su iya-a: "Epha, Chipfu guru ngu
ta abuekwa Pasho. O kwa 'Nggiri, no l'uzo
l'ekameka'; ⁴ kele-a; wakwa iphe, Chipfu epfu
baa: Mu e-me ngu g'i tsuahaa onwongu ebvu;
ndu yeru ngu obu g'ephe ha atuko atsū ngu
ebvu. Ii-gude enya ngu gedegede hūma teke
ndu ohogu phe e-gude ogu-echi egbushi phe.
Ndu Jiuda mgburugburu be mu e-woru ye l'eka
eze ndu Babilonu, bu onye a-kpu phe le ndzu
lashia ali ndu Babilonu; ozokwanu gude ogu-
echi gbushia phe. ⁵ Iphe, bukpo eku ndu
mkpukpu-a be mu e-woru yekota l'eka ndu
ohogu phe; mbu iphe, bukotakpoo iphe, ephe
seshiru akanya iya; mekpoo iphe, bukpo iphe,

vu oke aswa, nọkota l'ime iya; mękpoo iphe, bu ęku, eze ndu Jiuda kpataru. Iphemiphe ono be ęphe a-kwakọta ọkwata vuta lasha ali ndu Babilonu. ⁶ Gubedua, bu Pasho yee iphe, bu ndu bukọta l'ibe ngu be aa-kpukota le ndzu laa ali ndu Babilonu. O buru l'eka ono be unu anodu nwushihu; l'e lia unu l'eka ono; unu le ndu yeru unu obu ono, unu suru le Chileke pfuru phe, iphe, ęphe pfuru ono."

Aphu, Jieremaya agu

⁷ Gube Chipfu; i dusweru mu uto;
mu buru onye e dusweru uto.

I mekperu mu; teme o kaleru ngu.

Mu buwaa onye anoduje eme iphe-ochi mkpurumkpuru.

Onyemonye anoduje achị mu ochi.

⁸ Tekenteke, mu epfukpoo opfu be mu araje iya arara l'omeliwe dukwa; ọla-l'iswi du.

Opfu Chipfu mewaru; mu buru onye aako onu; teme a nodu achị mu ochi mkpurumkpuru.

⁹ Teke mu sukwanuru le mu tee kubaedu iya epha; ophu mu egudebaedu epha iya epfu opfu;

opfu iya ọbu anọdu mu
l'ọkpoma enwu mu
phuruphuru g'ọku;
rakuru arakuru l'ime ọkpu
mu.

Mbu l'ike esede iya bvụwaru
mu.

Mbu ị-a; mu taa dukwa ike
esede iya.

¹⁰ Kele mu anụkwa taba taba,
ẹphe adzụgbaaru
nwibe pẹ sụ:

“Nggiri dukwa l'uzo
l'ekameka!”

Ẹphe tukururu epfu sụ: “Unu je
edoo iphe ono, oopfu
ono!

Unu g'anyi je edoo iphe,
oome!”

Iphe, bukpuo ndu mu l'ẹphe
eshi ọnyà elekọtaepho
ẹnya g'ẹphe maru
teke ẹturu a-lọ mu.

Ẹphe tuko epfu sụ: “?a maru
e-dephuu iya.

Noo teke ọ-kalẹru anyi.

Ọ buru teke ono bẹ anyi
e-melata iya iphe-a,
oome nta-a.”

¹¹ Obenu ị Chipfu nọ swiru mu
eswiru g'onye eze-ọjọgu
swiru.

Ọo ya bu ị ndu ono,
achi mu ị njọ ono bẹ ọpfu

- a-du.
 O tọ kalẹduru phe;
 ọphu ooreduru phe
 g'ẹphe tọberu.
- Oo-buru phe iphe-iphere;
 ọphu a byadu azọha
 ẹn्या-ọlwa phe azọha.
- 12 Gube Chipfu, bu
 Ọkalibe-Kakọta-Ike;
 gube onye ono ahụtajẹ ndu
 pfiuberekoto ama;
 tẹme i nọdu avoje obu yẹe
 ọriri;
 gẹ mu humanu ẹka
 iimelata phe;
 kẹle ọo ngu bẹ mu yeru
 ikpe nkemu l'ẹka.
- 13 Unu gwa ebvu nọ Chipfu!
 Unu jaa Chipfu ajaja!
 Kẹle ọ dzọtaru ndzụ onye
 adudu g'ọ dọ iya l'ẹka
 ndu ẹjo-iphe.
- 14 Gẹ mbọku, a nwuru mu
 bụkwaru eswe,
 a turu ọnu!
 G'a ta gọkwaru ọnu-ọma nọ
 eswe mbọku ono,
 ne
 mu nwuru mu onoya!
- 15 G'onye byaru ezia nna mu ozi
 ono bụkwaru onye a turu
 ọnu;
 mbụ onye byaru asụ iya:
 “A nwụkwaru ngu nwa;

ọ buru nwa nwoke!"
 K'ophu bu l'ọ nūmaru iya;
 ẹhu tsọahaa ya.

16 Gẹ nwoke ono dukwa gẹ
 mkpukpu,
 Chipfu mebyishiru;
 ọphu ọ phuduru iya
 obu-imemini.

G'ọ bukwaru iphe,
 ọo-nọdu anu l'utsu bu
 uzu-ekwa.

O -be l'eswe; l'oonuaha mkpu
 ọgu.

17 Kele ọ to pyi-gbuduru mu
 teke mu nọ l'ẹpho;
 gẹ ne mu buru ilu mu.

Ẹpho ahawa iya rọ ragbada
 jaswaroya.

18 ?Bunaa gunu mekpooru iphe,
 mu futaru l'ẹpho afuta
 ophu gẹ mu bya bya
 ahuma iphe-ehuka yẹe
 nrimaphu;
 yẹe gẹ mu bya akpo-chi
 ishi ndzu mu
 l'iphe-iphere?

21

Chileke ajika eme iphe, Zedekaya arwo iya

¹ Opfu, shi l'eka Chipfu byakwa erwua Jieremaya nchi. Ọ buru teke ono be eze, bu Zedekaya yeru Pasho nwa Malukayijia; yele onye uke Chileke, bu Zefanaya nwa Maseya g'ephẹ jepfu

iya. Ēphe bya asū iya: ² “J̄eshikwaru anyi Chipfu; kēle Nebukadineza, bū eze ndu Bábilonu l'etsokwa anyi ōgu. ?A maru; ?Chipfu e-meru anyi iphe, dū biribiri g'o shi emeje teke ndiche k'ōphu ōo-laphu azū parū anyi haa.”

³ T̄obudu iya bū Jieremaya yeru p̄hē onu sū p̄hē: “Unu sū Zedekaya l̄e-a: ⁴ Wakwa iphe, oopfu; mbū Chipfu, bū Chileke kē ndu Ízurēlu baa: Iphe, mū abya ememe bū l̄e mū e-me ḡe ngw̄ogu, unu gude alwū ōgu buru unu ōgu, bū ngw̄ogu, unu gude etso eze ndu Bábilonu ōgu; ȳē ndu Bábilonu l'onwop̄hē, bū ndu n̄o l'azū mkp̄ukpu n̄o-p̄hee unu mgburugburu. Mu e-mechaa ch̄ibata p̄hē l'ime mkp̄ukpu-a. ⁵ Ozo bū l̄e mb̄edua l'onwomu a-n̄odu etso unu ōgu. Mu a-mach̄ikpō ̄eka mu; gude ōkpu ̄eka mu v̄ua ōvuma; gude iwe tukoshi unu oke ̄ehu-eghu mu. ⁶ Mu e-chitsushicha iphe, būkpoo ndu bū l̄e mkp̄ukpu-a; nemadzū ȳē an̄u. Ō buru ejo iphe-ememe e-gbushi p̄hē. ⁷ Wakwa iphe, Chipfu epfu baa: Teke e mechaarū nno; mu eworu Zedekaya, bū eze ndu Jiuda; ȳē ndu-oz̄i iya; m̄ekpoo ndu al̄i-a, bū ndu iphe-ememe ono gbuphodoru; ȳē ndu ōphu e gbuphodoru l'ogu-echi; m̄ē ndu ōphu ̄egu gbuphodoru; ch̄iru ye Nebukadineza, bū eze ndu Bábilonu l'̄eka; ȳē ndu ōhogu p̄hē ono, bū ndu aach̄o ndzū p̄hē ono. L'ō gudekwaph̄o ōgu-echi gbushia p̄hē; ōphu ōo-hadū p̄hē. Imemini p̄hē taa dūdu iya; ōphu ō dūdu onye ōphu ōophutaru.

⁸ “Ozokwapho l̄e-a; g'̄i sū ndu-a: Wakwa iphe, Chipfu epfu baa: Unu lekwa l̄e mū dobeakwaru

unu ụzo ndzụ yee ụzo ọnwu. ⁹ Iphe, bụkpoo onye nọ lẹ mkpụkpụ-a bụ ogu-echi bẹ ee-gude gbua ya; ẹgu egbua ndu ọphu oo-gbu; iphe-ememe egbua ndu ọphuu. Onye lufukwanuru je eworu onwiya ye l'ẹka ndu Bábilonu-a, bụ ndu nọ-pheru unu mgburugburu-a; l'a-nọdu ndzụ. Onye ono e-gude ndzụ iya gbala. ¹⁰ Iphe, mu chiwaru idzu iya bụ eme g'ẹjo-iphe dapfu ndu mkpụkpụ-a; ọ tọ bụdu iphe-oma. Nokwa iphe, Chipfu eepfu. Mkpụkpụ-a bẹ ee-ye l'ẹka eze ndu Bábilonu; l'o gude ọku mebyishia ya.

¹¹ “Ọzo bụ lẹ-a; g'ị sụ ndu ọnu-ulo onye eze ndu Jiuda: Unu nụmakwa Opfu Chipfu. ¹² Unubẹ ndu ọnu-ulo Dévidi; wakwa iphe, Chipfu epfu baa: Unu kpeje ikpe, pfuru ọto mbọku-mbọku. Unu adzọtaje onye ana nfu l'ẹka onye emekpa iya ẹhu. Ọdumeka bẹ ẹhu-eghu mu a-gbanwuhukwa ọku. Ọ bụru iphe, a-kpa iya nụ bụ ẹjo-ememe, unu meshiru; mbụ l'ẹhu-eghu mu ono e-nwu ọku k'ọphu bụ l'o to nwedu onye a-gbanyị iya nụ. ¹³ Mu nọru ngu lẹ njọ gube Jierúsalemu; mbụ gube onye bu lẹ nsuda-a; mbụ gube agbara mkpuma, nọ lẹ baswaa alị ẹka-a. Ọ kwa Chipfu epfu iya anụ unubẹ ndu ono, asuje: ‘?Bụ onye abya anyi eme gunu? ?Bụ onye adu ike abata l'ẹka anyi bu-a?’ ¹⁴ Mu a-hụ unu ahụhụ g'iphe, unu meru gbaru. Ọ kwa mụbe Chipfu epfu iya. Mu a-nwuru ọku ye l'oswa unu; tuko iphe, nọ-pheru unu mgburugburu tsukota.”

22

Ikpe, e kperu eze ndu l'eme ẹjo-ememe

1 Wakwa iphe, Chipfu epfu baa: “Je l'ibe eze ndu Jiuda je araa ozi-a arara l'eka ono: 2 Numakwa Opfu Chipfu; gube eze ndu Jiuda; mbu gube onye no l'aba-eze Dévidi; gubedua l'onwongu; me ndu-ozi ngu; mekpoo ndibe ngu, bu ndu eshije l'onu-abata-a abahu. 3 Wakwa iphe, Chipfu epfu baa: Unu kpeje ikpe, pfuru nhamunha; unu emeje iphe, pfuru oto. Unu adzotaje onye ana nfu l'eka onye emekpa iya ehu. Unu ta adukwa ewere; ozoo omeliwe, unu e-meje ndu lwaru alwalwa; ozoo ndu enwedunna; ozoo unwanyi, ji phe anodedu ndzu. Ophu unu anodujeshi l'eka-a gbua ndu adudu iphe, ephe meru! 4 Kele-a; o -buru l'unu jiru obu oyi mee iphe-a, mu suru g'unu meje-a; be eze ndu no l'aba-eze Dévidi; ephe le ndu ejeru phe ozi; me ndibe phe a-nodu agba l'ugbo-inya; me l'eli inya eshi l'onu-abata ibe eze-a abata. 5 Obenu teke o bu l'unu te emedu iphe, mu suru g'unu mee; ge mu gudekwa onwomu riaru unu angu; mbu l'ibe eze-a e-mechakwaa buru ochobu. Nokwa iphe, Chipfu eepfu bu ono.

6 “Kele-a; wakwa iphe, Chipfu epfu l'opfu ehu ibe eze ndu Jiuda: A makwaru-a li du galil Giladu l'ehu mu; ozoo g'eli ubvu ubvu Lebanonu. Obenu lo to dudu iphe, e-me ge mu te eme ngu gi du g'echiegu; mbu ge mkpukpu, e te bujeduru ebubu. 7 Mu dobewaru ndu mmebyi iche g'ephe bya emebyia ngu. G'ephe ha l'onye l'onye e-gudegbaa ngwogu phe. Ephe abya egbutsushia eguru oshi sida ngu ono; bya achiru iya ye l'oku.

8 “Ikpoto nemadzu, shigbaa l'oha, du igw-

erigwe l'a-ghata lẹ mkpukpu-a; ephe aji nwibe phe su: “?Bụ gụnu meru iphe, Chipfu meru egube iphe owa-a l'ehu oke mkpukpu-a?” ⁹ Aa-sụ phe l'iphe, kparụ iya nụ bukwa l'ephe gwoberu ogbandzu Chipfu, bụ Chileke phe; je awata ephozeru agwa; baahaarụ iya eja.”

¹⁰ Unu ta arakwa ekwa onye eze
ono, nwuhuru nụ ono!

Ophu unu emekwa
ekwa iya!

O buchikwaa onye unu
a-kwa ekwa iya
kwashia ya ike
bụ onye ophu a kpuru
lẹ ndzụ laa eka ozo.

Noo kele o tọ lwabaedu;
ophu oohumabaedu
alì eka a nwuru iya ozo.

¹¹ Kele-a; wakwa ge Chipfu pfuru opfu ehụ Shalumu nwa Jiosaya, bụ onye no-chiru okwa nna iya; bya aburu eze, ndu Jiuda; mbụ onye ono, tugbuwaru l'eka-a: “O tọ lwabaekwa. ¹² O kwa l'eka ono, ephe kpuru iya lẹ ndzụ laa ono be oo-nodu nwuhu. O tọ humabaekwa alì eka-a enya ozo.”

¹³ Nshio onye ono, akpu unuphu ibe eze iya l'uzo,
apfuduru-oto;
mbụ onye bụ l'uzo,
apfuduru nhamunha be
o gude akpu ulo-eli iya;
onye meru ndu alì iya;
ephe nodu eje ozi ke

mmanụ;
 ọp̄hu ọp̄fudu p̄hẹ ụgwo
 ozi p̄hẹ.

14 Ọ nọdu ep̄fuje sụ: Mu a-kwa
 unup̄hu ibe eze mu g'ọ
 paa ẹka.

Ya e-mee ụlo-eli iya g'ọ d̄ ọsa.
 Ọ bya emee ya bya eyeshia
 ya windo;
 bya egude oshi sida gbaa
 ya uko;
 bya etee ya penti
 uswe-uswe gude rwaa
 ya.

15 “?Bụ ak̄ushi ụlo oshi sida
 l'e-me g'ị b̄ru onye
 eze ọọ?”

Nna ngu; ?to shidu eri nri;
 anḡu ip̄he,
 aanḡu anḡungu?

O nọdu ekpeje ikpe,
 p̄furu nham̄nha;
 bya eme ip̄he,
 p̄furu ọto.

Iphemip̄he d̄ru iya l̄ ree.

16 Ndu eje ip̄he-ẹhuka;
 waa ndu ad̄udu g'ọ
 d̄ p̄hẹ b̄ ọ gbaru
 ọdzori;
 ọ d̄ru iya l̄ ree.

?T̄obudu ip̄he ono b̄ l'onye-a
 maru onye mu b̄?”

Nokwa ip̄he, Chipfu eep̄fu.

17 Obenu ịe gụbedua be ọnya
 ngu;
 yee okpoma ngu bu
 l'eka i phoberu iya
 bu l'eri urwu
 ghelegheleghele;
 yee egbu ndu adudu
 iphe, ephe meru;
 yee eme nemadzu
 iphe-kpanganga yee
 omeliwe.

18 Oo ya bu lee-a; wakwa iphe, Chipfu epfu
 l'opfu ehu Jiehoyakimu, bu nwa Jiosaya, bya
 aburu eze ndu Jiuda:

A taa rakwa ekwa iya su:
 Owiwo nwune mu nwoke-e!
 Owiwo nwune mu nwanyi-e!
 A taa rakwa ekwa iya su:
 Owiwo onye nwe mu nu-e!
 Owiwo eguru onye-a!

19 Ee-li iya g'onye eli
 nkapfu-igara.

Mbu l'oo wuruwuru be
 aa-lo iya lota
 je etuphaa l'azu mkpukpu
 Jierusalemu.

20 "Jekwa l'ubvu ubvu Lebanonu
 je echia mkpu!

Ge ndu ali Beshanu
 numakwa olu ngu!

Jekwa anodu l'eli ubvu ubvu
 Abarimu chia mkpu;
 kele ndu gu l'ephe

tugbaru buru nanu
 be e gbushichaakwaru
 g'ephe ha.

21 Mu kakwaru ngu teke ono,
 i shi dobesu l'o to dudu
 iphe,
 byaru eme ngu nu ono.

I sula-a l'i tii yedu onu.
 O kpokwa g'i shi teke i bu
 okorobya meta bu ono.
 I tiki meswekwaa iphe,
 mu suru g'i mee.

22 Pherephere a-tuko ndu
 echeru ngu aturu pata.
 L'a tuko ndu gu l'ephe
 tugbaru buru nanu
 kpu le ndu.

Noo teke iphere e-gude ngu;
 l'e woru ngu iphu kpu
 le nu.

O buru iphe, kparu iya nu
 bu ejo-iphe, iimegbabe.

23 Unube ndu bu l'ubvu ubvu
 Lebanonu;
 mbu ndu kparu epfune
 l'ulo, a kuru l'oshi-sida;
 egube ude,
 unu e-mechakwanaa
 tsu teke iphe-ehuka
 azu unu gburumu
 pfurii;
 mbu meahaa unu ehuka ge
 nwanyi, ime eme!"

24 Wakwa iphe, Chipfu epfu baa: “Eshinu mu nọ ndzụ gę mu nọ iya-a; bę ọ tọ dukwa m'obeta gube Jiehoyakinu, nwa Jiehoyakimu, bụ eze, ndu Jiuda bụru echi-ọhubama, mu gba l'ekutara mu; mu agbafulekwa ngu-a. 25 Mu e-woru ngu ye l'eka ndu achọ ndzụ ngu; mbụ ndu iitsu ebvu; mbụ l'eka Nebukadineza, bụ eze ndu Babilonu; yele eka ndu Babilonu. 26 Mu e-tuphakupę ngu phọ etupha; gụ lę ne, nwuru ngu nụ; je echie unu l'alị eka ọzo; eka abudu eka a nwuru ngu; ọphu ọ bụdu eka a nwuru ne ngu. Ọ bụru l'eka ono bę unu n'ębo a-nọdu nwuhu. 27 Unu ta abyadu alaphu azụ l'alị ono, a-nọdu agụ unu alwalwa ono.”

28 Jiehoyakinu-a; ?ọ bụ ite-urwa, tukpohuru nụ, a jikaru ajika tọ? Mbụ iphe, adudu onye ọ dū ree? ?Bụ gunu meru g'o gude a chiru yę unwegirima ibe iya etuphashia; je eworu phę chiru ye l'alị eka ephe amadu?

29 Gube alị! Alị! Alị! Nụmakwa
Opfu Chipfu!

30 Wakwa iphe, Chipfu epfu
baa:

“Dee nwoke-a l'ekwo l'ọ bụ
onye enwedụ nwa;
onye iphe ta aduduru lę
ree teke ọ nọ ndzụ.

Noo kele ọ tọ dudu awa
iya ọphu iphe,
byaru aduru lę ree.

Ọphu ọ dudu onye ọphu
byaru anọdu l'aba-eze
Dévidi.

Mbụ l'ọ tọ dudu onye
 ọphu byaru aburu
 eze ndu Jiuda.”

23

Ekali iya ọphu p̄fuberekoto

¹ Wakwa iphe, Chipfu epfu baa: “Aphụ a-tsokwaru ndu nche aturu ono, bụ ndu ọphu emebyishi aturu mu bya achikashi iya achikashi l'alị mu.” ² Ọo ya bụ ị-a; wakwa iphe, Chipfu epfu; mbụ Chileke ndu Ízurelu; iphe, oopfu anụ ndu nche aturu, eche ndibe iya: “Eshinu unu chikashiru aturu mu achikashi; mbụ chị-phua ya achị-phu; ọphu unu eletadu iya ọnya; bẹ mu e-letakwanụ unu ẹjo eleta; chia unu iphe ẹjo-ememe ono, unu meru ono.” Nokwa iphe, Chipfu eepfu bụ ono. ³ “Ọo mbeḁua l'onwomu e-je achikota nwa ndu phoduru nụ l'unwu aturu mu ono l'iphe, bụkpoo alị ẹka mu chiru phẹ jeye g'ọ ha; duphuta phẹ azụ l'ẹka ẹphe a-tajẹ nri, bụ ẹka ẹphe a-nọdu wata azuzu; aka igwerigwe eje. ⁴ Mu e-ye ndu nche aturu, a-nọdu eleta phẹ ọnya. Teke ono bẹ ndzụ taa guedu phẹ; ọphu ọ duedu iphe, eyekwadu phẹ ebvu; ọphu ọ duedu ọphu aachokwadu achọcho.” Nokwa iphe, Chipfu eepfu.

⁵ Wakwa iphe, Chipfu epfu baa: “E -mechaa bẹ mu e-metaru Dévidi ẹkali iya ọphu a-p̄fube ẹka ọto; mbụ onye eze, e-gude mmamiphe bụru eze; tẹme l'ọ nọdu ekpe ikpe, p̄furu nhamunha bya eme iphe, p̄furu ọto l'alị-a. ⁶ Ọ bụru teke ọ bụ eze bẹ aa-dzọta ndu Jiuda. Ndu Ízurelu anọdu;

ọ tọ dudu iphe, eme phẹ nū. Onye ono bẹ iphe, ee-ku iya bụ: ‘Chipfu, bụ apfubekoto anyi.’”

⁷ Wakwa iphe, Chipfu epfu baa: “Ọo ya bụ l'ọ -rwua mbọku ono bẹ ndiphe taa sụbaedu: ‘Eshinu Chipfu nọ ndzụ g'ọ nọ iya-a; mbụ onye dufutaru ndu Ízurelu l'alì Ijiputu.’” ⁸ Ọ bụwaru iphe, ee-pfuje bụ: ‘Eshinu Chipfu nọ ndzụ g'ọ nọ iya-a; mbụ onye dufutaru oshilọkpa Ízurelu l'alì ndu isheli waa l'iphe, bụkpoo ọhamoha, bụ ẹka o shi chị-phua phẹ.’ Teke ono bẹ ẹphe e-buru l'alì k'ẹka phẹ.”

Ndu epfu iphe, Chileke epfuduru

⁹ A -bya l'opfu-ẹhu ndu
mpfuchiru;
ọkpoma agbawahụkwa
mu agbawahụ.
Mbụ l'ọkpu mu l'ophu
anmakọta mu jijijiji.
Mu dọephọ g'onye mọe atsu;
mbụ g'onye mọe tų-tsuru.
Ọ bụru iphe, kparụ iya nū
bụ Chipfu yẹe opfu iya,
dụ nsọ.
¹⁰ Alì ẹka-a l'ophu bụ iphe,
jiru iya nū bụ ndu
eri ogori.
Ọ bụru ọnu, a tųru meru
g'ọ gude alì ẹka-a nọdu
l'aphụ.
Ẹka anụ akpajẹ nri
l'echięgu kpọhu jegiri
jegiri.

Ndu mpfuchiru nõdu
eme ejo-iphe;
tẽme ephe nõdu eme ike
phẹ g'ọ gbaduru.

11 Wakwa iphe, Chipfu epfu:
“Ndu mpfuchiru mẹ ndu-uke
Chileke tukururu buru
ndu te emedu ele Chileke.
Mbụ lẹ mu humacharu
ejo-iphe obu,
ephe eme obu l'eze-ulo
mu.

12 Noo g'o gude ọzo phẹ je
l'awata echi eturu.
Aa-chiru phẹ chi-phua
l'eka agba ochii.
Ọ buru eka ono bẹ ephe
a-da iko.

Mu egude ejo-iphe
dapfu phẹ teke ono,
ee-chi phẹ iphe ono.”
Nokwa iphe, Chipfu eepfu
bụ ono.

13 “L'echilabọ ndu mpfuchiru,
shi lẹ Samériya bẹ mu
humaru ebyi-a:
mbụ l'ephe epfuchiru Balu;
gude egube ono eduphu
ndibe mu, bụ ndu Ízurelu.

14 Tẹmanukwapho; l'echilabọ
ndu mpfuchiru kẹ
Jierúsalemuru bẹ mu
humakwarupho iphe,
anyị ishi edzu.

Èphe anọduje eri ogori;
 tẹme ndzụ phẹ bụru
 adzụ ụka.

Ndu eme ẹjo-ememe
 bẹ ẹphe anọduje eme
 g'ẹka ka phẹ esihu
 ike l'iphe, ẹphe eme;
 k'ọphu bụ l'ọ tọ
 dudu onye ọphu
 aghajeru ẹjo-iphe,
 oome azu.

L'ẹhu nkemu bẹ ẹphe
 dukotaepho gẹ ndu
 Sodomu;
 ndu Jierúsalemu dukotae
 mu phọ gẹ ndu Gómóra.”

¹⁵ Oo ya bụ ẹ-a; wakwa iphe, Chipfu, bụ
 Ọkalibe-Kakọta-Ike eepfu l'opfu ẹhu ndu mp-
 fuchiru:

“Mu e-me g'ẹphe ria nri,
 atsọ ilu;
 ẹphe angụ mini,
 e yeru iphe,
 egbu egbugbu.

Noo kele ọo l'ẹka ndu
 mpfuchiru,
 shi Jierúsalemu bẹ o shi;
 be eme ele Chileke
 barahụ dzuru alị ẹka-a
 l'opfu.”

¹⁶ Wakwa iphe, Chipfu, bụ Ọkalibe-Kakọta-
 Ike eepfu: “Unu ta angajekwa nchị l'iphe, ndu
 mpfuchiru epfuru unu. Èphe emejekwa g'unu
 chiru ụpfu ye l'iphe, te emedu ememe. Èphe

asuje l'ẹphe phuru ọphulenyà; ama l'ọo iphe, ẹphe ritaru l'ọkpoma. Ọ tọo bụduru iphe, shi yẹbe Chipfu l'ọnu. ¹⁷ Tekenteke bẹ ẹphe anọduje epfuru ndu kpọru mu ẹbo l'afu sụ phẹ: 'Wakwa iphe, Chipfu epfu baa: Ẹhu a-dụkwaa unu guu!' Ndu ọphu bụ iphe, shi l'ẹjo ọkpoma phẹ bẹ ẹphe anọduje eme; ndu k'ono bẹ ẹphe asuje: 'Ọ tọ dụkwa iphe, byaru emebata unu.' "

¹⁸ Obenu lẹ-a; ?bụ onye ole pfujeru gẹ yẹe Chipfu chia idzù lanụ; kẹ g'ẹphe humakwanu iphe, eme nụ; ọzoo numa opfu iya? ?Bụ onye ngabejeru nchi numa opfu iya? ¹⁹ Lekwa; Chipfu gudeakwa ẹhu-eghu ezi oke pherephere; mbụ ẹjo oke pherephere. Ọ bụru l'ishi ndu ẹjo-iphe bẹ ọophu temutemu. ²⁰ Ọphu ẹhu eghubuhukwa Chipfu eghu ghiriri jasụ l'o meebekota iphe, dū iya l'ọkpoma k'ememe. Mbọku abya-a l'uzo iphu teke iphe-a l'e-dokota unu ẹnya ree.

²¹ "Ọ tọ bụdu mbẹdua ziru ndu mpfuchiru-a ozi. Ẹphe gudele-a ozi phẹ agba phuchaphucha. Ọphu mu epfukwaru opfu yeru phẹ; ẹphe nọdu epfulẹ-a epfuchiru mu. ²² Obenu l'ọme ẹphe pfujeru; mu l'ẹphe chia idzù lanụ; mẹ ọ -bụru iphe, mu pfuru bẹ ẹphe gege eje araaru ndibe mu arara; m'ẹphe emekwanaa; ẹphe aghakọbe; haa ẹjo ọzo, ẹphe etso; yẹe ẹjo-ememe, ẹphe eme."

²³ Wakwa iphe, Chipfu epfu baa: "'Ọ dū gẹ mu bụepho Chileke, nọ ntse; ọphu mu abụedu Chileke, nọ ụzenya tọo?" ²⁴ Wakwa iphe, Chipfu epfu baa: "'Ọ nweru onye e-je l'ẹka dū k'edomi onwonye je edomia onwiya k'ọphu bụ lẹ mu taa humadu iya tọo? ?Mu te ejiduru imigwe; bya

eji eliphe l'ophu?" Nokwa iphe, Chipfu eepfu bu ono. ²⁵ "Mu nũaaakwaru iphe, ndu mpfuchiru ono epfu, bu ndu egudeje epha mu epfu iphe, mu epfuduru. Epe asuje: 'Mu rworu nrwo! Mu rworu nrwo!'

²⁶ "?Bukpoo teke ole be egube iphe owa-a ano-beru l'okpoma ndu mpfuchiru-a, te epfudu ire-lanu-a; ndu buepho ejo oriri, bataru phe l'egomunggo be epe epfuje. ²⁷ Epe edobesuje le nrwo ono, epe ezeru nwibe phe ono e-me ge ndibe mu zohaa epha mu egube ono, nna phe oche phe gude abaru Balu eja zohaa epha mu ono.

²⁸ "G'onye mpfuchiru, arwo nrwo zenupho nrwo iya; obenu le-a; g'onye ophu numaru opfu mu gude ire-lanu pfua ya; kele-a; ?bu awe be eswa akpe eje aturu akpuru iya?" Nokwa iphe, Chipfu eepfu. ²⁹ Wakwa iphe, Chipfu epfu baa: Opfu, shi mu l'onu dukwa g'oku; teme o dukwapho g'ongu, etsuje mkpuma yogiri yogiri.

³⁰ Oo ya bu le-a; Wakwa iphe, Chipfu epfu baa: "Mu no-chikwaru uzo ndu mpfuchiru ono, ejeje ezita opfu, nwibe phe pfuru bya epfu; bya asu l'oo mu pfuru iya onoya. ³¹ Mbụ le-a; mu no-chikwaru uzo ndu mpfuchiru ono, asaje onu phe su le mu suru ono." Nokwa iphe, Chipfu eepfu.

³² Wakwa iphe, Chipfu epfu baa: "Lekwa; mu no-chikwaru uzo ndu ono, arwoje nrwo eregede ono; ndu anoduje eze nrwo obu; shi nno mee ge ndibe mu tsoru uka ono, epe adzu ono; yee eku-onwonye ono phua uzo ono. Ophu o budu l'oo mu ziru phe; ophu o dukwa ekemu, mu turu nu phe. Oo ya bu l'o to dukpoda urwu, epe abaru

ndu-a ililekpoo.” Nokwa iphe, Chipfu eepfu.

³³ “Teke ndu ẹka-a; ọzoo onye mpfuchiru; ọzoo onye uke jiru ngu sụ ngu: ‘?Ị jiru Chipfu ọ sụ g'e mee ọgunu?’ L'ịisu phe-a: ‘G'e mee ọgunu bu ọgunu? Ọ sụru lẹ ya a-gwọbe unu! Noo iphe, Chipfu epfu bu ono.’ ³⁴ Teke ọ bukwanu l'onye mpfuchiru; ọzoo onye uke; ọzoo onye ọzo mmanu pfulaharu sụ lẹ ya jikwaru Chipfu; o zia iphe, ee-me; mu anua onye obu aphu; yele ndibe iya g'ephe ha. ³⁵ Iphe, unu a-nọduje aji nwibe unu phe; aji iya unwunna unu phe bu: ‘?Chipfu sūhunuru agha g'a jiru iya?’ Mbu: ‘?Buhunu ọgunu be Chipfu pfuru?’ ³⁶ Ọle-a; unu te egudekwa onu unu pfua iphe, unu jiru Chipfu; ọ sụ g'e mee ọzobakpo. Kele ọ buwaa iphe, onyemonye pfuru onwiya be oome; unu gude nno woru opfu ke Chileke, nọ ndzụ gha igharaphu; mbu Chipfu, bu Okalibe-Kakota-Ike; bya aburu Chileke anyi. ³⁷ Waa iphe, iipfujeru ndu mpfuchiru baa: ‘?Unu jiru Chipfu; ọ sūhunu unu agha?’ Mbu; ‘?Bu ọgunu be Chipfu pfuru?’ ³⁸ A makwaru-a l'unu epfu l'unu jiru Chipfu; o zia unu iphe, e-me nu. Ọle-a; wakwa iphe, Chipfu epfu baa: Iphe, unu anọduje epfu bu: ‘Wakwa iphe, a jiru Chipfu; ọ sụ g'e mee’; mbu ọ bukwaru unube ndu mu sūru g'unu te epfuekwa nno. ³⁹ Ọo ya bu lẹ-a; mu zohafutajekwa unu; chifu unu l'iphu mu; unu lẹ mkpukpu ono, mu nuru unu lẹ nna unu oche phe ono. ⁴⁰ Ujikputeru, mu e-me unu a-nokwa ojejoje; mbu l'ọo-buru iphe-iphere, a-nọ ojejoje; ophu a byadu azoha iya azoha.”

24

Nkata akpuru oshi figu labo

¹ O be g'a kpuchaaru ndu-a le ndzu; mbu Jiehoyakinu nwa Jiehoyakimu, bu eze ndu Jiuda; ephe le ndu-ishi ndu Jiuda; mekpoo ndu emeje ona; yee ndu akpu uzu; be e shikota le Jierusalemu kpu le ndzu laa ali ndu Babilonu. O buru onye kpu phe nu bu Nebukadineza, bu eze ndu Babilonu. O be g'a kpuchaaru phe le ndzu ono; Chipfu goshi mu nkata akpuru oshi figu labo, a subegbaaru l'aguga eze-ulo Chipfu.

² Nkata lanu bu iphe, du iya nu bu akpuru oshi figu, du ree shii, dugbaa ge figu, charu egwa. Nkata ophuu buru iphe, du iya nu bu figu, du eji shii; mbu lo du-be eji; k'ophu bu lo to dudu k'eriri. ³ Noo ya bu; Chipfu bya aja mu su: “?Bu gunu be i humaru; Jieremaya?”

Mu su iya: “O kwa akpuru oshi figu. Ndu ophu du ree dushikpoo ree ike; ndu ophu du eji dushikwanaa eji ike k'ophu bu lo to dudu k'eriri.”

⁴ Tobudu iya bu; mu bya anuma opfu ke Chipfu, suru mu: ⁵ “Wakwa iphe, Chipfu, bu Chileke ke ndu Izurelu epfu baa: O kwa g'akpuru oshi figu figu owa-a, dugbaa ree-a du; bu ge ndu ono, a kpu le ndzu l'ali ndu Jiuda du mu ree, bu ndu mu chifuru l'ali-a chiru je eye l'ali ndu Babilonu. ⁶ Mu e-gude enya mu eche phe nche g'o duru phe le ree. E -mechaa; mu edulatakwa phe pho ozo l'ali eka-a. Teke ono be mu e-me g'ephe paa eka; ophu mu akwatsuedu phe. Mu a-dza phe g'onye dzaru oshi; ophu mu

ephefubaedu phe ephefu. ⁷ Mu a-nu phe obu, ephe e-gude maru mu; mbu l'oo mu bu Chipfu. Ephe a-buru ndibe mu; mbedua aburu Chileke phe. Noo kele ephe e-gude obu phe l'ophu l'ophu lwapfuta mu.”

⁸ Wakwa iphe, Chipfu epfu baa: “A bya le k'akpuru oshi figu ono, du eji ono; mbu duta-beru eji; k'ophu bu l'e tee ridu iya eriri ono; noo ge mu e-me Zedekaya, bu eze ndu Jiuda bu onoya; me ndu-ishi l'ali-eze iya; mekpoo iphe, bu ndu ono, phoduru le Jierusalemu ono; m'ephe -no l'ali eka-a; m'ephe -no l'ali ndu Ijiputu. ⁹ Mu e-me phe g'ephe buru ndu ali-eze unwu-eliphe l'ophu a-nodu aso oyi. Ephe a-buru phe iphe e gude achi ochi; me iphe, e gude anma l'etu. Ee-gude phe agba mgbonu; gude phe ephu l'iphu l'iphe, bukpo eka mu chiru phe ye. ¹⁰ Mu e-me g'e gbua phe l'ogu-echi; egu emee phe; ejo iphememe emee phe gbiriri jasu ephe abvubebe l'ali-a, mu nuru phe; yele ndiche phe-a.”

25

Ndu a kpuru le ndzu a-no iya ukporo apha eto l'apha iri

¹ Owaa bu opfu Chileke, o pfuru Jieremaya le ke ndu Jiuda l'ophu l'apha, kwe Jiehoyakimu, bu nwa Jiosaya apha eno, o wataru aburu eze ndu Jiuda. Apha ono bu apha mbu, Nebukadineza wataru aburu eze ndu Babilonu. ² Jieremaya, bu onye mpfuchiru Chileke numaepho opfu Chileke ono; o pfuaru iya ndu Jiuda l'ophu; ephe l'iphe, bu ndu bukota le Jierusalemu. O suru phe-a:

³ “E -shi k'ukporo apha l'apha ẹto nta; mbu e -shi l'apha, kwe Jiosáya bu nwa Amonu apha iri l'eto, o wataru aburu eze unube ndu Jiuda; byasu ntanu owa-a; be mu shiepho nuta Opfu Chipfu; mu nodu epfueru iya pho unu mpfuto; ophu unu angajeduru nchi. ⁴ Temekpoo Chipfu bya eyekpo ndu-ozu iya ono, bu ndu mpfuchiru iya g'ephe ha n-yeto g'ephe bya epfuaru unu opfu; ophu unu angaduru nchi; teme ophu unu eyeduru onu.

⁵ “Epe pfua su: ‘Unu ghakobedupho nta; g'unu ha l'ehu l'ehu; unu hadapho ejo-ememe, unu eme; mekpoo ejo-iphe, unu anwu ememe. O kwa iya bu g'unu a-nodu l'ali ono, Chipfu nuru unu; bya anu iya ndiche unu phe ono jasu l'ojeje. ⁶ Unu be tsoshi agwa ndu ozo. Unu be jeshiru iya ozi; ophu unu abashiru iya eja. Unu be gudeshi iphe, unu gude eka mee gude akpatsu Chipfu iwe. O kwa iya bu le mu te emekaduru unu iphe.’ ⁷ Ophu unu eyeduru mu onu; unu gude iphe, unu gude eka unu mee gude akpatsu mu iwe. Unu shi egube ono mekaahaa onwunu iphe.” Nokwa iphe, Chipfu eepfu bu ono.

⁸ Oo ya bu le-a; wakwa iphe, Chipfu, bu Okalibe-Kakota-Ike eepfu baa: “Eshinu unu ta ngabeduru nchi l'opfu, mu pfuru; ⁹ be mu achikobe ndu isheli l'ipfu l'ipfu; yee onye-ozu mu, bu Nebukadineza, bu eze ndu Babilonu. O kwa Chipfu epfu iya. Mu achiru phe bya g'ephe buru ndu ali-a ohogu; yee iphe, bu ndu bu iya nu; me iphe, bukpooha, bupheru phe mgburugburu. Mu e-mebyishibebe phe rengurengu kpoo; mee phe; epe aburu iphe,

anyị ishi ẹdzu; bya aburu iphe e gude eme iphe ọchi; yele iphe, e gude ephu l'iphu; teme l'ọburu ochobu jasụ l'ojejoje. ¹⁰ Mu e-me g'ọ-phuwuruwuru k'ẹhu-utso yele ete ẹswa ta aduhe l'echilabọ phẹ; ọphu olu nwanyị, alụ ji; yele kẹ nwoke, alụ nwanyị ọphúú aduedu; ọphu ọda ikwe nri aduedu iya; ọphu ọku emeedu iya jaa. ¹¹ Alị ẹka-a l'ọphu l'ọphu a-buru okorobo ochobu; teme ọha-a l'ọphu anodugbaa eze ndu Bábilonu l'ẹka; ụkporo apha ẹto l'apha iri. ¹² Teke ụkporo apha ẹto l'apha iri ono dzuerupho; mu anụa eze ndu Bábilonu aphụ; yele ọha ono l'ọphu. Mbụ l'alị ndu Bábilonu l'ọphu bẹ mu a-nụ aphụ ejọ-iphẹ, ẹphe meshiru. Mu eworu iya togbo; l'ọburu ochobu jasụ l'ojejoje. Nokwa iphe, Chipfu eepfu. ¹³ Alị ẹka ono bẹ mu e-mekọta iphemiphe, mu pfuhawaru lẹ mu e-me iya; mbụ iphemiphe, e deru l'ẹkwo, bụ iphe, Jieremaya pfuru lẹ mpfuchiru lẹ k'ọhamoha l'ọphu. ¹⁴ Ẹphebedua bẹ ọha, dụ igwerigwe; yele eze ndu parụ ẹka e-mechakwaphọ mee phẹ ohu. Mu apfua phẹ ụgwo g'iphe, ẹphe meru gbaru; yele iphe, ẹphe gude ẹka phẹ meta.”

Okoro oke-ẹhu-eghu Chileke

¹⁵ Wakwa iphe, Chipfu, bụ Chileke ndu Ízurelu pfuru mu baa: “Okoro-a, bụ iphe, jiru iya nụ bụ mee k'oke-ẹhu-eghu mu-a; nafunu mu iya l'ẹka. Jenụ emee g'iphe, bụ ọha, mu e-zi g'i je alị phẹ ngụkota iya! ¹⁶ Ẹphe -ngue ya phọ; ẹphe awata akpọ garigari; wata eme ọbvụ ọbvụ; kele mu achiru ndu ogu-echi ye g'ẹphe buru phẹ ọgu.”

17 Tɔbudu iya bu; mu bya anata Chipfu okoro ono; bya ejee ohamoha, bu eka o ziru mu je emee; epe ngukota iya; 18 mbu Jierusalemu; waa mkpukpu, nogbaa l'ali ndu Jiuda; waa ndu eze phe; waa ndu-ishi l'ali-eze iya; g'e mekota iya g'o buru ochobu; yele iphe, anyi ishi edzu; waa iphe, e-gude achi ochi; me iphe, e-gude ephu l'iphu, bu g'o du ntanu-a; 19 waa Fero, bu eze ndu Ijiputu; waa ndu-ozu iya; waa ndu-ishi l'ali-eze iya; waa ndu nkiya g'ephe ha; 20 waa iphe, bu ndu ohozo, bu l'ali Ijiputu; waa iphe, bu eze ndu ndu Uzu; waa iphe, bu eze ndu ndu Filisitayinu; mbu eze, ndu mkpukpu Ashikelonu; yele eze ndu mkpukpu Gaza; waa eze ndu mkpukpu Ekuronu; yele nwa ndu phoduru le mkpukpu Ashidodu; 21 waa ndu Edomu; waa ndu Mowabu; waa ndu Amonu; 22 waa iphe, bu ndu eze ndu Taya; waa iphe, bu ndu eze ndu Sayidonu; waa iphe, bu eze ndu ndu bu l'azu eze-enyimu azu iya ophuu; 23 waa ndu Dedanu; waa ndu Tema; waa ndu Buzu; waa iphe, bu ndu bugba l'oha, du enya; 24 waa iphe, bu eze ndu ndu Arabu; waa iphe, bu ndu eze ndu ohozo, bu ndu bu l'echiegu; 25 waa iphe, bu eze ndu ndu Zimiri; waa iphe, bu eze ndu ndu Elamu; waa iphe, bu ndu eze ndu Midiya; 26 waa iphe, bu ndu eze ndu isheli; ndu bu ntse; me ndu ophu bu enya; mbu ndu ono g'ephe hakpo nanunanu; mbu-a; o buepho ali-eze, nokota l'eliphe mgburugburu. G'ephe ha -nguchaa ya; eze ndu Sheshaku angukwaa ya pho.

27 "Su-a; waa iphe, ii-pfuru phe baa: Wakwa iphe, Chipfu, bu Okalibe-Kakota-Ike eepfu; mbu

Chileke ke ndu Ízurelu: Unu ngua iphe-a; g'ọ tsu unu atsutsu; unu agbọo ya; unu adaa iko; unu taa gbeshibaedu agbeshi; ọ buru iphe, akpa iya nū bu lẹ mu a-chiru ndu ogu-echi yeru unu. ²⁸ Ọle teke ephe jikaru l'ephe taa natadu ngu okoro obu angu iphe, nọ iya nū; l'ịisu phe-a: Wakwa iphe, Chipfu, bu Ọkalibe-Kakọta-Ike eepfu baa: Unu ngufutajekwa iya! ²⁹ Lenu! Mu gudeakwa ejo-iphe abyapfuta mkpukpu ono, eeku eyeru epha mu ono. ?Unu arị l'unu a-la g'a ta nū unu aphụ? Unu taa alakwa g'a ta nū unu aphụ; kele mu e-ku ogu-echi oku g'ọ bya egbufu iphe, bu ndu bu lẹ mgboko-a.” Nokwa iphe, Chipfu, bu Ọkalibe-Kakọta-Ike eepfu.

³⁰ Nta-a bu lẹ-a; tuko iphe-a,
mu pfuru ngu-a pfuaru
phe; sụ phe lẹ-a:
“Chipfu a-gbẹkwa
l'ephekerephe gbọo
uja.
Ọo-nọdukwa l'ibe iya,
dụ nsọ chia mkpu;
gbọoru ndu alị nkiya uja.
Ọo-nọdu ara gbagbagba
ge ndu azoshi akpuru
vayinu.
Ọ buru ndu ọo-nọdu
araru iya bu ndu bu
l'eliphe l'ophu l'ophu.
³¹ Ụtsú a-da gbaa mgboko
ophorokpo;
kele opfu daru Chipfu
yele ohamoha.

Oo-kpe nemadzū l'ophu ikpe;
 woru ndu ẹjo-iphe haa
 g'e gude ogu-echi
 gbushia.”

Nokwa iphe, Chipfu eepfu.

³² Wakwa iphe, Chipfu, bụ Ọkalibe-Kakọta-Ike eepfu baa: “Lenu! Ẹjo-iphe asakwa galagala; o -shi l'ọha ọwa l'ọsobá l'ọhozo. Mbụ l'oke pherephere abyakwa ezizi. Ọ bụru ẹka oo-shi bụ l'ẹka igwe beru alì beru.” ³³ Lẹ teke ono bẹ ndu Chipfu phuru tẹterii a-tuko dabyigbaaru l'ẹkameka; eshi l'ishi mgboko ishi iya-a jasụ l'ishi iya ọphuu. Ọ tọ dudu onye a-ra ẹkwa phẹ; ophu aa-pakọbedu odzu phẹ; ophu ee-lidu phẹ elili. Ọ chia l'ẹphe a-dujegbaa gẹ nshì dọru l'alì.

³⁴ Unubẹ ndu eche aturu; unu raa ẹkwa chia mkpu! Unu rwaphua onwunu l'urwuku; unubẹ ndu-ishi ikpoto aturu! Noo kele teke ee-gbushi unu rwuakwaru. Unu a-da iko tukposhihu g'ite-urwa, dọ ree. ³⁵ Ndu eche aturu te enwedu ẹka ẹphe a-gbaru laa; ophu ndu-ishi ikpoto aturu enwedu ẹka ẹphe a-gbaru laa gude nahụ. ³⁶ Ọ kwa olu ẹkwa ndu eche aturu ada ẹgube phọ; mkpu, ẹphe echi; mbụ ndu-ishi ikpoto aturu; noo kele Chipfu emebyishiwa ẹka ẹphe echeje aturu phẹ. ³⁷ Phorokotoko ẹka ono, shi daa nyonyoronyo ono bẹ ee-me g'ọ dabyiru ke mmanụ. Ọ bụru iphe, a-kpa iya nù bụ ẹhu-eghu Chipfu. ³⁸ Ọo-paru ọgba iya haa g'oduma; alì phẹ aburu ochobu. Ọ bụru iphe, a-kpa iya nù bụ ogu-echi ndu emekpa phẹ ẹhu. Ọzo bụ iphe, a-kpa iya nù bụ oke ẹhu-eghu Chipfu.

26

Eeme g'e gbua Jieremaya

¹ O be lẹ gẹ Jiehoyakimu nwa Jiosáya bahuerupho l'aba-eze ndu Jiuda k'òphúú; Chipfu bya epfua opfu sù: ² “Wakwa iphe, Chipfu epfu baa: Je je apfuru l'oma-unuphu eze-ulo Chipfu je epfuru yeru iphe, bukpoò ndu bu lẹ mkpukpu, noğbaa l'ali ndu Jiuda, bu ndu abyaje abaru Chileke eja l'ulo Chipfu. Pfuaru phe iphemiphe, mu sùru ngu g'i pfuaru phe. Te pfuphodokwaru phe iya mẹ nanu. ³ ?A maru; ?ephe angabe nchi. Onyenonu aghakobe haa ejo-ememe, oome. Oo ya bu; mu apalia pazeta. Mu tee meedu phe ejo-iphe, mu shi doberu phe; bu iphe, kparu iya nu bu ejo-ememe, ephe meshiru.

⁴ “Iphe, ii-pfuru phe bu lẹ-a: O -buru l'unu taa ngabeduru iya nchi; eme iphe, mu turu ekemu iya, bu ophu mu doberu l'iphu unu; ⁵ teme o -buru l'unu taa ngadu nchi l'opfu, ndu-ozì mu, bu ndu mpfuchiru epfu, bu ndu mu ziru; ephe byapfuta unu; ephe -byachaa; ephe abyabaa; ophu unu angaduru nchi; ⁶ be mu e-mekwa ulo-a g'o du gẹ Shilo; mee mkpukpu-a l'oburu iphe, ee-gudeje ephu l'iphu l'ohamoha, no lẹ mgboko mgburugburu.”

⁷ No iya; ndu-uke Chileke; mẹ ndu mpfuchiru; mekpoo ndu Izurelu l'ophu numakota eka Jieremaya epfu iphe ono l'ulo Chipfu. ⁸ Toòudu iya bu; epfughe, Jieremaya epfugheru ndu ono g'ephe ha iphe, Chipfu sùru g'o pfua; ndu-uke ono; mẹ ndu mpfuchiru ono; mekpoo ndu ono g'ephe hakota zule iya pho gburumu gude; su

iya: “Ì nwùhujekwa! ⁹ ?Denu g'o gude i gude epha Chipfu epfu l'ulo-a e-mechaa dụ gẹ Shilo; tẹme lẹ mkpukpu-a e-mechaa buru ochobu, adudu onye bu iya nu?” Tọbudu iya bu; ndu ono l'ophu bya azupyabe Jieremaya l'ulo Chipfu l'eka ono.

¹⁰ O be teke ndu-ishi l'alị ndu Jiuda nūmaru iphe, ada nu; ephe shi l'unuphu ibe eze wuhu jeshia l'ulo Chipfu. Ephe bya eje anoduchaa l'onu-abata ophuu l'ulo Chipfu. ¹¹ Tọbudu iya bu; ndu-uke; yee ndu mpfuchiru ono bya asu ndu-ishi ono; yee ndu Izurelu l'ophu su phe: “Nwoke-a gbakwaru k'ekpe mpfu-gbu. Noo kele unu gudekpowa nchi unu numa iphe, o gude mpfuchiru pfua lẹ ke mkpukpu-a!”

¹² No iya; Jieremaya bya asu ndu-ishi ono g'ephe ha ephe lẹ ndu Izurelu g'ephe ha: “O kwa Chipfu yeru mu gẹ mu bya epfua iphe, ee-me ulo-a; waa mkpukpu-a, bu iya bu iphemiphe-a, unu nūmaru-a. ¹³ Nta-a bu; unu dozia uto unu; yele umere unu! Unu wata eme iphe, o pfuru; mbu Chipfu, bu Chileke unu. Oo ya bu gẹ Chipfu apalia pazeta. O too meedu unu ejo- iphe, o shi su l'oo-me unu. ¹⁴ O -buru mbedua be unu elenaa lẹ mu no unu l'eka. Iphe, unu rikpooru l'o du ree bya apfuru nhamunha; unu mee mu iya. ¹⁵ Ole o bu; oo epho ophu unu amakarhu bu lẹ-a; unu -gbua mu; ikpe-ochi onye adudu iphe, o meru atu-koru unu l'ishi; tu-koru l'ishi mkpukpu-a; yele ishi ndu bu iya nu. Kele tororo iya bu l'oo Chipfu yeru mu gẹ mu byapfuta unu bya epfua iphe-a g'unu numa.”

16 Noo ya bu; ndu-ishi ono yee ndu Ízurelu l'opfu su ndu-uke; epehe le ndu mpfuchiru ono-a: "E tee kpekwa nwoke-a mpfu-gbu! O gudeakwa epha Chipfu, bu Chileke anyi pfua opfu nu anyi."

17 Ndu bu ogerenya l'ali ono haru gbeshi kpitaru bya apfuru su ikpoto ndu kuru l'eka ono-a: 18 "Mayika, bu onye Moreshetu be ziru ndu Jiuda ozi Chipfu ziru le teke Hezekaya, bu eze ndu Jiuda. O pfuru ndu Jiuda su phe: Wakwa iphe, Chipfu, bu Okalibe-Kakota-Ike eepfu:

"Ee-mechaa ko okoro l'ubvu Zayonu kofu g'onye ako opfu.

Mbu le mkpukpu Jierusalemu be e-mechaa buru ikpozu.

Eli ubvu ono, bu eka eze-ulo Chileke no ono e-mechaa buru eka egbudu zechiru.

19 Hezekaya, bu eze Jiuda; ozoo onye ozo kpo l'ali ndu Jiuda; ?epehe gburu iya-a egbugbu? ?To bu-chidaa iphe, Hezekaya meru bu l'o tsuru Chipfu ebvu; wata achu uzo, ya e-shi tuba iya l'enya? To Chipfu ?to paliduru pazeta k'opfu bu l'o to meeduru phe ejo-iphe, o shi su l'oo-me phe. O kwa ejo-iphe be anyi eme onwanyi nta-a."

20 O nwekwaruro onye ozo gudejekwapho epha Chipfu pfua mpfuchiru. Onye ono bu Uraya nwa Shemaya. Eka a nwuru iya bu le mkpukpu Kiriya-tu-Jiarimu. O pfukwarupho iphe, Chipfu suru g'o pfua l'opfu ehu mkpukpu-a; ye le ali eka-a; egube-a, Jieremaya pfuru-a. 21 O be teke eze, bu Jiehoyakimu; yee ndu-ishi Ojogu iya; waa ndu-ishi l'ali-eze iya numaru opfu iya; eze meahaa ge ya gbua ya. Obenu le Uraya numaru iya gude ndzu-agugu gbalaa laa ali ndu

Ijiputu. ²² Eze, bu Jiehoyakimu zile-a Ełunatanu nwa Akubo; bya ahakwarupho nemadzu yeru iya; g'o je ali ndu Ijiputu. ²³ Epehe je l'eka ono je akputa Uraya bya akpuru iya je anu eze, bu Jiehoyakimu, bu onye pfuru; e gude oguechi gbuta nwoke ono tua. E woru odzu iya je etuphaa etupha l'eka eelije ndu enya lwaru.

²⁴ Ole g'o duhabe; Ahikamu nwa Shafanu turu ikè yeru Jieremaya. O buru iya bu l'a ta akpuduru iya nu ndiphe g'e gbua.

27

Ndu Jiuda a-la l'eka Nebukadineza

¹ O be ge Zedekaya nwa Jiosaya bahuru l'okwa-eze ndu Jiuda k'ophuu; Chipfu bya epfua opfua nu Jieremaya. ² Wakwa iphe, Chipfu epfu baa: "Kwee agadagba yee odogoro; li tuko iya nyabe onwongu l'olu. ³ Li zia ndu byaru Jierusalemu ozi g'e je ezia eze ndu Edomu; waa eze ndu Mowabu; waa eze ndu Amonu; waa ke ndu Taya waa ke ndu Sayidonu. L'e zikwaa ya pho Zedekaya bu eze ndu Jiuda. ⁴ Zia phe ozi g'ephe je ezia nnajiuphu phe su phe-a: Wakwa iphe, Chipfu, bu Okalibe-Kakota-Ike eepfu; mbu Chileke ndu Izurelu. Waa iphe, unu e-zi nnajiuphu unu baa: ⁵ 'O kwa ike-okpu mu, paru eka; yee oshi-eka mu lochiru alochi be mu gude mee mgboko-a l'ophu; bya emee nemadzu; yele anu, bu iya nu; teme o buru onye du mu ree be mu anuje iya. ⁶ Nta-a bu le-a; ali unu l'ophu be mu yekotawaru l'eka onye-ozu mu, bu Nebukadineza, bu eze ndu Babilonu. Mu

mekwarupho gę anu, bu l'ęgbudu nọduchaa mu l'ęka. ⁷ Ọhamoha l'ophu a-nọdu iya l'ęka; nọdu iya nwa iya; waa nwanwa iya; jasụ ali-eze iya adakpọhu. Noo teke ọhamoha, dụ igwerigwe mekpoo eze ndu parụ ęka e-me iya ohu phẹ.

⁸ “ Teke ọ bu l'o nweru ọhamoha; ọzoo ali-eze, jikaru anọdu Nebukadineza l'ęka; mbụ eze ndu Babilonu; ọzoo l'ephẹ jikaru edobe olu g'ọ nyabẹ phẹ agadagba-njigba iya; mu egude oguechi; yẹ ọkpa nri; yẹ ẹjo iphe-ememe nua ndu ọbu aphụ. Mbụ mee ndu ono iphe gbiriri jasụ mu egude ęka Nebukadineza mebyishibebe ndu ọbu. Nokwa iphe, Chipfu eepfu. ⁹ Ọo ya bu lẹ-a; unu ta angakwaru ndu mpfuchiru unu nchi; mę ndu jibya unu; mę ndibe unu, akoje iphe, nrwọ bu; mę ndibe unu, ndu agba ẹja; mę ndu karụ akaka, bu ndu asuje unu l'unu taa lakwa eze ndu Babilonu l'ęka. ¹⁰ Mpfuchiru, ephẹ epfuru unu bu ụka bẹ ephẹ adzushiru unu. Ọ buru iphe, oo-me bu g'unu haa ali unu lamihukpọo alamihu. Mu e-nwufu unu enwufu; unu eje alaa l'iswi. ¹¹ Obenu l'ọha -woru olu doberu eze ndu Babilonu; ọ nyabẹ phẹ agadagba-njigba iya; ephẹ nọdu iya l'ęka; bẹ mu e-kwe haa g'ephẹ buru l'ali k'ęka phẹ; akọ iya opfu; buru iya eburu. Nokwa iphe, Chipfu eepfu.’ ”

¹² Mu wokwarupho ozi ono zia Zedekaya, bu eze ndu Jiuda. Mu sụ iya: “Wozekwa olu doberu eze ndu Babilonu g'ọ nyabẹ ngu agadagba-njigba iya; nọdu iya l'ęka; yẹ ndibe iya; k'ophu iinọdu ndzụ. ¹³ ?Denu g'o gude gubedua gu lẹ ndu ali ngu l'ophu je l'a-buru ndu ee-gude oguechi gbushia; ẹgu egbushia phẹ; yẹle ẹjo

iphe-ememe, bu iphe, Chipfu pfuru le ya e-gude gbushia oha, jikaru l'ephe taa nodudu eze ndu Babilonu l'eka. ¹⁴ Unu ta ngakwa nchi l'opfu ndu mpfuchiru, asuje unu l'unu ta abyakwa anodu eze ndu Babilonu l'eka; kele o kwa uka be ephe adzuru unu le mpfuchiru ono. ¹⁵ Wakwa iphe, Chipfu epfu baa: 'O to bukwa mbedua ziru phe ozi ono. O to bukwa mu be ephe epfuchiru. O kwa uka be ephe adzu. O buru iya e-me; mu enwufu unu nwuru unu jeye; unu alaa l'iswi; unubedua l'onwunu; unu le ndu ono, epfuru unu mpfuchiru ono.' "

¹⁶ Mu bya asu ndu-uke Chileke; ephe le ndu Jiuda l'opfu le-a: "Wakwa iphe, Chipfu epfu baa: Unu ta ngakwa nchi l'opfu ndu mpfuchiru, asuje unu l'o bufukwaa nwanshiji nta; l'aatuko ngwa ono, e gwetaru l'ulo Chileke laa ali ndu Babilonu ono gwephuta azu. O kwa uka be ephe adzu le mpfuchiru, ephe epfuru unu. ¹⁷ Unu ta ngakwaru phe nchi. Unu nodu eze ndu Babilonu l'eka g'unu anodu ndzu. ?Denu g'o gude mkpukpu-a je l'a-buru ikpuzu? ¹⁸ O -buru l'ephe bu ndu mpfuchiru; ephe nodu anumaje olu Chipfu; g'ephe rwonaa Chipfu, bu Okalibe-Kakota-Ike ge ngwa-ulo ono, e gude dozia eze-ulo Chipfu ono, bu ophu phodukwaduru nu; yee ophu phoduru l'ibe eze ndu Jiuda; yee ophu phoduru le Jierusalemu ta abuhe iphe, eerwuta laa ali ndu Babilonu. ¹⁹ Le-a; wakwa iphe, Chipfu, bu Okalibe-Kakota-Ike eepfu le k'itso itso eze-ulo Chileke; waa k'iphe ono, eeyeje mini, echi ririri ono; waa k'ogba-kperekpere; waa ikpoto ngwa ozo ono, phodugbaaru le

mkpukpu-a, ²⁰ bu ndu ophu o gwetaduru; mbu Nebukadineza, bu eze ndu Babilonu; teke o kpuru eze ndu Jiuda, bu Jiehoyakinu nwa Jiehoyakimu le ndzu shi Jierusalemu laa ali ndu Babilonu; kpuypyabekota iya ndu a maru amaru l'ali ndu Jiuda yele Jierusalemu. ²¹ Ee! Wakwa iphe, Chipfu, bu Okalibe-Kakota-Ike eepfu; mbu Chileke ke ndu Izurelu; wakwa iphe, oopfu le k'iphe ono, e gwephodoru l'ulo Chipfu ono; yee ophu phoduru l'ibe eze ndu Jiuda; yee ophu phoduru le Jierusalemu: ²² 'G'ephe ha be eegwetachakwa laa ali ndu Babilonu. O buru l'eka ono be oo-nodu gbiriri jasu mboku, mu a-choru iya bya. Noo teke mu a-chiphuta iya azu bya edophukwa azu l'eka-a.' " Nokwa iphe, Chipfu eepfu.

28

Onye adzuje uka le mpfuchiru, bu Hananiya

¹ O buru l'apha ono kwapho; ge Zedekaya bahuru l'aba-eze ndu Jiuda k'ophuu; l'onwa k'ise l'ime apha k'eno; be onye mpfuchiru, bu Hananaya nwa Azuru, bu onye shi mkpukpu Gibiyonu; no l'ulo Chipfu l'iphu ndu-uke Chileke; me l'iphu oha l'ophu su mu-a: ² "Wakwa iphe, Chipfu, bu Okalibe-Kakota-Ike eepfu; mbu Chileke ndu Izurelu: Mu a-nyakashu agadagbanjigba ono, eze ndu Babilonu nyaberu unu ono. ³ L'ime apha labo be mu a-chi-phutakota iphe, bukpo ngwa ulo Chipfu ono azu l'eka-a; mbu ngwa ono, eze ndu Babilonu, bu Nebukadineza chitaru l'eka-a lashia ali ndu Babilonu. ⁴ Ndu mu

a-chi-phutakwapho azu l'eka-a bu Jiehoyakinu nwa Jiehoyakimu, bu eze ndu Jiuda; mekpoo iphe, bukota ndu a kpuru le ndzu l'ali ndu Jiuda, bu ndu laru ali ndu Babilonu; noo kele mu anyakwa agadagba-njigba ono, eze ndu Babilonu nyaberu unu ono. Nokwa iphe, Chipfu eepfu.”

⁵ Tobudu iya bu; onye mpfuchiru, bu Jieremaya bya eyee onu su onye mpfuchiru ono, bu Hananaya-a l'iphu ndu-uke; yele l'iphu iphe, bukpo ndu pfuru l'ulo Chipfu; ⁶ su iya: “G'o dukwa nno! Ge Chipfu mekwaa ya nno! Ge Chipfu mekwaa iphe ono, i pfuru le mpfuchiru ono; g'o chi-phutakwa ngwa ulo Chipfu azu; yee ndu a kpuru le ndzu; g'o shikwa l'ali ndu Babilonu tuko phe chi-phuta azu l'eka-a! ⁷ Ole g'o duhabe; ngabekwa nchi numa iphe, mu abya epfu ye ngu le nchi; yele nchi ndu-a l'ophu. ⁸ Ndu mpfuchiru, vu mu uzo; bya evuru ngu uzo; mbu ndiche; buepho iphe, ephe epfuje le mpfuchiru nu oha, du igwerigwe; yee ali-eze, paru eka; bu l'ogu a-du; yee okpa-nri; waa ejo iphe-ememe. ⁹ Obenu l'onye mpfuchiru, epfu opfu le nchi adu doo buepho teke iphe, o pfuru meru g'o pfuru iya be ee-kweje le Chipfu ziru iya eviya.”

¹⁰ Tobudu iya bu; onye mpfuchiru ono, bu Hananaya bya anyafu Jieremaya, onye mpfuchiru agadagba-njigba ono, o nya ono bya eworu iya nyajia. ¹¹ Hananaya bya apfuru l'iphu oha l'ophu su: “Wakwa iphe, Chipfu epfu baa: O kwa egube-a bu ge ya a-gbajifu agadagba-njigba ke Nebukadineza, bu eze ndu Babilonu l'olu ohamoha l'ime apha labo.” O pfuepho nno;

Jieremaya tugbua.

¹² A nõekwapho nwanshii g'onye mpfuchiru, bu Hananaya gbajifucharu agadagba-njigba ono, nõ l'olu onye mpfuchiru, bu Jieremaya ono; Jieremaya õbu nũma olu-Opfu Chipfu, suru iya:

¹³ "Je je akaru Hananaya sũ iya lẹ-a: Wakwa iphe, Chipfu epfu: Iphe, i gbajifuru bukwa agadagba-njigba õphu e meru l'oshi; õle iphe, mu e-gude dochia ya bu agadagba-njigba õphu e meru l'igwè. ¹⁴ Wakwa iphe, oopfu; mbũ Chipfu, bu Okalibe-Kakõta-Ike; mbũ Chileke kẹ ndu Ízurelu: Mu e-woru agadagba-njigba õphu e meru l'igwè nyabẹ l'olu õhamoha-a l'õphu gude mee phẹ g'õ buru Nebukadineza, bu eze ndu Bábilõnu bẹ ephe a-nõdu l'ẹka. Mbũ lẹ mu e-me iya g'õ nõdu elektachaa mẹ anũ, bu l'egbudu."

¹⁵ Tõbudu iya bu; onye mpfuchiru, bu Jieremaya sũ Hananaya, bu onye mpfuchiru-a: "Ngabekpodapho nchi; Hananaya! O tõ bukwa Chipfu ziru ngu g'i bya; obenu l'i mewaru ndu-a; ephe je adakobe iphe, abudu eviya. ¹⁶ Oo ya bu lẹ-a; wakwa iphe, Chipfu epfu baa: 'Mu abyakwa ngu ewofu l'eli mgboko-a. Apha-a gededede bẹ ii-nwũhu; kẹle i pfuwaru opfu, eme g'e kwefuru Chipfu ike.' "

¹⁷ O -rwuẹpho l'õnwa k'ẹsaa l'apha ono kwapho; Hananaya, bu onye mpfuchiru nwũhu.

29

Ekwo-ozì, e deru nũ ndu a kpuru lẹ ndzũ

¹ Owa bu iphe, e deru l'ekwo-ozì, Jieremaya gbẹ lẹ Jierusalemu dee nũ g'a nũ ndu bu

ogeranya l'ime ndu ophu no ndzu l'ime ndu ono, a kpuru le ndzu ono; l'a nu iya ndu bu uke; me ndu bu ndu mpfuchiru; me iphe, bukpo ndu ono, Nebukadineza kpuru le ndzu shi le Jierusalemu laa ali ndu Babilonu ono. ² Teke ono be a kpuakwanaru eze, bu Jiehoyakinu le ndzu; yee ne iya, bu eze-nwanyi; me ndu eleta ibe eze enya; mekpoo ndu-ishi ndu Jiuda yee ndu Jierusalemu l'ophu; me ndu eme ona; me ndu akpu uzu; be a kpukotawaru le ndzu kpuru lufu le Jierusalemu. ³ Onye o nuru ekwo-ozu obu bu Eleyasa nwa Shafanu; yee Gemaraya nwa Hilikaya, bu ndu Zedekaya, bu eze ndu Jiuda ziru ozi g'e je zia eze, bu Nebukadineza l'ali ndu Babilonu. Ekwo-ozu, Jieremaya deru obu suru:

⁴ “Wakwa iphe, Chipfu epfu baa; mbu Okalibe-Kakota-Ike; Chileke ke ndu Izurelu. Ndu oopfu iya anu bu ndu ono, a kpuru le ndzu ono g'ephe ha; mbu ndu ono, mu meru; e shi le Jierusalemu kpuru phe laa Babilonu ono: ⁵ Unu kpushikwaa ulo buru; unu akoo opfu ria iphe, o metaru. ⁶ Unu lushikwaa nwanyi nwushia unwegirima; unu achotaru unwu unu nwoke nwanyi alulu; unu ekee unwu unu nwanyi ji; k'ophu ephebedua l'e-nwekwarupho unwegirima. Unu nodukwa l'eka ono ka adu igwerigwe; unu taa nodukwa aka alwa ali. ⁷ Ozo bu le-a; unu chojekwa iphe, e-me ge nchi du doo le mkpukpu ono, bu eka a kpuru unu le ndzu laa ono. Unu pfujeru nu Chipfu l'iswi ehu ndu ono; kele nchi -du phe doo; l'o dukwapho unu. ⁸ Kele-a; wakwa iphe, Chipfu, bu Okalibe-

Kakota-Ike eepfu; mbu Chileke ndu Ízurelu: Unu te ekwekwa ge ndu mpfuchiru unu; me ndu agbaru unu eja; duru unu ghaa uzo. Unu ta angajekwaru phe nchi le nrwọ, unu meru phe; ephe nodu arwo. ⁹ O kwa uka be ephe adzuru unu su l'ephe gude epha mu epfu mpfuchiru. O to bukwa mu yeru phe. Nokwa iphe, Chipfu eepfu.”

¹⁰ Wakwa iphe, Chipfu epfu baa: “A -noepho ukporo apha eto l'apha iri le Babilonu be mu abyapfuta unu bya emeeru unu iphe ono, du ree ono, mu kweru ukwe iya ono; mbu le mu a-bya eduphuta unu azu l'ali eka-a. ¹¹ Kele mu maru oriri, mu arı l'ehu unu. Nokwa iphe, Chipfu eepfu. Mu arı k'eme g'ehu du unu guu; o to bukwa g'o duru unu le njọ. Ge mu mee g'uzo iphu duru unu le ree; unu enweru iphe, unu a-nodu ele enya iya. ¹² Teke ono be unu arakuje mu; unu abyapfuta mu; bya epfuru nu mu; mu angaberu unu nchi. ¹³ Teme unu achọ mu; chota mu; me o -buru l'unu gude obu unu l'ophu achọ mu. ¹⁴ Teke ono be unu a-chọ mu chota; nokwa iphe, Chipfu epfu. Mu emee unu; unu taa bueduru ndu a kpuru le ndzu. Mbu le mu e-jeepho l'iphe, bukpo ohamoha; mekpoo ekameka ono, mu chiru unu laa ono je achiphuta unu azu l'eka ono, mu meru; a kpu unu le ndzu ono. Nokwa iphe, Chipfu eepfu.”

¹⁵ Unu a-sukwaro: “Chipfu yeanaru anyi ndu mpfuchiru le Babilonu.” ¹⁶ Obenu le-a; wakwa iphe, Chipfu epfu baa l'opfu ehu onye eze ono, no l'aba-eze Dévidi ono; ye le opfu ehu iphe, bukpo

ndu phọduru lẹ mkpukpu-a; mbụ unwunna unu, bụ ndu ophu a kpukobeduru unu l'ephe lẹ ndzụ. ¹⁷ Ee! Wakwa iphe, Chipfu bụ Okalibe-Kakota-Ike eepfu baa: "Iphe, mu e-ye bukwa ogu-echi; yee okpa-nri yee ejo iphe-ememe g'ọ buru phe ogu. Mu emee phe; ephe adu g'ejo akpuru oshi figu, duta-beru eji k'ophu bụ l'e tee ridu iya eriri. ¹⁸ Mu e-gude ogu-echi; yee okpa-nri; yee ejo iphe-ememe achi phe oso. Mu emee phe; ephe aburu iphe, ali-eze nogbaa lẹ mgboko-a a-nodu aso oyi; mbụ ephe aburu iphe, e gude atụ onu; yee iphe, anyi ishi edzu; waa iphe e gude achi ochi; yee iphe, e gude ephu l'iphu l'eka ohamoha no, bụ eka mu chiru phe jeye. ¹⁹ Noo kele ephe ta ngabeduru nchi l'opfu mu; o kwa Chipfu epfu iya; mbụ opfu, mu pfuru mpfuto nụ phe; o buru ndu mu ziru iya bụ ndu-ozu mu bụ ndu mpfuchiru. Ophu unubedua, a kpuru lẹ ndzụ-a angakwarupho nchi. Nokwa iphe, Chipfu eepfu." ²⁰ Oo ya bụ lẹ-a; unu numakwa Opfu Chipfu g'unu ha buru ndu a kpuru lẹ ndzụ; bụ ndu mu chitaru lẹ Jierusalemu chilaa Babilonu.

²¹ Wakwa iphe, Chipfu epfu baa; mbụ Okalibe-Kakota-Ike, bụ Chileke ke ndu Izurelu; wakwa iphe, oopfu l'opfu-ehu Ehabu nwa Kolaya; yee opfu-ehu Zedekaya nwa Maseya, bụ ndu gude epha mu adzuru unu uka lẹ mpfuchiru: "Mu e-woru phe ye l'eka Nebukadineza, bụ eze ndu Babilonu; l'o woru phe gbushia l'ataphu unu eka unu ele enya. ²² Oo phe a-kpa iphe, ndu Jiuda ono, a kpuru lẹ ndzụ ono g'ephe ha, bụ

ndu nọ l'alị ndu Bábilọnu a-wata ephu l'iphu sụ: 'Gẹ Chipfu mekwaa ngu iphe, o meru Zedekaya; yẹe Éhabu, bụ ndu eze ndu Bábilọnu hụru l'ọku.' ²³ Noo kele ẹphe mewaru iphe-eswe l'echilabọ ndu Ízurelu. Ẹphe l'unyomu obutobu phẹ riwaru ogori; ẹme ẹphe gudewaa ẹpha mu dzua ụka, bụchaa iphe, mu asuduru phẹ g'ẹphe mee. Iphemiphe ono bẹ mu makotaru; ẹme mu bụru onye-ekebe iya." Nokwa iphe, Chipfu eepfu.

Ozi, e ziru Shemaya

²⁴ "Karụ Shemaya, bụ onye Nehelamu: ²⁵ Wakwa iphe, Chipfu epfu; mbụ Ọkalibe-Kakọta-Ike; bya aburu Chileke ndu Ízurelu: I gude ẹpha ngu dee ẹkwọ-ozì wolaaru iphe, bụkpoo ndu nọ lẹ Jierusalẹmu; bya anụ iya Zefanaya nwa Maseya, bụ onye uke; mękpoo iphe, bụkota ndu-uke ndu ọphuu g'ẹphe ha. I sụru Zefanaya-a: ²⁶ 'Chipfu meakwaru ngu onye uke g'ị nọdu l'ọkwa Jiehoyada; g'ị nọdu eleta ụlo Chipfu ẹnya. O -nweru onye ọbvụ eme, kuru onwiya onye mpfuchiru; chịru iya ọkpa ye lẹ mkpọro; nwua ya olu lẹ mgbọrigwè. ²⁷ ?Bụ gunu kparụ iphe, ị tị gbọduru Jieremaya onye Anatótu ụja, bụ onye epfuru unu mpfuchiru? ²⁸ Wakwa ozi, o ziru anyi lẹ Bábilọnu baa: "Iphe ọbu a-nọkwa ọdu. Ọo ya bụ lẹ-a; unu kpushikwaa ụlo buru; unu akọo opfu ria iphe, o metaru." ' ' "

²⁹ Ọ bụru iya bụ l'onye uke ono, bụ Zefanaya abya eworu ẹkwọ-ozì gụaru Jieremaya, bụ onye mpfuchiru. ³⁰ No iya; olu-Opfu Chipfu rwua

Jieremaya nchị sụ: ³¹ “Woru ozi-a zia g'ọ rwua lẹ nchị iphe, bụ ndu ono, a kpuru lẹ ndzụ ono g'ẹphe ha: Wakwa iphe, Chipfu epfu l'opfu ẹhu Shemaya, bụ onye Nehelamu: Eshinu Shemaya epfuru unu iphe ọ sụru lẹ mu pfuru; l'ẹbe abụ l'ọo mu ziru iya ya; be o mewaru; unu je adakobe iphe, abudu eviya. ³² Wakwa iphe, Chipfu epfu baa: Shemaya, bụ onye Nehelamu bẹ mu a-nụ aphụ; yẹle awa iya l'ophu; k'ophu bụ l'ọ tọ dukwa onye o nweru a-phodukwadu nụ l'echilabọ ndu-a; ophu ọo-humadu iphe-oma ono, mu e-mechaa meeru ndu ndibe ono; noo kele o pfuwaru iphe, e gude kwefuru mu ike.” Nokwa iphe, Chipfu eepfu.

30

Chileke ekwe ukwe alwalwa ndu Ízurelu

¹ Wakwa opfu, shi l'ọnu Chipfu rwua Jieremaya nchị. ² “Wakwa iphe, oopfu; mbụ Chipfu, bụ Chileke kẹ ndu Ízurelu: Tụko opfu-a, mu pfuru nụ ngu-a dekọta l'ẹkwo. ³ Kele-a: wakwa iphe, Chipfu epfu baa: mbọku abyakwa; teke mu e-je l'ẹka a kpuru ndibe mu lẹ ndzụ laa; mbụ ndibe mu bụ ndu Ízurelu ẹphe lẹ ndu Jiuda; je eduphuta phẹ azụ; bya edophu phẹ azụ l'alị ono, mu nuru nna phẹ oche g'ọ bụru nkephẹ ono. Nokwa iphe, Chipfu eepfu.”

⁴ Wakwa opfu, Chipfu pfuru pfudoru ndu Ízurelu ẹphe lẹ ndu Jiuda.

⁵ “Wakwa iphe, Chipfu epfu

baa:

Anyi anụkwa mkpu,

ẹphe echi;
 mbu ndu ndzu agu.
 Mbu l'oo n-yemebvu du;
 o to budu nchi-adu-doo.
 6 Jinaa aji huma; nwoke
 ?o tsuje ime nwa?
 ?Denukwanu g'o gude mu
 humagba unwoke l'ehu
 l'ehu g'ẹphe chigbaaru
 ẹka kwẹe l'ẹpho gẹ nwanyi,
 ime eme;
 onyenonu wochaaru iphu
 gbanwube onwu onwu?
 7 Tuswekwa! Mboku ono
 a-dukwa ẹjo ẹji;
 k'ophu bu l'o to duedu
 eswe a-dubaa ẹji g'oo ya.
 Teke ono be oshilokpa
 Jiekopu e-je iphe-ẹhuka;
 obenu l'ee-mechaa
 dzota iya l'ime iya.

8 “Wakwa iphe, oopfufu; mbu Chipfu, bu
 Okalibe-Kakota-Ike: O -rwua mboku ono be mu
 a-nyakwo agadagba-njigba ono, no phe l'olu ono;
 mu abya atoshia phe egbu, e keru phe; ophu ndu
 ohozo emebaedu phe ohu phe. 9 ẹphe a-nodu
 ejeru Chipfu, bu Chileke phe ozi; yee Dévidi ono,
 bu eze phe ono, bu onye mu e-me g'o futaru phe.

10 “Gẹ ndzu ba agukwa ngu;
 gube Jiekopu, bu onye-osi mu!
 Nokwa iphe, Chipfu eepfu.
 G'e be yekwa ngu ebvu;
 gube Izurelu;

kele-a; lekwa lẹ-a;
mu e-shikwa l'ẹka dọ
ẹnnya dzọta ngu.

Mu adzọta ẹnwu ngu l'ali
ẹka a kpuru phẹ lẹ
ndzọ laa.

Noo teke Jiékọpu a-lwa azu
bya anọdu l'ẹhu-guu.

Tẹme ọ tọ duedu iphe,
byaru emebaa ya nọ;
ọphu ọ dudu onye
byaru emebaa ya g'ọ
buru onye ndzọ agọ.

11 Wakwa iphe, Chipfu epfu baa:

Mu nọkwa swiru ngu eswiru;
mu a-dzọ ngu!

A makwaru-a lẹ mu tukoru
ọhamoha emebyishibẹbe,
bọ ndu mu shi woru
ngu ghakaa l'ime phẹ.

Obenu lẹ mu tee
mebyishibẹbedu ngu
gberegedege.

Mu a-hù ngu ahùhù l'ọzo,
pfuru nhamunha.

Ọphu mu ahakwanu ngu
phuruphuru gẹ mu
ta anu ngu aphọ l'ophu
l'ophu."

12 Wakwa iphe, Chipfu epfu
baa:

Onwo, aba ngu nọ bẹ e tee
metakwa emeta.

Ọp̄hu ip̄he, e mekarū ngu
akp̄ohudu akp̄ohu.

¹³ Ọ t̄o d̄udu onye a-gbaru
ngu ọdzori.

Ọp̄hu ọ d̄udu ip̄he ọzo,
ee-mebaa l'onyá ọbu,
aba ngu n̄u ọbu.

Ọp̄hu ịi-kaedū mma akaka.

¹⁴ Ip̄he, buk̄poo ndu gu
l'ẹp̄he shi eshi ọnyà
zohakotawaru ngu.

Ẹp̄he ta akpaedū ngu ishi
ililekp̄oo.

Mu tsuwaru ngu ip̄he,
onye ọhogu etsuje
ọhogu iya.

Mu bya echia ngu ip̄he,
onye d̄uru nemad̄u
ẹhuka echije iya.

Ọ b̄uru ip̄he, kparū iya
n̄u b̄u l'i menuk̄aru
ejo-ip̄he.

T̄eme ip̄he-ẹji, i meshiru
paa igwerigwe.

¹⁵ ?D̄enu g'o gude ị n̄odu ara
ẹkwa ip̄he, mekarū ngu n̄u;
mbu ip̄he, eme ngu ẹhuka,
bu ip̄he,
taa kp̄ohudu akp̄ohu?

Ọ kwa l'ị metanuk̄aru
ip̄he-uta; t̄eme ip̄he-ẹji,
i meshiru paa igwerigwe;
meru g'o gude mu mee

ngu iphemiphe ono.

16 Obenu l'iphe, bukpo
ndu eripya ngu be
ee-ripyakwa.

Iphe, bukpo ndu ohogu
ngu be aa-kpu le ndzu.

Ndu kwaru iphe ngu
l'okwata be
aa-kwakwapho okwata.

Ndu keru iphe ngu l'ogu
be ee-kekwaphe iphe
phe l'ogu.

17 Obenu le mu e-me g'ehu du
ngu ike;
mee g'onya, du ngu l'ehu
kphu.

Nokwa iphe, Chipfu eepfu.

O buru iphe, kparu iya
nu bu l'e kuru ngu
onye a chifuru achifu;

Zayonu, aduedu onye
akpa ishi iya.

18 "Wakwa iphe, Chipfu epfu
baa:

Onu-ulo Jiekpu ono,
e shi kpu le ndzu ono
be mu e-dophu azu l'onodu
iya.

Mu aphuaru aka ephe bu
obu-imemini.

Mkpukpu ono be aa-kpu-phu
azu l'eli ozu iya ono.

Ibe eze ono abyakwa

anọ-chia l'ẹka ọ gbaru
g'ọ nọdu.

19 Ẹphe awata agụ ebvu-ekele;
atu uzu ẹhu-ọtso.

Mu emee g'ẹphe kabaa igwe;
ọphu ẹphe abyadụ alwa
alị alị.

Mu e-me g'ẹphe bụru ndu
aakwabẹ ùbvù;
ọphu ẹnya abyadụ alwa phẹ.

20 Ụnwu phẹ bụ g'ẹphe shi
dụ teke ndiche bụ
g'ẹphe a-dụ.

Tẹme edzudzu-ọha aburu
iphe, ngụchaaru
anguru l'iphu mu.

Mu anụa ndu eme phẹ ewere
aphụ.

21 Onye eze phẹ a-buru onye
lanụ l'ime ndibe phẹ.

Onye a-buru onye-ishi phẹ
aburu l'echilabọ phẹ bẹ
oo-shi.

Mu a-kpụritaru iya;
l'ọobya anọdu mu ntse;
kẹle-a: ?bụ onye sụru
g'oo-dobe onwiya iche
bya bya anọdu mu l'iphu?

Ọ kwa Chipfu epfu iya.

22 Ọo ya bụ l'unu a-buru ndibe
mu;
mu aburu Chileke unu.”

²³ Lekwa! Chipfu gudeakwa ẹhu-eghu ezi oke-pherephere; mbụ ẹjo oke pherephere. O bụru l'ishi ndu ẹjo-iphe bẹ ọophu temutemu; ²⁴ ọphu ẹhu eghubuhukwa Chipfu egbu gbiriri jasụ l'o meebekota iphe, du iya l'okpoma k'ememe. Mbọku abya-a l'uzo iphu teke iphe-a l'e-dokota unu ẹnya ree.

31

Alwalwa ndu Ízurelu

¹ Wakwa iphe, Chipfu epfu baa: “O -rwua lẹ teke ono; bẹ mu a-buru Chileke k'ipfu l'ipfu ndu Ízurelu l'ophu; ẹphe aburu ndibe mu.”

² Wakwa iphe, Chipfu epfu baa: “Ndu ono, oguechi gbuphodoru ono bẹ e meru eze-iphe-oma teke ẹphe nọ l'echiegu; mbụ Ízurelu; teke o shi achọ ẹka ọo-nọdu tuta unme ³ bẹ Chipfu shi l'ẹka du ẹnya mee g'ọ hụma iya. Mu yeru ngu obu yee ngu iya k'ojeje. Mu gude n-yemobu mu kpuritaru ngu. ⁴ Mu a-kpụ-phukwa ngu phọ azụ; l'ị bụru onye a kpuphuru azụ; gube nwamgboko mu yee nwoke akwajeduru ono, bu gube Ízurelu. L'i wota nkwa ngu je etsoru ndu ẹhu atso wata ete ebvu. ⁵ Ii-wata akọ opfu-vayinu l'eli úbvú úbvú Samériya ozobaa. Ndu akọ opfu a-kọ iya; ria iphe, ẹphe kọru iya; ⁶ kele e -mechaa; l'ọ duru mbọku, ndu eche nche a-nonya; ẹphe echiaha mkpu l'alí úbvú úbvú ndu Ifuremu sụ: ‘Unu bya g'anyi je l'úbvú Zayonu; jepfu Chipfu, bu Chileke anyi!’ ”

⁷ Wakwa iphe, Chipfu epfu baa: Unu gụa ebvu ẹhu-utso nụ

Jiékpópu!
 Unu tũa ụzu ẹhu-ụtsó nụ
 onye-ishi ọhamoha!
 Unu raa ya arara; kwaa ya
 l'ẹvu sụ:
 Jiko Chipfu; dzọnaa ndu
 nkengu;
 mbụ nwa ndu Ízurelu ndu
 ọphu phọduru nụ!
⁸ Lekwa; mu e-shi l'alị ndu
 isheli chị-phuta phẹ
 azụ.
 Mu e-jerwuchaa ẹka igwe
 beru alị beru je
 erwukọo phẹ.
 Mu a-chitachaa mẹ ndu atsu
 ishi; mẹ ndu ẹniyeni;
 mẹ ndu dụ ime;
 mẹ ndu ọphu ime emewaa
 ememe.
 Ọ bụepho l'ikpoto ndu a-lwa
 nụ a-pa ẹka.
⁹ Ẹphe a-nọdu ara ẹkwa abya.
 Mbụ l'ẹphe a-nọdu arwọ mu
 arwọrwo;
 mu edu phẹ alwa.
 Mu e-du phẹ dughaa nggele
 nggele;
 dua phẹ shia ụzo,
 dụ baswaa k'ọphu ụpfu
 ata akpọdu phẹ l'ọkpa.
 Ọ bụru iphe, kparụ iya nụ bụ
 lẹ mu bụ nna Ízurelu;
 tẹme Ifuremu bụru ọkpara

mu.

10 “Unu n̄makwa Opfu Chipfu;
unubę ọhamoha!

Unu araa ya arara ęę ndu
bukube eze-ęnyimu
l'ęka d̄u ęnya n̄ma!

L'onye ono, chikashiru
ndu Ízurelu ono
a-chikobekwa phę phọ
ọzo.

L'ooche un̄wu aturu iya
ọbu nche g'onye eche
aturu;

11 kele Chipfu gbafutawaru
Jiékoṗu p̄f̄a aswa ishi iya
l'ęka ndu ka phę ọkpehu.

12 Ẹphe a-bya bya at̄a ọzu
ẹhu-utso l'úbvú Zayonu.

Ẹphe eteru ẹswa kpua iphe,
d̄u ree, Chipfu doberu;
mb̄u ereshi-o; mę męe-o;
mękpoo man̄u;
mę un̄wu aturu mę eghu;
mękpoo ikpoto eswi.

Ẹphe a-d̄u g'opfu,
a k̄oru agba iya mini ree;
ọphu ẹphe a-n̄odubaedu
aph̄u-aph̄u.

13 Teke ono bę un̄wumgboko
a-wata ete ebvu;
ẹhu at̄sọ phę;
mę un̄wokorobyia;
mę ndu b̄u ọgerenya

kwapho.

Noo teke mu e-me g'aphu,
 ephe shi agu buru phe
 ehu-utso.

Mu a-du phe obu;
 mu agbanwee aphu,
 tsoru phe nu g'o buru phe
 ehu-utso.

¹⁴ Ndu uke be mu a-nukpo iphe,
 du ree nu k'etsutsu iya.

Teme iphe, du ree,
 mu doberu be e-jikpo
 ndu nkiya epho.”

Nokwa iphe, Chipfu eepfu.

*Chipfu a-phuru ndu
 nkiya obu-imemini*

¹⁵ Wakwa iphe, Chipfu epfu
 baa:

“A numaru uzu-ekwa le
 mkpukpu Rama;
 mbu ekwa anwuhu me oke
 nggumaphu.

O buru Rechielu l'ara ekwa
 unwu iya;
 ophu o kwedu g'e gbobuta
 iya egbobuta;
 opfu l'unwu iya bvueberu.”

¹⁶ Wakwa iphe, Chipfu epfu baa:

“Gberuma! Ba rah ekwa!
 Huchaa enya-mini, no ngu
 l'anya;
 kele ee-mechaa bua ngu
 nggo ozi ngu;

mbụ l'ẹphe e-shi l'alì ndu
 ọhogu lwa.

Ọ kwa Chipfu epfu iya.

¹⁷ Ọo ya bụ ẹ-a; unu lee ẹnya
 l'iphu a-duru unu ree.

Ụnwu unu l'a-lwa l'alì phe.”

Nokwa iphe, Chipfu eepfu
 bụ ono.

¹⁸ Ude, Ifuremu atsụ bẹ mu
 nụmawaru; l'ọ sụru:

Ị hụwaru mu ahùhù g'onye
 ahù nweswi,
 ekwedu g'a gọta iya.

A hùkwanaa mu hùta.

Dophunu mu azụ gẹ mu
 alwaphuta azụ;
 noo kele ọo ngu bụ Chipfu
 bya aburu Chileke mu.

¹⁹ Mu kpaphuhucharu;
 izimanụ bya alwaphuta
 mu azụ.

Ọnodu, mu nọ doẹ mu phọ
 ẹnya.

Mu phuru yoo; chiru ẹka ye
 l'iphu ụtapfu.

Iphere bya egude mu;
 mu bya aburu onye
 ẹnya lwaru;
 kele ọo iphe, mu meru
 teke mu bụ okoro bya
 bẹ byaru eteahaa mu
 ntụ l'iphu nta-a.

²⁰ “Sụ-a; Ifuremu ?tọ bụdu nwa,

mu yeru obu;
mbu nwa, t̄baru mu
l'ɛnya?

A makwaru-a l̄e mu ahaj̄eru
epfuru iya;
obenu l̄e mu anyataj̄ele
iya-a.

Oo ya bu l̄e-a; oghoroko iya
du mu shii;
mbu l̄e mu aphuru iya
obu-imemini,
paru ɛka.

Nokwa iphe, Chipfu eepfu
bu ono.

²¹ Meshia ohubama dobegbaa
l'oji!

L'i koshia obvudu obvudu
dobegbaa!

L'i lerwetakwa oji,
a t̄uru mkpoli ɛnya,
bu oji, iishi!

Lwadupho azu;
gube nwamgboko mu,
bu ɪzurelu!

Lwadupho azu l̄e mkpukpu
ngu ono g'o ha!

²² ?Ii-ghaphekp̄o ɛgube ono
jasu teke ole;
gube nwada ono,
eegudedu
ire iya ɛka ono?

Chipfu mewaru iphe ophuu
l̄e mgboko-a;

mbụ ịe nwanyị a-wata
eleta nwoke ọnya.”

Iphe e-mechaa duru ndibe Chileke ịe ree

²³ Wakwa iphe, Chipfu, bụ Okalibe-Kakota-Ike eepfu baa; mbụ Chileke ndu Ízurelu: “Ọ sụru-a: Mu -shiepho l'ẹka a kpuru phẹ ịe ndzụ duphuta phẹ azụ; bẹ ndu nọ l'alị Jiuda; yee mkpukpu ịe mkpukpu iya a-wata epfu opfu-a ọzo sụ:

“Gẹ Chipfu kebe ngu l'oma;
gube ibe onye ono,
pfuberekoto ono;
gube úbvú, dụ nsọ!

²⁴ Ndu Jiuda mę mkpukpu ịe mkpukpu, nọkota iya nụ l'a-tuko bukọtaru l'ẹka ono; ndu akọ opfu eburu iya; ephe ịe ndu aghaphe aghaphe; ephe l'eghu mę aturu phẹ. ²⁵ Kele onye ike bvuru bẹ ee-me-a g'epho ji; mu emee iphe, bukpo onye rwuhuru arwuhu g'ọ rokota ike.” ²⁶ Mu jeberu nno bya etehu; bya awata achika ọnya. Mgbenya mu ọbu nọdu atso mu ntumatu.

²⁷ Wakwa iphe, Chipfu epfu baa: Lekwa; mbọku abyakwa-a; teke mu e-woru mebyi-iphe, bụ nemadzụ yee anụ woru ghakaa l'alị Ízurelu yele alị Jiuda. ²⁸ Oo gẹ mu eche phẹ nche; e pheshia phẹ; nwukposhia phẹ; e mekpee phẹ; mebyishia phẹ; ephe laa l'iswi; nokwaphọ gẹ mu a-nọdu eche phẹ nche; aa-kpukwa phẹ; dzaphu phẹ azụ. Nokwa iphe, Chipfu eepfu. ²⁹ O -rwua mbọku ono bẹ a taa sụbaedu:
Nna anyi phẹ bukwa akpuru
vayinu,
achaduru achacha bẹ

ẹphe riru.

Ọ nọdu akpọ ụnwu phẹ
eze ihuku.

³⁰ O bu-chia iphe, e-me nụ bu l'onyemonye a-la l'ẹjo-iphe, o metaru. Onye riwaruro akpuru vayinu, achaduru achacha; eze akpowa iya rọ ihuku.

³¹ Wakwa iphe, Chipfu epfu baa: Mbọku abyakwa teke mu ọ ndu Ízurelu; waa ndu Jiuda a-gba ndzụ ọphúú. ³² Ono taa duedu g'ogbandzu ọphu mu ọ nna phẹ oche gbaru; teke ono, mu gude ẹka seta phẹ dufuta phẹ l'alị ndu Ijiputu; noo kele ẹphe mebyiru ọgbandzu mu; l'eka bukwa mbedua bu ji, alụ phẹ nụ. Nokwa iphe, Chipfu eepfu. ³³ Wakwa iphe, Chipfu epfu baa: Wakwa ọdu ọgbandzu ọphu mu l'ọnu-ulo Ízurelu a-gba: mẹ e -mechaẹpho teke ono. Ekemu mu bẹ mu e-woru ye phẹ l'egomunggo. Ọ buru l'ime ọkpoma phẹ bẹ mu e-de iya edede. Mu a-buru Chileke phẹ; ẹphebedua aburu ndibe mu. ³⁴ Nemadzu tee ziedu nwibe iya iphe ọzobaa; ọphu nemadzu eziedu nwune iya iphe ke g'aasuje: Makwaru Chipfu! Kele ẹphe e-shiẹpho l'onye ẹnya kachaa alwalwa l'ime phẹ maru mu jasụ l'onye ọphu kachaa shii. Noo kele mu a-guru phẹ nvụ l'ẹjo-iphe, ẹphe megbaberu. Ọphu mu anyatabaedu iphe-ẹji phẹ ọzobakpo. Nokwa iphe, Chipfu eepfu bu ono.

³⁵ Wakwa iphe, Chipfu epfu baa:
Mbụ onye ono, doberu
 ẹnyanwu sụ g'o chije
 l'eswe;
 bya emee g'ọnwu;

yẹ kpokpode chije
 l'enyashi; onye ono,
 bu iya akparwubeje
 oke-enyimu;
 akpara-mini iya ede mba;
 ẹpha iya bu Chipfu,
 bu Okalibe-Kakota-Ike.

36 “Oo ẹpho m'ọ bu l'a -nonyaru;
 iphe-a,
 mu tuburu k'ememe-a
 phuhu k'ọphu mu
 huma-buhuru iya;
 ọ buru iya bu l'oshilokpa
 Ízurelu achihu;
 ẹphe taa buedu ọha ẹka
 phe l'iphu mu jasuru
 asuru.”

Nokwa iphe, Chipfu eepfu
 bu ono.

37 Wakwa iphe, Chipfu epfu baa:
 “Oo ẹpho m'ọ bu l'aa-tù
 imigwe imigwe l'iphe,
 aatuje iphe;
 aabya ebvua alì bvurwua
 ẹka a toru okpa mgboko
 l'ophu;
 teme mu e-gude iphe,
 oshilokpa Ízurelu
 megbaberu jika-gbua
 phe.”

Nokwa iphe, Chipfu eepfu
 bu ono.

38 Wakwa iphe, Chipfu epfu baa: “Mboku abyakwa teke ee-mechaa kpukwaa mkpukpu-a doberu mube Chipfu eshi l’oje Hananelu jasụ lẹ Ọnu-abata Mgbureku. 39 Ogologo iphe, e-gude atụ iphe l’a-gbẹ l’ẹpho l’ẹka ono dabyiru ogologo jasụ l’eli úbvú Garebu; l’ọobya ago-jia dabyiru jasụ lẹ Gowa. 40 Nsuda ono l’ophu, bụ ẹka e shi etuphaje odzu; awushi iya ntụ; mękpoo ẹgu ono l’ophu, dabyiru jasụ lẹ nggele Kidironu l’uzo ẹnyanwu-awawa; gbiriri jasụ l’aguga onu-abata Inya; g’o ha a-dukotaru Chipfu nsọ. Ophu a byadu ephefubaa mkpukpu ono ephefu; ophu ee-nwukposhi baedu iya enwukposhi.”

32

Jieremaya azụ alị-ẹgu

1 Wakwa olu-opfu, rwuru Jieremaya nchị; mbụ olu-opfu, shi l’ẹka Chipfu l’apha, kwe Zedekaya apha iri, ọ watarụ aburu eze ndu Jiuda. Ono bukwanuru apha ophu kwe Nebukadineza apha iri l’esato. 2 Ndu ojoğu k’eze ndu Babilonu bẹ nọ-pheru Jierusalemu mgburugburu teke ono. Onye mpfuchiru ono, bụ Jieremaya buro ẹka ọ kwarụ bụ l’oma-unuphu ẹka ndu nche anọje l’ibe eze ndu Jiuda; 3 kele Zedekaya, bụ eze ndu Jiuda turu iya mkpọro l’ẹka ono sụ: “?Bụ ọgunu meru g’o gude ị nọdu epfu mpfuchiru nkengu g’iipfu iya ono? I pfuru sụ lẹ Chipfu suru lẹ ya abyaakwaa eworu mkpukpu-a ye l’ẹka eze ndu Babilonu; o jekwa l’anata iya. 4 Lẹ Zedekaya, bụ eze ndu Jiuda taa nahukwa ndu Babilonu agbala; ọ chikwa l’ọ tọ dudu iphe, e-me g’e te

ye iya l'eka eze ndu Babilonu; yele iya epfugbaa opfu iphu l'iphu; l'o gude enya iya ebo ebo huma iya. ⁵ L'oo-kpuru Zedekaya laa Babilonu bu eka oo-nodu jasụ ya anụ ya aphụ. L'onokwa iphe, Chipfu epfu. Lẹ mu -tsoo ndu Babilonu oḡu; ọ tọ dukwa iphe, mu a-lwuta iya."

⁶ Tọbudu iya bu; Jieremaya sụ: "Olu-Opfu Chipfu rwukwaru mu nchi ⁷ sụ lẹ Hanameḷu nwa Shalumu, bu nwune nna mu a-byapfuta mu bya asụ mu ge mu zunaa ali iya, no lẹ mkpukpu Anatotu; kele eshinu ọ bu mu l'iya kachaa abubu be ọ bu mu be o rwuberu agbata iya. ⁸ E mechaa; ọ nwuepho ge Chipfu pfuru ono. Nwa nwune nna mu, bu Hanameḷu mechaa bya abyapfuta mu l'oma-unuphu eka ndu nche anoje; bya asụ mu ge mu zunaa ali iya, no lẹ mkpukpu Anatotu; l'oke ali ndu Benjaminu. Eshinu ọ bu mu be o rwuberu agbata iya nworu; ge mu zu l'iya pho g'ọ buru nkemu. Mu maerupho l'ọ kwa Opfu Chipfu. ⁹ Ọ buru iya bu lẹ mu eje azua ali obu lẹ mkpukpu Anatotu l'eka nwa nwune nna mu, bu Hanameḷu bya apfua ya okpoga iya, bu mkpola-ochaa, erwa iya du shekelu iri l'esaa. ¹⁰ Mu bya edeeru iya ekwo byaa ya epha mu; mee ya ohubama; ndu ekebe yekwa iya pho eka; bya eworu mkpola-ochaa ono tua l'iphe, aatuje iphe. ¹¹ Mu bya eworu ekwo ono, e deru, goshiru l'ali buwaa nkemu ono; mbu mpekala iya ono, e meru ohubama ono, bu ophu e deru g'oo-noberu me ge mu nweberu iya; bya ewotakwapho mpekala iya ophu e meduru ohubama gude. ¹² Mu bya eje achiru ekwo ono nu Baruku, bu

nwa Neraya nwa Maseya; l'iphu nwa nwune nna mu, bu Hanamelu yele iphu ndu ekebe, bu ndu byiru eka l'ekwo ono; yele iphu ndu Jiuda l'ophu, bu ndu nogbaa l'oma-unuphu eka ndu nche anoje ono. ¹³ Mu nodu l'iphu phe l'eka ono bya eworu ozi-a zia Baruku su iya: ¹⁴ 'Wakwa iphe, oopfu; mbu Chipfu, bu Okalibe-Kakota-Ike; mbu Chileke ndu Izurelu. O suru-a: Chita ekwo ali-a, e deru-a; me ophu e meru ohubama; yee ophu e meduru ohubama l'ekwo ono, e deru gude zu ali-a; woru iya je achiru ye l'ite-urwa k'ophu oo-no odu; ¹⁵ kele-a; wakwa iphe, Chipfu bu Okalibe-Kakota-Ike, bu Chileke ndu Izurelu epfu baa: Ee-mechakwaa wata azu ulo; yee ali; yee opfu-vayinu l'ali eka-a ozo.' "

Jieremaya epfu anu Chileke

¹⁶ Mu wochaaruru ekwo ono, e gude zu ali ono nuchaa Baruku nwa Neraya; mu bya awata epfu anu Chipfu su: ¹⁷ "Gube Nnajiuphu, bu Chileke! O kwa ngu meru igwe; bya emee ali; o buru ike okpu ngu yee eka ngu, i lochiru alochi be i gude mee ya. O to dukwa iphe, tsunukaru ngu l'ehu. ¹⁸ Gube onye egoshije igwerigwe nemadzu l'i yeru phe obu. O le iiwojeru aphu ejo-iphe, ndu bu nna meru woru nwua l'utapfu ndu bu unwu phe m'ephe anohedu. Gube oke Chileke ono, ike du ono; onye epha iya bu Chipfu, bu Okalibe-Kakota-Ike; ¹⁹ iphe, i chiru idzu ememe be ha shii; teme iphe, iime ememe paa eka. I saru enya humagbua iphemiphe, nemadzu eme. I nodu ebuje onyemonye nggo g'iphe, o meru gbaru; yee iphe, o metaru. ²⁰ I meru iphe-ohumalenya; yee

iphe, dū biribiri l'alī ndu Ijiputu; ì nòdu emele
 iya phò g'iime iya jasū ntanū-a. Iimeru iya ndu
 Ízurelu; bya emeru iya ndiphe mgburugburu; o
 mee; epha ngu pfuru g'ò pfukwaduru-a. ²¹ I
 dufutaru ndibe ngu, bụ ndu Ízurelu l'alī ndu
 Ijiputu; ọ bụru iphe-ohumalenya; yee iphe, dū
 biribiri bẹ i gude mee ya. Ọ bụru ike okpu ngu;
 yee eka ngu, ì lochiru alochi; waa iphe, dū ebvu
 bẹ i gude mee iphemiphe ono. ²² Ì nūru phẹ alī-a,
 bụ ophu i riburu angū l'ii-nū nna phẹ oche phẹ,
 bụ alī, mini era-eswi yee manū-ēnwu jiru pyimu
 pyimu. ²³ Epha bya abata bya anata iya nworu;
 ophu epha emeduru iphe, ì sūru g'ephe meje;
 ophu epha etsoduru ekemu ngu; mbụ l'ephe te
 emeduru iphe, ì karū sū g'ephe meje; ọ bụru iya
 meru g'o gude ì haa iphemiphe-a, bụ ejo iphe-
 ehuka-a byapfuta phẹ.

²⁴ “Lewarọ g'a kpuru igbulọ-ọgu kpuphee
 mkpukpu-a mgburugburu g'e gude nata iya. Ọ
 bụru ogu-echi; yee egu; yee ejo iphe-ememe bẹ
 mewaru g'e woru mkpukpu-a nū ndu Bábilonu,
 bụ ndu etso iya ọgu. Iphe, i pfuru bẹ iilenaa enya
 l'o mewaru g'i pfuru iya. ²⁵ Ọle ọ bụ; a makwaru-
 a lẹ mkpukpu-a bẹ e yewaru l'eka ndu Bábilonu;
 ọle gube Nnajiuphu, bụ Chipfu pfuru mu sū mu-
 a: ‘Gude mkpola-ochaa zua alī-a; l'iinweru ndu
 ekebe lẹ g'ì gude eme k'azuzu iya ọbu!’ ”

²⁶ No iya; olu-Opfu Chipfu bya erwua Jiere-
 maya nchì sū: ²⁷ “Ọ kwa mu bụ Chipfu bya
 aburu Chileke ndiphe l'ophu. ?Ọ duru iphe,
 atsunukaje mu l'ehu ememe? ²⁸ Ọo ya bụ lẹ-a;
 wakwa iphe, Chipfu epfu baa: Mu abyaakwa

eworu mkpukpu-a ye l'eka ndu Babilonu; yee Nebukadineza, bu eze ndu Babilonu, bu onye anata iya nu. ²⁹ Ndu Babilonu-a, l'etso mkpukpu-a ogu-a l'e-mechaa bata bya atua ya oku l'ootsua ya tsufu; mbu tsukota oku l'ulo; me l'ulo, bu eka ndu nemadzu no kpatsu mu iwe; eka ephe ejeje anodu le mkpotsu akpo unwu-isensu oku anu Balu; teme ephe agbaru agwa mee gude agwa iya. ³⁰ Ndu Izurelu ephe le ndu Jiuda ta adudu iphe ozo, ephe mebaaru gbahaa ejo-ememe be ephe eme l'ataphu mu; eshinu ephe bu nwata be ephe anodujeepho akpatsu mu iwe l'iphe, ephe eme l'eka. Nokwa iphe, Chipfu eepfu.

³¹ "E -shi mboku, e doberu mkpukpu ono jasunata-a be mkpukpu-a shiepho kpatsuta mu iwe; yee oke ehu-eghu k'ophu bu le mu e-wofu iya l'ataphu mu. ³² Ndu Izurelu ephe le ndu Jiuda kpatsuwaru mu iwe; o buru iphe, kparu iya nu bu ejo-ememe ono, ephe meshiru ono g'oha; ephebedua; me ndu eze phe; mekpoo ndu-ishi phe; me ndu-uke phe; me ndu mpfuchiru phe; ndu Jiuda me ndu Jierusalemu. ³³ Ephe gharu mu okpurukpu haa agharu mu iphu. A makwaru-a le mu ziru phe iphe nzito; ole ephe te eyeduru onu ophu ahuhu, mu ahu phe erwudu phe l'ehu. ³⁴ Ephe woru ejo ahuma phe ono, bu nshi woru dobe l'ulo, e kuru epha mu; shi nno turwua ya. ³⁵ Ephe kpu eka aagwaje iphe agwagwa doberu Balu le nsuda Hinomu; g'oha buru eka ephe a-kpoje unwegirima phe oku gude gwaa Moleku; l'ebe abu le mu tujeru ekemu; mbu l'o to batajekpodaru mu nu

l'obu k'asụ g'ephe mee ẹbyi, dụ ẹgube ono; shi nno mee gẹ Jiuda mee iphe-ẹji.”

³⁶ “Iphe, unu epfu l'opfu ẹhu mkpukpu-a bu l'ọ kwa ogu-echi; yee okpa-nri; yee ẹjo iphe-ememe be e gudewaa eworu mkpukpu-a eye l'eka eze ndu Babilonu; obenu le-a; wakwa iphe, Chipfu, bu Chileke ndu Izurelu epfu baa: ³⁷ O to dukwa iphe, e-me ge mu ta chilatachaa phe eshi l'iphe, bukpo ẹka mu shi chiru phe jeye teke ẹhu egbu mu egbu; enya nodu ata mu kpitikpiti. Mu e-duphutacha phe azu duru bya edobe l'eka-a g'ephe buru g'o to du iphe, e-me phe nu. ³⁸ Epe aburu ndibe mu; mu aburu Chileke phe. ³⁹ Mu e-me g'okpoma phe buru nanu; umere phe aburu nanu; k'ophu epe a-nodu atsụ mu ebvu g'o duru phe le ree; duru unwu phe, e-mechaa etso phe lazu. ⁴⁰ Mu l'ephe a-gba ogbandzu ojeje; ophu mu abyadu ahaba emeru phe iphe, du ree; mu akpalia phe g'ephe tsuje mu ebvu k'ophu epe ta abyadu ahabaa mu ahaha. ⁴¹ Ehu a-nodu atsọ mu; mu emeeru phe ree. Ophu o dudu iphe, e-me ge mu ta adza phe adzadza l'ali ẹka-a; mbu mu e-gudekpoo obu mu l'ophu mee ya.”

⁴² “Wakwa iphe, Chipfu epfu baa: O kwa ge mu wotaru ndu-a eze iphe-ehuka-a bu ge mu a-nukota phe iphe, du ree, mu kweru phe ukwe iya. ⁴³ Ee-mechaa zuaha ali ozobaa l'ali-a, bu ẹka unu asuje: ‘O bukwaa ochobu; ali, nemadzu ebudu; ophu anu ebudu iya; kele e wowaru iya yee l'eka ndu Babilonu.’ ⁴⁴ Ee-mechaa gudeaha mkpola-ochaa zuaha ali ozo; deaha ekwo ali; meahaa ya ohubama;

ndu ekebe eyekwa iya phọ ẹka; l'oke alì ndu Benjiaminu-a; yele mkpukpu le mkpukpu, nọ-pheru Jierúsalemú mgburugburu; mękpoo l'iphe, bú mkpukpu, nọ l'alì ndu Jiuda; mę l'ophu nọgbaa l'alì úbvú úbvú; mę ophu nọgbaa l'alì okpa úbvú, nọ l'uzo ęnyanwu-ariba; mę ophu nọ l'echięgu ndohali. O buru iphe, a-kpa iya nù bú le mu e-dophu phę azu l'onodu phę; nokwa iphe, Chipfu epfu.”

33

Ee-mechaa dophu Jierúsalemú azu l'onodu iya

¹ Olu-Opfu Chipfu byakwa erwua Jieremaya nchì kę mgbo ẹbo teke ono, o nọkwadu l'oma-unuphu ẹka ndu nche anoje ono; sù: ² “Wakwa iphe, Chipfu epfu baa; mbu onye ono, bú iya meru mgboko; mbu Chipfu; onye bú iya meru mgboko dobe g'ọo-dù; bya emee ya; o nguru anguru; o kwa Chipfu bú ẹpha iya. ³ Kua mu oku; huma le mu a-za ngu ẹnu; bya akaru ngu iphe, paru ẹka bya adu omilomi, bú iphe, i mahakpoda; ⁴ kele-a; wakwa iphe, Chipfu, bú Chileke kę ndu Izurelu epfu baa l'opfu ẹhu ọlo, dugbaa le mkpukpu-a; yele opfu ẹhu ọlo ibe eze ndu Jiuda, bugbaa ọlo, a kwatsushiru gude gbobuta obvudu ẹja, ndu ohogu kuberu; yee ogu-echi phe; ⁵ l'eka aalwu ogu onye le ndu Babilonu: O kwa odzu be ee-mechaa gude chi-jishia ya achi-jishi; mbu odzu ndu mu e-gude ẹhu-eghu mu; yee ęnya, ata mu kpitikpiti gbushia. Mu woharu ndu mkpukpu-a iphu mu;

ọ bụru iphe, kparụ iya nụ bụ ẹjo-iphe, ẹphe emegbabe.

⁶ “Ọle g’ọ dūhabe; mu e-wotaru phẹ ẹhu-ọdu-ike; mbụ mee g’ẹphe wekọrohu. Mu e-me g’ẹphe wekọrohu; mee g’ẹhu dū phẹ guu dū k’etsutsu iya; ọphu ọ duedu iphe, byaru eme phẹ nū.

⁷ Mu e-dophu ndu Jiuda; mẹ ndu Ízurelu azụ l’ọnodu phẹ; mu akpua phẹ; ẹphe adū g’ẹphe shi duhawa. ⁸ Mu abya asashia phẹ ẹjo-iphe, ẹphe meru mu g’ọ ha; bya aguaru phẹ nvụ l’ẹjo-iphe ono, ẹphe meru mu ono, bụ l’ẹphe kwefuru mu ike ono. ⁹ Oo ya bụ ẹpha mkpụkpu-a emeahaa g’ẹhu tsoo uto. Ohamoha, nọkota lẹ mgboko l’ophu, bụ ndu a-numa iphemiphe, bụ iphe, dū ree, mu a-nodu emeru phẹ ajaahaa mu ajaja; kwabeahaa mu úbvú. Ẹphe awata atsụ ebvu; wata anma pyaapyaapya; kele mu e-meru ndu mkpụkpu-a iphe, dū ree; mee g’ẹhu dū phẹ guu.”

¹⁰ Wakwa iphe, Chipfu epfu baa; “Alị ẹka-a, unu sūru l’ọ bụ ochobu, nemadzū ebudu ebudu; ọphu anū ebudu iya-a; mbụ ime mkpụkpu lẹ mkpụkpu Jiuda; yẹ gbororo, dabyigbaaru lẹ Jierúsalem, bụ ẹka a gbadochawaru agbado; ọphu nemadzū ebudu iya ebudu; ọphu anū adudu iya-a; bẹ ee-mechaa nūaha olu ọzobaa; ¹¹ olu ẹhu-uto; mẹ olu ndu ete ẹswa; olu unwumgboko, ala ji; mẹ k’unwoke, alū nwanyị ọphúú; yẹ olu ndu gude ngweja ekele abya l’eze-ulo Chipfu; ẹka ẹphe agụ ebvu asuje:

“Kele Chipfu,

bụ

Ọkalibe-Kakota-Ike ekele;

kele Chipfu dū ree;

n-yemobu iya anoje jasụ
l'ojejoje.

Ọ bụru iphe, a-kpa iya nụ bụ lẹ mu e-dophu alị-a azụ l'ọnodu iya. Noo iphe, Chipfu epfu.”

¹² Wakwa iphe, Chipfu, bụ Ọkalibe-Kakọta-Ike eepfu: “L'alị ẹka-a, bụ ochobu; ọphu nemadzu ebudu iya; ọphu anụ ebudu iya-a; l'iphe, bụkpoo mkpụkpu lẹ mkpụkpu, nọ iya nụ; bẹ ẹka eeche eswi e-mechaa lwa azụ bya adụkota gẹ ndu eche aturu dọbeje anụ, ẹphe eche. ¹³ L'iphe, bụkpoo mkpụkpu lẹ mkpụkpu ono, nọgbaa l'alị úbvú úbvú; mẹ ndu ọphu nọ l'alị ọkpa úbvú, nọ l'uzo ẹnyanwu-arịba; yẹ ndu ọphu nọ l'echiegu ndohali; mẹ lẹ k'alị ndu Benjaminu; mẹ l'unwu mkpụkpu lẹ mkpụkpu, nọ-pheru Jierúsalemụ mgburugburu; yẹfua l'ime mkpụkpu, nọgbaa lẹ Jiuda; bẹ anụ, eeche eeche e-mechajẹ awughata l'ataphu onye a-nọdu agụ iya ọgu. Nokwa iphe, Chipfu eepfu.”

¹⁴ Wakwa iphe, Chipfu epfu baa: “Mbọku abyakwa teke mu e-meru ndu ọnu-ụlo Ízurelu yẹ ọnu-ụlo Jiuda iphe, dụ ree, mu kweru ukwe lẹ mu e-meru phẹ. ¹⁵ O -rwua mbọku ono bẹ mu e-me g'ẹkali-iphe, pfulerekoto kpofuta l'oshilokpa Dévidi. Ọ bụru yẹbedua e-me iphe, pfulu ọto yẹ iphe, dụ nhamunha l'alị ẹka-a. ¹⁶ O -rwua mbọku ono bẹ aa-dzọta ndu Jiuda; ndu Jierúsalemụ eburu túsaru ẹhu; ọ tọ dudu iphe, eme phẹ nụ. Iphe, aa-wata iya ekuku aburu: ‘Chipfu, bụ apfulbekoto k'anyi’; ¹⁷ kele-a wakwa iphe, Chipfu epfu baa: Ụko onye a-nọdu l'aba-eze ọnu-ụlo Ízurelu ta abyakwa aduru

Dévidi; ¹⁸ Ophu ndu-uke, bu ndu Lívayi abyadu akọ ọko onye a-pfuru l'iphu mu mkpürumkpuru egweru mu ngweja-akpo-ọku; waa ngweja-nri; me ngweja mmanu ozo.”

¹⁹ Tọbudu iya bu; Opfu Chipfu bya erwua Jieremaya nchi su: ²⁰ Wakwa iphe, Chipfu epfu baa: “O -buru l'unu a-du ike mebyia ogbandzu, mu l'eswe gbaru; yee ogbandzu, mu l'enyashi gbaru; k'ophu bu l'eswe yee enyashi taa nwuedu l'orwuberu iya; ²¹ a bya emebyik-wapho ogbandzu mu le Dévidi, bu onye-ozu mu; yee ogbandzu mu le ndu Lívayi, bu ndu-uke, ejeru mu ozi; o o ya bu le Dévidi tee nweedu awa, bu onye a-buru eze ndu l'aba-eze iya. ²² Mu e-me awa Dévidi, bu onye-ozu mu; yee awa ndu Lívayi, bu ndu eje ozi l'iphu mu; g'ephe buru aguta aguta ge kpokpode, no l'igwe; ophu aatukotadu phe l'iphe, aatuje erwa iphe egube-a, a taa tukotajedu eja, no l'aguga eze-enyimu-a.”

²³ Tọbudu iya bu; Opfu Chipfu bya erwua Jieremaya nchi su: ²⁴ “?Tii ledu iphe, ndu-a anoduje epfu su: ‘Ipfu labo-a, Chipfu hotaru-a be o paakwaru gwobe?’ Ephe shi egube ono kpo ndibe mu ebo l'afu; k'ophu bu l'ephe ta abuedu oha eka phe l'iphu phe. ²⁵ Wakwa iphe, Chipfu epfu baa: Ome mu l'eswe yee enyashi ta agbaduru ndzu; bya atua ekemu doberu igwe yee ali; ²⁶ me mu ajika oshilokpa Jiekopu; yee ke Dévidi, bu onye-ozu mu; ophu mu tege ahotadu onye lanu, bu nwa iya nwoke g'o buru ishi ndu bu oshilokpa Ebirhamu; yele ke Ayizaku; yele ke Jiekopu; kele-a; mu e-dophu phe azu l'onodu

phẹ bya aphuaru phẹ obu-imemini.”

34

Aaloru Zedekaya ẹka lẹ nchi

¹ Gẹ Nebukadineza, bụ eze ndu Bábilonu; yee ndu ojoḡu iya l'ophu; waa iphe, bụ ohamoha, nọkota iya l'ẹka; tukuru etso Jierúsalemu oḡu; yee mkpukpu, nọ-pheru iya mgburugburu bẹ opfu-a shi l'ẹka Chipfu rwua Jieremaya nchi.

² Wakwa iphe, oopfu; mbụ Chipfu, bụ Chileke kẹ ndu Ízurelu. O suru-a: Jepfu Zedekaya, bụ eze ndu Jiuda je asụ iya-a: Wakwa iphe, Chipfu epfu: Mu abyakwa eworu mkpukpu-a ye l'ẹka eze ndu Bábilonu, bụ onye a-tu iya oḡu l'ootsua ya tsufu.

³ Ophu o dukwa iphe, e-me g'ì nahụ iya g'o to gude ngu. O chikwa l'ee-gude ngu kpuru nụ iya. L'i gude ẹnya ngu hụma eze ndu Bábilonu; unu l'iya anodu l'iphu l'iphu pfugbaa opfu; l'ì lasha alì ndu Bábilonu.

⁴ “Ole o bụ; numakwa ukwe-iphe, Chipfu ekwe ngu; gube Zedekaya, bụ eze ndu Jiuda. Wakwa iphe, Chipfu epfu l'opfu ẹhu ngu; e tee gbukwa ngu l'ogu-echi; ⁵ ị-nwuhukpoo chiriiri. Oo g'a kpoberu oḡu lia ndiche ngu phẹ, bụ ndu ophu vuru ngu uzo buru eze; nokwapho g'ephe akpobe oḡu l'ulo-ekwa ngu gude raa ekwa ngu sụ: ‘Owiwo; nnaji mu-e!’ O kwa mbedua l'onwomu ekwe ukwe-iphe-a; bụ iphe, Chipfu epfu.”

⁶ Tọbudu iya bụ; Jieremaya, bụ onye mp-fuchiru tuko iphemiphe ono pfiaru Zedekaya, bụ eze ndu Jiuda lẹ Jierúsalemu. ⁷ Teke ono bẹ ndu ojoḡu eze ndu Bábilonu etsokwa ndu

Jierúsalemu oḡu; yẹe mkpukpu lẹ mkpukpu ozo, nọgbaa l'alì ndu Jiuda, bu mkpukpu ndu ophu phoduru nu, du ge Lakishi; yẹe Azeka. O bu mkpukpu ono ephenebo bu mkpakọ mkpukpu, a kpu-pheru igbulọ mgburugburu, phoduru nu l'alì ndu Jiuda teke ono.

Ndu bu ohu l'e-mechaa nweru onwophe

⁸ Owa bu opfu, shi l'eka Chipfu rwua Jieremaya nchi g'eze, bu Zedekaya gbacharu oḡbandzu epe lẹ ndu Jierúsalemu l'ephe ara iya arara lẹ ndu bu ohu e-nweru onwophe.

⁹ Onyemonye l'a-ha ohu iya, bu onye Hiburu; me ndu ke nwoke me ke nwanyi; g'o to du onye agba onye Jiuda ibe iya ohu. ¹⁰ Oo ya bu; ndu-ishi; mekpoo iphe, bu ndu Izurelu, bu ndu bahuru l'oḡbandzu ono toko kweta l'ephe a-ha ohu phe nwoke me unwanyi; g'o to duhe onye a-buru ohu ozobaa. Epe pfubua ya woru phe hakota. ¹¹ E mecha; izimanu lwa phe azu; epe bya achiphuta ndu bu ohu ono azu; mbu ndu ono, epe shi hawa ono; bya agbaphu phe ohu azu.

¹² Tobudu iya bu; olu-opfu Chipfu bya erwua Jieremaya nchi su: ¹³ Wakwa iphe, Chipfu epfu; mbu Chileke ndu Izurelu. O suru-a: "Mu lẹ ndiche unu phe gbaru ndu teke mu dufutaru phe l'alì ndu Ijiputu; mbu l'alì eka epe no buru ohu. Mu pfua su: ¹⁴ Iphe, bukpo apha esaa, a-nwuta anwuta g'onnyemonye l'ime unu l'ehu l'ehu tohajekwa onye Hiburu ibe iya, e reru unu. Mbu l'o -jewaru unu ozi apha ishii; g'unu haje iya g'o la ke mmanu; ophu nna unu oche phe angaduru mu nchi; ophu epe eyeduru mu onu.

¹⁵ Izimanu lwa unu azu le mgboru nta-a; unu bya emee iphe, pfuru nhamunha l'enya mu. G'unu ha l'onye l'onye bya araa ya arara su ge ndu ali unu nweru onwophe. Unu nodu l'iphu mu gbaa ndzu l'ulo-a, e kuru laaru epha mu-a. ¹⁶ O be nta; unu byakwa bya aghakobe bya emerwushiaha epha mu ozo. G'unu ha laphuchaa azu je achiphuta ohu unu ke nwoke yee ke nwanyi ono azu; mbu ndu unu shi hawa g'ephe jeje eka du phe ree. Nta-a be unu gbaphuwaru phe ohu ozo.

¹⁷ "Oo ya bu le-a; wakwa iphe, Chipfu epfu baa: 'Unu te emekwaru iphe, mu suru g'unu mee. Unu ta arakwaru iya arara su ge ndu ali unu nweru onwophe. Oo ya bu le-a; nta-a be mu arawa iya arara l'unu e-nweru onwunu; o kwa Chipfu epfu iya. Enweru onwunu obu bu l'ee-gude ogu-echi gbua unu; ejo iphe-ememe egbua unu; egu egbua unu. Mu e-me unu ge ndu ali-eze, nokota le mgboko l'ophu so unu oyi. ¹⁸ Onye ono, mebyiru ogbandzu mu ono; ophu o meduru iphe, e pfuru l'ogbandzu ono, bu ophu epe no mu l'iphu gbaa; ndu ono be mu e-me g'ephe du ge nweswi ono, a sukaharu ebo bya eshia ya echilabo ghajaa ono. ¹⁹ Ndu-ishi ndu Jiuda yee ke ndu Jierusalemu; me ndu eleta ibe eze enya; me ndu bu uke; mekpoo ndu ali ono l'ophu, bu ndu ghajaru echilabo nweswi ono ²⁰ be mu e-woru ye l'eka ndu ohogu phe, bu ndu achu ndzu phe. Odzu phe l'a-buru nri enu, epe l'eli; yee anu, bu l'eliphe.

²¹ " 'Zedekaya, bu eze ndu Jiuda; yee ndu-ishi l'ali-eze iya be mu e-yekota l'eka ndu ohogu phe, bu ndu achu ndzu phe; woru phe ye l'eka ndu

ojoḡu eze ndu Bábilonu, bu ndu shi sephuwaa onwophe azu l'eka i no. ²² Wakwa iphe, Chipfu epfu baa: Mu a-tu ekemu l'onwomu; o buru mu e-duphuta phe azu le mkpukpu-a. Ephe e-tsoo ya oḡu; nata iya; woru oku tua ya l'ootsua tsufu. Mu emee ge mkpukpu, noḡbaa l'ali ndu Jiuda buru ochobu; o to duedu onye ebu iya ebubu.' "

35

Unwu Rekabu

¹ Wakwa opfu, shi Chipfu l'eka rwua Jieremaya nchi teke Jiehoyakimu nwa Jiosaya bu eze ndu Jiuda. O suru: ² "Jepfu ndu onu-ulo Rekabu je eduru phe bya l'eka ulo eze-ulo Chileke eka lanu. Ephe -bya l'ini phe mee g'ephe nḡa."

³ Tobudu iya bu; mu tugbuja je ekua Jiazanaya, bu nwa Jieremaya nwa Habazinaya; bya ekua unwune iya g'ephe ha; yee unwu iya g'ephe ha; o buepho ndu onu-ulo Rekabu g'ephe hakota.

⁴ Mu bya achibata phe l'eze-ulo Chipfu; bya achiru phe bahu l'onu-ulo k'unwu Hananu nwa Igudalaya, bu onye ke Chileke. Onu-ulo k'ono no-kube onu-ulo ke ndu-ishi; bya ano-koru l'eli onu-ulo Maseya nwa Shalumu, bu onye-nche onu-abata. ⁵ Mu bya agbajishia mee l'ite subegbaaru ndu onu-ulo Rekabu ono; bya edoberu phe okoro; bya asu phe: "Unu pata mee nḡa!"

⁶ Ephe yeeru mu onu su mu: "Anyi ta angujekwa mee; kele nna anyi oche, bu Jion-adabu nwa Rekabu bukwa iya turu anyi ekemu ono su anyi-a: 'G'unubedua mekpoo oshilokpa unu ta adukwa teke unu angujekpo mee jasu

l'ojejoje! ⁷ Ọzo bụ g'unu ta akpụjekwa ụlo; ọphu unu akujekwa iphe akuku; ọphu unu akojekwa opfu-vayinu. G'ọ tọ dukwa iphe ono, ọphu unu e-nwejeru; ọo ẹpho ụlo, e meru l'ekwa bẹ unu a-nọduje ebuphe. Ọo ya bụ g'unu a-kaa nka l'alị ono, unu lwaru alwalwa ono.' ⁸ Anyi nọdu emeepho iphemiphe ono, nna anyi oche, bụ Jionadabu nwa Rekabu turu anyi l'ekemu ono. Ọo ya bụ l'anyịbedua; mękpoo unyomu anyi mękpoo unwu anyi unwoke mę unwanyi teke angu-swekwa mę; ⁹ ọphu anyi eke kpụ-swee ụlo k'eburu; ọphu anyi akodu opfu-vayinu; ọphu anyi enwedu ẹgu; ọphu anyi akudu iphe, aaku akuku. ¹⁰ Ọ kwa l'ulo, e meru l'ekwa bẹ anyi ebujeru; teme anyi nọdu anọduje emeepho iphemiphe ono, Jionadabu, bụ nna anyi oche ziru anyi ono. ¹¹ Ọ be gę Nebukadineza, bụ eze ndu Babilonu byaru bya asopyabe alị ẹka-a; anyi sụ: 'Unu byakwa g'anyi lashia Jierusalemu; g'anyi nahu ndu ojogu ndu Babilonu; yee ke ndu Aramu.' Ọ kwa iya meru g'o gude ọ buru le Jierusalemu bẹ anyi nọ."

¹² Tọbudu iya bụ; Opfu Chipfu bya erwua Jieremaya nchị sụ: ¹³ Wakwa iphe, opfu; mbụ Chipfu, bụ Okalibe-Kakota-Ike; mbụ Chileke ke ndu Izurelu: "Je je akaru ndu Jiuda; yee ndu Jierusalemu sụ phe-a: ?Unu tee gudedu ndu-a nwuta iphe wata eme iphe, mu suru g'unu meje? Ọ kwa Chipfu epfu. ¹⁴ Jionadabu nwa Rekabu turu ndibe iya ekemu sụ g'ephe ta ngujekwa mę. Epe nọdu eme iphe ono, a turu phe l'ekemu ono. Ọphu epe angudu mę jasụ

ntanụ-a; ọ buru iphe, kparụ iya nụ bu l'ephe eme g'ephe mee iphe, nna phẹ oche turu phẹ l'ekemu. Obenu lẹ mbedua pfuwaru yeru unu; mu -pfuchaa; mu epfubaa; ọphu unu ekwedu eme iphe, mu sụru g'unu mee. ¹⁵ Ndu ozi mu, bu ndu mpfuchiru g'ephe ha be mu yewaru g'ephe byapfuta unu; mu -yechaa; mu eyebaa; ephe bya bya asụ unu-a: 'G'unu ha l'onye l'onye hanaa ejo-iphe, unu eme; dozia umere unu; g'unu te tsohekwaru agwa; unu ba baheru iya eja. Ọo ya bu g'unu eburu l'alị ono, mu nuru unu lẹ nna unu oche phẹ ono.' Ọphu unu angaduru nchị; ọphu unu eyeduru mu onu. ¹⁶ Oshilokpa Jionadabu nwa Rekabu be meakwaru iphe, nna phẹ oche turu phẹ l'ekemu; obenu lẹ ndu-a te ekwedu eme ọphu mbedua suru g'ephe meje.

¹⁷ "Ọo ya bu lẹ-a; wakwa iphe, oopfụ; mbụ Chipfu, bu Okalibe-Kakota-Ike, bu Chileke ke ndu Izurelu: Unu ngabekwa nchị! Iphe, bukpo ejo iphe-ehuka ono, mu suru lẹ mu e-wotaru unube ndu Jiuda ono be mu e-wotakwaru unu; wotaru iya iphe, bukpo onyemonye, bu lẹ Jierusalemu. Mu pfuru phẹ opfu; ọphu ephe angaduru nchị. Mu kua phẹ oku; ọphu ephe azaduru enu." ¹⁸ Tobudu iya bu; Jieremaya bya asụ ndu onu-ulo Rekabu: "Wakwa iphe, o pfuru; mbụ Chipfu, bu Okalibe-Kakota-Ike, bu Chileke ndu Izurelu. Ọ sụru-a: Eshinu unu mewaru iphe, nna unu oche, bu Jionadabu turu unu ekemu iya; bya emekota iphemiphe, ọ suru g'unu meje; mbụ ọ buerupho g'o goshiru iya unu bu g'unu eme iya; ¹⁹ be bu lẹ-a; wakwa iphe, oopfụ;

mbụ Chipfu, bụ Ọkalibe-Kakọta-Ike; bya aburu Chileke ke ndu Ízurelu. Ọ sụru: Ọ tọ dukwa iphe, e-me g'awa Jionadabu nwa Rekabu te nwe onye a-nọdu ejeru mu ozi.”

36

Jiehoyakimu echie ẹkwo Jieremaya l'ọku

¹ O be l'apha, kwe Jiehoyakimu nwa Jiosáya apha ẹno, ọ wataru aburu eze ndu Jiuda; opfu-a shi l'ẹka Chipfu rwua Jieremaya nchi: ² “Wota ẹkwo, a phuru aphupu dee iphe, bukpo iphemiphe ono, mu pfuru ngu le k'ehu ndu Ízurelu; me ke ndu Jiuda; me k'ohamoha ozo; shikpopho teke mu wataru ngu iya epfuru le teke Jiosáya shi buru eze byasu nta-a; deta iya. ³ ?A maru; ?ndu onu-ulo Jiuda -numa iya; mbu numa iphe, bukpo ejo iphe-ehuka ono g'o ha, mu doberu le mu e-me phe ono; g'ephe ha l'onye l'onye ahaa eme ejo-iphe, ephe eme; mu aguaru phe nvu l'iphe, bukpo iphe-eji, ephe eme.”

⁴ Tobudu iya bu; Jieremaya bya ekua Baruku nwa Neraya; o bya anodu. Jieremaya wataru iya epfushiru iphemiphe ono, Chipfu pfuru iya ono; Baruku nodu edeshi iya l'ekwo aphupu ono. ⁵ No iya; Jieremaya su Baruku-a: “Mbdua be ephe wuchikwaru ewuchi; k'ophu mu taa dudu ike abya l'eze-ulo Chipfu. ⁶ Oo ya bu le-a; tugbukwaa je l'eze-ulo Chipfu l'eswe mboku, aaswije egu je aguaru ndiphe iphe, i deru l'ekwo aphupu-a; mbu Opfu Chipfu, bu ophu mu pfuru ngu epfuru; i dee ya edede. Guaruru iya ndu Jiuda l'ophu, bu ndu shigbaa le mkpukpu ẹka ephe

shigbaa abata l'ulo ono. ⁷ ?A maru; ?ephe arwo Chipfu; g'ephe ha l'onye l'onye eshi l'eme ejo-ememe ono, ephe eme ono lwaphuta azu; kele oke ehu-eghu Chipfu, o suru l'o-tukoru l'ishi ndu-a paru eka.”

⁸ Baruku nwa Neraya tuko iphemiphe ono, Jieremaya onye mpfuchiru suru g'o mee ono mekota. O pfuru l'eze-ulo Chipfu tuko Opfu Chipfu ono, e deru l'ekwo ono woru guaru phe. ⁹ O be l'onwa ke tete l'apha, kwe Jiehoyakimu nwa Jiosaya apha ise, o bahuru l'aba-eze ndu Jiuda; e woru eswe aa-swiru Chipfu egu raa arara l'iphe, bukpo oha ndu bu le Jierusalemu l'ophu; mekpoo ndu ophu shi le mkpukpu, nogbaa l'ali ndu Jiuda bya. ¹⁰ Baruku bya eje apfuru l'eze-ulo Chipfu l'oma-ulo Gemaraya nwa Shafanu, bu onye edeje ekwo. Onu-ulo k'ono no l'oma ulo-eli iya, no le mgboru onu-abata Ophuú. O pfuru l'eka ono woru opfu Jieremaya, e deru l'ekwo-a woru ga; onyemonye numa-dzuru.

¹¹ O be ge Mayikaya, bu nwa Gemaraya nwa Shafanu numaru Opfu Chipfu ono g'o ha, bu ophu e deru l'ekwo ono; ¹² o bya agbazeta jeshia ibe eze; bya eje abahu l'oma-ulo k'onye edeje ekwo. Iphe, bukpo ndu-ishi g'ephe ha doru l'eka ono. Ndu no iya nu bu onye edeje ekwo l'onwiya, bu Elishama; yee Delaya nwa Shemaya; yee Elunatanu nwa Akubo; yee Gemaraya nwa Shafanu; yee Zedekaya nwa Hananaya; yee iphe, bukpo ndu-ishi ndu ophuu g'ephe ha. ¹³ Mayikaya bya eworu iphemiphe, o numaru,

Baruku gūru ndiphe l'ekwo ono kōoru phẹ. ¹⁴ Iphe, bu ndu-ishi ono g'ephe ha bya ezia Jiehudi, bu nwa Netanaya nwa Shelemaya, bu nwa Kushi g'o je asu Baruku g'o gudeeshikwa ekwo aphuphu ono, o guru ndu Izurelu ono gude bya. No iya; Baruku nwa Neraya bya aparu ekwo aphuphu ono l'eka gude bya ejepfu phẹ. ¹⁵ Ephe su iya: "Nodueshikwa anoo gūaru iya anyi."

No iya; Baruku bya eworu iya gūaru phẹ. ¹⁶ O be teke ephe nūmaru opfu ono g'o ha; ephe bya elegbabechaa nwibe phẹ enya l'eka ndzu agu phẹ. Ephe su Baruku: "Opfu-a g'o ha be anyi e-jekwa akōoru eze." ¹⁷ Ephe bya ajia Baruku su iya: "Kaeshikwaru anyi. ?Denu g'i meru dekota iphemiphe-a g'o ha? ?Bu Jieremaya epfuru ngu iya; i nodu ede to?"

¹⁸ Baruku su phẹ; "Ee; oo ya pfukotaru mu iphe-a g'o ha; mu gude mini-ekwo dee ya l'ekwo-a."

¹⁹ Tobudu iya bu; ndu-ishi ono bya asu Baruku-a: "Ge gu le Jieremaya tugbukwaa je edomia onwunu. Unu te emekwa g'a maru eka unu no!"

²⁰ Ephe bya eworu ekwo aphuphu ono bya edobe l'ulo ke Elishama, bu onye edeje ekwo. Ephe bya ejepfu eze l'oma-unuphu ibe iya je epfuaru iya iphemiphe. ²¹ Eze bya ezia Jiehudi su iya g'o je ewotaeshikwa ekwo aphuphu obu. Jiehudi bya tugbua je l'ulo Elishama, bu onye edeje ekwo je ewota ekwo ono bya agūaru eze; yee ndu-ishi; ndu-ishi g'ephe ha pfugbaaru l'aguga iya. ²² Teke ono bu onwa tete. O buru l'obu, aanoduje l'udzumini be o no; a zuberu iya oku l'epfu; o nodu enwu taphutaphu l'eka o

nọ. ²³ Ọ nọdu abujeru; Jiehudi -gụepho mpekala ẹkwo ono ẹto ọzoo ẹno; eze egude mma ndu edeje ẹkwo byikata iya ye l'ọku epfu ono. O mee ya nno; jasụ ẹkwo aphụphu ono kekọta ọku. ²⁴ Ọphu eze; yẹe ndu ejeru iya ozi, bụ ndu tukuru opfu ono g'ọ ha numa ono egoshiduru lẹ ndzụ agụ phẹ; ọphu ẹphe alakaduru uwe phẹ. ²⁵ Ẹlunatanu; yẹe Delaya; yẹe Gemaraya rwọkpoo eze sụ iya g'ọ tọ kpọshi ẹkwo aphụphu ono ọku; ọphu o yeduru phẹ ọnu. ²⁶ Ọ bụchiaru iphe, o meru; mbụ eze bụ l'ọ turu ekemu sụ gẹ Jierahumelu, bụ nwa iya; yẹe Seraya nwa Azuriyelu; yẹe Shelemaya nwa Abudelu; g'ẹphe je egude Baruku, bụ onye edeje ẹkwo; yẹe Jieremaya, bụ onye mpfuchiru. Obenu lẹ Chipfu domiru phẹ.

²⁷ Eze kpọchaepho ẹkwo aphụphu ono ọku; mbụ ẹkwo, e deru opfu, bụ Baruku deru iya iphe, Jieremaya pfuru iya g'o dee ya; Opfu Chipfu rwua Jieremaya nchị. ²⁸ Ọ sụ: “Wota ẹkwo aphụphu ọzo dee iphemiphe ono, dọ l'ẹkwo aphụphu kẹ mbụ phọ, bụ ọphu ọ kpọru ọku; mbụ Jiehoyakimu, bụ eze ndu Jiuda. ²⁹ Ọzo bụ lẹ-a; karụ Jiehoyakimu, bụ eze ndu Jiuda; sụ iya lẹ-a: Wakwa iphe, Chipfu epfu baa: Ị kpọru ẹkwo aphụphu ono ọku sụ: ‘?Bụ gunu meru g'o gude i dee ya sụ l'eze ndu Babilonu byafutaje bya emebyishia alị-a mee gẹ nemadzụ yẹe anụ ta aduhe iya?’ ³⁰ Ọo ya bụ lẹ-a; wakwa iphe, Chipfu epfu baa l'opfu ẹhu Jiehoyakimu, bụ eze ndu Jiuda: O too nwekwaru onye e-shi iya l'ẹhu, a-nọdu l'aba-eze Dévidi. Odzu iya bẹ aa-togbo

l'etezi; l'ọ dabyiru; anwụ echia ya l'eswe; iji adaa kpua ya l'enyashi. ³¹ Mu a-nụ iya aphụ; yẹe unwegirima iya; yẹe ndu ejeru iya ozi; kele ephe eme ejo-iphe. Iphe, bukpoọ ejo iphe-ehuka ono, mu sụru lẹ mu e-me phẹ ono bẹ mu e-mekotacha phẹ; ephe lẹ ndu bu lẹ Jierúsalemu mẹ ndu Jiuda. Noo kele ephe ta ngaduru mu nchi.”

³² Tọbudu iya bụ; Jieremaya bya ewota ekwo aphuphu ọzo; bya eworu iya nụ Baruku nwa Neraya, bụ onye edeje ekwo. Jieremaya byakwa bya epfuaru iya iphe, oo-de iya; Baruku byakwa bya edekota iya iphe, bukpoọ iphe, shi dụ l'ekwo aphuphu ophuu, ọ kporu oku; mbụ Jiehoyakimu, bụ eze ndu Jiuda. E yebakwaa ya phọ ikpoto iphe ọzo, dugbakwapho g'ono.

37

Jieremaya eje mkpọro

¹ Zedekaya nwa Jiosáya bẹ Nebukadineza, bụ eze ndu Bábilonu meru eze ndu Jiuda. Ọ bụru iya bụ eze nochia enya Jiehoyakinu bụ nwa Jiehoyakimu. ² Yẹbedua l'onwiya; mẹ ndu ejeru iya ozi; mẹ ndu alị ono l'opfu ta adudu onye ngarụ nchi l'opfu ono, Chipfu gbẹ l'onu Jieremaya, bụ onye mpfuchiru pfua ono.

³ Eze, bụ Zedekaya bya ezia Jiehukalu nwa Shelemaya; yẹe onye uke, bụ Zefanaya nwa Maseya g'ephe jepfu Jieremaya, bụ onye mpfuchiru je ezia ya ozia sụ iya-a: “Pfu opfu ehụ anyi nụ Chipfu, bụ Chileke anyi jikonu.”

⁴ Teke ono bẹ Jieremaya nweru onwiya; kele e teke atudu iya mkpọro teke ono. ⁵ Mbụ lẹ ndu

ojoḡu Fero-a wufutaru l'alì ndu Ijiputu. O be ḡe ndu Bábilonu, bu ndu no-pheru Jierúsalemu mgburugburu numaru abyabya ndu Ijiputu ono; eḡhe wufu paru Jierúsalemu haa.

⁶ Toḡbudu iya bu; Opfu Chipfu bya erwua Jieremaya, bu onye mpfuchiru nchì sù: ⁷ “Wakwa iphe, Chipfu, bu Chileke ndu Ízurelu epfu baa: Unu karu eze ndu Jiuda, ziru unu g'unu bya akpata mu ishi: ‘Ndu ojoḡu Fero-a, zefutaru bya unu eyeru eka-a l'e-mechakwaa laa alì pḡe, bu alì ndu Ijiputu. ⁸ Noo teke ndu Bábilonu a-lwa azu bya etsoo mkpukpu-a oḡu; lwuta iya l'oḡu tua ya oku; oku etsufu iya.’

⁹ “Wakwa iphe, Chipfu epfu baa: Unu ba noḡukwa eme onwunu eswe l'eka unu ari sù le ndu Bábilonu ta adukwa iphe, e-me g'eḡhe be mecha haa unu. Eḡhe taa hakwa unu! ¹⁰ Ome o bukpõnu ke g'unu mekpekota ndu ojoḡu ndu Bábilonu l'ophu, bu ndu etso unu oḡu; o buerupho ndu e mekaru iphe phoduru le mkpu, eḡhe turu; eḡhe afutale-a bya akpoo mkpukpu-a oku.”

¹¹ Ndu Bábilonu wufuchaepho le Jierúsalemu, bu iphe, kparu iya nu bu ndu ojoḡu Fero, eze gbiigbii abyapfuta pḡe; ¹² Jieremaya gbeshi le Jierúsalemu jeshia alì ndu Benjiaminu g'o je etsoru ndu eka ono keta okiphe iya. ¹³ O - rwuepho onu-abata Benjiaminu; onye-ishi ndu nche, epha iya bu Irayijia, bu nwa Shelemaya nwa Hananaya gude iya sù l'oogbalawa agbapfu ndu Bábilonu.

¹⁴ Jieremaya sù iya: “Ò kwa ùka. Mu ta agbalakwa agbapfu ndu Bábilónu.” Òphu Irayijia angaduru iya rò nchì. Ò bú-chia iphe, o meru bú l’o guderu Jieremaya kpùta iya kpùjeru ndu-ishi. ¹⁵ Èhu ghuahaa ndu-ishi ono eghe l’opfu èhu Jieremaya. Èphe zia; e chia ya iphe woru iya tua mkpòro l’ùlo Jionatanu, onye edeje èkwò, bú èka èphe meru; ò búru ùlo mkpòro.

¹⁶ E woru Jieremaya kpùru ye lẹ mkpòro l’obu-àlì; ò nòkpoo l’èka ono nòo òdu. ¹⁷ Tòbudu iya bú; eze, bú Zedekaya bya ezia; e je eduta iya dùjeru iya. Ò jìà ya lẹ mpya sù iya:

“?Ò nweru opfu, shi l’èka Chipfu tọ?”

Jieremaya sù iya: “Ee; aa-kpùru ngu ye l’èka eze ndu Bábilónu.”

¹⁸ No iya; Jieremaya bya asùkwapho eze, bú Zedekaya: “?Bú gùnu bú iphe-èjì, mu meru ngu; òzoo ndu ejeru ngu ozi; òzoo ndu-a l’ophu, meru g’o gude ì tùa mu mkpòro? ¹⁹ ?Dènu ndu mpfuchiru ngu ono, bú ndu shi epfujeru unu mpfuchiru sù: ‘Eze ndu Bábilónu tee tsokwa ngu ògu; òphu èphe etsokwa àlì-a ògu?’ ²⁰ Obenu lẹ nta; nnajìuphu mu, bú eze; jiko ngabèkpodapho nchì l’arwòrwo, mu arwò ngu. Mbù-a; te eduphuèkwà mu azù l’ibe Jionatanu, bú onye edeje èkwò; òdumeka bè mu a-nwùhukwa l’èka ono.” ²¹ Tòbudu iya bú; eze, bú Zedekaya bya eworu ekemu tùa sù g’e woru Jieremaya dobe l’òma-unuphu èka ndu nche anoje; g’a nùje iya ishi buredi mbòku-mbòku; mbùkwà ùdu buredi, ndu egheje buredi gheru; g’a nùje iya ya jasù buredi, nò lẹ mkpùkpù abvùebe. Ò búru iya bú

l'e woru Jieremaya dobe l'oma-unuphu ẹka ndu nche anoje; ọ nọdu l'ẹka ono.

38

Echie Jieremaya l'oke iduma

¹ Shefataya nwa Mátanu; yẹe Gedalaya nwa Pasho; yẹe Jiehukalu nwa Shelemaya; yẹe Pasho nwa Malukayijia numa iphe, Jieremaya anọduje epfuru ndu Jiuda l'ophu; kele ọosuje: ² “Wakwa iphe, Chipfu epfu baa: ‘Onye nọ lẹ mkpukpu-a a-lakwa l'ogu-echi; yẹe ọkpa-nri; yẹe ejo iphe-ememe. Obenu l'onye lapfuru ndu Bábilonu anọdu ndzụ. Oo-gude ndzụ iya gbalaa je anọdu ndzụ.’ ³ Tẹmanu-a; wakwa iphe, Chipfu epfu: ‘Mkpukpu-a ta adukwa iphe, e-me g'e te woru iya ye l'ẹka ndu ojogu eze ndu Bábilonu, bu onye e-mechaa lwuta iya l'ogu.’ ”

⁴ Tọbudu iya bu; ndu-ishi bya asu eze-a: “G'e gbukwaa nwoke-a. Oomekwa g'ike bvụ ndu ojogu, bu nwa ndu ophu phoduru nu lẹ mkpukpu-a; yẹe ndu-a l'ophu; ọ buru iphe ono, oopfụ anu phẹ ono akpa iya. Nwoke-a ta abukwa iphe, a-duru ndu-a ree bẹ ọcho; ọ kwa iphe, e-mebyi phẹ emebyi.”

⁵ Eze, bu Zedekaya yeeru phẹ onu su phẹ: “Ọ nonu unu l'ẹka; mbedua, bu eze ta adukwa iphe, mu akposhi unu ememe.”

⁶ Tọbudu iya bu; ephe kputa Jieremaya jeye l'oke iduma Malukayijia, bu nwa eze. Oke iduma mini ono nọ l'oma-unuphu ẹka ndu nche anoje. Ọ buru eri bẹ ephe turu iya seru ye l'iduma obu. Teke ono bẹ mini ta adudu l'iduma ono.

Iphe, dū iya nū buru ẹpuchi. Jieremaya buru bvubvurubvu l'ẹpuchi ono.

⁷ No iya; Ẹbedu-Mẹleku, bụ onye Kushi; bya aburu onye eleta ibe eze ẹn्या numa l'e yeru Jieremaya l'oke-iduma mini. O be g'eze nọ anọ l'ọnu-abata Jierusalemu, bụ Onu-abata Benjiaminu; ⁸ Ẹbedu-Mẹleku shi l'ibe eze tūgbua jepfu eze je asụ iya: ⁹ “Nnajiuphu mu, bụ eze; iphemiphe-a, ndu-a meru Jieremaya onye mpfuchiru-a buakwaa ẹjo-iphe bẹ ẹphe meru. G'ẹphe woru iya ye l'ime oke iduma g'ọ nọdu l'ẹka ono g'egu gbua ya; l'ẹbe abụ lẹ nri dukwadu lẹ mkpukpu.”

¹⁰ Tọbodu iya bụ; eze bya atuaru Ẹbedu-Mẹleku bụ onye Kushi ekemu sụ iya: “Duta ukporo umadzu l'umadzu iri l'ẹka-a g'unu l'ẹphe swiru je esefuta Jieremaya, onye mpfuchiru l'oke iduma ono; a -nọnya ọ nwuhu.”

¹¹ No iya; Ẹbedu-Mẹleku bya achita ndu ono; ẹphe l'iya swiru jeshia. O bya abahu l'ibe eze l'ulo, eedobeje iphe bya achita nkiriba ukpo yee nkirika ẹkwa l'ẹka ono bya egude eri seru iya nū Jieremaya l'ime oke iduma ono. ¹² Ẹbedu-Mẹleku, onye Kushi bya asụ Jieremaya-a: “Woru nkiriba ukpo yee nkirika ẹkwa-a dee l'ẹka g'ọ buru ẹwu l'ẹka یتu onwongu eri ono!” Jieremaya bya eworu iya mee nno. ¹³ Ẹphe gude eri ono selita iya eli sefuta l'ime oke iduma ono. Jieremaya byakwa bya anodu l'oma-unuphu ẹka ndu nche anoje.

Zedekaya akpata Jieremaya ishi ọzo

14 Tòbudu iya bụ; eze, bụ Zedekaya bya ezia; e je ekua Jieremaya, bụ onye mpfuchiru. O bya; e duta iya bahụ l'ònu-abata k'èto, bụ òphu e shi abahụ l'eze-ùlò Chipfu. Zedekaya bya asụ iya: “Mu abyakwa ngu aji aji. Ta adụkwa iphe, i-domiru mu edomi!”

15 Jieremaya sụ Zedekaya-a: “Mu -yeeru ngu ònu; ?tii gbudu mu nù? Teke mu chị-koshiru ngu idzu; o tọ bụdu l'ii-yeru mu ònu.”

16 Zedekaya ribuaru Jieremaya angụ lẹ mpya sụ iya: “Eshinu Chipfu nọ ndzụ g'ọ nọ iya-a, bụ onye meru anyi nọdu atụ unme; mu tee gbukwa ngu; òphu mu akpụkwaru ngu eye l'èka ndu achọ ndzụ ngu.”

17 Tòbudu iya bụ; Jieremaya bya asụ Zedekaya-a: “Wakwa iphe, oopfụ baa; mbụ Chipfu, bụ Chileke; bya aburu Okalibe-Kakota-Ike; buru Chileke ndu Ízurelu; sụ-a: I -woru onwongu ye l'èka ndu-ishi l'alị eze ndu Bábilonu; bẹ ndzụ ngu a-dụ; òphu aa-kpọdu mkpụkpu-a oku; gubedua gụ lẹ ndibe ngu g'unu ha anọdu ndzụ. 18 Obenu teke o bụ l'i tii woduru onwongu eye l'èka ndu-ishi l'alị eze ndu Bábilonu bẹ ee-wokwaru mkpụkpu-a ye l'èka ndu Bábilonu; ephe akpọo ya oku; òphu gubedua l'onwongu eshikwa phẹ l'èka anahu.”

19 Eze, bụ Zedekaya sụ Jieremaya-a “Ndu mu atsụ ebvu bụkwa ndu Jiuda, bụ ndu òphu wowaru onwophe ye l'èka ndu Bábilonu; lẹ ndu Bábilonu a-kpụkwaru mu nù phẹ; ephe emelaha mu omeliwe.”

20 Jieremaya sụ iya: “Ephe taa kpụkwaru ngu eye phẹ l'èka. Oo ephe g'i mee olu Chipfu, bụ

iya bu iphe-a, mu epfuru ngu-a. Oo ya bu l'ọ duru ngu le ree; teme ndzu adu ngu. ²¹ Obenu teke i jikaru l'i tii woduru onwongu eye phe l'eka; wakwa iphe, Chipfu kpuharu goshi mu baa: ²² Iphe, bukpoo unwanyi ono, a haru l'ibe eze ndu Jiuda ono be aa-chitahakwaa chijeru ndu-ishi l'ali eze ndu Babilonu. Unwanyi ono epfuaharu ngu su ngu:

“ ‘Epe dephukwaru ngu
 edepfu;
 bya eworu ngu mekpee;
 mbu ndu ono, bu onya ngu,
 i kporu obu yeru ono.

Nta-a be okpa mihuwaru ngu
 l'epuchi.

Ndu onya ngu phe ono paru
 ngu haa gbakashihu.’

²³ “Unyomu ngu g'ephe ha; yee unwegirima ibe ngu be aa-tuko chifuta chitaru ndu Babilonu. Ophu gubedua l'onwongu anahukwa phe agbala; o chikwaa iphe, e-me nu bu l'eze ndu Babilonu e-gude ngu; teme ozo bu le mkpukpu-a be aa-kpokwa oku.”

²⁴ Tobudu iya bu; Zedekaya bya asu Jieremaya: “Ba adukwa onye ii-me g'o maru uja mu le ngu-a; odumeka be ee-gbukwa ngu. ²⁵ Ndu-ishi -numa le mu pfuru yeru ngu; ephe -byapfuta ngu bya asu ngu: 'Pfuaru anyi iphe, i pfuru eze; yee ophu eze pfuru ngu. Be domikwaru iya anyi; odumeka be anyi e-gbukwa ngu!’ ²⁶ Oo ya bu l'ii-su phe-a l'o kwa arworwo be i shi arwo eze g'o to duphukwa ngu azu l'ibe Jionatanu g'i je anodu l'eka ono nwuhu.”

²⁷ E mechaa; ndu-ishi ono g'ephe ha tuko byapfuta Jieremaya bya ajia ya. O woerupho iphe ono, eze suru g'o pfiaru phe ono woru pfiaru phe. Ophu o duedu iphe ozo, ephe epfujeba; kele o to dudu onye numaru uja, ephe boru.

²⁸ Jieremaya nodu l'oma-unuphu eka ndu nche anoje l'eka ono gbiriri jasu mboku, a lwutaru mkpukpu Jierusalemu l'ogu.

39

Adada Jierusalemu

(2Ndu 25:1-7; 2Iphe 36:13-21; Jier 52:3-11)

¹ Tobudu iya bu; o be l'apha, kwe Zedekaya apha tete, o wataru aburu eze; l'abali k'iri l'onwa iri; eze ndu Babilonu, bu Nebukadineza chita ikpoto ndu ojogu iya; ephe byatashia Jierusalemu; bya ekepheta mkpukpu ono mgburugburu. ² No iya; o rwukwaa l'abali ke tete l'onwa k'eno l'apha, kwe Zedekaya apha iri le nanu; e tsukposhia igbulu, e gude kpu-pee mkpukpu ono mgburugburu. ³ O buru iya bu le ndu-ishi l'ali eze ndu Babilonu awubata bya adoru l'onu-abata Echilabo le mkpukpu ono. Ndu obu bu: Ngalu-Sareza; yee Samuga-Nebo; waa Sarisekimu onye bu iya bu ishi ndu eleta ibe eze enya; yee Ngalu-Sareza, bu iya bu ishi ndu ejeru eze ozi; waa iphe, bukpuo ndu bu ishi l'ali eze ndu Babilonu.

⁴ O be ge Zedekaya, bu eze ndu Jiuda yee ndu ojogu iya l'ophu humaru phe; ephe ye okpa l'oso gbalaaha. Ephe gude enyashi wufu le mkpukpu

ono. Ẹka ẹphe shiru gbalaa bu l'onu oguzo ono, du le mgbaka igbulọ labọ ono, du le mgboru mgbabu eze. O buru ẹka ẹphe shiru bu ọzo nsuda Araba. ⁵ O le ndu ojoḡu ndu Babilonu chipyaberu phe je agbapfu Zedekaya le baswaa ali, du le Jieriko. Ẹphe gude iya kpuru iya kputaru Nebukadineza, bu eze ndu Babilonu le mkpukpu Ribula l'ali Hamatu, bu ẹka o no nmaa ya ikpe. ⁶ O buru le Ribula l'eka ono be eze ndu Babilonu no gbushia unwu Zedekaya. Zedekaya nodu ele iya enya; o nodu egbushi phe. O byakwapho bya atuko ndu a maru amaru l'ali ndu Jiuda gbushikota. ⁷ O bya aswoshia Zedekaya akpuru enya; bya egude egbirigba, e meru l'oniyirubvu tu ya mkporo kputa lasha Babilonu.

⁸ Ndu Babilonu ono woru oku tu l'ibe eze ono; yee ulo ndiphe; bya enwukposhia igbulọ, e gude kpu-pee Jierusalemu mgburugburu. ⁹ Nebuzaradanu, bu onye-ishi ndu ojoḡu, anoduje eche eze ndu Babilonu nche; toko nwandu phoduru nu le Jierusalemu ono; yee ndu wowaru onwophe ye l'eka ndu Babilonu; waa ndu ophuu; kputa le ndzu lasha ali ndu Babilonu. ¹⁰ O le Nebuzaradanu, bu onye-ishi ndu ojoḡu, anoduje eche eze ndu Babilonu nche ono bu ndu o haru l'ali ndu Jiuda bu ndu ukpa olemole, bu ndu adudu iphe, ẹphe nweru. O nodu teke ono nuchaa phe opfu-vayinu; yee ali-egu.

¹¹ No iya; Nebukadineza, bu eze ndu Babilonu tu ekemu-a tu-doru Jieremaya; o buru onye o turu iya nu bu Nebuzaradanu, bu onye-ishi

ndu ojogu, anoduje eze ndu Babilonu nche su:
¹² “Unu dutakwa iya leta iya enya. Unu ta adukwa iphe, unu e-me iya; o chikwaa iphe, o sukpoerupho g'unu meeru iya; unu emeeru iya ya.” ¹³ Tobudu iya bu; Nebuzaradanu, bu onyeshi ndu ojogu, anoduje eche eze ndu Babilonu nche ono; yee Nebushazubanu, bu ishi ndu eleta ibe eze enya; yee Negalu-Sareza, bu ishi ndu ejeru eze ozi; yee ndu ophuu, bu ishi l'ali eze ndu Babilonu; ¹⁴ bya ezia; e je eduta Jieremaya dufuta l'oma-unuphu aka ndu nche anoje. Epe duru iya nu Gedalaya bu nwa Ahikamu nwa Shafanu; su iya g'o duru iya laa ibe iya. O buru iya bu le yee ndibe phe anodu.

¹⁵ Teke pho, Jieremaya shi nodu l'oma-unuphu aka ndu nche anoje pho be o numaru Opfu Chipfu, suru iya: ¹⁶ “Je akaru Ebedu-Meleku; onye Kushi; su iya: Wakwa iphe, Chipfu epfu baa; mbu Okalibe-Kakota-Ike; bya aburu Chileke ke ndu Izurelu. Su-a; mu abyaakwaa emeebe iphe, mu suru le mu e-me mkpukpu-a. Mu e-meru ala-l'iswi nu phe; o to budu upete. O -rwuepho teke ono be iphemiphe ono e-mekota l'ogbaa ngu l'iphu. ¹⁷ Ole mu a-nafuta ngu m'o -rwua mboku ono. Nokwa iphe, Chipfu eepfu. A taa kpuduru ngu anu ndu itsu ebvu. ¹⁸ O to dukwa iphe, e-me ge mu ta adzota ngu; k'opu bu l'e tee gbudu ngu l'ogu-echi; o bu-chia l'iigude ndzu ngu gbala; kele i kporu obu yeru mu. Nokwa iphe, Chipfu eepfu bu ono.”

*Teke Gedalaya bu ọchi-ọha ndu Ízurelu
(2Ndu 25:22-26)*

¹ Opfu-a bẹ Jieremaya nūmaru l'ọnu Chipfu gẹ Nebuzaradanu, bu onye-ishi ndu ojoḡu, anọduje eche eze ndu Bábilọnu nche tohachaeru iya phọ lẹ mkpukpu Rama. Kele ọ byaru bya ahuma Jieremaya l'ẹka a turu iya egbirigba; ephe lẹ ndu a kpuru lẹ ndzụ, shi Jierúsalem; yee alì ndu Jiuda ala alì ndu Bábilọnu. ² O be g'onye-ishi ndu ojoḡu ono hūmaru Jieremaya; ọ sụ iya: “Chipfu, bu Chileke ngu pfukwaru lẹ ya e-me ẹka-a omeliwe-a. ³ Nta-a bẹ Chipfu mewaru iphe, o pfuru. Iphemiphe ono mekotaru; kele unu meru Chipfu iphe-ẹji; ophu unu emeduru iphe, ọ suru g'unu mee. ⁴ Oke ntanụ-a bẹ mu atufuwa ngu l'egbirigba ono, nọ ngu l'ẹka ono. Tsoru mu g'anyi la alì ndu Bábilọnu m'ọ buru l'ọ dụ ngu ree egube ono; ọ buru mbedua l'a-nọdu eleta ngu enya. Teke ọ bukwanu l'ọ tọ dudu ngu ree egube ono l'ì haa abyabya. Lekwa! Alì ẹka-a l'ophu nokwa ngu l'iphu; jejekpọephe ẹka dụ ngu ree! ⁵ Oke ọ -buru l'ọ dụ ngu g'ì nọdu l'ẹka-a; g'ì laphu azu jepfu Gedalaya, bu nwa Ahikamu nwa Shafanu, bu onye eze ndu Bábilọnu hofutaru g'ọ buru ọchi-ọha, nọgbaa l'alì Jiuda l'ophu; je g'unu l'iya buru l'echilabọ ndu ẹka ono; teke odumeka; jekpọephe eburu l'ẹka dụ ngu ree.”

No iya; onye-ishi ndu ojoḡu, anọduje eche eze ndu Bábilọnu nche ono bya anụ iya nri, eeri eriri; bya anụ iya iphe gude meeru iya ree; bya aparu iya haa; ọ lashia. ⁶ O buru iya bu lẹ Jieremaya alapfushia Gedalaya nwa Ahikamu lẹ

mkpukpu Mizupa; je yele iya buru l'echilabo ndu ozo, bu ndu a haru l'ali eka ono.

⁷ O be ge ndu-ishi ndu ojogu ndu Jiuda g'ephe ha; ephe le ndu nke phe, bu ndu shi nodugbaa l'egbudu numaru l'eze ndu Babilonu hofutawaru Gedalaya nwa Ahikamu g'o buru ochi-oha l'ali ono; l'o wowaru unwoke; me unwanyi; me unwegirima, bu ndu kachaa akpa nri l'ali ono; mbu ndu ophu a ta akpuduru le ndzu laa ali ndu Babilonu; ye iya l'eka; ⁸ ephe wufuta wu-pfuta Gedalaya le mkpukpu Mizupa. Ndu byaru nu bu Ishimelu nwa Netanaya; yee Jiohananu; yee Jionatanu, bu unwu Kareya; waa Seraya nwa Tanuhumetu; waa unwu Efayi onye Netofa; yee Jiezanaya, bu nwa onye Maka; ephe le ndu nkephe. ⁹ Gedalaya, bu nwa Ahikamu nwa Shafanu bya eribuaru ephe le ndu nkephe ono nte su phe: "Unu ta tsukwa ebvu anodu ndu Babilonu l'eka. Unu nodukpoephe l'ali ono jeeru eze ndu Babilonu ozi g'o duru unu le ree. ¹⁰ Mbèdua l'onwomu a-nodu le mkpukpu Mizupa no-chije enya unu l'iphu ndu Babilonu, bu ndu-a, byapfutaru anyi-a; obenu l'unu a-nodu akuta mee; awo akpuru oshi onanwu; yee manu woru kwachia l'eka unu edobeje iya; unu eburu le mkpukpu-a, unu natagbaaru-a."

¹¹ O be teke iphe, bukpuo ndu Jiuda, no l'ali ndu Mowabu; yee ndu ophu no l'ali ndu Amonu; yele ndu k'ali ndu Edomu; mekpoo ndu ophu nogbaa l'ohamoha ozo; numaru l'eze ndu Babilonu nweru nwa ndu o haru haa l'ali ndu Jiuda; bya eworu Gedalaya, bu nwa Ahikamu nwa Shafanu mee onye-ishi phe; ¹² ephe tuko lwakota

alì ndu Jiuda; lwapfuta Gedalaya lẹ mkpukpu Mizupa; shigbaa l'ẹka ẹphe shi gbachaa nanu nanu. Ẹphe kwatakpoọ kua mee kua k'etsutsu iya; bya awọ akpuru oshi ọnanwu; woshia ya ike.

¹³ Ọ buru iya bu lẹ Jiohananu nwa Kareya; yee ndu-ishi ndu ojoḡu ono l'ophu, nọkwadu l'ẹgbudu ono bya abyapfuta Gedalaya lẹ Mizupa ¹⁴ bya asu iya: “?I maru-a lẹ Balisu, bu eze ndu Amọnu zikwaru Ishimelu nwa Netanaya g'ọ bya egbugu ngu?” Ophu Gedalaya nwa Ahikamu ekwetaduru iphe, ẹphe epfu.

¹⁵ Tọbudu iya bu; Jiohananu nwa Kareya bya ejepfu Gedalaya lẹ mpya lẹ Mizupa je asu iya: “Ge mu jenu egbugu Ishimelu nwa Netanaya g'ọ tọ du onye a-maru nu. ?Denu g'ọ gude e je l'aha iya g'ọ gbugu ngu mee ndu Jiuda l'ophu, bu ndu nọru ngu mgburugburu g'ẹphe gbakashihu; mee ge nwa ndu Jiuda ndu ophu phoduru nu laa l'iswi?”

¹⁶ Obenu lẹ Gedalaya nwa Ahikamu sọru Jiohananu nwa Kareya-a: “E jekwa eme iphe, du egube ono. Iphe ono, iipfu l'opfu ẹhu Ishimelu ono ta abukwa okpobe opfu.”

41

¹ No iya; o be l'onwa k'ẹsaa; Ishimelu, bu nwa Netanaya nwa Elishama; mbu onye shi l'unuphu ndu eze; bya aburu onye yi lẹ ndu-ishi, nọru l'ẹka eze; bya achiru umadzu iri gude byapfuta Gedalaya nwa Ahikamu lẹ mkpukpu Mizupa. Ẹphe wataepho eri nri l'ẹka ono; ² Ishimelu nwa Netanaya yee umadzu iri pho, yele ẹphe swi pho wu-lihu woru Gedalaya, bu nwa Ahikamu

nwa Shafanu gbua. O buri ugu-echi be epe gude gbua onye ono, eze ndu Babilonu hotaru g'ọ ndu buri ishi l'alì eka ono. ³ Ishimelu tukokwapho ndu Jiuda, epe le Gedalaya no le Mizupa; yee ndu ojogu ndu Babilonu, no l'eka ono gbushia.

⁴ A nepho ujiku lanu g'e gbucharu Gedalaya; kele o to dukpodaro onye mawaru nu teke ono; ⁵ Ukpoto umadzu eno tuko kpushia eji-agba; bya agbajashia uwe phe; bya egbukashichaa onwophe onya wuru bya. Eka epe shi buri le mkpukpu Shekemu; yee Shilo; waa Sameriya. Epe gude ngweja-nri; waa unwu-isensu gude abya l'ulo Chipfu. ⁶ Ishimelu nwa Netanaya bya eshi le Mizupa tugbua je agba phe ndzuta; ara ekwa eje. O jepfue phe pho o su: "Unu byapfutakwa Gedalaya nwa Ahikamu!" ⁷ Epe bahuepho l'ime mkpukpu ono; Ishimelu nwa Netanaya; yee ndu epe l'iya no woru phe gbua chiru phe ye l'eze iduma mini. ⁸ Umadzu iri l'ime phe su Ishimelu-a: "Te gbukwa anyi! Anyi nweru witi; yele bali; bya enweru manu; yee manu-enwu, anyi domiru l'egbudu." O paru epehedua haa; ophu o gbuduru phe yeru ndu ophu. ⁹ No iya; eze iduma mini ono, o chiru odzu ndu ono, o gbushiru ye ono; bu eze, bu Asa turu iya g'ọ buri iphe, ya gude adzo ndu ali iya l'eka Basha, bu eze ndu Izurelu. O buri iya be Ishimelu nwa Netanaya gude odzu ndu ono, o gbushiru ono kpojia.

¹⁰ Ishimelu bya atuko ndu nokota le Mizupa kpukota le ndzu; mbu unwada eze yee ndu

ozokpo, bu ndu phoduru nu l'eka ono, bu ndu Nebuzaradanu, bu onye-ishi ndu ojogu, anoduje eche eze ndu Babilonu nche; hotaru Gedalaya nwa Ahikamu g'ọ buru ishi phe. Ishimelu nwa Netanaya kpukota phe le ndzu kpuru phe ye; ephe lashia lapfushia ndu Amonu.

¹¹ O be ge Jiohananu nwa Kareya; yee ndu-ishi ndu ojogu g'ephe ha, bu ndu ephe l'iya no; tukoru ejo-iphe ono, Ishimelu nwa Netanaya meru ono numakota; ¹² ephe duta ndibe phe l'opfu jeshia etso Ishimelu nwa Netanaya ogu. Ephe l'iya je edzugba le mgboru oke okpuru ono, no le mkpukpu Gibiyonu ono. ¹³ O be ge ndu Ishimelu chi je ogu ono g'ephe ha humaru Jiohananu nwa Kareya; yee ndu-ishi ndu ojogu, ephe l'iya swi; ehụ tsoahaa phe. ¹⁴ Iphe, bu ndu ono, Ishimelu chi ono, bu ndu o kpuru le ndzu le Mizupa ono dakobe wu-pfu Jiohananu nwa Kareya. ¹⁵ Obenu le Ishimelu nwa Netanaya; yee umadzu esato l'ime ndu ono, ephe l'iya swi ono nahuru Jiohananu gbalaa gbapfu ndu Amonu.

Agba ala Ijiputu

¹⁶ Tobudu iya bu; Jiohananu nwa Kareya; yee ndu-ishi ndu ojogu, bu ndu ephe l'iya no; bya achita ndu ono, phoduru nu ono; mbu ndu Ojogu; me unwanyi; mekpoo unwegirima; me ndu eleta ibe-eze enya; g'ephe ha bu ndu Ishimelu nwa Netanaya shi kpua le ndzu le Mizupa g'o gbuchaaru Gedalaya nwa Ahikamu; Jiohananu toko phe shi le Gibiyonu chi-phutaazu. ¹⁷ Oo ya bu; ephe tugbukpoephe; jasụ ephe jerwua mkpukpu Gerutu Kimuhamu, no le

mgboru Bètulehemu; ẹka ẹphe phoberu eje alì ndu Ijiputu; ¹⁸ g'ẹphe gude nahụ ndu Bábilọnu. O bụru ebvu bẹ ẹphe atsụ phẹ; kele Ishimelu nwa Netanaya gburu Gedalaya nwa Ahikamu, bụ onye eze ndu Bábilọnu hotaru mee onye-ishi l'alì onó.

42

¹ Tọbudu iya bụ; ndu-ishi ndu ojogu g'ẹphe ha; mękpoo Jiohananu nwa Kareya; yẹe Jiezanaya nwa Hoshaya; mękpoo ndu ono g'ẹphe ha; eshi lẹ ndu ophu kachaa alwa alì jasụ lẹ ndu ophu kachaa shii; tuko bya awụ-pfu ² Jieremaya, bụ onye mpfuchiru je asụ iya: “Jiko nưmakpodapho arwọwo, anyi arwọ ngu g'i pfuru nụ Chipfu, bụ Chileke ngu l'opfu ẹhu nwa ndu-a, phoduru nụ-a g'ẹphe ha. Kele-a; g'iilena; a makwaru-a l'anyi shi dọ igwerigwe; nta-a bụwaa nwa ndu abadu ishi phoduru. ³ Pfuru nụ Chipfu, bụ Chileke ngu g'ọ karu anyi ọzo, anyi e-shi; yẹe iphe anyi e-me.”

⁴ Jieremaya, bụ onye mpfuchiru sụ phẹ: “Mu nưmakwaru iphe, unu pfuru. Mu e-pfukwaru-a nụ Chipfu, bụ Chileke unu, bụ iphe, unu arwọ. Mu -mechaa; mu akarụ unu iphemiphe, Chipfu epfu; ophu o dukpodaa ophu mu emeru unu lẹ mpya.”

⁵ No iya; ẹphe sụ Jieremaya-a: “Gẹ Chipfu bukwaru onye-ekebe, epfu ire-lanụ; yẹe onye e gude ire iya ẹka l'opfu ẹhu anyi lẹ ngu; mę o -bụru l'anyi te emeduru iphemiphe, Chipfu, bụ Chileke ngu suru g'ì sụ anyi g'anyi mee. ⁶ O -je l'aduru anyi lẹ ree; o je l'aduru anyi ẹji bẹ

anyi e-me iphe, o sūru g'anyi mee; mbū Chipfu, bū Chileke anyi; bya abūru onye anyi ezi ngu g'i jepfu g'ooduru anyi lẹ ree m'anyi mee olu Chipfu, bū Chileke anyi.”

⁷ A nọepfo abalị iri; olu-opfu Chipfu rwua Jieremaya lẹ nchị. ⁸ O bya ekukọbe Jiohananu nwa Kareya; yee ndu-ishi ndu ojoḡu ono g'ephe ha, bū ndu ephe l'iya nọ; mẹ ndu ẹka ono l'ophu; e -shikpọ l'onye kachaa alwa alị jasū l'onye kachaa shii. ⁹ O sū phe-a: “Wakwa iphe, Chipfu epfu baa; mbū Chileke ndu Ízurelu, bū onye unu yeru mu sū gẹ mu je arwọru unu arwọrwo. O sūru-a: ¹⁰ 'O -būru l'unu nọ l'alị ẹka-a; ya a-kpua unu g'akpuje ọlo-a; ya taa lakashidu unu alakashi. Ya a-dza unu adzadza; ya tee phefudu unu ephefu. Kele iphe-ehuka, ya meru unu jee; atsuwaa iya l'ehu.’ ¹¹ Wakwa iphe, Chipfu epfu baa: ‘Unu ba atsukwa eze ndu Babilonu ebvu, bū onye ono, unu atsū ebvu nta-a ono. Unu ba atsukwa iya ebvu; kele mu nọkwa swiru unu eswiru; mu je l'adzota unu; nafuta unu l'eka iya. ¹² Mu a-phuru unu obu-imemini k'ophu imemini unu a-dụ iya; l'ọ haa g'unu nọdu l'alị unu.’

¹³ “Obenu lẹ-a; o -būru l'unu sūru l'unu taa nọdukwa l'alị-a; unu eshi egube ono kwefuru Chipfu, bū Chileke unu ike. ¹⁴ Teke o bukwanu l'unu sūru waawaa; l'unu e-je eburu l'alị ndu Ijiputu, bū ẹka unu taa humadu oḡu l'enya; ophu unu anumadu opu-oḡu; ophu egu nri agudu unu; ¹⁵ Oo ya bụ; unu numakwa olu-opfu Chipfu; unubẹ nwa ndu phoduru nū l'alị

ndu Jiuda. Wakwa iphe, oopfu baa; mbụ Chipfu, bụ Ọkalibe-Kakọta-Ike; bya abụru Chileke ke ndu Ízurelu: ‘Ọ -bụru l'unu pfuwaru iya hoo haa l'unu a-la Ijiputu; unu nọdu eje eburu l'ẹka ono; ¹⁶ bẹ ogu-echi ono, unu atsu ebvu ono agbapfutakwa unu l'ẹka ono; teme ọkpa-nri ono, ndzụ iya agụ unu ono etsoru unu lashia alị ndu Ijiputu. Ọ bụru l'ẹka ono bẹ unu a-nọdu nwụhu. ¹⁷ Mbụ lẹ-a; iphe, bụkpoo ndu ono, gburu iya tororo l'ẹphe a-la Ijiputu je eburu ono bụkwa iphe, e-gbu phe nụ bụ ogu-echi; yee ọkpa-nri; waa ejo iphe-ememe. Ọphu ọ dukwa g'ọ ka mma l'ọo onye lanụ a-lwa nụ; ọzokwanu nahụ iphe-ẹhuka, mu e-me g'ọ dapfu phe.’ ¹⁸ Wakwa iphe, oopfu baa; mbụ Chipfu, bụ Ọkalibe-Kakọta-Ike; bya abụru Chileke ndu Ízurelu. Sụ-a: ‘Ọ kwa gẹ mu tukoshiru ndu bu lẹ Jierúsalemu oke ẹhughu mu; noo gẹ mu a-tukoshi iya unu; mẹ unu laa Ijiputu. Unu a-buru iphe, e gude atụ ọnu; yee iphe, anyị ishi ẹdzu; waa iphe e gude achi ọchi; yele iphe, e gude ephu l'iphu; ọphu unu egudebaedu ẹnya unu ahuma alị ẹka-a ọzo.’

¹⁹ “Unube nwa ndu phoduru nụ l'alị ndu Jiuda; Chipfu pfuakwaru iya unu sụ unu g'unu ba lakwa Ijiputu! Unu makwaru l'ọo ọkwa bẹ mu anmaru unu ntanụ-a ²⁰ l'ọ kwa emeswe bẹ unu mesweru onwunu teke unu ziru mu sụ gẹ mu jepfu Chipfu, bụ Chileke unu; mbụ teke unu sụru mu-a gẹ mu pfueshiduru nụ Chipfu, bụ Chileke unu l'iswi ẹhu unu. Gẹ mu pfiaru unu iphemiphe, o pfuru; hụma l'unu e-mekọta iya! ²¹ Mu pfiakwaru iya unu ntanụ-a; obenu l'unu

te ekwedu eme iphe, Chipfu epfu l'ime iphe, ọ sūru gẹ mu pfuaru unu. ²² Nta-a bụ ị-a; g'ọwa-a dokwaa unu ọnya; ọ kwa iphe, e-mechaa gbua unu l'ẹka ono, unu eje eburu ono bụ ogu-echi; yẹ ẹgu; yẹ ejo iphe-ememe.”

43

¹ O be gẹ Jieremaya pfuchaaru ndu ono iphemiphe ono g'ọ ha, bụ Opfu Chipfu, bụ Chileke pẹ; mbụ iphemiphe ono, Chipfu ziru iya sụ g'o pfuaru pẹ ono; ² Azaríya nwa Hoshaya; yẹ Jiohananu nwa Kareya; yẹ iphe, bụkpoo ndu ono g'ẹphe ha, bụ ndu eku onwophẹ ono tuko sụ Jieremaya-a: “Ọo ọka bẹ ịidzu! Chipfu, bụ Chileke anyi te zikwaru ngu g'ị bya asụ g'anyi te ejekwa eburu ị Jiputu! ³ Ọo Baruku nwa Neraya l'enwu ngu eye g'i pfuaru anyi iphe, a-buru anyi ọgu; g'eeshi g'e woru anyi ye l'ẹka ndu Bábilonu g'ẹphe gbushia anyi; ọzoo kpua anyi ị ndzụ lashia alị ndu Bábilonu.”

⁴ Tọbudu iya bụ; Jiohananu nwa Kareya; yẹ ndu-ishi ndu ojogu ono; mękpoo ndu ono g'ẹphe ha kwefu ike l'iphe, Chipfu sūru g'ẹphe mee; l'ẹphe taa ọdudu l'alị ndu Jiuda. ⁵ Ọ bụ-chia ị Jiohananu nwa Kareya; yẹ ndu-ishi ndu ojogu ono l'ophu dutaru ndu ono, phoduru nụ l'alị ndu Jiuda ono g'ẹphe ha; mbụ ndu ono, lwaru azu bya eburu l'alị ndu Jiuda ono, shigba l'ọhamoha, bụ ẹka e shi chigbaaru pẹ ye. ⁶ Ẹphe dutakwaphọ iphe, bụkpoo unwoke; yẹ unwanyi; yẹ unwegirima; yẹ unwada eze; mękpoo ndu Nebuzaradanu, bụ onye-ishi ndu ojogu, anọduje eche eze ndu

Bábilónu nche tukurú haarú Gedalaya, bú nwa Ahikamu; búru nwanwa Shafanu; chítachaa mę Jieremaya, bú onye mpfuchiru; yęę Baruku nwa Neraya. ⁷ No iya; ęphe bahunu l'alí ndu Ijiputu; jikaghaa l'ęphe tee medu iphe, Chipfu sųru g'ęphe mee. ęphe jekpọephọ jerwua mkpųkpu Tahųpanahesu.

⁸ E rwua lę Tahųpanahesu; olu-opfu Chipfu rwua Jieremaya nchí sų: ⁹ “Gę ndu Jiuda lee ngu ęnya; g'i harú mkpuma, ha shii pata je egude ępuchi kpų-buta iya lę mkpoze ęka eeshije abahų l'ibe eze, bú Fero lę Tahųpanahesu. ¹⁰ No iya; l'í sų phę-a: ‘Wakwa iphe, oopfú baa; mbų Chipfu, bú Ọkalibe-Kakọta-Ike, bú Chileke ndu Ízurelu: Mu e-zi g'e je ekuaru mu onye-ozí mu, bú Nebukadineza, bú eze ndu Bábilónu; ọ búru l'eli mkpuma-a bę oo-dobe aba-eze iya; mbų mkpuma-a, mu domíru l'ęka-a; l'ọ bya eworu uwe agbada eze iya phųshi iya l'eli. ¹¹ Ọ - bya bę ọo-lwų-kpe ndu Ijiputu; ndu o rwuberu l'egbugbu l'o gbua phę; ndu o rwuberu l'akpų lę ndzų l'ọ kpųa phę lę ndzų; ndu o rwuberu l'egbu l'ogu-echi; l'o gbua phę l'ogu-echi. ¹² Ọo-tų ọku l'ųlo nshi ndu Ijiputu. Ọo-kpọ nshi phę ono ọku; lwųa nshi phę ọlwu lę ndzų. Ọ búru ęgube ono, onye eche atųru agbaphuje onwiya ękwa ono; noo g'oo-wota Ijiputu gbaphua onwiya; shi l'ęka ono tųgbua lashía l'ęhu-guu. ¹³ Oo-tsukpọshi mkpuma, dų nsọ, nọgbaa l'ųlo ęnyanwu, nọ l'alí ndu Ijiputu; bya atųko ųlo-nshi ndu Ijiputu l'ophu kpọkota ọku.’ ”

44

Ola-l'iswi, shi l'agwo nshi

¹ Opfu-a rwuru Jieremaya nchi l'opfu ehu ndu Jiuda g'ephe ha, bu ndu bu l'ali ndu Ijiputu, bu iya bu le mkpukpu Migudolu; ye le mkpukpu Tahupanahesu; waa le mkpukpu Nofu; ye le ali ndu Paturosu su: ² Wakwa iphe, Chipfu, bu Okalibe-Kakota-Ike eepfu baa; mbu Chileke ndu Izurelu: "Unu humanuru-a oke ola-l'iswi, mu meru ndu Jierusalemu; ye le mkpukpu ndu Jiuda l'opfu. Nta-a be epe buwaa ochobu; ophu o duedu onye bu iya nu; ³ o buru iphe, kparu iya nu bu ejo-iphe, epe meru; shi nno kpatsu mu iwe; ke le epe wataru akpo unwu-isensu oku anu agwa; bya aburu agwa ono, epebedua l'onwophe; ozoo unubedua; ozoo nna unu oche phe amajeduru be epe wataru abaru eja. ⁴ Mu bya ezia ndu-ozu mu, bu ndu mpfuchiru; mu -zichaa; mu ezibaa; epe je asu phe-a: 'Ophu g'unu be meshi ejo ahuma-a, bu iphe, mu kporu ashi-a!' ⁵ Ophu epe angaduru nchi; ophu epe eyekpodarunu onu; ophu epe aghakobeduru haa eme ejo-iphe, epe eme; ophu epe ahaduru akpo unwu-isensu oku anu agwa. ⁶ O buru iya bu le mu eworu oke ehu-eghu mu wua phe l'ishi. O nwua phuruphuru tsoru mkpukpu Jiuda l'opfu; bya etsoru onu gbororo Jierusalemu; woru phe mee ochobu, bu ikpozu ono, epe bu ntanu ono.

⁷ "Nta bu le-a; wakwa iphe, Chipfu, bu Chileke, bu Okalibe-Kakota-Ike eepfu baa; mbu Chileke ndu Izurelu: ?Denu g'o gude unu nodu eme

onwunu egube ejo-iphe owa-a; ke g'unu mee g'unwoke chihu le Jiuda; unwanyi achihu iya; me ndu bu unwegirima; me ndu bu nwaswa; g'o to duhe onye a-phodu nu ililekpo? ⁸ ?Denu g'o gude o buru iphe, unu gude aka unu mee be unu gude akpatsu mu iwe; mbu ke g'unu wata akpo unwu-isensu oku anu agwa l'ali ndu Ijiputu, bu aka unu byaru eburu-a? Unu e-mebyikwa onwunu; woru onwunu mee iphe, ee-gude ephu l'iphe; teme ohamoha, no l'eliphe l'ophu anodu achi unu ochi. ⁹ ?Unu zohawaru ejo-iphe, nna unu oche phe meshiru; yee ke ndu eze ndu Jiuda; ephebedua me unyomu phe; yee ejo-iphe, unubedua meru; me unyomu unu; l'ali ndu Jiuda; yee oma gbororo Jierusalem? ¹⁰ Byasukwa ntanu-a be ephe teke ewozekwa onwophe ali; ophu ephe eke akwabekwa mu ubvu; ophu ephe eke ekwekpodanu mee ekemu mu; yee iphe, mu toru unu okpa iya; yee nna unu oche phe.

¹¹ "Oo ya bu le-a; wakwa iphe, Chipfu, bu Okalibe-Kakota-Ike eepfu baa; mbu Chileke ke Izurelu: Mu gbuakwaru iya tororo su le mu aburu unu ogu; le mu e-me unu ejo-iphe; mbu le mu e-me ge ndu Jiuda l'ophu chihu-gbua. ¹² Mu e-wofu nwa ndu ono, phoduru nu le ndu Jiuda, bu ndu ono, pfuwaru iya hoo haa l'ephe lafutaje Ijiputu je eburu ono. Ephe a-nwuhushikota le Ijiputu. O buru ogu-echi be ee-gude gbutsushia phe; ozoo egu egbushia phe. Ephe e-shiepho le ndu kachaa nwanshi jasu le ndu kachaa shii nwushihuepho l'ogu-echi ozoo l'egu ememe.

Èphe a-buru iphe, e gude atụ ọnu; yẹe iphe, anyị ishi ẹdzu; waa iphe e gude achi ọchi; yẹe iphe, e gude ephu l'iphu. ¹³ Ndu ono, larụ Ijiputu ono bẹ mu e-gude ogu-echi nwa aphụ; yẹe ẹgu ememe; waa ẹjo iphe-ememe; ẹgube ono, mu meru ndu Jierúsalemụ ono. ¹⁴ Ọphu ọ dudu ndu ono, phọduru nụ ono, shi alị ndu Jiuda ono, bu ndu ono, byaru eburu l'alị ndu Ijiputu ono; duru ọphu a-gbala nụ; ọphu ọ dudu onye ọphu a-wa nụ k'alwa azụ l'alị ndu Jiuda, bu ẹka agụ pẹ alwa azụ bya eburu; ọ tọ dudu onye a-lwa nụ; gbahaa nwọchileka ndu gbaru ọso ọgu.”

¹⁵ No iya; iphe, bu ndu ono, maru ẹ nyee pẹ anọduje akpọ ụnwù-isensu ọku anụ agwa ono; ẹphe l'ikpoto unwanyi, pfuru l'ẹka ono; mękpoo iphe, bu ndu bukọta l'alị Paturọsu, nọ l'alị ndu Ijiputu; tuko su Jieremaya-a: ¹⁶ “Ozi ono, i gude ẹpha Chipfu ezi anyi ono bẹ anyi taa ngakwaru ngu nchi. ¹⁷ Iphemiphe, anyi sụkpooru l'anyi e-me bẹ anyi mefutaje. Anyi a-nọdu akpọ ụnwù-isensu ọku anụ eze-nwanyi igwe; anyi agbaru iya męe gude agwa iya; ẹgube anyịbedua; yẹe nna anyi pẹ; yẹe ndu eze anyi pẹ; yẹe ndu-ishi anyi pẹ shi emeje ẹ mkpukpu, nọgbaa l'alị ndu Jiuda; yẹle oma gbororo Jierúsalemụ. Teke ono bẹ anyi shinu nweru nri shii; iphe duru anyi ẹ ree; ọphu ọ dudu iphe, shi atsụ anyi l'ẹhu. ¹⁸ Obenu l'eshinu anyi harụ akpọ ụnwù-isensu ọku anụ eze-nwanyi igwe; bya ahaa agbaru iya męe gude agwa iya; bẹ ọ tọ dukpodaa iphe, ọko iya aduduru anyi; teme ogu-echi yẹe ọkpa-nri nọdu agwa anyi maa.”

¹⁹ Unwanyi bya eyekwaphọ ọnu sụ: “Teke ono,

anyi shi akpọ ùnwù-isensu oku anụ eze-nwanyị igwe; bya agbaru iya mēe gude agwa iya; ndu alụ anyi ?ēphe ta amadụ g'anyi shi egheje akara mee ya ẹrengete kpua ya l'ọ dū g'ọ dū; anyi ebvube iya agba mēe gude agwa eze-nwanyị igwe ono?"

²⁰ Noo ya; Jieremaya bya asụ ndu ono g'ēphe ha; mbụ unwoke p̄hē; mē ùnwanyi p̄hē; mē iphe, bụkpoo g'ēphe ha bụru ndu yeru iya ụdu onu ono: ²¹ "Ọ -buru k'ùnwù-isensu ono, unu shi anọduje akpọ oku l'oma mkpukpu Jiuda ono; mē l'oma gbororo Jierúsalemụ ono; mbụ unubedua; yēe nna unu p̄hē ono; ndu eze unu p̄hē; yēe ndu-ishi unu p̄hē; yēe ndu alì-a l'ophu; Chipfu ?tọ nyataduru iya tọ? ?Tọ batajedu iya l'egomunggo tọ? ²² Chipfu bē ejo-iphe, unu emegbabe atsukwa l'ehu; mēkpoo ahuma ahuma ono, unu megbaberu ono. Ọ buri iphe ono meru g'ọ gude alì unu buri ochobu; bya aburu ikpọzu; buri iphe, e gude ephu l'iphu; k'ophu bụ l'ọ tọ dudu onye bu iya ebubu; ọ dū g'ọ dū ntanu-a. ²³ Ọ kwa kele unu kpọru oku l'ùnwù-isensu; yēle kele unu meru Chipfu iphe-ēji; ophu unu emejedu olu Chipfu; ophu unu etsodu ekemu iya; ophu unu emedu omelalì iya; ophu unu emejedu iphe, ọ suru g'e meje; meru g'ọ gude ejo-iphe-a dapfuta unu g'ọ dū ntanu-a."

Ijiputu bē aa-lwụ-kpe l'ogu

²⁴ Tọbudu iya bụ; Jieremaya bya asụ ndu ono g'ēphe ha: "Unu nūmakwa Opfu Chipfu; unubē ndu Jiuda l'ophu, bụ ndu nọ l'alì Ijiputu. ²⁵ Wakwa iphe, o pfuru; mbụ Chipfu, bụ Ọkalibe-Kakọta-Ike; bya aburu Chileke ndu Ízurelu:

Unubèdua; unu l'unyomu unu gude ọnu unu pfua ya epfupfu; sù l'iphe, unu riburu nte ememe ono bè unu mefùtaje; l'unu a-nọdu akpọ ùnwù-isensu ọku anụ eze-nwanyị igwe; tẹme l'unu a-nọdu agbaru iya mēe. Ngwanụ; unu meekwapho iphe ono g'unu riburu nte iya ono. ²⁶ Ọo ya bụ lẹ-a; unu nụmakwa olu-opfu Chipfu; unubè ndu Jiuda l'ophu, bụ ndu bu l'alị Ijiputu. Wakwa iphe, Chipfu epfu baa: Unu lekwa; mu gudekwa eze ẹpha mu ono ria angụ sù l'onye shi lẹ Jiuda taa gụ-kubaedu mu l'enwa l'alị Ijiputu l'ophu l'ophu. L'ephe taa sùbaedu: 'Eshinu Chipfu nọ ndzụ g'ọ nọ iya-a'.

²⁷ “Unu lekwa-a; mu egekwa pẹ-a ngge ejo- iphe; ọ tọ bụkwa k'oma Iphe, bụkpoo ndu Jiuda, nọ lẹ Ijiputu bè ogu-echi a-sukwa pyaapyaa; ẹphe akpaa nri jasụ ẹphe taa phọduedu. ²⁸ Ọ bụru nwa ndu ọphu nahuru ogu-echi bè e-shi l'alị Ijiputu lwaphuta azụ l'alị ndu Jiuda; ọle ẹphe ta adụdu igwerigwe. Noo teke ndu ono, phọduru lẹ Jiuda ono, bụ ndu lwarụ bya eburu l'alị ndu Ijiputu ono a-maru opfu onye ọphu a-pfuru nụ; ?bụ nkemu; tọo nkepẹ? ²⁹ Wakwa iphe, Chipfu epfu baa: Wakwa iphe, e-goshi unu lẹ mu a-hù unu ahùhù l'ẹka-a baa. Ọo ya e-me g'unu maru l'iphe-ẹhuka ono, mu sùru lẹ mu e-me unu ono bè mu e-mekọta unu. ³⁰ Wakwa iphe, Chipfu epfu baa: Fero, bụ Họfura; mbụ eze ndu Ijiputu bè mu e-wokwaru ye l'ẹka ndu ọhogu iya; mbụ lẹ mu e-woru iya ye l'ẹka ndu achọ ndzụ iya ẹgube ono, mu woru Zedekaya, bụ eze ndu Jiuda ye l'ẹka Nebukadineza, bụ eze ndu Bábilọnu ono, bụ onye ọhogu iya bya aburu onye achọ ndzụ

iya onoya.”

45

¹ Wakwa iphe, onye mpfuchiru Chileke, bu Jieremaya pfuru nu Baruku nwa Neraya l'apha k'eno, Jiehoyakimu nwa Jiosaya bahuru l'aba-eze ndu Jiuda; ge Baruku dechaaru opfu, oopfu; o nodu ede iya. ² “Wakwa iphe, Chipfu, bu Chileke ke ndu Izurelu epfu eyeru gube Baruku baa. ³ I pfuru su: ‘Nshio mu! Chipfu yekwaru nrimaphu l'iphe-ehuka mu. Mu tsuakwaru ude; ike bvụ mu; ophu mu atutajeedu unme.’ ”

⁴ Chipfu suru-a: “Waa iphe, ii-pfuru iya baa: ‘Wakwa iphe, Chipfu epfu baa: Mu a-bya enwukposhia iphe, mu shi kpua l'onwomu; mu abya epheshi iphe, mu shi dzaa l'onwomu l'alija mgburugburu. ⁵ ?Denu g'ii-shi bya awata achoru onwongu iphe, paru eka? Ba chokwa iya nno. Kele mu e-mekwa nemadzu mgburugburu ejo-iphe. Nokwa iphe, Chipfu eepfu. Obenu le gubedua be mu a-noduepho eleta enya l'ekameka, i jekporu. Mu a-haa ngu ro g'i gude ndu ngu gbala.’ ”

46

Ozi ehu ndu Ijiputu

¹ Owaa bu Opfu Chipfu, bu ophu rwuru onye mpfuchiru Chileke, bu Jieremaya nchi, bu opfu ehu ohamoha.

² Opfu ehu ndu Ijiputu: Ndu eezi ozi owa-a bu ndu ojogu Fero Neko, bu eze ndu Ijiputu, bu onye e mekperu le mgboru mkpukpu Kakemishi,

nọ l'aguga ẹnimu Yufurétisu. Ọ buru onye mekperu phẹ nụ bụ Nebukadineza, bụ eze ndu Bábilonu; l'apha, kwe Jiehoyakimu nwa Jiosáya apha ẹno, ọ bahuru l'aba-eze ndu Jiuda.

³ Unu dozikwaa iphe, unu

egudeje ezeru ọgu;
 unu dozia ndu ọphu ha
 ọsa mę ndu ọphu ha
 nwanshii;
 unu ezefuta jeshia ọgu!

⁴ Unu kwakọbe inya unu k'ọgu!

Unu awụ-koru inya-ọgu
 unu l'eli;
 unube ndu agba l'inya!

G'onyenonu pfukwaaru l'ẹka
 rwuberu iya nụ!

Unu ekpuchaaru okpu-igwe!

Unu rwachaa arwa unu
 arwacha!

Unu atuko uwe-ọgu unu
 l'ophu yee onwunu!

⁵ ?Bụ gunu bę mu humaru?

Ndzu aguwaa phẹ.

Ẹphe agbawaa ọso.

Ndu ojogu phẹ bę e
 mekpewaru.

Ẹphe ye ọkpa l'ọso gbala

l'ẹbe agha ẹnya l'azụ;
 kele nggiri dụ l'uzo
 l'ẹkameka.

Nokwa iphe, Chipfu eepfu bụ
 ono.

⁶ Ndu ọkpa ẹgwa ta agbakwa
 ọso.

Ophu onye dụ ike l'ọgu
agbalakwa.

O kwa l'uzo isheli;
l'uzo ẹnụmu Yufurétisu
bẹ ẹphe vukotaru iphe daa.

⁷ ?Bụ ndu ole baa, l'abya
kụlakula g'ẹnụmu
Nayilu; gẹ nggele,
dụ igwerigwe, asọgba
gborogboro?

⁸ O kwa ndu Ijiputu abya
kụlakula g'ẹnụmu
Nayilu ono;
gẹ nggele, dụ igwerigwe,
asọgba gborogboro.

Ephe epfu sụ l'ẹphe
e-tsulihu tuko mgboko
l'ophu sọpyabe.

L'ẹphe e-mebyishi mkpukpu
lẹ mkpukpu;
yẹle ndu bu iya nụ.

⁹ Unubẹ ịnya; unu watakwa
eje l'iphu l'iphu!

Unubẹ ndu agba l'ugbo-ịnya;
unu tangirihukwa g'e je!

Gẹ ndu dụ ike l'ọgu
gbeshikwa g'e je;
mbụ unubẹ ndu Kushi;
yẹe ndu Putu,
bụ ndu chigbaa iphe,
eegudeje ezeru ọgu;
mẹ unubẹ ndu Lidiya,
bụ ndu agbajẹ apfụ!

- 10 Obenu l'eswe mbọku ono bu
 Nnajiuphu nwe iya;
 mbu Chipfu,
 bu Okalibe-Kakota-Ike.
- Ọ kwa eswe agwata ugwo iphe;
 mbu mbọku, ọo-gwata ndu
 achi iya le njo ugwo
 iphe.
- Ọo ogu-echi a-su nemadzu
 pyaapyaa jasu l'ooji
 iya epho;
 jasu teke ọo-ngu mee
 ngu-jia epho;
 kele ọo Nnajiuphu;
 mbu Chipfu,
 bu
 Okalibe-Kakota-Ike
 agwa iphe l'ali ndu isheli;
 l'aguga enyimu Yufurétisu.
- 11 “Tugbua je l'ali ndu Giladu
 je emeta obvu etete;
 gube nwamgboko,
 yee nwoke akwajeduru,
 bu Ijiputu!
- Obenu l'igwerigwe obvu ono,
 iimegbaa ono bukwa
 ke mmanu.
- I tii wekorohukwa.
- 12 Ohamoha numawaru iphere
 ono,
 e meru kpua ngu ono.
 Ekwa unu tukowa mgboko
 l'ophu ngaa.

Ndu dụ ike l'ọgu tuko
 dapyabegbaa ibe phe.
 Ephe tuko daa ndatewo.”

¹³ Wakwa ozi, Chipfu ziru onye mpfuchiru iya,
 bu Jieremaya le k'ehu Nebukadineza eze ndu
 Babilonu, abya etso ndu Ijiputu ọgu.

¹⁴ Raa iphe-a arara l'ali ndu
 Ijiputu!

L'i chia ya le mkpu le
 mkpukpu Migudolu!
 Chikwaa ya pho le mkpu le
 mkpukpu Nofu;
 yele Tahupanahesu:
 Onyenonu pfukwaru l'eka
 rwuberu iya nu
 kwakobe;
 kele ogu-echi byawaru
 egbushi ndu no-kube
 ngu nu.

¹⁵ ?Bu gunu be agwa ngu,
 bu Apisu agbahunuru?
 ?Bu gunu be obobo-ena
 ngu obu aduedunu
 ike pfuru?

Iphe, kparu iya nu bu le
 Chipfu nwutsuwaru
 iya.

¹⁶ Ufu duru phe ndupyabe;
 ephe dagbaa dapyabe nwibe
 phe; ephe su:
 Unu gbeshi g'anyi laphu azu
 lapfu ndu ali anyi yee
 ndibe anyi!

G'anyi gbalaaru ogu-echi ndu
eme anyi mkpawere!

17 Unu gùbe Fero, bụ eze ndu
Ijiputu ẹpha ọzọ.

Unu kuje iya:
O-pfu-epfu-emegeme.

18 Wakwa iphe, Eze ono epfu baa;
mbụ onye ẹpha iya
bụ Chipfu,
bụ Ọkalibe-Kakọta-Ike:

Eshinu mu nọ ndzụ gẹ mu
nọ iya-a
bẹ o nweru onye a-bya nụ.

Onye ono a-dụ g'úbvú Tabọ
l'ẹka úbvú dọru.

Mbụ l'ọo-dụ g'úbvú Kamelu,
nọ l'agụga eze-enyimu.

19 Kwakọkwa iphemiphe,
ii-gude laa alị ọzọ;
unube ndu bu l'alị
ndu Ijiputu!

Noo kele mkpukpu
Nọfu bẹ e-mechakwaa
buru ochobu;
l'eemebyishia ya;
ọ tọ dudu onye eburu
iya eburu.

20 "Ijiputu bụ nwada eswi,
ama ntumatu.

Obenu l'ijiji-onyieka
eshije l'uzo isheli eje
abyapfuta iya
tekenteke.

- 21 Ndu ẹphe butaru g'ẹphe
 bya alwuaru phe ọgu
 be doru l'echilabo phe
 g'oke-eswi,
 daru ẹpfurepfu ọdu.
 Ẹphebedua tukowaru
 dakobe gbala;
 ọphu ẹphe adudu ike pfuru.
 Noo kele eswe mboku
 ọla-l'iswi dapfutawaru
 phe;
 mbu teke aanu phe aphu.
- 22 Ndu Ijiputu atsụ kpururu
 g'agwo,
 awu awuwu awufu;
 noo kele ndu ọhogu
 phe abyapfuta phe
 ẹhuka ẹhuka;
 bya egude ogbunku etso
 phe ọgu ge ndu
 egbutsushi oshi.
- 23 Ọswa phe l'ọphu be ẹphe
 a-supyashichaa
 asupyashi;
 g'ọ duhabe ẹpfukala.
 Nokwa iphe, Chipfu eepfu.
 Ẹphe ka igube adu
 igwerigwe;
 k'ọphu bu l'a taa gutadu
 phe l'ọgu.
- 24 Nwada Ijiputu be e mewaru
 iphe-iphere.
 Mbu l'e woru iya ye l'eka ndu

isheli.”

²⁵ Chipfu, bu Ọkalibe-Kakọta-Ike, bu Chileke ke ndu Ízurelu sùru-a: “Lekwa; mu abyakwa phe anu aphu; mbu Amonu, bu agwa ndu mkpukpu Tebesu; yee Fero; yee ndu Ijiputu; ephe l'agwa phe; mekpoo ndu eze phe; yee iphe, bukpo ndu kpọru obu yeru Fero. ²⁶ Mu e-woru phe ye l'eka ndu achọ ndzu phe; mbu l'eka Nebukadineza, bu eze ndu Babilonu; ephe le ndu-ozu iya phe. O le o bu; e -mechaa be ebukwaru-a le Ijiputu ozo g'e shi buhawaru iya.” Nokwa iphe, Chipfu eepfu bu ono.

²⁷ “Ta atsukwa ebvu;
gube Jiékọpu, bu onye-ozu
mu!

Ọphu i nmakwa
pyaapyaapya;
gube Ízurelu!

Lekwa; mu a-dzọta ngu l'ali,
du enya;
dzọta awa ngu phe l'ali
eka a kpuru phe le
ndzu laa.

Jiékọpu e-mechakwaa lwa
bya eburu le nchi-odoo
tusaru ehu.

Ọphu o dudu onye byaru
eyebaa ya ebvu.

²⁸ Ta tsukwa ebvu;
gube Jiékọpu,
bu onye-ozu mu;
kele mu nokwa swiru ngu.
O kwa Chipfu epfu iya.

Kele mu e-mebyishicha
 ọhamoha ono,
 mu chiru unu tũkaa
 l'echilabọ phe ono.
 Ọphu mu emebyishidu
 unubẹdua.
 Ọo ahùhù bẹ mu a-hù unu
 hùta iya unu l'ahuma.
 Ọphu mu ahakwanu unu
 phuruphuru ge mu
 te echi unu echachi."

47

Ozi, e ziru ndu Filisitayinu

¹ Ọwaa bu Opfu Chipfu, bu ọphu rwuru Jieremaya nchi, bu opfu ẹhu ndu Filisitayinu; teme Fero bya etsoo ndu mkpukpu Gaza ọgu.

² Wakwa iphe, Chipfu epfu baa:
 Lewarọ ge mini shi l'uzo
 isheli abya ke kulakula.
 Oo-mecha buru utso,
 asọ gborogboro.
 Ọo-sọ-kputa alị l'ophu;
 yẹe iphemiphe,
 nọ iya nọ;
 sọpyabe mkpukpu;
 yẹe onyemonye,
 bu iya nọ.

Ndu ono e-chishi mkpu.
 Mbụ l'iphe, bu ndu bu l'alị
 ono a-tu uzu-ekwa.

³ Mbụ l'ephe -numaepho igiji
 ichirupfu-okpa inya phe;

bya anuma uzu ugbo-inya
 ndu ohogu phe;
 yee kwokiri kwokiri,
 okpa ugbo-inya
 phe ono eme be ndu
 bu nna tee leedu
 enya l'azu k'eyeru unwu
 phe aka.

Eka a-tuhu phe
 lwakpalwakpa.

⁴ Kele mboku rwuakwaru teke
 ee-mebyishikota ndu
 Filisitayinu g'ephe
 hakota.

L'e mee ge nwa ndu phoduru
 nu, bu ndu gege eyeru
 ndu mkpukpu
 Taya yee ndu mkpukpu
 Sayidonu aka chihu;
 kele Chipfu abyakwa
 emebyishi ndu
 Filisitayinu;
 mbu nwa ndu phoduru nu
 le ndu ali Kafuto.

⁵ Ndu mkpukpu Gaza
 kpushiwaru ishi aphu.
 Ndu mkpukpu Ashikelonu be
 a lawaru l'iswi.
 Su-a; unube nwa ndu ophu
 phoduru le ndu Anaku;
 ?unu e-yejashikpoo
 onwunu egube-a jasu
 teke ole?

6 “Sua-a; gube ogu-echi
 Chipfu;
 ?bukpoo teke ole be
 oo-jeberu l'ikabe
 tuta unme?
 Kabenu miru onwongu
 yee l'obo!
 Tutanu unme; nodunu nwa
 nggujunguji!
 7 Ole ?denukwanu g'oo-shi
 nodu nwadoo
 l'eka ile enya le Chipfu
 tūwaru iya ekemu
 su g'ọ lwua ndu mkpukpu
 Ashikelonu;
 yee ndu bu l'aguga
 eze-enyimu?
 Mbụ l'onoo g'o pfuwaru
 l'ọo-dụ bụ ono.”

48

Ozi ẹhu ndu Mówabu

1 A -bya l'opfu ẹhu ndu Mówabu; wakwa iphe,
 oopfu; mbụ Chipfu, bụ Ọkalibe-Kakọta-Ike; mbụ
 Chileke ndu Ízurelu:
 “Nshio Nebo; kele e meru iya;
 ọ buru ochobu.
 Ndu Kiriyatayimu be e
 meru iphe-iphere;
 bya akpua phe
 le ndzu.
 Ulo phe, bu eka a kpushiru
 ike be e meru

iphe-iphere tũkaa ya
nanũnanu.

² A taa jaędu ndu Mówabu
ajaja.

O buru lę mkpũkpu
Hęshibonu bę a chĩru
phę ejo idzu sũ:

'Unu bya g'anyi mee g'ọha
ono chĩhu!'

Unubędua kwapho;
unubę ndu mkpũkpu
Madumenu
bę ee-mechakwaa laa
l'iswi.

Ogu-echi e-mechakwaa chĩa
unu ęjo ọso.

³ Unu ngabękpodapho
nchĩ nũma mkpu,
eechi lę mkpũkpu
Horonayimu;
mkpu alĩ arwũhu yęę
oke ọla-l'iswi.

⁴ Ndu Mówabu bę e
mebyishiwaru.

Unwegirima iya chishiru
mkpu ike.

⁵ Ęphe enyi obvu awũ eje l'ũzo
mkpũkpu Luhiti;
akwa ntũmatu eje atũgbu.

Mbũ l'ũzo ọkpa-ũbvũ
mkpũkpu Horonayimu
bę a nũmaru mkpu ękwa,
eechi ekpu iphemiphe ono,
larũ l'iswi ono.

6 Unu gbalaa! Unu gbaa ọso
ndzụ unu!

Unu je ebvuru g'irwu,
bvuru l'echiegu!

7 Eshinu unu kpọru obu ye
l'iphe, unu aduje ike mee;
yee ẹku unu be
aa-kpufukwaa unubedua
le ndzụ.

Teme agwa unu, bu Kemoshi
be aa-kpukwapho
le ndzụ; yele ndu-uke,
agwaje iya nu;
me ndu-ishi iya.

8 Ee-mebyishi mkpukpu le
mkpukpu.

Ofhu o dudu mkpukpu,
byaru anahu nu
me nanu.

Nsuda nsuda be a-buru
mkpurupyata.

L'e mebyishia eka du baswa;
kele o egube ono be
Chipfu pfuru iya.

9 Chibe ndu Mowabu nkù;
kele oo-mecha phelihi
phefu.

Mkpukpu le mkpukpu phe
a-bukotachaaru
ochobu.

O to dudu m'onye lanu eburu
iya nu.

10 Onye a turu onu be o bu;

mbụ onye gude
 ẹregede ejeru Chipfu
 ozi!

A tũkwaru onye ono ọnu,
 bụ onye te egudedu
 ogu-echi iya egbu ọchi!

¹¹ Eshi teke ọ bụ nwata
 bẹ ndu Mówabu
 nọkpopho tũsaru ẹhu
 g'ọhu-mẹe, dọru l'ite.

Ọphu a wụ-phedu iya
 awụ-phe l'ite;
 kele e teke akpụ-swee
 ndu Mówabu ẹ ndzụ
 lashia alị ọzo.

Noo g'o gude ọ nọdu
 atsoepho g'ọtso.

Ọphu ooshibuhudu
 mkpọ eshibuhu.

¹² Wakwa iphe, Chipfu epfu
 baa:

O nwenuru-a mbọku,
 abya nụ, bụ mbọku,
 mu e-ye ndu
 awụ-phe mēe l'ite.

Ẹphe awufuta iya l'ite ono,
 ọ dọru ono.

Ẹphe awufuta iya l'ite ọbu;
 woru ite ono,
 o shi dọru ono tsukposhia.

¹³ Noo teke iphere Kemoshi
 e-gude ndu Mówabu;
 ẹgube ono,

iphere Bẹtelu guderu
 ndu Ízurelu, bu iphe,
 ẹphe shi dakobe ono.

14 ?Denu g'unu e-shi sù l'òkpehu
 dù unu;
 l'unu bu ndu dù ike l'ògu?

15 Ndu e-mebyishi Mówabu;
 yẹ mkpukpu, nọgbaa
 ya nù bẹ nọwaa anọno.

Unwoke phẹ, kachaa
 agba mkparawa bẹ
 ee-gbukọta egbugbu.

Nokwa iphe, oopfụ;
 mbụ Eze ono,
 ẹpha iya bu Chipfụ;
 bya aburu
 Okalibe-Kakọta-Ike.

16 Teke ndu Mówabu a-la l'iswi
 dukwaa tsokere.

Eze iphe-ẹhukà a-dapfukwa
 phẹ ẹgwegwa.

17 Unu jekwa akporu phẹ iphu;
 unubẹ ndu unu l'ẹphe
 bukubegbaa!

Mbụ unubẹ ndu maru ẹpha
 phẹ.

Unu sù phẹ-a: 'Denu g'ọ nwuru
 a gbajiru mgboro-eze,
 shihuru ike;
 tẹme ọ buru mgboro,
 ama ntumatu-a?'

18 Unubẹ ndu bu lẹ mkpukpu
 Dibonu;

unu shinu le biribiri unu
 nyizeta
 bya anodu l'ali, du jakporo
 jakporo;
 kele onye emeyi ndu
 Mowabu byapfutaru
 unu bya egwepyaa
 mkpukpu le mkpukpu
 unu ono,
 a kpushiru ike ono.

19 Unu pfukpodarupho l'aguga
 gbororo gee ngge;
 unube ndu mkpukpu Arowa!

Unu jia unwoke, agba oso;
 ye unwanyi,
 nahuru nu!

Unu jia phe su phe:
 'Bu gunu meru?'

20 Ndu Mowabu be e meakwaru
 iphe-iphere kpua;
 kele ephe dakashihuwaru.

Unu rwua erwubvu;
 chishia mkpu ike!

Raa ya arara le nggele Anonu
 le Mowabu be e
 mebyishiwaru!

21 Ndu bu le mbarabata be ikpe
 dapfuakwaru;
 mbu ndu Holonu;
 ye ndu Jiahasu;
 waa ndu Mefahatu;
 22 dapfu ndu Dibonu;
 ye ndu Nebo;

mekpoo ndu
 Betu-Dibulatayimu;
²³ dapfu ndu Kiriyaatayimu;
 yee ndu Betu-Gamulu;
 yee ndu Betu-Meyonu;
²⁴ dapfu ndu Keriyotu;
 yee ndu Bözura;
 dapfukota mkpukpu
 le mkpukpu ndu Mówabu
 l'ophu;
 ndu ophu bu enya me
 ndu ophu bu ntse.

²⁵ Mpu ndu Mówabu be e
 chikwashiakwaru.

Teme e chikwoshiwa iya eka.”
 Nokwa iphe, Chipfu eepfu
 bu ono.

²⁶ “Unu chegharu iya mee eka;
 kele oo Chipfu be o koru
 okpa l'ishi.

Ge ndu Mówabu watanu
 ebvuka egbo, ephe gboru;
 g'ephe aburu iphe,
 ee-gude agba mgbonu.

²⁷ ?Tobudu ndu Izurelu be
 unu shi egudeje agba
 mgbonu?

?Bu ephe le ndu-oshi shi
 nodu teke ono to;
 mekwanuru g'o gude unu
 shi atuje uka l'ishi
 ekweru iya une
 me unu -nodu epfu opfu

ẹhu iya?

28 Unu gwọbechaa mkpụkpu
unu je eburu
l'agbara-mkpuma;
unubẹ ndu Mówabu!

Unu dọephọ ọ kparaka,
bụ l'ọnu ọgba ọ
ọokpaje ọpfune iya!

29 Anyi nụmakwaru ọ Mówabu
gude ekube onwiya.

Mbụ l'o kunukaru onwiya;
tẹme ọ nọdu etsenụka
etsetse.

Mbụ l'eku-onwonye ọbu
mẹkpoo etsetse iya
ọbu;
mẹkpoo mkpofu-ọkpoma
iya ọbu ọ parụ ẹka.”

30 Wakwa iphe, Chipfu epfu
baa:

“Mu makwaru oke ẹhu-eghu
iya;
ọle ọ bukwanu ọ
mmanu.

Tẹme ekuku, ooku onwiya
bukwarupho iphe-mmanu.

31 Noo g'o gude mu nọdu
erwu erwubvu l'opfu
ẹhu ndu Mówabu.

Mbụ l'ọo ndu Mówabu l'ophu
l'ophu ọ mu echi
mkpu iya.

Ọ buru ndu mkpụkpu

Kiru-Haręsetu bę mu agu
aphu phę.

³² Mu kakwa ara ękwa gube
opfu-vayınu kę mkpukpu
Sibuma eme lę kę Jiaza.

I jaru ajajaj jarwuchaa
k'ophu ękali ngu rwuchaaru
eze-ęnyimu;
jerwuchaa eze-ęnyimu,
no-kube mkpukpu Jiaza.*

Ole e mebyishiwaru iphe,
bukpoo akpuru ngu.

³³ E wofuwaru ęhu-utso yę eme
ęmereme l'ęgu oshi-omi
ndu Mowabu yęle
ali phę.

Męę bę mu mewaru g'a ba
kutajehe l'ęka aakuje
męę.

Ophu o duedu onye
anodujekwadu akwa
ęvu mę a -nodu akų iya.

A makwaru-a l'aanoduje anų
olu l'ęka ono;
ole o to buedu olu onye
akwa ęvu.

³⁴ Mkpu, ęphe echi
ngakotaakwaru.

E shi lę Hęshibonu chikota
mkpu obu;
je akpaa lę Eleyale;

* **48:32** 48:32 Oo Eze-ęnyimu Unu bę epfu opfu iya l'ęka-a.

mękpoo lę Jiahazu.
 E shi lę Zowa chia ya jasų
 lę Horonayimu;
 waa ęgulatu-Shelishiya;
 noo keęe mini
 tashihęchaaru je
 akpaalę keę Nimurimu.

³⁵ L'alį ndu Mówabu bę mu
 e-me g'a gwabuhu iphe
 l'ęnya ęka aagwaję iphe;
 mee g'a ta akpojehe
 ỳnwù-isęnsu ọku nų
 agwa phe.”

Nokwa iphe, Chipfu eepfu
 bų ono.

³⁶ “Oo ya bų l'obu mu aphų
 swooswooswo
 agų aphų ndu Mówabu
 g'onye aphų ototo;
 ọ nọdu agų aphų ndu
 Kuru-Haręsetu g'onye
 aphų ototo; keęe urwu,
 ęphe ritaru bvųwaru.

³⁷ Onyemonye kpųshiwaru ishi.
 Onyemonye kpųshia ęjį-agba.
 Ónyá-mma dųkota
 onyemonye l'ęka.

Onyemonye gbaphukọta
 uwe-aphų l'upfu.

³⁸ Mbų l'iphe, ada l'ọma
 ỳlo-eli,
 nọgbaa l'alį ndu
 Mówabu;

mẹ l'edupfu l'edupfu l'opfu
 ta adukwa iphe ọzo,
 gbahaa ọzu-ẹkwa;
 noo kẹle mu tsukpọshiwaru
 ndu Mówabu g'ite,
 adudu onye ọ du ree.”

Nokwa iphe, Chipfu eepfu
 bu ono.

³⁹ “Waa g'a tukashiru phe
 nanunanu!

Waa g'ẹphe atụ ọzu-ẹkwa
 wọwoowoo!

Waa gẹ ndu Mówabu gude
 iphere ghaa azu!

Ndu Mówabu buakwaa iphe,
 e gude agba mgbonu.

Mbu l'iphe, bukpo ndu
 no phe ntse be ọnyi
 ishi ẹdzu.”

⁴⁰ Wakwa iphe, Chipfu epfu baa:
 “Lenu! Ugo ephekwa raa
 ephezeta l'ali.

O woru nkù iya jashia l'eli ali
 ndu Mówabu.

⁴¹ Mkpukpu, nọgbaa ya nu be
 aa-lwutachaa.

L'a natachaa phe ọlo,
 ẹphe edomije onwophe.

Lẹ mboku ono be obu ndu
 Ojogu ndu Mówabu
 a-duẹpho g'obu nwanyi,
 ime eme.

⁴² Ndu Mówabu l'opfu be

ee-mebyishi
 kele ephe koru Chipfu
 okpa l'ishi.

43 N-yemebvu; yee iduma iduma;
 yee onya nogbakwa echeru
 unu echeru;
 unube ndu Mowabu!"

Nokwa iphe, Chipfu eepfu
 bu ono.

44 "Onye nahuru n-yemebvu;
 l'odaba l'iduma.

Onye nyifutaru l'iduma;
 onya a-nmata iya.

Noo kele o iphe ono be
 mu e-gude byapfuta
 Mowabu l'apha,
 aa-nodu anu iya aphu."

Nokwa iphe, Chipfu eepfu
 bu ono.

45 "Le mgboru mkpukpu
 Heshibonu be ndu
 agba oso ogo pfuru
 nyegenyege.

Noo kele oku kpufuru
 le Heshibonu.

Mbu l'onwu phuruphuru oku
 etsu l'ime mkpukpu
 Sihonu.

O buerupho l'echi ishi be
 otsu ndu Mowabu.

Mbu okpu-ishi ndu ono,
 shi anoduje aba
 hanyihanyi ono.

46 Nshio unube ndu Mówabu!

Ndu Kemoshi be e
mebyishiakwaru.

Unwu unu nwoke be a
kpuakwaru le ndzu laa
ali ozo.

Teme unwada unu phe buru
ndu a lwutaru l'ogu laa
ali ozo.

47 O le mu e-mechakwaa dophu
ndu Mówabu azu l'onodu phe
le mboku, du l'iphu."
Nokwa iphe, Chipfu eepfu
bu ono.

Nokwa g'ikpe, e kperu ndu
Mówabu jeberu
bu onoya.

49

Ozi ehu ndu Amonu

¹ A bya l'opfu ehu ndu Amonu; wakwa iphe,
oopfu; mbu Chipfu:

?Bu le Izurelu te enwedu
unwegirima unwoke to?

?To nwedu onye e-ri iphe iya
to?

?Denu g'o gude Moleku gbe
nata ali ndu Gadu;
o buru okiphe iya?

?Denu g'o gude ndibe iya
buru le mkpukpu iya
be epe bugbaa?

² Oo ya bu le-a; wakwa iphe,

Chipfu epfu baa:
 Mu e-mechaa mee gę ndu
 mkpukpu Raba,
 nọ l'alì ndu Amọnu numa
 mkpu ọgu.

O -rwua mbọku ono bę Raba
 a-buru ikpọzu;
 tẹme unwu mkpukpu,
 nọ-pheru iya
 mgburugburu
 etsufukọta l'ọku.

Noo teke ndu Ízurelu a-chifu
 ndu shi chifu phẹ nụ.

Nokwa iphe, Chipfu eepfu bu
 ono.

³ Unu tya ọzu-ẹkwa;
 unubę ndu Heshibonu;
 kele mkpukpu Eyayi bę
 e mebyishiakwaru!

Unu chishikwaa mkpu ike;
 unubę ndu bu lẹ Raba!

Unu yekwaa uwe-aphu
 wata ara ẹkwa.

Unu ekwoo gburugburu shia
 ọwa-a yẹ ọphuu
 l'ime npherenphere igbulọ
 mkpukpu unu ono;
 kele Molẹku bę aa-kpukwa
 lẹ ndzụ lashiya alì ọzo;
 yẹle ndu-uke,
 agwajẹ iya nụ;
 mẹ ndu-ishi iya.

⁴ ?Dẹnu g'o gude i gude

nsuda nsuda ngu eku
 onwongu;
 mbu gube nwada e gudedu
 ire ngu eka ono;
 mbu gube onye kporu obu
 ye l'eku ngu epfu su:
 ?Bu onye suru mu eme gunu?
⁵ Lekwa; mu e-mechakwaa
 mee ge ndzu-agugu
 rwuta ngu.
 O kwa Nnajiuphu epfu iya;
 mbu Chipfu,
 bu Okalibe-Kakota-Ike.
 O buru ndu oo-shi l'eka
 bu ndu bupheru ngu
 mgburugburu.
 G'unu hakpo l'onye l'onye
 be aa-chifu achifu.
 Ophu o dudu onye
 a-chi-phuta ndu
 gbalawaru nu azu.
⁶ "Ole mu e-mechakwaa
 dophu ndu Amonu azu
 l'onodu phe.
 Nokwa iphe, Chipfu eepfu
 bu ono."

Ozi ehu ndu Edomu

⁷ A bya l'opfu ehu ndu Edomu;
 wakwa iphe, oopfu;
 mbu Chipfu,
 bu Okalibe-Kakota-Ike:
 "Mmamiphe ta adukpoedu
 le mkpukpu Temanu

ọtọ?
 ?Ọkpobe idzu bvụwaru
 l'ẹka ndu maru eye
 ọnu l'opfu ọtọ?
 Mmamiphe phẹ ?o rehuwaru
 erehu ọtọ?
 8 Unubẹ ndu bu ẹ Dedanu;
 unu ghakọbe gbalaa!
 Unu gbaba je edomia
 onwunu l'ime ẹka dụ
 omilomi;
 kele mu gudekwa ọla-l'iswi
 abyapfuta oshilọkpa
 Iso
 ẹ teke mu abya iya anụ
 aphụ-a.
 9 Ọ -buru ẹ ndu awọ akpuru
 vayinu byapfutaru
 ngu;
 ?ẹphe ta awọ-phodojedu
 nwọphu dụ
 nwolemole?
 Ndu-oshi -bya ibe ngu
 l'enyashi;
 ?tọ buedupho iphe,
 mkpa iya duru phẹ bẹ
 ẹphe e-wota kpoloko?
 10 Obenu l'oshilọkpa Iso bẹ
 mu gbabẹwaru ọto.
 Ẹka ono, ẹphe edomi edomi
 ono bẹ mu kpuhawarụ
 ghebe ọnu;
 k'ọphu ẹphe tee
 domikọtaedu onwophe.

Ụnwegirima phe;
 mẹkpoo abubu phe;
 mẹkpoo obutobu phe;
 lakotaru l'iswi;
 tẹme ẹphebedua
 chihukwapho.

11 Pakwaru unwu ogbee unu
 haa;
 kele mu e-me-a g'ẹphe
 nodu ndzu!

G'unwanyi unu, ji phe
 nwuhwaru chiru
 upfu kwee l'ehu mu!"

12 Wakwa iphe, Chipfu epfu baa: "O -buru
 le ndu agbaduru k'angu iphe, shi l'okoro ono
 anguchaa iphe, shi iya nu; ?bu gunu a-kpa g'a
 haa unu g'a ta nu unu aphu? A taa hakwa unu
 g'a ta nu unu aphu. Unu ngufutajekwa iphe,
 shi l'okoro ono; 13 kele-a; wakwa iphe, Chipfu
 epfu baa: Mu gudeakwa onwomu ria angu su
 le mkpukpu Bozura e-mechaa buru ikpozu; bya
 aburu iphe, aakpo-yiru ukuvu. Mbu l'oo-buru
 ochobu; bya aburu iphe, eephu l'iphu. Teme
 iphe, bu mkpukpu ozo, nokota l'ali ndu Edomu
 a-bukotaru ikpozu jasu l'ojejoje."

14 Mu numakwaru ozi,
 Chipfu ziru.

Onye-ozu be e ziru g'ẹphe
 jepfu ohamoha su
 phe-a:

"Unu dzukobekwa onwunu
 bya etsoo phe ogu!
 Unu gbalihukwa jeshia ogu!"

15 Kele-a; lekwa; mu mewaru;
 ì ha nwanshìì l'echilabọ
 ọhamoha;
 ọphu ọ dudu iphe,
 ndiphe guberu ngu.

16 Ọ kwa ebvu, i shi eyeje ndu
 ọzo; yee eku-onwonye,
 nọ ngu l'obu ono
 dephuru ngu;
 mbu gube onye ono,
 bu l'ime agbara-mkpuma
 ono;
 onye bu l'eka úbvú kakọta
 l'eli.

Ọ tọ dukwa m'obeta i je
 akpaa epfune ngu
 l'ephekerephe
 ephekerephe ge k'ugo;
 be mu e-shikwa l'eka ono
 mekota ngu l'i daa.

Nokwa iphe, Chipfu eepfu
 bu ono.

17 Ndu Edomu e-mechaa buru
 iphe,
 aakpo-yiru ukuvu.

Iphe, bukpo ndu ghataru
 phe nu be ishi anyi
 edzu.

Ephe egude iya gbaahaa
 mgbonu; o buru iphe,
 a-kpa iya nu bu eze
 iphe-ehuka ono,
 a-dapfu phe nu ono.

18 Oo ẹgube ono, e mebyishiru
 mkpukpu Sodomu yẹ
 Gómóra ono;
 bya emebyishia mkpukpu
 lẹ mkpukpu,
 nọgbaa phẹ lẹ mgboru ono;
 nokwa g'ọ tọ dudu onye
 e-bu l'ali ndu Edomu;
 ophu o dudu onye e-me
 iya unuphu.

Nokwa iphe, Chipfu eepfu
 bu ono.

19 “Lekwa-a! O kwa g'oduma
 shi l'oswa,
 nọ l'aguga ẹnimu Jiódanu
 kwofuta;
 bya adapfu aturu,
 dọru l'odu aturu,
 nri du shii bukwapfo
 gẹ mu e-kwo
 gburumu je achifu
 ndu Edomu l'ali iya
 l'otulupfu.

?Bu onye be mu hotaru g'ọ
 buru onye mu a-tu ẹka
 g'o mee iphe ono?

?Bu onye du gẹ mu du?

?Bu onye suru mu eku ikpe?

?Bu onye bu onye eche aturu,
 a-du ike pfuru gẹ mu
 l'iya mee?”

20 Oo ya bu le-a; unu numakwa
 idzu,

Chipfu chiru lẹ ya e-me
 ndu Edomu; mbu iphe,
 o chiru lẹ ya e-me ndu
 bu lẹ mkpukpu Temanu.

Ọ tọ dukwa iphe, a-kposhi
 g'a ta kputa unwu
 aturu iya me unwu
 egbu iya kpufu;
 ndzu erwuta ndu ophu
 phoduru nu.

21 Oda, oo-da teke ephe a-da
 be a-nmayichaa mgboko
 anmayi.

L'a nodu lẹ mgboru
 Eze-enyimu Uswe-uswe
 numachaa olu-ekwa
 phe.

22 Lenu! Ugo ephekwa raa
 ephezeta l'ali.

O woru nkù iya jashia l'eli
 mkpukpu Bozura.

Lẹ mboku ono be obu ndu
 Ojogu ndu Edomu
 a-duepho g'obu nwanyi,
 ime eme.

Ozi ehu Damasukosu

23 A -bya l'opfu ehu ndu
 Damasukosu;

“Ndu Hamatu yee ndu Apadu
 be e kpuakwaru iphu
 le ntu;
 noo kele ephe numawaru
 ejo nzi.

Meji tofuwaru phe.
 Okpoma aphuwaa phe
 gbudugbudu
 g'eze-enyimu,
 a swongaru aswonga.

24 Ndu Damasukosu be aka
 tulwahuru.

Ephe dakobeakwaru
 agbalawa agbala.

Meji tofuakwaru phe atofu.
 Ejo iphe-ehuka gudeshiwaa
 phe ge nwanyi,
 ime eme.

25 ?Denu g'o gude ophu a
 gwobeduru mkpukpu
 ono,
 a maru amaru ono?

Mbu mkpukpu ono,
 tubaru mu l'anya ono?

26 Oo ya bu le-a; unwokorobya
 phe a-nodu ada popoo
 l'oma gbororo.

Ndu Ojogu phe l'ophu be
 ee-megbushibebe
 mboku ono.

Nokwa iphe, Chipfu,
 bu
 Okalibe-Kakota-Ike
 eepfu bu ono.

27 Mu a-tu oku l'igbulu
 Damasukosu;
 l'ootukota iphe, bu ulu,
 Benu-Hadadu kpuru
 kpushia ike."

Ozi ẹhu Keda yẹ Hazo

28 A -bya l'opfu ẹhu ndu Keda yẹ alì-eze ndu Hazo, bụ ophu Nebukadineza, bụ eze ndu Bábilonu lwu-kperu; wakwa iphe, oopfufu; mbụ Chipfu, bụ Okalibe-Kakota-Ike:

“Unu zelihi tsoo ndu Keda
ogụ!

Unu mebyishia ndu shi
uzo ẹnyanwu-awawa!

29 Ulo pẹ, bụ ulo ophu e meru
l'ekwa;
yẹ egbu yẹ aturu pẹ bẹ
aa-tuko rwuta.

L'aachita ekwa pẹ;
yẹ iphemiphe,
ephe nweru enweru;
mekpoo inya-kamelu
pẹ.

Ndiphe echi mkpu ekpu
pẹ sụ pẹ:

‘Nggiri nokwa l'uzo
l'ekameka.’ ”

30 Wakwa iphe, Chipfu epfu
baa:

“Unu gbalakwaa agbala;
unu gbamihukwa
agbamihu!

Unu jekwa anodugbaa l'ogba,
du omilomi;
unube ndu bu le Hazo.

Noo kele Nebukadineza,
bụ eze ndu Bábilonu
chikwaru idzu unu
k'ẹji;

bya epfubuwaa iphe,
oo-me unu.”

31 Wakwa iphe, Chipfu epfu baa:

“Unu zelihi tsoo ọha,
tɔsaru ẹhu ọgu, bụ ọha,
bụ ọphu adudu onye
ẹphe atsụ ebvu;
mbụ ọha,
ete nwedu ọguzo;
ọphu ọ kpọbeduru
mgborígwè;
tẹme ndibe iya buerupho
nọduru onwophẹ.

32 Inya-kamelu phe bẹ
aa-kwachaa l'okwata.

L'e rwutakwaphọ ikpoto eswi
phẹ l'ọgu.

Iphe, bụ ndu bugba l'ọha,
dụ ẹnya bẹ mu e-wojeruro
tụkaa lẹ pherephere.

Mu eshi l'uzo m'uzo mee
g'oke iphe-ẹhuka
dapfu phe.

Nokwa iphe, Chipfu eepfu
bụ ono.

33 Mkpukpu Hazọ l'e-mechaa
buru ẹka nkuta-ọswa
a-dojeru;
kele ọo-buru ochobu
jasụ l'ojejeje.

Ọ tọ dudu onye byaru eburu
l'ẹka ono.

Mbụ l'ọ tọ dudu nwoke,

byaru akwabaa ya
unuphu buru.”

Ozi ẹhu ndu Elamu

³⁴ Wakwa Opfu Chipfu, bu ophu rwuru Jieremaya onye mpfuchiru nchi l'opfu ẹhu ndu Elamu. Teke o numaru iya bu le ntsolohu teke Zedekaya wataru aburu eze ndu Jiuda.

³⁵ Wakwa iphe, oopfu; mbu Chipfu,
bu Okalibe-Kakota-Ike:
Lekwa; mu a-gbajikwa apfu
ndu Elamu,
bu iya bu ẹka ike phe
kpajiru.

³⁶ Iphe, mu e-me g'o dapfu
ndu Elamu bu uzi
pherephere ẹno,
shigbaa le mgburaku
akpaminigwe uzi ẹno.

Mu a-tuka phe;
ephedzuru
pherephere uzi ẹno.

Ophu o dukpodaa oha,
nonu bu ẹka ndu
Elamu ataa gbachadaa
oso ogu laa.

³⁷ Mu a-tukashi ndu Elamu
nanunanu l'iphu ndu
ohogu phe;
mbu l'iphu ndu achọ
ndzu phe.

Mu e-me g'ejo-iphe dapfu
phe;
mbu le mu a-tu-koshi

phẹ oke ẹhu-eghu mu.
 O kwa Chipfu epfu iya.
 Mu e-me g'e gude ogu-echi
 achị phẹ
 jasụ teke mu e-me g'ẹphe
 ta aduhe.

³⁸ Ẹka mu e-je ebvube aba-eze
 mu bu l'ali ndu Elamu.
 Mu emebyishia onye eze phẹ;
 yẹe ndu-ishi phẹ.

O kwa Chipfu epfu iya.

³⁹ “Ole mu e-mechakwaa
 dopu ndu Elamu azu
 l'onodu phẹ l'ataphu.
 Nokwa iphe, Chipfu eepfu
 bu ono.”

50

Ozi ẹhu ndu Bábilonu

¹ Wakwa opfu, Chipfu pfuru; o gbẹ l'eka
 Jieremaya, bu onye mpfuchiru pfua l'opfu ẹhu
 ndu Bábilonu; yẹe alị phẹ.

² “Unu raa ya arara radzuru
 iya ohamoha g'a
 numa-dzuru!
 Unu palia ẹkwa-ohubama raa
 ya g'a numa-dzuru!
 Unu ba adukwa iphe,
 unu a-ha l'azu.
 Ochia iphe, unu a-nodu epfu
 bu-a:
 'Ndu Bábilonu be a kpukwaru
 le ndzu.

Balu bẹ e mekwaru
 iphe-iphere.

Tẹme Maruduku bẹ
 ndzu-agugu gudewaru.

Ntẹkpe phẹ bẹ e mekwaru
 iphe-iphere.

Tẹme e mee; ndzu-agugu
 rwuta iphemiphe ono,
 a kpuru akpukpu ono.'

³ Oha, shi l'isheli gbeshiru g'o
 tsoo phẹ ogu.

Oo-me ali phẹ g'ọ buru
 ochobu.

Ophu ọ dudu onye byaru
 ebubaaru eburu l'ime
 iya;
 nemadzu mekpoo anu
 a-tuko shi iya gbalaa."

⁴ Wakwa iphe, Chipfu epfu
 baa:

"O -rwua mboku ono bẹ ndu
 Ízurelu yẹ ndu Jiuda
 a-tugbabekwa
 gude ẹnya-mini je
 achọo Chipfu,
 bu Chileke phẹ.

⁵ Ephe a-ji aji ọzo, e shi eje
 úbvú Zayonu
 woru iphu ghaa l'ọzo ibiya
 ono epfugbaa sụ:

Unu bya; g'anyi lẹ Chipfu
 tugba buru nanu
 l'ogbandzu ojeje,

- a ta abyadu azoha azoha!
⁶ Ndibe mu bu aturu,
 tuphahuru etuphahu.
 O bu ru ndu eche phe nu
 dusweru phe uto;
 bya emee phe;
 ephe tsoru oma ubvu
 aghaphe.
 Ephe tsoru ubvu ubvu ye
 obvu obvu aghaphe;
 bya azohaa aka ephe
 anoduje atuta unme.
- ⁷ Iphe, bukpuo ndu humaru
 phe nu vuru phe
 kpatakpata.
 Ndu ohogu phe su: 'Ikpe ta
 nmakwaru anyi;
 kele ephe mesweru Chipfu,
 bu okpobe onye-nche
 phe; mbu Chipfu,
 bu onye nna phe oche
 kporu obu yeru.'
- ⁸ Unu gbafukwa le Babilonu!
 Unu lufukpoephe l'ali ndu
 Babilonu alufu ophu!
 Unu dūephe ge mkpi,
 a chishiru dobe l'iphu
 ikpoto eghe ye aturu!
- ⁹ Noo kele-a; lekwa-a;
 mu e-jekwa akpalia
 ikpoto oha, paru aka;
 gude byapfuta Babilonu
 ugu.

Ọ bụru ẹka mu e-me g'ẹphe
 shi bya bụ l'uzo isheli.
 Ẹphe abya edokaa onwophe
 kwabẹru iya.

Ọ bụru ẹka ono bẹ ẹphe e-shi
 bya alwuta iya.

Ọnu-apfu phe a-du ge ke ndu
 maru agba apfu,
 bụ ophu abujeru: ọ -gufu;
 ọ tọo gbaduru ẹka
 alwa.

10 Ọo ya bụ le ndu Babilonu bẹ
 aa-kwa l'okwata.

Ndu a-kwa iya okwata obu
 bẹ e-rijikpoo ẹpho.”

Nokwa iphe, Chipfu eepfu
 bụ ono.

11 A makwaru-a l'unu ete ẹswa;
 ẹhu nọdu atso unu;
 mbu unube ndu ono,
 vukaru okiphe mu ono.

A makwaru-a l'unu azo kitimu
 kitimu ge nwada eswi,
 azoshi ereshi;
 teme unu nọdu egbu ọrà
 g'okee inya.

12 Ofe iphere e-mechaa mee
 ne unu.

Mbu l'onye ono, tsuru ime
 unu ono bẹ ee-kpu iphu
 le ntu.

Oo-mecha buri iya bẹ ẹnya
 a-kacha alwalwa
 l'ohamoha.

Mbụ l'ọo-buru echięgu;
 yęe mgbęgu ali-ọkponku;
 waa ali-evevee.

13 Eshinu ęhu eghu mube
 Chipfu eghu be e tee
 bubaędu iya ebubu.

Ọchia l'aa-togbo iya l'ọo-buru
 okorobo ochobu.

Iphe, bukpo ndu ghataru ali
 ndu Babilonu ono be
 ọo-nyị ishi ędzu;
 ęphe egude iya gbaahaa
 mgbonu.

Ọ buru iphe, a-kpa iya
 nu bu iphe ono,
 e mekagbaaru iya ono.

14 Unu dokaa onwunu l'ophere
 l'ophere no-pee
 ndu Babilonu
 mgburugburu;
 mbu unube ndu agbaje
 apfu g'unu hakpo!

Unu gbaje phe iya!

Unu ba adukwa onu-apfu unu
 ophu unu a-gbaphodo
 me nanu;
 noo kele ọo Chipfu be
 ęphe meru iphe-ęji!

15 Unu chi mkpu-ogu kpu iya
 ęka ębo ębo!

Ike bvwaru iya; mkpoli,
 ọ turu k'ogu obu
 dakotawaru!

E nwukpọshiwa igbulọ,
 nọ-pheru iya
 mgburugburu.

Eshinu iphe-a bụ emelata bẹ
 Chipfu emelata;
 unu melata iya iphe,
 o shi emeje!

Unu mee ya iphe,
 o shi emeje ndu ọzo!

¹⁶ Unu mee gẹ ndu akọ opfu
 chihu lẹ Bábilonu.

Ndu egbuje ereshi;
 ẹphe l'iphe,
 ẹphe gude egbu ereshi
 l'ọkpa-ji achihukwapho.

Ndu ọhogu pẹ e-gude
 ogu-echi mee;
 onyenonu aghaa iphu
 gbapfushia ndibe pẹ;
 mbụ l'onyemonye a-gbala
 lapfushia ndu alị iya.

¹⁷ “Ízurelu buakwaa aturu,
 a chikashiru achikashi.
 Ọ bụru oduma chikashiru iya.
 Kẹ mbụ, vuru iya kpatakpata
 bụ eze ndu Asiriya.

Onye ikpazụ, tapyashiru
 ọkpu iya bụru Nebukadineza,
 bụ eze ndu Bábilonu.”

¹⁸ Ọo ya bụ lẹ-a; wakwa iphe, oopfu; mbụ
 Chipfu, bụ Ọkalibe-Kakọta-Ike; bya aburu
 Chileke kẹ ndu Ízurelu:
 Ọ sụru-a: “Mu a-nụkwa eze

ndu Bábilõnu aphụ;
 yẹe ndu alị iya l'ophu;
 ẹgube ono,
 mu nuru eze ndu
 Asiriya aphụ ono.

19 Obenu lẹ ndu Ízurelu bẹ mu
 e-duphuta azụ l'ẹka ẹphe
 shi buru.

Ẹphe abyakwa anọdu l'úbvú
 Kamẹlu;
 yẹe alị Beshanu riaha
 nri ọzo.

Ẹphe anọdu l'úbvú úbvú
 Ifuremu;
 yẹle alị Giladu riaha nri;
 rijiaha ẹpho.

20 Wakwa iphe, Chipfu epfu baa:

O -rwua mbọku ono;
 lẹ teke ono gẹdegede
 bẹ aa-vọkpoo g'a
 maru ẹka ikpe nmaru
 Ízurelu;
 ọle ọ tọ dudu ọphu
 aa-chọ-vu.

L'avọo iphe-ẹji Jiuda nta vọo
 imo;
 ọ tọ dudu iphe, aa-vọta.

Noo kele nwa ndu ono,
 mu meru g'ẹphe phọdu
 ono bẹ mu a-guru nvu."

21 Wakwa iphe, Chipfu epfu
 baa:

"Unu tsoo ndu alị Meratayimu
 ọgu;

- yẹ ndu bu l'alì Pekodu!
 Unu chĩa phẹ ọso;
 gbua phẹ egbugbu;
 mee phẹ g'ẹphe bvụeberu
 mu rengurengu!
- Unu mekọta iphemiphe,
 mu sùru g'unu mee!
- 22 Ẹphu-ọgu aphụakwa l'alì ono;
 mbụ ẹphu ọla-l'iswi,
 parụ ẹka apaa.
- 23 Waa g'ọngu ndu mgboko
 l'ophu gbajishihuru
 tũkaa nanụnanu!
- Waa gẹ Bábilọnu byawaru
 bya abụru ochobu
 l'echilabọ ọhamoha!
- 24 Mu gbaberu ngu ọnyà gube
 Bábilọnu.
- Ị bya amaru; ị dalahụwa iya.
 A hụma ngu gude ngu;
 kele ọo Chipfu bẹ iitso opfu.
- 25 Chipfu gụhaakwaru ụlo-ẹku
 iya ghebe ọnu;
 bya atụko ngwọgu k'oke
 ẹhu-eghu iya chishia;
 kele Nnajiuphu, bụ Chipfu;
 bya abụru
 Ọkalibe-Kakọta-Ike;
 nwekwarụ iphe,
 ọobyanya ememe l'alì ndu
 Bábilọnu.
- 26 Unu shikwa l'ẹkameka bya
 etsoo ya opfu!

Unu gùhashia ọba-ẹku iya
ghebechaa ọnu!

Unu rwukọbe iya kùbe l'ikpo
l'ikpo g'ẹka a kùberu
ereshi.

Unu mee ya g'ọ bvụeberu mu
rengurengu
g'ọ tọ dukwa onye
a-phọduru iya nù!

27 Unu tuko oke-eswi iya
gbushichaa!

G'a chikotaru phẹ je l'ẹka
ee-gbushi phẹ!

Nshio phẹ; kẹle eswe nke phẹ
rwuakwaru;
mbụ eswe mbọku,
aa-nụ phẹ aphụ.

28 Unu ngabẹkpodapho nchị
nụma olu ndu agba
ọso ọgu,
bụ ndu shi l'alị ndu
Bábilọnu nahụ agba
ala Zayọnu eje epfu lẹ Chipfu,
bụ Chileke anyi gwatawaru
ụgwo iphe;
mbụ ụgwo iphe,
e meru eze-ulo iya.

29 Mee gẹ ndu ọgba-apfụ dzukọbe
tsoo Bábilọnu opfu;
mbụ iphe, bukpo
ndu maru ese ụta kikiki!

Unu kpọbe ụlo-ẹkwa unu
nọ-phae ya mgburugburu!

G'ò tọ dukwa mę onye lanu,
 a-nahu nu!
 Unu pfua ya ugwo iphe,
 o meru!
 Unu mee ya iphe,
 o meru ndu ozo;
 kele ọo Chipfu be o koru
 okpa l'ishi;
 mbu Onye nsọ ke ndu Ízurẹlu.

30 Ọo ya bu le-a; unwokoroby
 phe a-nodu ada popoo
 l'oma gbororo.

Ndu Ojogu phe l'ophu be
 ee-megbushibebe
 mboku ono.

Nokwa iphe, Chipfu eepfu
 bu ono.”

31 Wakwa iphe, Chipfu epfu baa:
 “Lekwa; mu buakwaa odu
 duru ngu;
 gube nwophu eku onwongu;
 noo kele eswe nke ngu
 rwuwaru;
 mbu teke aa-nu ngu
 aphu.

32 Onye eku onwiya be upfu
 a-du l'okpa l'o daa.

Ophu o dudu onye a-pali iya
 nu.

Mu e-ye oku le mkpukpu le
 mkpukpu iya, bu oku,
 e-tsu tsua iphemiphe,
 no iya mgburugburu.”

- 33 Wakwa iphe, oopfufu;
 mbu Chipfu,
 bu Okalibe-Kakota-Ike:
 “Ndu Izurelu be eemekwa
 ewere;
 nokwapho g'eeme
 ndu Jiuda.
 Ndu kpuru phe le ndzu
 gudeshia phe ike.
 Ophu ephe ekwedu g'ephe
 laa.
- 34 Obenu l'onye agbafutaje phe
 nu be ike du.
 Iphe, oza bu Chipfu,
 bu Okalibe-Kakota-Ike.
 Oo-byakpoo ehuka ehuka bya
 phe agbaru odzori;
 k'ophu oo-me g'a tutaaha
 unme l'ali phe;
 mekwanaa ge ndu ophu bu
 l'ali ndu Babilonu ta
 tutajehe unme atuta.”
- 35 Wakwa iphe, Chipfu epfu baa:
 “Ogu-echi a-buru ugu duru
 ndu Babilonu!
 Mbu l'oo-buru ugu duru ndu
 bu le Babilonu;
 me ndu-ishi iya;
 ye ndibe iya,
 bu ndu maru iphe!
- 36 Ogu-echi a-buru ugu duru
 ndu mpfuchiru
 iya epfu iphe,

mu epfuduru ono;
 k'ophu ephe a-bukotaru ndu
 eme eswe.

Ogu-echi a-buru ogu duru
 ndu ojoḡu iya;
 k'ophu ndzu-agugu e-rwuta
 phe okpobe erwuta.

³⁷ Ogu-echi a-buru ogu duru
 inya iya;
 ye ụḡbo-inya iya;
 ye iphe,
 bukpo ndu Ojogu,
 byaru abyabya,
 no iya l'ime;
 k'ophu g'ephe ha
 a-bukotaerupho
 unwanyi.

Mbu-a; ogu-echi a-buru ogu
 duru ulo-eku iya;
 k'ophu aa-kwakota iphe
 iya l'okwata.

³⁸ Okpomoku a-byapfuta mini,
 du iya nu;
 k'ophu oo-tukoepho
 tashihuchaa.

Noo kele o bu ali,
 aagwo obvu.

Obvu ono-a be ndzu-agugu
 e-mechaa gbaghaa
 iphu.

³⁹ Oo ya bu l'iphe, e-mechaa
 buru l'eka ono
 a-buru anu-egbudu ye

achi-anmabu.
 Teme o bukwarupho l'eka
 ono be mgbashi-ujiku
 e-buru.
 Ophu a byadu ebubaaru
 iya eburu.
 Mbụ l'e tee bubaedu iya;
 e -shi l'ogbo sweru ogbo.
 40 Wakwa iphe, Chipfu epfu
 baa:
 O kwa egube ono,
 Chileke mebyishiru
 Sodomu yee Gomóra;
 yee mkpukpu,
 no-pheru iya
 mgburugburu ono
 bu g'ọ to dudu onye byaru
 eburu l'ime iya;
 ophu o dudu nwoke,
 byaru akwa iya unuphu
 buru.
 41 Unu lenu! O nweru ndu
 Ojogu,
 shi l'uzo isheli abya.
 Mbụ l'ọo oha, paru eka apaa;
 bya aburu eze ndu du
 igwerigwe be e
 jeru akpalia;
 ephe shi l'eka igwe
 beru ali beru eje abya.
 42 Iphe, e gude kwaa phe
 ngwogu buru apfu
 yee arwa.
 Ephe du njo; teme ophu ephe

aphuduru nemadzu
 obu-imemini.
 Ephe anoduje aphu g'enyimu,
 aphu gbudugbudu
 l'eka ephe agba l'eli inya
 phe eje abya.
 Ephe dokaru onwophe ge
 ndu keru ugu
 abyapfuta gube nwada
 Babilonu!
 43 Eze ndu Babilonu numawaru
 akọ phe; eka kuda iya.
 Ndu-agugu gude iya;
 iphe meahaa ya ehuka
 ge nwanyi, ime eme.
 44 Lekwa-a! O kwa g'oduma
 shi l'oswa,
 no l'aguga enyimu Jiodanu
 kwofuta;
 bya adapfu aturu,
 doru l'odu aturu,
 nri du shii bukwapfo
 ge mu e-kwo
 gburumu je achifu
 ndu Babilonu l'ali iya
 l'otulupfu.
 ?Bu onye be mu hotaru g'o
 buru onye mu a-tu
 eka g'o mee iphe ono?
 ?Bu onye du ge mu du?
 ?Bu onye suru mu eku ikpe?
 ?Bu onye bu onye eche aturu,
 a-du ike pfuru ge mu

l'iya mee?

45 Oo ya bu ɽ-a; unu nɽmakwa
iphe,
Chipfu chiru ɽ ya e-me
Bábilonu; mbu iphe,
o chiru ɽ ya e-me ali
ndu Kaludiya.

O to dudu iphe, a-kposhi g'a
ta kpota unwu aturu iya
me unwu eghe iya
kpufu.

Ndu ophu phoduru nu be
ndzu e-rwuta.

46 Teke aa-lwuta Bábilonu be
oo-da too;
k'ophu oo-nmayichaa
mgboko anmayi.

Ohamoha anuma-dzuchaaru
olu-ekwa phe.”

51

1 Wakwa iphe, Chipfu epfu baa:
“Unu lekwa; mu a-kpali
onye mmebyi
g'o buru ugu duru ndu
Bábilonu;
mbu ndu bu l'ali, aza 'obu
ndu wu-lihuru etso
mu opfu’.

2 Mu e-zi ndu ohozo g'ephe je
etsoo ndu Bábilonu ugu;
g'ephe je aphuchaa phe
aphucha;

mee alì phẹ adabyiru
iphoro.

Ẹphe a-nọdu abya iya oḡu
ẹka ẹbo ẹbo me
o -rwuepho mbọku ono,
ee-mebyishi phẹ ono.

³ G'onye agbajẹ apfụ te setakwa
uta iya k'agbagba;
ọphu ọ kwakwa onwiya
ngwọgu.

Unu ta aphukwaru
unwokorobya phẹ
obu-imemini.

Unu mee ndu ojọgu phẹ
g'ẹphe bvụeberu mu
rengurengu.

⁴ Aa-nọdu egbushi phẹ;
ẹphe ada gbiigbii l'alì
ndu Bábilonu.

Mbụ l'aa-nọdu emeka
phẹ iphe ọkpobe
emeka l'aguga gbororo.

⁵ A makwaru-a l'alì ndu
Ízurelu ẹphe lẹ ndu
Jiuda l'ophu bụ iphe,
jiru iya nụ bụ
ikpe-anmanma,
nmaru phẹ l'iphu Onye Nso
kẹ Ízurelu.

Ọle Chileke phẹ, bụ Chipfu
bya aburu
Ọkalibe-Kakota-Ike
teke agbadokwa phẹ.

- 6 Unu gbaa ọso shi l'alì ndu
 Bábilọnu gbalaa!
 G'onyenọnu dzọo onwiya
 ndzụ!
- G'e be mebyishikwa unu opfu
 l'ẹphe meru iphe-ẹji;
 noo kele o rwuakwaru
 teke Chipfu e-melata;
 mbụ teke ọo-pfu phẹ ụgwo,
 gbaru phẹ nụ.
- 7 Bábilọnu shi bụru okoro,
 e meru lẹ mkpọla-ododo
 l'ẹka Chipfu.
- O gude iya mee mее tsuaha
 ndu mgboko l'ophu.
 Ọhamoha nguru mее,
 shi l'okoro ono.
- Ọo ya meru g'o gude ẹphe
 meahaa ọbvụ ọbvụ
 nta-a.
- 8 Bábilọnu dawarụ l'ọtulupfu
 tsukpọshihu.
- Unu rashia ẹkwa iya ike!
 Unu kpatakwaru iya
 ọbvụ-etete g'o mebe l'ẹka
 iphe eme iya ẹhuka.
- ?A maru l'oo-shi nno bụru
 iya ewekọrohu?
- 9 'Anyi gege emetakwa
 Bábilọnu iphe,
 eme iya nụ;
 ọle o to nwehẹdu
 ewekọrohu.

G'anyi parụ iya haa
 g'onyenonu lashia
 ali iya; kele ikpe,
 nmaru iya nu rwuwaru
 akpaminigwe;
 mbu l'ọ ha ephekerephe
 g'eka urwukpu no.'

10 'Chipfu meakwaru;
 anyi buru ndu
 pfuberekoto ozo!

Unu bya g'anyi je l'ubvu
 Zayonu je akoo iphe,
 Chipfu,
 bu Chileke anyi meru!'

11 Unu rwachaa onu apfu unu
 arwacha!

Unu achia-lia iphe,
 unu egudeje egbobuta
 onwunu!

Chipfu kpaliakwaru ndu eze
 ndu Midiya;
 noo kele iphe,
 o tuberu bu g'o mebyia
 ali ndu Babilonu.

Chipfu a-gwata ugwo iphe;
 ugwo iphe,
 e meru eze-ulo iya.

12 Unu palia ekwa-ohubama
 gude goshi l'ogu duru
 igbulọ mkpukpu Babilonu!

Unu cheshi nche ike!
 Mbu-a unu mee ge ndu nche
 nodu le nche!

Unu eje l'egbudu je edokaa
 ndu mpya-ogu;
 kele Chipfu e-mekwa iphe,
 o tuberu; mbu iphe,
 o chi-buhuhawaru le ya
 e-me ndu bu le Babilonu.

¹³ Unube ndu bu l'aguga
 enyimu;
 teme unu nweru eku shii;
 ndzu unu bvuaakwaru!

Mbu l'eba-oghu ndzu unu
 ghabuhuakwaru!

¹⁴ Chipfu, bu
 Okalibe-Kakota-Ike
 gudeakwa onwiya
 ria angu su le ya
 a-chiru nemadzu ye le
 mkpukpu ono;
 ephe eji iya kpimu;
 sweta iya g'eka igube
 swetaru.

Teme ephe atua okoo
 kpua unu.

¹⁵ Oo okpehu iya be o gude
 mee mgboko.

O buru mmamiphe iya be o
 gude mee mgboko;
 o nguru anguru;
 bya egude nkwamenya iya
 phushi akpaminigwe.

¹⁶ O -mee; igwe raa ora; mini,
 no l'imigwe aphua
 gbudugbudu.

Ọ ọ́du emeje g'urwukpu shi
l'ẹ́ka igwe beru sọru
sọfuta.

Teke o meru; igwe ọ́du edze
mini l'ọ́otukwapho
egbigwe.

Tẹ́me ọ́ ọ́du eshije l'ụlo
ẹ́ku iya kprofuta
phẹ́rephere.

¹⁷ Nemadzu l'ophu te enwedu
egomunggo.

Tẹ́me ọ́phu ọ́ dudu iphe,
ọ́ maru.

Iphere gudekọ́ta iphe,
bukpoo ndu akpu ọ́zu;
ọ́ buru ntekpe,
ẹ́phe kpushiru meru
phẹ́ iya;
kele ntekpe phẹ́ obu
bukota ọ́ghoshi.

Ọ́ tọ́ dudu ọ́phu atọ́ unme.

¹⁸ Ẹ́phe bukota iphe-mmanu;
iphe,
e gude agba mgbonu.

O -rwuepho teke aa-nu phẹ́
aphu; ẹ́phe alaa l'iyi.

¹⁹ Onye ono, bu okiphe oshilokpa
Jiékpọ́pu ono ta adukwa
ge ndu k'ono;
kele ọ́o ya bu onye
meru iphemiphe;
mẹ́chakpoo okpa-ipfu ono,
bu okiphe iya ono.

Onye ono bẹ epha iya
 bụ Chipfu,
 bụ Okalibe-Kakota-Ike.
 20 O kwa ngu bụ ogbunku,
 mu gude alwu ọgu.
 O bụ ngu bẹ mu egudeje
 chikaa ọha l'ophu.
 O bụru ngu bẹ mu egudeje
 mebyia ali-eze l'ophu.
 21 O bụ ngu bẹ mu egudeje
 chikaa inya;
 yee ndu no phe l'eli.
 Mu ndu egudeje ngu chikaa
 ugbo-inya;
 yee ndu agba iya nu.
 22 O bụ ngu bẹ mu egudeje
 chikaa nwoke yee
 nwanyi.
 O bụru ngu bẹ mu egudeje
 chikaa ndu bụ ọgerenya;
 yee ndu bụ okorobia.
 O bụru ngu bẹ mu egudeje
 chikaa nwoke ogbaga;
 yee nwanyi ogbaga.
 23 O bụru ngu bẹ mu egudeje
 chikaa onye eche aturu;
 yee aturu iya.
 O bụru ngu bẹ mu egudeje
 chikaa onye akọ ofu;
 yee eswi, o gude akọ iya.
 O bụru ngu bẹ mu egudeje
 chikaa ndu achi ọha;
 yee ndu-ishi.

24 “Teme; ọzo bu ẹ mu a-nduepho unu l'iphu pfa Babilonu; yee iphe, bukpo ndu bukota l'ali ndu Babilonu l'ophu ugwo iphe, epe meru l'ubvu Zayonu.” Nokwa iphe, Chipfu eepfu bu onoya.

25 Wakwa iphe, Chipfu eepfu

baa:

“Lekwa; mu bukwa odu duru

ngu;

gube ubvu ono,

anoduje emebyishi

emebyishi ono;

mbu unube ndu ono,

mebyishikotaru eliphe

l'ophu ono.

Mu a-machiru ngu eka

l'oburu odu duru ngu.

Mu eshi ẹ mkpakpa-onu ubvu

phua ngu phuzeta l'ali;

mee ngu l'iburu ubvu,

a kporu oku.

26 Ophu o dudu mkpuma

aa-kwata l'ehu ngu

k'eme mkpuma,

gude ulo.

Ophu o dukwapho mkpuma,

shi iya nu,

e gude atu okpa-ulo.

Noo kele ii-dabyiru buru

okorobo-egu jasu

l'ojeje.

Nokwa iphe, Chipfu eepfu

bu ono.

27 Unu palia ẹkwa-ọhubama
l'alì ono!

Unu gbua opu tsoru ọhamoha!
Unu dozia ọhamoha g'ẹphe
tsoo ya ọgu.

Unu eje ekua ndu alì-eze,
nọnu g'ẹphe tsoo ya ọgu;
ndu Araratu; waa ndu Mini;
waa ndu Ashikenazu!

Unu họta onye-ishi-ọjọgu,
a-buru iya ọgu!

Unu achifuta inya ye g'o
zeru gbiigbiigbi
je g'ẹka igube etsu.

28 Unu dozia ọhamoha g'ẹphe
tsoo ya ọgu;
mbu ndu eze ndu Midiya;
waa ndu achì ọha phe;
waa ndu-ishi phe;
mẹkpoo ndu alì ẹka
nọkota phe l'ẹka g'ẹphe
hakota.

29 Alì anma jijijiji bya echi
gburugburu; kele iphe,
Chipfu chiru k'eme
ndu Babilonu dukwa
g'ọ dụ.

Mbu l'oo-me alì Babilonu
l'ophu l'ọoburu ochobu;
k'ophu bu l'ọ tọ dudu
onye byaru ebubaaru
iya eburu.

30 Ndu ojọgu ndu Babilonu be

hakwaru alwu oḡu
lachaa je anodu l'ulo phe,
a kpushiru ike.

Ike be bvukotawaru phe nu;
ephe duwaa g'unwanyi.

Eka ephe bu ebu bu be a
tuwaru oku.

Mgboro-igwe, o gude
gbaa upho iya be a
nyajishiwaru.

³¹ Onye okpa-egwa lanu
anoduje agba etso
nwibe iya;
onye-ozu etso onye-ozu ozo;
bukpoerupho ndu eze ezi
eze ndu Babilonu
l'a nataakwaru iya
mkpukpu iya l'ophu
l'ophu.

³² Eka mini asokahu asokahu
be a kuchichaakwaru;
bya atufu oku l'uda l'uda,
dugbaa l'eka ono.

Ndu ojogu be meji tofuwaru."

³³ Wakwa iphe, oopfu; mbu Chipfu, bu
Okalibe-Kakota-Ike; mbu Chileke ke ndu
Izurelu:

"Nwada Babilonu dukwaa
g'aligwaka aazoshi eswa
le baligwaka teke aazo iya
tolitoli.

Teke aa-kpa iya g'onye akpa
ji rwuakwaru."

34 “Nebukadineza, bu eze ndu
Bábilõnu ripyawaru
anyi.

O mewaru; ophu anyi amaèdu
iphe, anyi eme.

O mewaru anyi;
anyi buru ite iphoro.

Oo g'ejo agwo elweje iphe-a
bu g'o lweru anyi
bya egude eku anyi rijia
epho;
bya agbe teke ono gbofu
anyi.

35 G'iwashi, e weru l'anu-ehu
anyi tukokwaru ndu
Bábilõnu l'ehu!”

Nokwa iphe, ndu bu l'ubvu
Zayonu epfu.

“Ge mee anyi tukokwaru
l'ishi ndu bu l'ali ndu
Bábilõnu!”

Nokwa iphe, ndu bu le
Jierusalemu epfu.

36 Oo ya bu le-a; wakwa iphe,
Chipfu epfu baa:

“Lekwa; mu a-gbaru unu
odzori; melata iphe,
e meru unu.

Enyimu phe be mu e-me
g'o tashihu;
bya emee ogba mini
phe g'o tashihuchaa.

37 Bábilõnu e-mechaa buru

ikpọzu;
 ẹka nkuta-ọswa bugbaa;
 waa iphe, a-nọdu anyị
 ishi ẹdzu;
 tẹmẹ l'e gudekwa iya
 phọ agba mgbonu;
 ẹka ọ tọ dudu onye bya
 eburu iya eburu ọzo.

38 Ndibe iya g'ẹphe ha asugbaa
 ekiri g'oduma.

Mbụ l'ẹphe asugbaa kọroro
 g'unwu oduma nshii.

39 Obenu l'ọo teke ono,
 oonwu phẹ
 phuruphuru g'ọku ono
 bẹ mu e-shiru phẹ nri
 ọbo-iphe;
 mee mее atsuahaa phẹ;
 k'ọphu ẹphe a-chiepho
 ọchi kpọkiri huchaa
 akpọkiri hu;
 kuwaruro mgbenya,
 ẹphe tee tehubaedu etehu.

Nokwa iphe, Chipfu eepfu
 bu ono.

40 Mu a-kwata phẹ tya l'ali g'unwu
 aturu, a chi eje egbushi;
 mbụ g'ikpoto ebili;
 yee ikpoto eghu.

41 Lewarọ g'e gude gude ndu
 Sheshaku;
 g'e gude lwuta ndu ndiphe
 l'ophu shi gude eku

onwophe.

O buakwaa iphe, anyị
ishi ẹdzu l'echilabọ
ọhamoha.

42 Ẹnyimu byaakwaru utso
ripyabe alị ndu
Bábilọnu.

O buru gborogboro, ọoso be
o gude sọpyabe iya.

43 Mkpukpu le mkpukpu,
nọ iya nọ bukotaru
ochobu; kpọhu nkụ;
buru alị evevee;
alị ẹka adudu onye bu
iya nọ;
ọphu ọ dudu onye eshi iya
eshishi.

44 Mu a-hù Balụ ahùhù l'alị
ndu Bábilọnu.

Mu emee ya l'ọ gbọo iphe,
o lwehawaru elwelwe.
Ọhamoha taa wụedu
awụ-pfu iya.

Teme igbulọ mkpukpu
Bábilọnu adakpọshihu.

45 Ndibe mu; unu shikwa
l'ime iya wụfuta!

Unu gbakwaa ọso ndzụ unu!
Unu gbalakwaaru oke
ẹhu-eghu Chipfu!

46 Ge meji ta tọfukwa unu;
ọphu unu atsuhukwa
ebvu;

teke unu a-wata anụ ude
 ọgu l'alị ono;
 a -tukpoo ọwa-a apha-a;
 apha ọzo l'aawata ọzo;
 mbụ teke iwashị adụ
 l'alị ono;
 tẹme onye-ishi anọdu
 etso onye-ishi ọgu.

⁴⁷ Ọo ya bụ; o nweru teke
 dufutaje nụ,
 bụ teke mu a-nụ nshi
 ndu Bábilonu aphụ.
 Alị phẹ l'ophu bẹ ee-me
 iphe-iphere.

Ndibe iya, e gburu egbugbu
 adabyigbaaru adabyiru
 l'ime iya.

⁴⁸ Noo teke imigwe;
 mẹ eliphe l'ophu;
 yẹe iphe, bukpoo iphe,
 nọkota iya nụ
 a-tụ ọzu l'ẹka ẹhu atso
 phẹ uto l'opfu ẹhu
 ndu Bábilonu;
 kele ndu mmebyi,
 shi l'uzo isheli abya phẹ
 etso ọgu.”

Nokwa iphe, Chipfu eepfu
 bụ ono.

⁴⁹ “Ọ kwa ọ ndu Bábilonu
 meru ndu mgboko l'ophu;
 ẹphe daa ọpọpoo
 bụ ọ ndu Bábilonu ono

a-da pọpoo
 ẹphebedua.

Ọ bọru iphe, kpara yia nọ bu
 g'ẹphe gude gbua ndu
 Ízurelu.

⁵⁰ Unube ndu nahuru ogu-echi;
 unu tugbuekwapho!

Unu be jekpọkwa
 anmarwube!

Unu nọdukpooro ọzenya
 nyata Chipfu!

Unu anyatakwapọ
 Jierúsalemu!”

⁵¹ “E kpuakwaru anyi iphu
 le ntu;
 kele a kọwaru anyi onu.

Teme iphere kpuchiwaa
 anyi iphu;
 noo kele ndu ohozo
 bahuru l'eka dugbaa
 nsọ l'ulo ke Chipfu.”

⁵² Wakwa iphe, Chipfu epfu
 baa:

“Mbọku abyanu-a, bu mbọku,
 mu a-nu nshi aphu.

Ọ bọru iphe, a-nodu ada l'ali
 iya l'ophu
 bu atsọ ude, ndu e mekaru
 iphe atsọ.

⁵³ Ọ tọ dukwa m'obetaru
 Babilonu jerwuchaa
 akpaminigwe;
 bya emee ọlo, a kpushiru

ike nkiya, dū ephekerephe;
 mee ya;
 ọphu aabahudu iya abahu;
 be mu e-yele-a ndu e-je
 emebyishia ya.

Nokwa iphe, Chipfu eepfu
 bu ono.

⁵⁴ Ụzu-ekwa adakwa le
 Babilonu; uzu,
 egoshi l'e mebyishiaru
 iphe,
 paru eka l'ali ndu
 Babilonu.

⁵⁵ Chipfu abyawaa emebyishi
 Babilonu;
 byanyikota oke uzu ono,
 aanoduje atu l'ime
 iya ono.

Ndu ohogu atu akpara
 g'eze-enyimu abya.

Uzu, epehe a-nodu atu ala
 ephekerephe.

⁵⁶ Noo kele onye mmebyi
 byawaru emebyishi
 Babilonu.

Ndu ojogu iya be a
 kpuchawaru le ndzu.

Teme a gbajishiwa uta
 phe mkpurikpu
 mkpurikpu;
 kele Chipfu bu Chileke,
 apfuje nemadzu
 ugwo g'iphe,

o meru gbaru.

O je l'apfu iya ugwo pfu-dzua
ya ya apfu-dzu.

⁵⁷ Mu e-me ge ndu-ishi iya;
ye ndibe iya, maru iphe;
ye ndu-ishi ojogu iya;
me ndu-ishi
mkpukpu phe;
mekpoo ndu ojogu phe;
ngua mee g'o tsu
phe atsutsu.

Mgbenya atuko tushi phe;
ephe tee tetabaedu
eteta jasu l'ojeje.”

Nokwa iphe, oopfu;
mbu onye eze ono,
bu Chipfu; bya aburu
Okalibe-Kakota-Ike ono.

⁵⁸ Wakwa iphe, oopfu;
mbu Chipfu bu
Okalibe-Kakota-Ike:
“Igbidigbi igbulo Babilonu
ono be ee-tsukposhichaa
etsukposhi.

L'a tufu oku l'ephekerephe
onu-abata iya ono.

Ndiphe eria aphu see akanya
ke mmanu.

Ohamoha abuerupho oku be
ephe e-jeru ozi jasu
ike avu phe.”

⁵⁹ Wakwa ozi, onye mpfuchiru Chileke, bu
Jieremaya ziru Seraya, bu nwa Neraya bya aburu

nwanwa Maseya; teke ono, o jeru Bábilõnu ono; ọ bụru ẹphe ẹ Zedekaya swi; mbụ eze ndu Jiuda teke ọ bụwaru eze apha ẹno. Seraya ono bụ onye-ishi, bụ iya achọtaje ẹka ndu ije akwajẹ. ⁶⁰ Jieremaya tukoephọ ẹjo-iphẹ, a-nwuru Bábilõnu dekotá l'ẹkwọ; mbụ iphemiphe ono, e dekotaru k'opfu ẹhu Bábilõnu ono. ⁶¹ Iphe, o pfuru Seraya bụ: "Teke i jerwuẹkwarupho Bábilõnu; gukwaa iphemiphe-a g'a numa-dzuru. ⁶² Iphe, ii-pfufua bụ: 'Gube Chipfu; i pfuwaru sù l'ii-mebyishi ẹka-a; k'ophu bụ ẹ nemadzụ tee buẹdu iya ebubu; ophu anụ a-nọedu iya; l'oo-buru ochobu ojejoje!' ⁶³ Teke i guchaerupho ẹkwọ-a; l'ilibe iya mkpuma woru chie l'ime ẹnyimu Yufurétisu. ⁶⁴ Iphe ọzo, ii-pfufua ye iya bụ: 'Noo gẹ Bábilõnu a-tsu ọtsuri bụ ono; ophu oo-sebaedu ọzo. Ọ bụru iphe, a-kpa iya nù bụ ẹjo-iphẹ, mu abya eme g'ọ dapfu iya; ophu ike adubaedu ndibe iya.' "

Noo ẹka opfu Jieremaya jeberu bụ onoya.

52

Teke Zedekaya bụ eze ndu Jiuda (2Ndu 24:18-20; 2Iphe 36:11-16)

¹ Zedekaya bẹ nọwaru ụkporo apha l'apha lanụ teke ọ watarụ aburu eze. Iphe, ọ nọru l'aba-eze ẹ Jiurusalemu bụru apha iri ẹ nanụ. Ẹpha ne iya bụ Hamutalu nwada Jieremaya ẹ Libuna. ² O meru iphe, dọ ẹji l'ẹnya Chipfu gẹ Jiehoyakimu meru. ³ Ọ bụru ẹhu-eghu, eghu Chipfu bẹ iphe ono gude nwua l'ẹhu ndu

Jierúsalemu; mę l'ęhu ndu Jiuda; jeye teke ọ chifuru phę l'atatiphu iya.

Zedekaya nonyaa; bya ekwefuaharu eze ndu Bábilonu ike.

Adada Jierúsalemu

(2Ndu 25:1-7; 2Iphe 36:13-21; Jier 39:1-10)

⁴ Tọbudu iya bu; o be l'apha, kwe Zedekaya apha tete, ọ wataru aburu eze; l'abali k'iri l'onwa iri; eze ndu Bábilonu, bu Nebukadineza chita ikpoto ndu Ojogu iya; ephe byatashia Jierúsalemu. Ephe kepheta mkpukpu ono; bvuphee ya ose-ogu mgburugburu. ⁵ Ephe kepheta mkpukpu ono jeye l'apha, kwe eze, bu Zedekaya apha iri le nanu; e -shi teke ọ wataru abu eze. ⁶ G'o rwuru abali ke tete l'onwa eno be egu-ememe, du le mkpukpu ono kabaa njo; k'ophu ndu bu iya nu te nwehedu nri, ephe e-ri. ⁷ O rwua mboku ono; e tsukpo igbulo mkpukpu ono. O be l'enyashi iya; ndu Ojogu l'ophu tsukahụ gbalaa. Eka ephe shiru gbalaa bu l'onu oguzo ono, du le mgbaka igbulo labo ono, du le mgboru mgbabu eze. Teke ono be ndu ojogu ndu Bábilonu kepheru mkpukpu ono mgburugburu. O buru eka ephe shiru bu uzo nsuda Araba. ⁸ Ole ndu Ojogu ndu Bábilonu chipyaberu eze, bu Zedekaya je egude iya le baswaa ali, du le Jieriko. Ndu Ojogu iya buhaa ya tsukashihu. ⁹ Ephe kpua eze, bu Zedekaya le ndzu; kpuru iya kpu-pfu eze ndu Bábilonu le mkpukpu Ribula, bu eka ọ no nmaa ya ikpe. ¹⁰ O buru le Ribula l'eka ono be eze ndu Bábilonu no gbushia unwu Zedekaya; Zedekaya nodu ele iya enya; ọ nodu

egbushi phe. O byakwapho bya atuko ndu-ishi l'ali ndu Jiuda gbushikota. ¹¹ O bya aswoshia Zedekaya akpuru enya; bya egude egbirigba, e meru l'onwirubvu tugbabe iya kpota lasha Babilonu; je eworu iya tua mkporo; o nodu l'eka ono jasu teke o nwuhuru. ¹² O bya erwua g'onwa ise du l'abali iri; l'apha, kwe Nebukadineza apha iri le tete, e -shi teke o wataru abu eze ndu Babilonu; Nebuzaradanu, bu onye-ishi ndu ojogu, eche Nebukadineza nche; mbu onye-ozie eze ndu Babilonu ono jeshia Jierusalemu. ¹³ O je atua oku l'eze-ulo Chipfu; me l'ulo-eze; me l'ulo, dukota le Jierusalemu; mbu l'ulo ndu oke amadu be o tukotaruru oku. ¹⁴ Iphe, bu ndu Ojogu, onye-ishi ojogu ono, echeje eze nche chi; ephe je l'eka ono; be tsukposhiru igbulu, e gude kpu-pheta Jierusalemu mgburugburu. ¹⁵ Nebuzaradanu, bu onye-ishi ndu ojogu, echeje eze nche tuko iphe, bu ndu phoduru le mkpukpu ono rwukoo lasha Babilonu; ephe le ndu lapfuru eze ndu Babilonu alapfu; mekpoo ndu emeje ona, phoduru nu. ¹⁶ Onye-ishi ndu ojogu ono, bu Nebuzaradanu be ndu ophu o haru haa bu ndu ophu kachakpoo aburu ndu ukpa l'ali ono; g'ephe jeje ozi l'opfu-vayinu; me l'opfu.

¹⁷ Itso onwirubvu, du l'eze-ulo Chipfu; me ogba-kperekpere; me iphe ono, e shi eyeje mini ono, e gude onwirubvu kpua, du iya nu; be ndu Babilonu kupyashichaaru akupyashi; vuta onwirubvu ono lasha ali Babilonu. ¹⁸ Ephe vutakwarupho ite; me iphe, eegudeje ekpo ntu; me iphe, apaje oghu oroku; me gbamugbamu; waa iphe, bukpu iphe, a kpuru l'onwirubvu,

eegudeje eje ozi l'eze-ulo Chipfu; ¹⁹ Onye-ishi ndu ojogu ono bya achitakwapho eze ochi; yee iphe, aaguje oku; yee gbamugbamu; mekpoo ite; me iphe, aapfubeje oroku; mekpoo nkweka; mbu iphemiphe, bukpuo iphe, e meru le mkpola-ododo yee k'ochaa.

²⁰ Onyirubvu, lakotaru l'itso labo ono; me l'iphe ono, e shi eyeje mini ono; yee oke-eswi onyirubvu iri l'ebo ono, shi nodu iya le mkpula ono; me l'o-gba-kperekpere ono, buchaa iphe eze, bu Solomonu meshiru dobe l'eze-ulo Chipfu; be erwa, du iya nu be ataa tukotadu onu iya.

²¹ Itso ono be eli iya dugbaa nkwo-eka iri l'esato l'ehu l'ehu. Iphe, itso ono du gbaa mgburugburu buru nkwo-eka iri l'ebo. E meru itso ono; uzo du iya l'echi. Igbidigbi itso ono dugbaa mkpushi-eka eno eno. ²² Nchi-itso, a tu-koberu l'eli itso ono be eli iya du nkwo-eka ise ise. A bya egude ugbu yele itorokuma, a kpuchaaruru l'onyirubvu; tsophee ya mgburugburu. Itso k'ebo; yele itorokuma, akpuru dobe iya buru iphe lanu yele ophuu. ²³ Itorokuma du ukporo eno l'iri l'ishii l'aguga iya. Mkpako itorokuma, akpuru dophee ugbu ono mgburugburu du ukporo ise.

*A kpuru ndu-ishi ndu Jiuda le ndzu
(2Ndu 25:18-21)*

²⁴ Noo ya; onye-ishi ndu Ojogu ono, bu ndu anoduje eche eze nche ono bya akputa Seraya, bu onye-ishi ndu-uke Chileke le ndzu; kputa Zefanaya, bu onye-uke, etsota Sereya; me umadzu eto, echeje nche l'onu-abata eze-ulo Chipfu. ²⁵ A bya abya le ndu ophu nokwadu le mkpukpu;

ọ bya akpụta onye aharu aháhá shi buru onye-ishi ndu ojogu; me umadzu esaa, shi agbazijeru eze idzu; kputa onye edejeru onye-ishi ndu ojogu ekwo, bu iya bu onye-ishi ndu egudeje ndu ali ono l'okpehu g'ephe je ogu; me ukporo umadzu eto, bu unwoke ali ono, a humaru le mkpukpu ono. ²⁶ Nebuzaradanu, bu Onye-ishi ndu ojogu, anoduje eche eze nche ono tuko g'ephe ha kputa kpu-pfuta eze ndu Babilonu le mkpukpu Ribula. ²⁷ O buru le Ribula l'eka ono, du l'ali Hamatu be eze ndu Babilonu no gbushia phe. Noo g'e shi kpu ndu Jiuda le ndzu l'ali phe laa ali ozo bu ono. ²⁸ Wakwa umadzu ole, Nebukadineza kpuru le ndzu lashia ali ozo. L'apha kesaa, e -shi teke o wataru aburu eze be o chitaru ndu Jiuda unu umadzu esaa l'ukporo umadzu iri le nanu l'umadzu eto. ²⁹ O rwua l'apha ophu kwe iya iri l'esato, e -shi teke o wataru aburu eze; o shi le Jierusalemu chita unu umadzu labo l'ukporo umadzu l'umadzu iri l'ebo. ³⁰ O be l'apha, kwe Nebukadineza ukporo apha l'apha eto, e -shi teke o wataru aburu eze; Nebuzaradanu, bu Onye-ishi ndu ojogu, anoduje eche eze nche bya achilaaru iya ndu Jiuda, du unu umadzu l'ukporo umadzu iri l'esaa l'umadzu ise. Mkpako ndu a kpuru le ndzu buru unu umadzu iri le nanu l'ukporo umadzu iri.

*A tufutaru Jiehoyakinu l'ulo-mkporo
(2Ndu 25:27-30)*

³¹ O buru l'apha, kwe Jiehoyakinu, bu eze ndu Jiuda ukporo apha l'apha iri l'esaa, e -shi teke a kpuru iya le ndzu be Evilu-Merodaku, byaru

aburu eze ndu Bábilonu. O buru g'ónwa iri l'èbo dù l'úkporo abalì l'abalì ishi; bẹ ọ tufutaru Jiehoyakinu, bụ eze ndu Jiuda ono l'ùlo-mkpọro. ³² O pfuru opfu oma yeru Jiehoyakinu; bya edobe iya l'ónodu, kakọta ree eme lẹ kẹ ndu eze ọzo, a tukuru yẹle ẹphe kpua lẹ ndzu laa alì Bábilonu. ³³ O buru iya bụ lẹ Jiehoyakinu eyefu uwe mkpọro iya; bya awata eri nri lẹ teburu eze gbiriri jasụ g'ọ nọ-beru. ³⁴ Mbọku-mbọku bẹ eze anuje iya okpoga, oo-gudeje eme mkpa iya jeye g'ọ nọ-beru; mbụ gbiriri jasụ mbọku, ọ nwuhuru.

cclxii

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d